

MAJEPACU JŨMENIJICHI
YÁVAIYE JAVEQUE
COYŨIYEDE COYŨITUCUBO

Resumen del Antiguo Testamento
en cubeo



Sociedad Bíblica Internacional

**Las ilustraciones se usan por cortesía de la © David C. Cook
Foundation.**

**Primera edición,
© 1994
International Bible Society**

Licencia Creative Commons (Reconocimiento-NoComercial-SinObraDerivada 3.0 Unported)

- Compartir — Usted es libre de copiar, distribuir y comunicar públicamente la obra.
- Reconocimiento — Debe reconocer los créditos de la obra.
- No comercial — No puede utilizar esta obra para fines comerciales.
- Sin obras derivadas — No se puede alterar, transformar o generar una obra derivada.

<http://creativecommons.org/licenses/by-nc-nd/3.0>

Índice

Jūmenijicu caiyede ũi cuedaino mácarō	1
<i>(Génesis 1-2)</i>	
Põeva Jūmenijicure ne vainí tuino mácarō	3
<i>(Génesis 3.1-21)</i>	
Cain ĩmacure ũi boarí jaruvaino mácarō	5
<i>(Génesis 4-5)</i>	
Noé ĩadocū uracūre ũi đaino mácarō	7
<i>(Génesis 6-9)</i>	
Põevare obedicāmuare Jūmenijicu ũi yávaicōjeino mácarō	9
<i>(Génesis 11.1-9)</i>	
Abraham	10
<i>(Génesis 12-18, 21.1-8)</i>	
Isaac	13
<i>(Génesis 22.1-19, 25.19-23)</i>	
Esaú aru Jacob	15
<i>(Génesis 25.24-34)</i>	
Jūmenijicu Joséde decoboaiyede ũi majide đaino mácarō	16
<i>(Génesis 37, 39-41.36)</i>	
José Egipto āmicurijoborōcavure ũi jaboteino mácarō	22
<i>(Génesis 41.37-50)</i>	
Egiptocavu Israecavure ne āmeno đaino mácarō	27
<i>(Éxodo 1)</i>	
Moisés Israecavure ũi cadateiyurĩduino mácarō	28
<i>(Éxodo 2.1-22)</i>	
Israecavure Jūmenijicu ũi cadateicōjeino mácarō Moiséde	30
<i>(Éxodo 2.23-4.31)</i>	

Egiptocavu ne jaboca Israecavure ũi nuicõjemenõ mácarõ	34
<i>(Éxodo 5-10)</i>	
Faraón Israecavure ũi nuicõjeino mácarõ	37
<i>(Éxodo 11.1-13.6)</i>	
Jia urada Jūariya āmicuriyare Jūmenijicu Israecavure ũi jatara daino mácarõ	39
<i>(Éxodo 13.17-15.21)</i>	
Israecavu Jūariya āmicuriya ēcarui curivu bācavu Sinaí āmicuricū cūracūi ne eaino mácarõ	42
<i>(Éxodo 15.22-17.16)</i>	
Sinaí āmicuricū cūracūi Jūmenijicu Israecavure “Yópe dajarā” pucapuruaape paiye daicõjeiyede ũi epeino mácarõ	45
<i>(Éxodo 19.1-20.20)</i>	
Jūmenijicu Moiséde ũi coyuiño mácarõ ape daicõjeiyede	48
<i>(Éxodo 20.21-23.33)</i>	
Israecavure jiveque jajiéni, Moisés ũi jádovaino mácarõ Jūmenijicu ne ja aiyede	51
<i>(Éxodo 24)</i>	
“Āimara cajeáque mearore jíñami cūrami maquinóre Israecavure daicõjejacu” Jūmenijicu Moiséde ũi arī coyuiño mácarõ	52
<i>(Éxodo 25.1-31.11; Levítico 24.1-9)</i>	
Israecavu Jūmenijicu ne vainí tuino mácarõ oteivecujicupe ārojacu ne pēpeimu mácuque	55
<i>(Éxodo 31.18-34.35)</i>	
Jūmenijicu ũi cūrami āimara cajeáque ne daiñamine Israecavu ne daino mácarõ	58
<i>(Éxodo 35-40)</i>	
Israecavure Jūmenijicu ne jínajiyede Moiséde Jūmenijicu ũi coyuiño mácarõ	60
<i>(Levítico 1-7, 17; Números 5, 15.1-31, 28.1-15)</i>	
Sacerdoteva ne memeni buino mácarõ	64
<i>(Levítico 8-9)</i>	

Jūmenijicu ũi coyuno mácarō sacerdotevare ũi đaicōjeiyede	66
<i>(Levítico 21-22)</i>	
Pucarā Aarōi mára ne yaino mácarō Jūmenijicure ne vaini tuiye boje	66
<i>(Levítico 10.1-7)</i>	
Israecavure ape āiyede Jūmenijicu ũi āicōjemeneno mácarō	67
<i>(Levítico 11)</i>	
Jūmenijicu ũi coyuno mácarō Moiséde docucurivape ne teiyede aru docucubevape ne dare đaiyede ũi jāiyede	68
<i>(Levítico 12-15; Números 19)</i>	
Jūmenijicu epeyu ape đaicōjeiyede Moiséde ũi coyuno mácarō	71
<i>(Levítico 18-20)</i>	
Jūmenijicu Israecavure ũi epeino mácarō cūinājāravu ũre ne mearo jínajijāravure	72
<i>(Levítico 16, 23; Números 28.16-29.40)</i>	
Moiséde Jūmenijicu ũi corevaicōjeino mácarō Israecavure	76
<i>(Números 1-2)</i>	
Jūmenijicu ũi beoino mácarō Leví ũi yajubocavure sacerdotevare cadatenajivure	77
<i>(Números 3-4, 7-8)</i>	
Jūmenijicu “Mívu bárājivu nazareo pōeva” arī, ũi coyuno mácarō Moiséde	79
<i>(Números 6)</i>	
Sinaí āmicuricū cūracū yebai curivu Israecavu ne nuino mácarō Canaán āmicurijoborōi	80
<i>(Números 9.15-10.36)</i>	
Puque baju Israecavu ne cārijino mácarō Jūmenijicure jaraivu	81
<i>(Números 11)</i>	
Miriam Aarōmaque Moiséde ne tebutino mácarō	83
<i>(Números 12)</i>	

Israecavu Canaán āmicurijoborōi dupini járajivure ne jaroino mácarō	84
<i>(Números 13-14)</i>	
Jāmenijicure Coré, Datán, aru Abiram ne jaraino mácarō	85
<i>(Números 16-17)</i>	
Moisés Aarómaque Jāmenijicure ne vainí tuino mácarō	88
<i>(Números 20.1-13, 22-29)</i>	
Obedivu Israecavure ādava ne cūri jaruvare đaino mácarō	89
<i>(Números 20.14-21, 21.4-9)</i>	
Israecavu pucarā jabova jinaque boarí ne vainí tuino mácarō	91
<i>(Números 21.21-35)</i>	
Moab āmicurijoborōcavu ne jabocu Balāare Israecavure “Āmeno nujarori mujare” arí, ũi bojedarīduino mácarō	91
<i>(Números 22-25, 31)</i>	
Bedióva cojedeca Israecavure Moisés ũi corevaino mácarō	97
<i>(Números 26)</i>	
Pucayajuboacavu aru apeyajuboa coricacavu Jordán āmicuriya jia aviá dainocapūravui curijoborōre ne jēniaino mácarō Moiséde	98
<i>(Números 32)</i>	
Canaán āmicurijoborōre ne coavaino mácarō Jāmenijicu Israecavure nore ne eabedeca	99
<i>(Números 27.1-11; 34-36)</i>	
Pōecubenoi bacuivure Moisés ũi coyuinno mácarō	100
<i>(Deuteronomio 1-11)</i>	
Jāmenijicu ũi daicōjeiyede Moisés ũi ārure đaino mácarō Israecavure	103
<i>(Deuteronomio 12-26)</i>	

Israecavure Jūmenijicu jiede Moisés ũi coyurĩ bubaino mácarō	105
<i>(Deuteronomio 27-30)</i>	
Moisés bácuí yainíburu yóboi Josué ũi oatuvaino mácarō	106
<i>(Números 27.12-23; Deuteronomio 31-34)</i>	
Israecavure Jordán āmicuriya jiare Josué ũi jatare đaino mácarō	108
<i>(Josué 1-5)</i>	
Jericó āmicuriĩmarocavure Israecavu ne boarĩ vainí tuino mácarō	112
<i>(Josué 6)</i>	
Cūinácu Israecacu Jūmenijicure ũi ju abe boje Israecavu ne vainí tubeno mácarō Hai āmicuriĩmarocavure	114
<i>(Josué 7-8)</i>	
Gabaón āmicuriĩmarocavu ne meyuyaino mácarō Israecavure	116
<i>(Josué 9)</i>	
Obediĩmaroare Israecavu ne vainí tuino mácarō	117
<i>(Josué 10-12)</i>	
Canaán āmicurijoborōre Josué ũi coavaino mácarō Israecavure	119
<i>(Josué 13-22)</i>	
Josué Jūmenijicu jiede coyurĩ ũi bubaino mácarō Israecavure	121
<i>(Josué 23-24)</i>	
Israecavu Jūmenijicure ne ju abeni buino mácarō . . .	122
<i>(Jueces 1.1-3,6)</i>	
Jūmenijicu ũi epeino mácarō Israecavure ũi beoimarare “Yópe daiye jauvu” aipōevare	123
<i>(Jueces 3.7-5.31)</i>	
Gedeón Israecavure ũi cađateino mácarō Madián āmicuriyajubocavure ne boaiyede	126
<i>(Jueces 6.1-8.28)</i>	

Jūmenijicu ũi epeino mácarō Israecavure apevu ũi beoimarare “Yópe daiye jauvu” aipōevare	130
<i>(Jueces 8.29-12.15)</i>	
Sansón ũi cadateino mácarō Israecavure Filisteo āmicuriyajubocavu náre ne vainí tuiyuede	132
<i>(Jueces 13-16)</i>	
Rut āmicuco Jūmenijicare ōi ja aino mácarō	136
<i>(Rut 1-4)</i>	
Jūmenijicu ũi beoino mácarō Samuede ũ jiede coyucaipōecu bacuyúre	139
<i>(1 Samuel 1-3)</i>	
Filisteo āmicuriyajubocavu Israecavure ne boarí vainí tuino mácarō	143
<i>(1 Samuel 4-7)</i>	
Jūmenijicu ũi jabojacoino mácarō Saúl āmicucure Israecavu ne jabocu bacuyúre	145
<i>(1 Samuel 8.1-13.2)</i>	
Saúre Jūmenijicu ũi jaboteicōjemeno mácarō ũre ũi ja abe boje	147
<i>(1 Samuel 13.3-15.35)</i>	
Israecavu ne pueno jabocure oatuvacuyure Jūmenijicu ũi beoino mácarō Davide	151
<i>(1 Samuel 16.1-13)</i>	
Arpa āmicurō biabeinoque David ũi biabeni jádovaino mácarō ñai jabocu Saúre	153
<i>(1 Samuel 16.14-23)</i>	
Filisteocacu churara uracure David ũi boarí jaruvaino mácarō	153
<i>(1 Samuel 17.1-18.5)</i>	
Ñai jabocu Saúl Davique jorojĩñu, ũre ũi boarí jaruvaiyurĩduino mácarō	156
<i>(1 Samuel 18.6-20.42)</i>	
Ñai jabocu Saúl Davide ũi boaiyuede, David ũi dupini nuino mácarō	158
<i>(1 Samuel 21-23)</i>	

Puque David ñai jabocu Saúre jáñu, úre ñi boaiyubeno mácarō	161
<i>(1 Samuel 24-27)</i>	
Ñai jabocu Saúl aru ñi mára apevuque boarí ne yaino mácarō	165
<i>(1 Samuel 28-31, 1 Crónicas 10)</i>	
Ñai jabocu Saúl bácu Davicapūravu ñi oatavarí jaboteino mácarō	167
<i>(2 Samuel 1-6, 8-10, 1 Crónicas 11-16, 18-20, 26.29-27.34)</i>	
Jūmenijicu Davide “Mure yópe darí cadatequijivu” ñi arí epeino mácarō	170
<i>(2 Samuel 7, 1 Crónicas 17)</i>	
Ñai jabocu David ñi āmeina teiye báquede Jūmenijicu ñi ārumeteino mácarō	172
<i>(2 Samuel 11-20)</i>	
Jūmenijicui cūramine ne ñarājinore David ñi meadarí coreino mácarō	175
<i>(2 Samuel 24, 1 Crónicas 21.1-26.28, 28.1-29.22a)</i>	
David ñi toivaino mácarō ne yuriaiye Jūmenijicure mearore jivu	178
<i>(2 Samuel 22-23, 1 Crónicas 16, Salmos 18, 96, 105.1-15)</i>	
Ñai jabocu David ñi mácu jípacure ñi oatavarí jaboteino mácarō	179
<i>(1 Reyes 1.1-2.12, 1 Crónicas 29.22b-30)</i>	
Salomón ñi jabotení buino mácarō Israecavure	182
<i>(1 Reyes 3.3-4.34, 2 Crónicas 1)</i>	
Ñai jabocu Salomón Jūmenijicui cūrami maquinóre ñi ñaicōjeino mácarō	185
<i>(1 Reyes 5-7, 2 Crónicas 2.1-5.1)</i>	
Jūmenijicure ñi cūramine “Míñami maquinómu” ñai jabocu Salomón ñi arí epeino mácarō	186
<i>(1 Reyes 8.1-9.9, 2 Crónicas 5.2-7.22)</i>	

Ñai jabocu Salomón cave upacure obedivu pōeva ne majino mácarō	188
<i>(1 Reyes 9.10-10.29, 2 Crónicas 8.1-9.29)</i>	
Bucucu baju nuñu Salomón Jāmenijicure ũi ju abeno mácarō	190
<i>(1 Reyes 11, 2 Crónicas 9.30-31)</i>	
Israel āmicurijoborōre ne coavaiyede pucajoborōa mauteino mácarō	191
<i>(1 Reyes 12.1-24, 2 Crónicas 10.1-11.4)</i>	
Jeroboam āmicucu Efraín āmicurijoborōcavure pueno ũi jaboteino mácarō	192
<i>(1 Reyes 12.25-14.20)</i>	
Nadab, Baasa, Ela, Zimri, aru Omri āmicurivu Efraín āmicurijoborōcavure pueno ne jaboteino mácarō	195
<i>(1 Reyes 15.25-16.28)</i>	
Roboam, Abías, aru Asa āmicurivu Judea āmicurijoborōcavure pueno ne jaboteino mácarō	196
<i>(1 Reyes 14.21-15.24, 2 Crónicas 11.5-16.14)</i>	
Acab āmicucu Efraín āmicurijoborōcavure pueno jabocu āmecure Elías ũi jaraino mácarō	197
<i>(1 Reyes 16.29-19.21)</i>	
Ñai jabocu Acab ũi āmeno teiye boje Jūmenijicu ũre ũi ñājine ñaquinore Elías ũi coyūino mácarō	203
<i>(1 Reyes 20-21)</i>	
Josafat āmicucu Judea āmicurijoborōcavure pueno ũi jaboteino mácarō	204
<i>(1 Reyes 22.1-50; 2 Crónicas 17.1-21.1a)</i>	
Acab bácuí mácu Efraín āmicurijoborōcavure pueno ũi jaboteino mácarō aru Eliseo Elíare ũi oatuvaino mácarō	206
<i>(1 Reyes 22.51-53; 2 Reyes 1-3)</i>	
Jāmenijicu ũi paruéque Eliseo ũi darĩ jáedovaino mácarō	209
<i>(2 Reyes 4-5)</i>	

Siria āmicurijoborōcavu churarava Efraín āmicurijoborōcavure ne boaino mácarō	213
<i>(2 Reyes 6.8-8.15)</i>	
Joram āmicucu Judea āmicurijoborōcavure pueno ūi jaboteino mácarō	217
<i>(2 Reyes 8.16-24; 2 Crónicas 21.1b-22.1)</i>	
Jehú āmicucu jabocu Acab bácu ūi cūramicavure ūi boarí jebeino mácarō	217
<i>(2 Reyes 8.25-10.36; 2 Crónicas 22.2-9)</i>	
Joás āmicucu Judea āmicurijoborōcavure pueno ūi jaboteino mácarō	218
<i>(2 Reyes 11-12; 2 Crónicas 22.10-24.27)</i>	
Judea āmicurijoborōcavure Jāmenijicu jiede Joel āmicucu ūi coyucaino mácarō	221
<i>(Joel 1-3)</i>	
Joacaz, Joás, apescu Jeroboam máre Efraín āmicurijoborōcavure pueno ne jaboteino mácarō aru Amasías Judea āmicurijoborōcavure pueno ūi jaboteino mácarō	222
<i>(2 Reyes 13.1-14.24; 2 Crónicas 25)</i>	
Jāmenijicu jiede coyucaipōecu Jonás āmicucu Efraín āmicurijoborōcavure aru Nínive āmicuriīmarocavure ūi coyuino mácarō	224
<i>(2 Reyes 14.25; Jonás 1-4)</i>	
Jāmenijicu jiede coyucaipōecu Amós āmicucu Efraín āmicurijoborōcavure ūi coyuino mácarō	227
<i>(Amós 1-9)</i>	
Uzías āmicucu Judea āmicurijoborōcavure pueno ūi jaboteino mácarō	229
<i>(2 Reyes 15.1-7; 2 Crónicas 26)</i>	
Jāmenijicu jiede coyucaipōecu Oseas āmicucu Efraīcavure aru Judeacavure máre ūi coyuino mácarō	230
<i>(Oseas 1-14)</i>	

Judea āmicurijoborōcavure Jūmenijicu jiede coyucaipōecu Isaías āmicucu ũi coyũino mácarō	232
<i>(Isaías 1-6)</i>	
Jotam aru Acaz āmicurivu Judea āmicurijoborōcavure pueno ne jaboteino mácarō	236
<i>(2 Reyes 15.32-16.20; 2 Crónicas 27-29; Isaías 7.1-9.7)</i>	
Efraín aru Judea āmicurijoborōcavure Isaías ũi coyũino mácarō	237
<i>(Isaías 9.8-12.6)</i>	
Judea aru Efraín āmicurijoborōcavure Jūmenijicu jiede coyucaipōecu Miqueas āmicucu ũi coyũino mácarō	238
<i>(Miqueas 1-7)</i>	
Asiria āmicurijoborōcavu Efraín āmicurijoborōcavure boarí, vainí turí, ne boarí pupuimarare ne buorí nuvaino mácarō	240
<i>(2 Reyes 14.26-29; 15.8-31; 17)</i>	
Ezequías āmicucu jabocu meacu Judea āmicurijoborōcavure pueno ũi jaboteino mácarō	242
<i>(2 Reyes 18-20; 2 Crónicas 29-32; Isaías 28-29, 36-39)</i>	
Jūmenijicu jiede coyucaipōecu Isaías āmicucu Israecavure Judea āmicurijoborōi copainajivure ũi coyurí toivaino mácarō	245
<i>(Isaías 40-66)</i>	
Manasés, Amón, aru Josías āmicurivu Judea āmicurijoborōcavure ne jaboteino mácarō	250
<i>(2 Reyes 21.1-23.30; 2 Crónicas 33-35; Jeremías 1-15)</i>	
Nahúm āmicucu Jūmenijicu jiede Nínive āmicuriīmarocavure ũi coyũino mácarō	254
<i>(Nahúm 1-3)</i>	
Jūmenijicu jiede coyucaipōecu Sofonías āmicucu Judea āmicurijoborōcavure ũi coyũino mácarō	254
<i>(Sofonías 1-3)</i>	

Jūmenijicu jiede coyucaipōecu Habacuc āmicucu Judea āmicurijoborōcavure ũi coyūino mácarō	255
<i>(Habacuc 1-3)</i>	
Joacaz aru Joacim āmicurivu Judea āmicurijoborōcavure pueno ne jaboteino mácarō	257
<i>(2 Reyes 23.31-24.7; 2 Crónicas 36.1-8; Jeremías 22.11-12, 25-26, 31, 36)</i>	
Caldea āmicurijoborōcavu Judeacavure Babiloniaita ne nuvaino mácarō	260
<i>(Daniel 1-3)</i>	
Joaquín āmicucu Judea āmicurijoborōcavure pueno ũi jaboteino mácarō	263
<i>(2 Reyes 24.8-17; 2 Crónicas 36.9-10; Jeremías 22.24-30, 29.1-14)</i>	
Jūmenijicu jiede coyucaipōecu Ezequiel āmicucu Judea āmicurijoborōcavure Babiloniai curivure ũi coyūino mácarō	264
<i>(Ezequiel 1-24)</i>	
Caldea āmicurijoborōcavu ñai jabocu Nabucodonosor ũi churaravaque Jerusalén āmicuriimarore ne jaruvare ñaino mácarō	265
<i>(2 Reyes 24.18-25.21; 2 Crónicas 36.11-20a; Jeremías 21, 24, 27.12-28.17, 32-35, 37-39; Ezequiel 17.11-18)</i>	
Jūmenijicu jiede coyucaipōecu Ezequiel āmicucu bedióva Judeacavure Babiloniaita curivure ũi coyūino mácarō	267
<i>(Ezequiel 33-34, 36-48)</i>	
Ñai pueno jabocu Nabucodonosor ārumecu ũi teino mácarō	269
<i>(2 Reyes 25.27-30; Daniel 4)</i>	
Media aru Persia āmicurijoborōcavu Caldeacavure boarí, vainí turí, obedijoborōcavure pueno ne jaboteino mácarō	270
<i>(Daniel 5, 7-8)</i>	

Āimara jījecurīvu leones āmicurīvu Daniene Jūmenījicu ne āicōjemeno mácarō <i>(Daniel 6)</i>	272
Darío aru Ciro obedīvu pōevare pueno jabova ne cuede Daniel apūcure decoboainope ūi jāīyede Jūmenījicu ūi majide đaino mácarō <i>(Daniel 9-12)</i>	275
Ņai jabocu Ciro Israecavure Jerusalēita ūi nuicōjeino mácarō <i>(2 Crónicas 36.20b-23; Esdras 1-2)</i>	277
Jerusalēi Israecavu Jūmenījicu ūi cūramine ne meadaino mácarō <i>(Esdras 3-6; Hageo 1-2)</i>	278
Jūmenījicu jiede coyucaipōecu Zacarías āmicucu Jerusalēita nuivure ūi coyūino mácarō <i>(Zacarías 1-14)</i>	281
Ester āmicuco jaboco Israecavure cadatedo ōi āmenore vaidé đaino mácarō <i>(Ester 1-10)</i>	282
Ņai sacerdote Esdras āmicucu Jerusalén āmicurīīmaroita ūi nuino mácarō <i>(Esdras 7-10)</i>	288
Jerusalén āmicurīīmarore ne biaidore ne jaruvaibiaido bácarōre Nehemías Israecavure ūi meadaicōjeino mácarō <i>(Nehemías 1-7)</i>	289
Esdras Nehemíamaque Jūmenījicu ūi đaicōjeiyede ne vainī tuicōjemeno mácarō Israecavure <i>(Nehemías 8-13)</i>	294
Jūmenījicu jiede coyucaipōecu Malaquías āmicucu Israecavure ūi coyūino mácarō <i>(Malaquías 1-4)</i>	296
Jūmenījicure mearo jīyure “Āmeno vaijácūrī”, Satanás ūi aiyede jāpiayu, Jūmenījicu ūi ju aino mácarō <i>(Job 1.1-2.10)</i>	298

Job yóbecurã ĩcavũque ũi boroteino mácarõ	299
<i>(Job 2.11-14.21)</i>	
Bedióva Job ĩcavũque ũi boroteino mácarõ	302
<i>(Job 15-21)</i>	
Bedióva cojedeca Job ĩcavũque ũi boroteino mácarõ	303
<i>(Job 22-31)</i>	
Apecu Joque ũi boroteino mácarõ	305
<i>(Job 32-37)</i>	
Jũmenijicu ũi ju aino mácarõ Jore	306
<i>(Job 38-42)</i>	
Israecavu Jũmenijicure mearore jĩni ne yuriaiye báque	307
<i>(Salmos 1-150)</i>	
Salmo 1	308
Salmo 2	309
Salmo 5	309
Salmo 8	309
Salmo 14	310
Salmo 16	310
Salmo 19	311
Salmo 22	311
Salmo 23	312
Salmo 32	312
Salmo 34	313
Salmo 37	313
Salmo 40	314
Salmo 41	315
Salmo 44	315
Salmo 45	316
Salmo 51	316
Salmo 68	317
Salmo 69	317

Salmo 73	318
Salmo 78	318
Salmo 89	319
Salmo 91	319
Salmo 94	320
Salmo 95	320
Salmo 100	321
Salmo 102	321
Salmo 104	322
Salmo 109	322
Salmo 110	323
Salmo 112	323
Salmo 113	323
Salmo 118	324
Salmo 119	325
Salmo 121	325
Salmo 135	325
Salmo 137	326
Salmo 139	327
Salmo 140	327
Salmo 146	327
Israecavu me majidivu ne coyuiye báque, pōevare majide ðaivu	328
<i>(Proverbios 1-31)</i>	
Ñai jabocu Salomón bojuvure ũi coyuiño mácarō, náre majicayu	328
Ñai jabocu Salomón ape ũi me majiéde coyuiye báque	329

Jūmenijicu caiyede ũi cuedaino mácarō

Génesis 1-2

*(Mateo 19.4-5, Marcos 10.6-7, Juan 1.1-3, 1 Corintios 6.16, 11.8-9, 15.45-47,
2 Corintios 4.6, Efesios 5.31, 1 Timoteo 4.4, Hebreos 4.3-4, 11.3,
Santiago 3.9, 2 Pedro 3.5, Apocalipsis 22.2,14)*

Caiye cubedejaquemavu. Cavarō, joborō, jocucua, āimara, pōeva, caivu, caiye máre cubedejaquemavu. Dinumure cavarōre, ijoborōre máre cuedarejaquemavu Jūmenijicu caiye ape jipocai. Aru ñemino marejaqué mavu. Que baru “Miadáro májaro”, arejaquemavu ũ. Ũi que aiyede, miadáro curejaquemavu. “Jāravu bájarō”, aru “Ñami májaro”, arejaquemavu. Ũ miadárore “Jāravu” arī, aru ñeminore “Ñami” arī, āmidorejaquemavu. Ũi que daiyede, cūinéjaquemavu cūinájāravu.

Bedióva cuedarejaquemavu Jūmenijicu. Ũi aiyedata, ocopeñiboa baquiyé muri nurejaquemavu. Muri pu cavarō maquinóita, oco curitucubu baquinói nuri jēnejaquemavu. “Cavarō májaro”, arī āmidorejaquemavu. Ũi que daiyede, pucajāravua vaidéjaquemavu.

Aru bedióva cuedarejaquemavu Jūmenijicu. Ũi aiyedata, oco jia urada baquinó cūináromia cójijidejaquemavu. Aru joborō maquinó jārorejaquemavu mearo. Ũi aiyedata, cuetedejaquemavu cōriámenejaiye, pueuabedejaiye, betacabedejaiye, menemenejaiye, cōjamenejaiye, aru caiye die coapa joborōre pīarējaquemavu quédada. Diede pīarī, urarō bucurī nurejaquemavu. Que teni yóbecurijāravua vaidéjaquemavu.

Ina majare miadárajivure cuedarejaquemavu Jūmenijicu. “Que bájarā muja”, arī aviávare cuedarejaquemavu ũ. Jāravu-cacure jāravure miadáicōjenejaquemavu. Aru ñai majióvacu ñamicacure aru abiácovare máre ñamine cojicōjenejaquemavu. Que baru yore ijāravure miadárejaquemavu. Aru yóvaicuvaijāravua vaidéjaquemavu.

Bedióva cuedarejaquemavu Jūmenijicu. Moamenejaivure, āivamenejaivure, aru pāramevamenejaivure máre, caivu jia jívui curivure cuedarejaquemavu. Aru mījinare, āimara vuivure

máre cuedarejaquemavu. Ne juedocubarĩburu yóboi, cūpururejaquemavu. Que teni cūinápurupe paijāravua vaidéjaquemavu.

Bedióva cuedarejaquemavu Jūmenijicu. Ina macarōcavu āimarare, mícuvamarare, papeivure, aru júvare máre, caivu joborōi curivure cuedarejaquemavu. Ne juedocubarĩburu yóboi, cūpururejaquemavu na máre.

Aru pōeva mārājivure máre cuedarejaquemavu. Ũmu macuyúre aru nomió macodóre yópe darĩ, úpe ārojarivure cuedarejaquemavu náre, ũi dāpiainope dāpiaivure. Jobore ĩni, jēni, pōecu bacuyúre darejaquemavu úpe ārojacure. Ũi daimu mácuĩ ũecare ũme japurĩ, ũme epedejaquemavu ñaine, pōeva néñecu macuyúre. Ũme epeni buojarĩ, ũi daimu mácure “Adán májacu mu”, arĩ āmidorejaquemavu Jūmenijicu.

Ñai ũmure Edén āmicurō oteiye curōi epedejaquemavu. Nore jia curejaquemavu, aru jocucua máre. Oteiye curō coricai pucacua jocucua curejaquemavu, dicu cūinácu jēiye cainumua apure daiye, aru apecu méne aru āmene máre majide daiye. Ñai pōecure nore jāri capuicōjeni, yópe arejaquemavu Jūmenijicu:

—Me corejacu ji oteiye curōre. Jocucua jēiyede ājacu mu. Ũbenita coricacacu, méne aru āmene máre majide



daicu jēiyede āmejacu mu. Dicu jēiyede āñu maru, jāve yai-cúyumu mu, arī coyurejaquemavu Adáre Jūmenijicu.

“Ñai pōecu ūi yóvaimo cubebico. Meamevu ūre”, arī dápiarejaquemavu. Dinumure caivu ina ūi cuedaimara mácvare, āimara coapa, Adán yebai davarejaquemavu Jūmenijicu, āmi-doicōjeñu náre. Ubenita ne jēneboi ūi yóvaimo macodó cubedajaquemavu.

Que baru “Ūre cadatecodore daquijivu” arī, ūre cāori, ūi tépenado cūinádore ĩni, nomió macodóre darejaquemavu. Adán ūi coedaiyede, “Yúpe pōecobu mu. Ji tépenabacadoque dacube Jūmenijicu jímarepaco bacodóre”, arejaquemavu. Que baru ácu pōecu jímarepaco bacodó cuvacyu, ūi bucuvare dajocacuyame. Aru jímarepacore cuvarī, ómaque cūinávupetamu na Jūmenijicui jáinore.

Ina pucarā doiye cubedajaquemavu. Ubenita cuyebedejaquemavu na. Aru Jūmenijicu caiye ūi daiye báquede jári, “Meavu” arejaquemavu. Que teni seis paijāravua vaidéjaquemavu.

Cōmiáijāravui, “Cari jāravu meajāravubu” arī, caiye ūi cuedaiyue báquede aru caivu ūi cuedaiyumara mácvare máre cuedarī buojarī, memeni dajocarī, jabuóvarejaquemavu Jūmenijicu.

Pōeva Jūmenijicure ne vainí tuino mácarō

Génesis 3.1-21

(Romanos 5.12-19, 2 Corintios 11.3, Apocalipsis 2.7, 12.9, 20.2, 22.3, 14, 19)

Áicu máre curejaquemavu. Jujoyayu barejaquémuvau ñai áicu. Satanás curejaquemavu. Ū nomióre yópe arī jēniari járejaquemavu:

—¿“Caiye jocucua jēiyede āmejara muja”, ari mujare Jūmenijicu? arejaquemavu ñai áicu.

Aru ócapūravu arejaquemavu:

—Caiye iye jēiyede āivubu ñuja. Ubenita ānicu coricacacu jēidure āicōjemetebi ñujare Jūmenijicu. Iyede ñuja āivu baru, yainájaramu, arejaquemavu ō.

—Bi, jāve āmevu. Yaibénamu muja. Áivu baru, méne aru āmene máre majinajaramu muja. Jūmenijicupe paivu tenaja-

ramu muja. Aru nópe majini, “Yúpe teinomu” arī, āicōjemete-cube Jūmenijicu mujare, borocucu arejaquemavu ũ, āicu.

Diede jápiarī, dicu jēidure tugarī, īni, ārejaquemavu. Aru jímarepacure jídejaquemavu, ũi āquiepe ado. Que teni āri buojarī, méne aru āmene máre majini, ne bajure jári, ne doiye cubeni, cuyedejaquemavu. Cuyedivu yocajīene īni, nareni, doicajeare darejaquemavu.

Aviá doiye bajure Jūmenijicu cucudarejaquemavu nore oteiye curōre. Ũre ũi ēmeiyede jápiarī, jocucua jēneboi dupidejaquemavu ina. Náre órejarejaquemavu Jūmenijicu:

—¿Āri curāru muja? arejaquemavu.

Aru Adācapūravu ju arejaquemavu:

—Mure jápiarī cuyevu yu. Ye cuitótecaje cubevu yu. Que baru dupivu yu mure, arejaquemavu.

—¿Name mure que coyuri? ¿Ji āicōjemecu jēidure ācurū mu? arī jēniari járejaquemavu Jūmenijicu.

—Mi jívamo yure dicu jēidure jīni, “Ārevu”, abico yure. Aru yure jīni, yu āvuicu, arejaquemavu Adán.

Aru ócapūravu arejaquemavu:

—Nai āicu yure borodabi. Que baru yu āvuico, arejaquemavu.

Ōi que aruta, nai āicure arejaquemavu Jūmenijicu:

—Mi borodaiye boje mu mi yapiburā papeni návacuyumu joborōi. Mu mauteuyumu nomiōi mácu bacuyúre. Nomiōi mácu bacuyú ũi cubochīarure cūcuyumu mu. Ũbenita nai nomiōi mácu bacuyú mure mi jipobure cobacuyume ũ, arejaquemavu nai āicure.

Nópe ayu, “Āicu nomiōi mácu bacuyúre ijié tecuyureca, āicui paruéde cūiné dacuyume ōi mácu bacuyú”, aiyurejaquemavu.

Ico nomióre arejaquemavu Jūmenijicu:

—Juedocuvacore ijiquiebu mure. Ũbenita mimarepacure ucodomu mu. Mimarepacu mure cōjeñu macuyúme. Aru ũre jápiacodomu mu, arejaquemavu ico nomióre.

Aru Adāre arejaquemavu Jūmenijicu:

—Yure vainí tava mu. Que baru joborōre miumenejaiyede aru āmecōriamenejaiyede máre pīaré dacuyumu yu. Mu pare memenu maru, mi oteiye jēiyede ācuyumu mu. Joboque mure dacacu yu. Aru jobotecuyumu mu yaiyúta, arejaquemavu Adāre.

Aru jímarepaco caivu pōeva népaco bacoó barejaquemavu. Que baru Adán “Éva bájaco mu”, arĩ amidorejaquemavu ōre.

Dinumūre āimarare boarĩ, cajeáre yevarĩ ĩni, ne dorājiye đacarĩ, náre jidejaquemavu Jūmenijicu. Dicajeare ĩni, dorejaquemavu ina pōeva.

Ina majide đaicu jēiyede āivu bácavu ne āmenajiyepe ayu apecu jocucu jēiyede, dicu cainumua apure đaicu, Jūmenijicu náre jaetovarĩ jarorejaquemavu ne mearo cújurorōre jocarĩ. Nore coreicōjenejaquemavu apecu querubín āmicurivure, ángelevape paivure, cūináve táuve uruivede cavarivure, ina pōeva ne eabenajiyepe ayu icu jocucu apure đaicu yebai.

Cain ĩmacure ũi boarĩ jaruvaino mácarō

Génesis 4-5

(Mateo 23.35, Lucas 3.37-38, 11.51, Hebreos 11.4-5, 12.24, 1 Juan 3.12, Judas 11, 14)



Adán jímarepacore juedodarejaquemavu. Aru mamara pucarā juedocuvarejaquemavu ō Éva. Ōi mamacuvamu Caín amidorejaquemavu. Oteipōecu barejaquemavu. Aru ĩmacu Abel oteiāimarare jārĩ coreipōecu barejaquemavu.

Cūinájāravu Caín ũi oteiyede ĩni, đavarĩ, jījurocu barĩdurejaquemavu Jūmenijicure. Aru Abel máre ũi cuvamarare oteiāimara mearare ĩni, boarĩ, juarĩ, jāmuóri, jidejaquemavu Jūmenijicure. ĩmacui jiyede

me járejaquemavu Jūmenijicu. Ūbenita jíbucui jýyede āmei járe-
jaquemavu. Que baru jorojīnejaquemavu Caín. Nópe jorojīñure
jáñu, arejaquemavu Jūmenijicu:

—Jorojīnejacu mu. Āmeina tebejacu. Aru mure me dayure
jári, torojucuyumu. Āmeno dayu baru cojedeca, ñájjicuyumu.
Ūbenita me dayu baru, me cucuyumu. Que baru me ñajacu, are-
jaquemavu.

No yóboi, Caín ĩmacumaque macarōi nurejaquemavu. Aru
noi ĩmacure boarí jaruvarejaquemavu jíbucu. Jūmenijicu ūre
arī jēniari járejaquemavu:

—Mu, Caín, ¿ārīta míyocu curi? arejaquemavu.

—Majibevu yu. ¿Jýyocure coreyu bárica yu, mi que aiyede?
copu arejaquemavu ũ.

—¿Mýyocure aipe dacurū mu? Mýyocu bácu, mi boarí jaru-
vaimu mácuí jive joborōi paraivu. Que baru mu urarō memēñu-
vacari quíjjino ĩcuyumu mi oteiye báquede. Quédata cure cucu-
yumu mu cainumua jabuóvabecuva, arejaquemavu Jūmenijicu.

Aru Caín arejaquemavu ūre:

—Ji āmeina teiye boje joai mure jocarī cuiye jauvu yure cai-
numua jabuóvabecuva. Ācu pōecu yure copuyu baru, boarí jaru-
vacuyume yure, arejaquemavu.

Ūbenita Jūmenijicucapūravu arejaquemavu:

—Bi bajubu. Pōecu mure boarí jaruvayu baru, pueno urarō
ñájjicuyume, arejaquemavu Caíne.

Que arī, toivarī jēorejaquemavu Caíne, caivu ūre jári ne
boarí jaruvabenajipepe ayu ūre. Dinumure Caín Edéne jocarī
ñurejaquemavu aviá dainocapūravui, Nod āmicurijoborōi. Nore
nomicurī, ne mamajuedocuvamure āmidorejaquemavu Enoc.
Aru ne curiīmaro máre Enoc āmicurejaquemavu.

Ciento treinta paiujua cuvacu Adán, cojedeca jímarepacore
juedodarejaquemavu. Mamajicure jípaco āmidorī arejaquemavu:

—Mimamicu Abel bácuře oatuvaimumu mu. Que baru Set
bájacu mu, arejaquemavu.

Adán mamara obedivu curejaquemavu. Novecientos treinta
paiujua cuvacuta, yaidéjaquemavu ũ mácu. Ū mácuí mácu Set
nomicurī juedocuvarejaquemavu Enos āmicucure. Aru Enos ũi
mácu Cainán marejaquémavu. Cainán ũi mácu Mahalaleel ba-
rejaquémavu. Mahalaleel ũi mácu Jared barejaquémavu. Jared
ũi mácu Enoc barejaquémavu.

Aru Enoc ũi mácu Matusalén marejaquémavu. Ñai Enore me yóvarejaquemavu Jūmenijicu. Que baru yaibédejaquemavu ũ. Apucurata Enore nuvarejaquemavu cavarō mearo ũi curōi. Matusalén ũi mácu Lamec barejaquémavu. Novecientos sesenta y nueve paiujua cuvacuta yaidéjaquemavu Matusalén mácu. Lamec ũi mácu Noé marejaquémavu. Aru ũmu juedova yóbecurā cuvarejaquemavu Noé, ne āmiá Sem, Cam, aru Jafet.

Noé jiadocū uracūre ũi daino mácarō

Génesis 6-9

(Mateo 24.37-39, Lucas 3.36, 17.26-27, Hebreos 11.7, 1 Pedro 3.20, 2 Pedro 2.5, 3.6)

Dijāravucavu Noé ũi cuede obedivu cūpururejaquemavu. Aru caivu ina pōeva āmeina tedejaquemavu na. Ne āmeina teiyede jári, chīorejaquemavu Jūmenijicu pōevare ũi cuedaiye báquede. Que baru yópe dápiarī, “Ji cuedaimara mácavure jaruvaquijivu yu, ne āmeina teiye boje”, arī dápiarejaquemavu ũ.

Caivu apevu pōeva āmenareca, Noécapūravu mearo darejaquemavu Jūmenijicui jáinore. Que baru ũi cuedaimara mácavure ũi jaruvaquiye jipocai, yópe daicōjenejaquemavu Jūmenijicu ũre:

—Jiadocū uracūre, cūrami curicū maquinóre, đajacu mu. Joaricū ciento treinta y cinco paimetros bajo, aru uracū veintidós paimetros bajo, aru ũmujuricū trece paimetros bajo curicū maquinóre đajacu. Yóbecuriva curaivaque đajacu diñami jiadocūcadāmi maquinóre. No coricacatucubu baquinóre jáicobe quījicobe baquinóre aru jedevacobe baquinóre máre jiadocūcāveita đajacu mu.

’Jiare yabovarī, muiváibo darocuyumu yu. Aru yócavu caivu yainájarama. Ubenita mi daiye boje yópe ji urōpe, dicūque meadacuyumu mure, mimarepacore, aru mímarare némarebucuvaque máre, arejaquemavu Jūmenijicu Noéne.

Aru yópe arī coyure nurejaquemavu:

—Āimara máre, ji āicōjeimarare pōevare siete paivu ũmuvare aru siete paivu nomivare ĩni ecovajacu mu dicū jívui. Aru apevure, ji āicōjememarare pucarā coapa, ũmu nomióque ĩni ecovajacu dicū jívui. Aru muje ārajiyede, ina āimara ne

ārajiyede máre cójijovarī adajacu dicū jívui, arejaquemavu Jūmenijicu.

Ūi daicōjeiyepe darejaquemavu Noé. Aru que darī buojayure járī, yópe arejaquemavu Jūmenijicu:

—Maja jiadocūi jatujarā. Siete paijāravua cūiye bajure oca-
vacayumu yu. Cuarenta paijāravua aru ñamiá máre ocaqui-
yebu yore. Caivu curivu jiadocū jedevai yainájarama na, arī
coyurejaquemavu.

Yópe arī ūi coyuiyepe vaidéjaquemavu. Oco ocarī, jia yaborī,
ēmuri, joborōre pu cūracūare máre muivárejaquemavu. Ūbe-
nita dicū jiadocū jorejaquemavu. Aru dicū jívucavu mearejaque-
mavu. Ciento cincuenta paijāravua aru ñamiá máre mauteni
pararejaquemavu no muiváibo.

Dinumure ārurejaquemavu Jūmenijicu ina jiadocū jívui
curivure. Que teni ūmevu darorī, jiare coaivarejaquemavu.
Aru dicū datuórī tubarejaquemavu cūracū Ararát āmicuricū
puenoi. Cuarenta paijāravua aru ñamiá máre vainíburu
yóboi, quíjicobe jáicobede voarī, mījicure jarorídurejaque-
mavu Noé, majicaya jia coaiyede. Ñai vare nuri, copaidabe-
dejaquemavu dicūi. Que baru jia coaiyede majibedejaque-
mavu cāreja Noé. Majiyucu, jurecore jarorejaquemavu. Aru



vure nuridurī, ōi tubae eabeni, copaidarejaquemavu. Siete paijāravua yóboi, bediόva őre jarorejaquemavu ũ, Noé. Avia ũi doiye bajure copaidarejaquemavu ő, jureco. Olivo āmicuricu jocucu cavajībure puyorī vini, davarejaquemavu Noéne. Siete paijāravua vainíburu yóboi, bediόva cojedeca jarorejaquemavu jurecore. Ūbenita copaidabedejaquemavu. Que baru majidejaquemavu ũ jia coaiyede.

No yóboi, Jūmenijicu etaicōjenejaquemavu caivu ina jiađocū jīvui curivu bācavure. Noé etayu bācu cūraboaque cainiyutubore đarī, āimara Jūmenijicui āicōjemarare boarī, juarī, jāmuóri, jídejaquemavu ũre, mearore jíyu. Que đayure járī, torojurī yópe arejaquemavu Jūmenijicu:

—Ye jaruvabecuyumu yu ji cuedaimara māvavure muivái-boque cojedeca. Que baru cavarōi námene epeni, jáđovacuyumu yu, maje ārurajipepe ayu diede, arejaquemavu Jūmenijicu.

Pōevare obediāmuaire Jūmenijicu ũi yávaicōjeino mácarō *Génesis 11.1-9*

Noé ũi pāramena curipinidu teivu obedivu curejaquemavu. Caivu ina cūinācāmumia yāvarejaquemavu. Jūmenijicu pōevare cainoa joborōai coavarī nuicōjeniduyu bācureca, nácapūravu caivu cūináro joborōi nurejaquemavu. Avia dainocapūravui nurejaquemavu pu jocucubejoborōi, Sinar āmicurōi. Nore earī, “Apenoi numenajarevu maja. Īmaro urarō teni, cūrami uradāmi đarī cavarōita eaiñami maquinó, yoma curājaramu maja, parurivu”, arīdurejaquemavu ne baju.

Điñami bájuroriñamine ne teniduiyede, nore ēmenejaquemavu Jūmenijicu, iñami, ne dájuroriñamine jácudayu. Ne dájuroede majini, náre coapa apei yávaiyede jídejaquemavu, náre coavacuyu. Quédata ne baju yávarī majibeni, mamateni, ne memeinore dajocarejaquemavu diñamine memeniduiyu bācavu. Que baru ne dájuroriĩmaro mácarō Babel āmicurejaquemavu. Aru que đarī, náre coavarejaquemavu Jūmenijicu cainoa joborōaita.

Abraham

Génesis 12-18, 21.1-8

(Mateo 1.1-2, 10.15, 11.23-24, Lucas 1.54-55, 3.34, 10.12, 17.28-29, 32, Juan 7.22, Hechos 7.2-8, 17, Romanos 2.25-3.1, 4.1-22, 9.7, 9, Gálatas 3.6, 8, 16-18, 4.21-30, Hebreos 7.1-10, 11.8-10, 17-19, 13.2, Santiago 2.23, 2 Pedro 2.6-8, Judas 7)

Obedijua Noé mácuí yainíburu yóboi, curejaquemavu Abram. Harán ámicurijoborō curejaquemavu. Aru Jūmenijicu ũre yópe arejaquemavu:

—Mi joborōre jocarī nujacu apeno joborōita. Nore mi eai-yede, obedivu juedocuvare dacuyumu ya. Mipāramena curipinidu teivu bárājivu jiniturājarama na. Mearo dacacuyumu caivu pōevare, mi ju aiye boje yure, arejaquemavu Abrāre.

Ũi jápiaye báquede ũi cōjeiye báquapedeca darejaquemavu ũ. Que teni jímarepaco Sarai ámicucoque, ímacu bácuí mácu, Lot ámicucoque, aru caivu ne yebacavauque máre nurejaquemavu Canaán ámicurijoborōi.

Canaán ámicurijoborōi ne earīburu yóboi, yópe arī coyurejaquemavu Jūmenijicu Abrāre:

—Mipāramena curipinidu teivu bárājivu jiniturājarama na. Ijoborōre jícuyumu mure aru na mārājivure máre, arejaquemavu Jūmenijicu.

Ũi que aiye de jápiaya, Abram torojacu cūraboaque cainiyutubore darī, áimarare boarī, juarī, jāmuóri, jidejaquemavu Jūmenijicure, mearore jíyu ũre.

Dinumure áiye cubedejaquemavu dijoborōre. Que baru áiye vore nurejaquemavu Abram ũ jivauque Egipto ámicurijoborōi. Nuri earejaquemavu. Ne cuede nore, ure cuve earejaquemavu. No yóboi, copainurejaquemavu Canaán ámicurijoborōi.

Nore curī, Abram ũi oteiáimara obedivu cuvarī, aru Lot máre obedivu cuvarī, Lot ũi áimarare coreipōeva aru Abram ũi áimarare coreipōeva jijatedejaquemavu ne baju. Que baru yópe arejaquemavu Abram Lore:

—Jijatebenajarevu maja. Joborō urarō cuvu. Mu ári cui-yucu, cujacu mu. Mi yore cuiyuru, apenoi nucuyumu ya. Aru mi apenoi nuiyuru, dinumu yore cucuyumu ya. Mi ũmei maji-jacu mu, arejaquemavu Abram.

Lot jípacumacure ja arī, mearo joborōre jári jia Jordán āmicuriya ēcarui, cucu nurejaquemavu ũ jivuque nore. Pucarōa ĩmaroa curejaquemavu nore, Sodoma aru Gomorra āmicuriĩmaroa. Nócavu pare āmeina teivu barejaqué mavu. Lot ũi nuri-buru yóboi, Abram mautedejaquemavu Canaán āmicurijoborōi.

Ŭi cuede nore, yópe arī coyurejaquemavu Jūmenijicu ũre:

—Mi jipocai jivatenei cocorī, jájacu mu. Aru copedini yóbore máre jári, vaibóre aru apeno vaibóre máre jájacu mu. Caiye mi jáiyede mure aru mipāramena curipinidu teivu bárājivure jícuyumu yu. Na márājivu obedivu tenajarama. Ēpayabeape paivu barājárama mipāramena curipinidu teivu bárājivu. Na márājivu obedivure corevarī oabenajarama, arejaquemavu Jūmenijicu.

Dinumure apeno ĩmarocavu jabova ne pōevaue cójjideja-quemavu Sodomacavuque, boarǎjivu. Aru Lot curejaquemavu Sodoma āmicuriĩmaroi. Boarǎ buojarǎ, Lojāre nuvari, ne cuvede máre tatorǎ ĩni, nuwarejaquemavu. Náre que darǎ buojarǎ, apenoa ĩmaroacavure máre boarǎnurejaquemavu. Ne que dai-yede, jápiarejaquemavu Abram.

Cūináu ina ne boarǎedaiyede dupiyu bácu coyacunureja-quemavu Abrāre ne nuvaiyede Lojāre ne cuveque. Ŭi coyuiyede jápiarǎ, Abram ũ jivuque aru ũi yebacavuque máre, trescientos dieciocho paivu, cujurǎnurejaquemavu. Náre boqueni, boarǎ, vainí tarejaquemavu Abrāja ina Lojāre nuvaivu bácvure. Que teni náre ĩni, copaidarejaquemavu Abrāja.

Ne copaidaiyede, Sodomacavu ne jabocu aru Salem āmicuriĩmarocacu, Melquisedec āmicucu, copunurejaquemavu Abrājare. ũai Melquisedec memecayu Jūmenijicure sacerdotepe, yópe arī coyurejaquemavu Abrāre:

—Me cujacu mu. Mure jári coenínivu ne boaiye báquede mure cadatequemavu Jūmenijicu. Cavarōre aru joborōre máre cuedarejaquemavu ũ, arejaquemavu.

Abram caiye iye cuvede ũi íye báquede ũi boarǎ, vainí tuimara mácvure jocarǎ, caipucapuruaape paiye coavarǎburu yóbore, cūináro iye coavaiye báquecarōre jídejaquemavu Melquisedede. No yóboi, Sodomacavu ne jabocu yópe arejaquemavu Abrāre:

—ũujevu mi ĩni davaimara mácvure jíjacu yure. Aru cuve mi íye báquede nuvajacu mu, arejaquemavu, bojedaiyu-ríduyu ũre.

Ûbenita Abrācapūravu arejaquemavu:

—Mi cuve ji íye báquede cuvaiyubevu yu. Yebacavu ne áíye báquede ícacu yu quénora. Que baru boje ubevu yu, arejaquemavu.

No yóboi, Jūmenijicu arejaquemavu Abrāre:

—Jidubejacu mu. Mure jári coreni, cadatecuyumu yu. Urarō mearo jícuyumu mure, arejaquemavu.

Ûi que aiyede, Abrācapūravu arī jēniari járejaquemavu:

—Mu, Jūmenijicu, ¿aípe daji yu urarō mearo mi jídu yure? Juedocuvavevu yu. ¿Que baru mearo ji cuvaede ñame eaquijidi ji yainíburu yóboi? Apecu ícuyume ji cuve báquede. Juedocuvare dabeteavū mu yure, arejaquemavu.

—Ye apecu míyede ímecuyume. Yu mure juedocuvare daquijivu. Abiácovape baju obedivu barājárama mipāramena curipinidu teivu bárājivu, arejaquemavu Jūmenijicu Abrāre.

Aru Abram ju arejaquemavu Jūmenijicure. Que baru yópe arejaquemavu Jūmenijicu úre:

—Boropatebecubu mu ji jáínore. Ijoborō mure jícuyumu yu. Ûbenita mipāramena curipinidu teivu bárājivu curānurajarama apeno joborōi. Nócavure ne yebacavu tenajarama na márājivu. Nore curājarama cuatrocientos paiujua pueno baju. Aru no yóboi, yore copaini darājarama ure cuveque, arejaquemavu Jūmenijicu.

Dinumure Abram jímarepaco, Sarai, juedocuvabecovacari, pare juedoeaiyuco barejaquemavu. Yópe arī coyurejaquemavu jímarepacure:

—Yu ye juedocuvabecotamu. Que baru ji yebacacore nomicujacu mu, yure òi juedocuvacacojiyepe ado yure boje, arejaquemavu Sarai.

Ûi que aiyede, Abram jímarepacoí yebacaco, Agar ámicuco, Egipto ámicurijoborōcacore nomicurejaquemavu. Aru juedocuvarejaquemavu, Ismael ámicucure.

Trece paiujua yóboi, yópe arejaquemavu Jūmenijicu Abrāre:

—Mu aru mívu ũmuva aru mi yebacavu ũmuva máre muje cajede burajarā muja, muje ārurajiyepe ayu ji coyuiye báquede mujare, arejaquemavu Jūmenijicu.

Ûi que aiyede jápiarī, darejaquemavu yópe Jūmenijicu ũi ðaicōjeiyepe. Aru mearore jidejaquemavu úre. Cojedeca Jūmenijicu arejaquemavu Abrāre:

—Mu obedijoborōacavu néñecu macuyámu му. Oatuvauquijivu mi āmiáre caride. Abraham májacu му. Aru mimarepaco Sara āmicujacorī ō caride. Obedijoborōacavu néñeco macodóme ō, arejaquemavu.

Aru Abraham ūi cien paiujua cuvacuta, ūmujicure juedocuvarejaquemavu jímarepaco bajuque. “Isaac bájacu му” arī, mamacure āmidorejaquemavu jípacu. Aru ocho paijāravua ūi pōeteniburu yóboi, ūi cajede burarī, yópe Jūmenijicui daicōjeiye báquepedeca darejaquemavu Abraham.

Isaac

Génesis 22.1-19, 25.19-23

(Mateo 1.1-2, Lucas 1.73-75, 3.34, Hechos 3.25, 7.8, Gálatas 4.21-30, Hebreos 6.13-14, 11.9, 11-12, 17-19, Santiago 2.21)

Isaac bojuyo baede, “¿Abraham yure ju ajebarica?” arī dápiarī, Jūmenijicu arejaquemavu Abrahāre:

—Mu mímacu cūinácu, mi jecumure, Isaare, cūinácu cūracūi, Moriah āmicurijoborōcacūi, nuvajacu. Dicūre jádovaquijivu mure. Nore ūre boarī, toa juarī, mímacure jíjacu yure, arejaquemavu.

Cōmiáijāravu javejīna Abraham mamacuque, aru ūi yebacavu pucarā, ne oteiāimacurā pecare tuorī, tāuvede īni, aru cá-mavede pēori nuvarī, nurejaquemavu. Yóbecurijāravua nuivu baju. dicūre járejaquemavu Abraham. Dinumu ina yebacavure mauteicōjeñu ūmacayuque, aru tāuvede, cá-mavede máre īni, mamacure pecare tuicōjeñu, nure nurejaquemavu ina, Abraham mamacumaque.

Ne nuiyede, Isaac jípacure arī jēniari járejaquemavu:

—¿Āimacu, maje Jūmenijicure jíquijimu, ári curi ū? arejaquemavu Isaac.

—Jūmenijicu ūi baju jícuyume āimacure, arejaquemavu Abraham mamacure.

Que ayuvata, muri nurejaquemavu dicū puenoi. Jūmenijicure ne jínajinore earī, cainiyutubore darī, nore puenora pecare tuorī, mamacure jēni, buorī buojarī, peca puenora tuorejaquemavu ū. Aru tāuvede īni, mamacure boarīdurejaquemavu



Abraham. Ñbenita dinumuma cūinácu Jūmenijicu daroimu, ángele, órejarejaquemavu Abrahāre, yópe arī:

—Mu, Abraham, mímacure boabéjacu mu. Jūmenijicu ũi jái-yede mi daiyuede yópe ũi cōjeiyepe, majicube mure me ju ayure ũre. Que baru mímacure boabéjacu mu, arejaquemavu ñai ángele.

Ũi que arīburu yóboi, Abraham copedini, járejaquemavu cūinácu āimacure. Ũi javaroa jocujīcu cavabuai quédata jēnejaquemavu. Ũre ĩni, davarī, peca puenora tuorī, boarī, toa juarī, jidejaquemavu Jūmenijicure, mearore jíyu.

Bedióva cojedeca ñai ángele órejarejaquemavu Abrahāre, yópe arī:

—Mure Jūmenijicu ũi cōjeiyepe daiyucure me dacacuyume ũ. Que baru yópe aibi mure: “Obedivu barājárama mipāramena curipinidu teivu bárājivu, abiácovape aru ēpayabeape máre. Vainí turājarama náre jári coenínivure. Aru obedijoborōacavure me dacacuyumu yu, mi ju aie boje yure”, aibi Jūmenijicu, arejaquemavu ñai ángele.

Isaac cuarenta paiujua cuvacuta, nomicurejaquemavu jípacui yócu mácu mácoque, Rebeca āmicuco. Ñbenita

juedoeabedejaquemavu ô. Que baru jímarepacu Jūmenijicuque jēniarejaquemavu ôre boje. Aru ũi jēniariburu yóboi, pucarã juedoearejaquemavu ô. Ne pōetenajiye jipocai, yópe arejaquemavu Jūmenijicu ôre:

—Îmacucapūravu jíbucu pueno parucu nurî, jabotecuyame, arejaquemavu.

Pējave ne pōeteyede, jíbucure Esaú âmidorî, îmacure Jacob âmidorejaquemavu.

Esaú aru Jacob

Génesis 25.24-34

(Mateo 1.2, Lucas 3.33-34, Hechos 7.8, Romanos 9.10-12, Hebreos 11.9, 20, 12.16-17)

Esaú bucucu nuñu, âimarare me boarî majicu barejaqué-mavu. Que baru jípacu pare jecurejaquemavu ũre. Îmacu, Jacob, cūramicacu barejaqué-mavu. Que baru jípaco pare jecurejaquemavu ũre.

Cūinájāravu âiye jatuóyu barejaqué-mavu Jacob. Jíbucu âimarare cujuvu bácu ueturî, cūrami copainuri, arîdurejaquemavu:

—Āvué yaiyátamu yu. Dicoro jūaricoro mi jatuóiyé báquede jíjacu yure, arîdurejaquemavu.

—Mamapōeteyu bácutamu mu. Que baru majepacu ũi cuvede jícuyame mure ji pueno aru ũi yóboi majevure jabotecuyumu mu. Mamapōeteyu mi cuvajuroede aru mi jabotejuroede majevure yure mi bojedaru, âiyede jíquijivu yu, arejaquemavu Jacob.

—Yu āvué yaiyátamu. ¿Que baru mamapōeteyu ji cuvajuroede aipe dajebarica yure? arejaquemavu jíbucu.

—Dinumuma bojedajacu diede yure, arejaquemavu îmacucapūravu.

Jíbucu yópe arî ju arejaquemavu:

—Mamapōeteyu ji cuvajuroede mure bojedayutamu yu, arejaquemavu.

Ũi que arîburu yóboi, ũre âiyede jídejaquemavu îmacu.

Ārî buojarî, etarî nurejaquemavu Esaú, mamapōeteyu ũi cuvajuroede jaruvaya bácu.



Esau ũi pāramena curipinidu teivu bārājivu Edom āmicuriyajubo pōeyajubo barejaquemavu. Aru Jacob ũi mára doce paivu cuvarejaquemavu. No yóboi, Jūmenijicui daroimu, ángele, Jacob ũi āmiáre oatuvārī, Israel āmidorejaquemavu ũre. Aru ũi pāramena curipinidu teivu bārājivu Israel āmicuriyajubo pōeyajubo barejaquemavu.

Jūmenijicu Joséde decoboaiyede ũi majide daino mácarō

Génesis 37, 39-41.36

(Hechos 7.9-10, Apocalipsis 2.7)

Canaán āmicurijoborōi curejaquemavu Jacob. Pucarā jímarebucuva aru pucarā yebacarōmiva cuvarejaquemavu. Doce paivu mamara ũmuva cuvarejaquemavu Jacob dinomivaque. Jímarepaco Lea āmicucoque seis paivu ũmu juedova cuvarejaquemavu, Rubén, Simeón, Leví, Judá, Isacar, aru Zabulón āmicurivu. Ũi yebacarōmivaque yóvaicuvaivu ũmu juedova cuvarejaquemavu, Bilha āmicuco ōi mára Dan aru Neftalí āmicurivu aru Zilpa āmicuco ōi mára Gad aru Aser āmicurivu. Ũbenita jímarepaco, Raquel āmicuco, jecurejaquemavu apevu pueno. Que

baru Raquei mára pucarā, néyova, José aru Benjamín āmicurivure jecurejaquemavu Jacob némamina pueno.

José diecisiete paiujua cuvacu, cuitótecaje meacajede jídejaquemavu jípacu ũre. Aru jíburā ne daiye caiyede, méne aru āmene máre, coyurejaquemavu José jípacure. Que baru jíburā jorojīni járejaquemavu ũre.

Cūináñami cāñu, decoboarejaquemavu. Aru ũ coedayu, coyurejaquemavu iye decoboaiye báquede jíburāre, yópe arī:

—Jápiajarā muja. Ñamine, ji cāiyede, yópe decoboavũicu yu. Maja oteiye curōita maje oteiye jēiyede jevaivu batevú maja. Aru iyede jevarī, tóroa darī, buorīta, jitorocapūravu nútevũicu, mujare ayubu. Aru jitorore mujetoroa tarabuteni, nacachini, puedavu, arejaquemavu.

—¿Mu ñuje jabocu teiyucurū mu? arī jorojīnejaquemavu jíburā.

Bedióva decoboarejaquemavu José. Ũi decoboarīburu yóboi, yópe arī coyurejaquemavu jípacure aru jíburāre:

—Ñai aviá járavucacu aru ñai ñamicacu, aru abiácova máre once paivu yure nacachima, arejaquemavu.

Ũi coyuiyede jápiarī, jorojīñu arejaquemavu jípacu ũre:

—¿Yure, mipaco, mimamina, aru míyocu máre mure nacinajidica, ayurū mu? arejaquemavu.

Ubenita José ũi decoboaiye báquede dápiayu barejaqué-mavu jípacu.

Jacob ũi mára caivu oteiāimarare coreipōeva marejaqué-mavu. Oteiāimara obedivu cuvarejaquemavu na. Cūinájáravu caipucapuruafe paivu Jacob ũi mára ne oteiāimarare Siquem āmicurōi nuwarejaquemavu, náre cōriáre āoranuivu. Nore ne cuede, népacu Joséde jarorejaquemavu ne yebai, náre jáicōjeñu. Dare dayure jári, jíburā ne baju yópe arejaquemavu:

—Jájara, decoboavacu daibi majare. Ũre boarī jaruvarājarevu. “Macarōcacu āimacu ũre āri jaruvacube”, arājarevu majepacure. ¿Dinumu aipe báquijidica ũi decoboaiye báque? arejaquemavu jíburā.

—Ũre boarī jaruvabenajarevu. Quéda ānicobe ococobe bácarō ococubecobe jívui ũre japuporī, adarājarevu, arejaquemavu némamicu, Rubén, Joséde meadaiyacu.

Aru ĩmara ũre ju arejaquemavu. Que baru José ũi daiyede ne yebai, ũre jēni, ũi doicaje jípacu ũi jícaje bácarōre duvarī ĩni,



dicobe jívui japuporí adarejaquemavu. Ûbenita ne que daiyede, náque cubedejaquemavu Rubén.

No yóboi, apevu Ismael báci pāramena eaivure járejaquemavu Joséi mamina, Egipto āmicurijoborói nuivu, bojedarājivu ne cuvede. Náre jári, Judá arejaquemavu:

—José majeyocu bajutame ũ. Que baru ũre boarí jaruvaiye jaubevu majare. Āninare ũre bojedarājarevu, arejaquemavu.

Ũi que aiyede ja arí, Joséde ne ĩniburu yóboi dicobede jocarí, bojedarejaquemavu ina Ismaecavure. Tāuturaturava veinte paiturava plataque daituravare jidejaquemavu Joséde boje.

No yóboi, Rubén jácunuridurejaquemavu Joséde dicobei. Ûbenita eabedejaquemavu. Que baru ĩmara yebai chīori copainuri, yópe arejaquemavu:

—¡Majeyocu cubetebi! ¿Aipe darājidica maja? arejaquemavu.

Joséi mamina áimacure boarí, néyocui doicaje bácaröre ĩni, jiveque jĭjovari ěnuvarejaquemavu. Que darĭburu yóboi, dica-jede jarorejaquemavu népacure. Dicajede jári, urarō chĭorejaquemavu Jacob.

—ĭPa, jĭmacu bácu doicaje bácarōtamu icaje! Macarōcacu āĭmacu ũ mácure jĕni, āri jaruvacube, arĭ codoboborejaquemavu. Aru joe bajita orejaquemavu Jacob mamacu bácu. Aru yópe arejaquemavu mamarare:

—Ocuyumu jĭmacu bácu pu ji yaiyeta. Ārumetecuyumu, arejaquemavu.

Ina Ismaecavu eaiyu Egipto āmicurijoborōi, Joséde bojedarejaquemavu Potifar āmicucure. Ĕ marejaquémavu memecayu Egiptocavu pueno jabocure, faraón ne aimu. Churaravai jabocu barejaquémavu ıai Potifar. Que teni José yebacatedejaquemavu. Ũbenita Jūmenijicu cadatedejaquemavu ũre. Que baru ména memenejaquemavu Potifai cūrami. Potifare ju arĭ, vainĭ tubedejaquemavu. Que baru Joséde cojurĭ, ũi cūramine aru ũi cuvede máre jári capuicōjenejaquemavu Potifar.

Ũbenita Potifai márepaco Joséde újuroco barĭdurejaquemavu. Jāravua coapa cārijovarejaquemavu ũre, “Yúque cujacu” arĭ. Ũbenita ōre ju abedejaquemavu Josécapūravu, yópe arĭ:

—Caiye ũi cuvaede yure jáicōjeame mimarepacu. Ũbenita mu ũi márepacotamu. Que baru mi aiyepu ji daru, meamejebu Jūmenijicui jáinore, arejaquemavu.

Ũbenita cūinájāravu, cūramine ecorĭ, memecunurejaquemavu José. Aru Potifai márepaco curejaquemavu cūinácova. Ĕi doicaje puenocacajede ĩni, “Yúque cujacu”, arĭdurejaquemavu bedióva cojedeca. Ői que aiyede, José cúyarĭ etarejaquemavu cūramine jocarĭ, ũi puenocacajede dajocarĭ ōi purui.

Ŕi etaiyede jorojĭnejaquemavu ō. Que baru codoboborĭ, ōi yebacavure cuturejaquemavu. Náre meyuyarĭ arejaquemavu:

—űai Israecacu yure jĕiyurĭdubi. Ũbenita ji codoboboiyede yure dajocarĭ numi ũ. Jájara ũi puenocacaje cuvū cāreja yore, arejaquemavu.

Aru nopedeca arĭ coyurejaquemavu ōi márepacure, ũi eaiyede ũi cūrami. Ői coyuiyede jápiarĭ, jorojĭni, Joséde āmeina teivure jĕni jacoĩnami jacorejaquemavu. Ũbenita nore ũi cuedeca, Jūmenijicu cadatedejaquemavu ũre. Diĩnami jabocu José

me dayure jári, úre epedejaquemavu apevu buoimarare corei-põecu bacuyúre.

Buoimaracavu pucarã faraóre memecaivu bácavu barejaqué-mavu, cūinácu úre ũcuidore jípõecu bácu aru apecu úre páu dacai-põecu bácu. Faraón náque jorojĩñu, jacorejaquemavu náre. Cūináñamine áme decoboarejaquemavu ina pucarã. Apejãravuita ne coedaiyede, na chĩoivure járejaquemavu José. Que baru yópe arĩ jēniari járejaquemavu náre:

—¿Aipe teni chĩoivuru muja? arejaquemavu.

Aru yópe arĩ coyurejaquemavu na:

Áme decoboavu ñuja. Ñuje decoboaiyede coyui-põecu cubebi, arejaquemavu.

—Decoboaiyede coyuiyede majibi Jūmenijicu. Coyujarã yure muje decoboaiye báquede, arejaquemavu José.

Nai faraóre ũi ũcuidore jípõecu bácu yópe arĩ coyurejaquemavu:

—Yu oteiuyaimure jávuicu. Dimure yóbecuricavabua cútevu. Aru ji jáiyede cóvua povuicu dimu. Porĩ, úyaiboa ñeminiboare jēni, tavarĩ, ĩni, faraón ũi ũcuidore úyaicorore piporĩ, jívuicu yu úre, arejaquemavu.

Aru Josécapūravu yópe arejaquemavu, coyuyu yo decoboaino mácarõre:

—Yópe aiyurõ matedébu mi áme decoboaino mácarõ. Dica-vabua yóbecuricavabua yóbecurijāravua aiyurõmu. Yóbecurijāravua yóboi, bediõva cojedeca mure ũi ũcuidore jícōjecuyume faraón jipoca mi jiye báquepedeca. Aru mu diñami ámeina teivure jēni jacoĩñamine etayuta, me ārujacu yure. Faraóre coyucajacu yure. Ámeina tebecureca, ámeina teyupe jacoma yure, arĩdurejaquemavu José.

Aru ũcapūravu ju arĩdurejaquemavu. Faraóre páu dacai-põecu máre, yópe arĩ coyurĩdurejaquemavu ũi áme decoboaino mácarõre Joséde:

—Abucuya yóbecuriya ji jipoburã tuorĩ, nuvañu matevú yu. No puenocada abucuyare páu cútevu. Aru diede mĩjina āivu batemá, arejaquemavu.

Aru Josécapūravu yópe arejaquemavu, coyuyu yo deco-boaino mácarõre:

—Yópe aiyurõ matedébu mi áme decoboaino mácarõ. Yóbecurijāravua aiyurõmu diya abucuya. Yóbecurijāravua yóboi,

ñamemure buorī jocucui, yuyacuyume mure faraón, boarī jaruvacuy. Aru mi baju bácarōre ārajarama cavava, arejaquemavu José.

Aru yóbecurijāravua yóboi, náre vaidéjaquemavu yópe José ũi aye báquepedeca. Ũbenita ñai faraóre ũi ũcuidore jípōecu Joséde ārumenejaquemavu.

Русајуа vainíburu yóboi, cūináñamine puque baju āme decoboarejaquemavu ñai faraón. Apejāravuita ũi coedaiyede, diede dápiarī, chīori, cuturejaquemavu ũre coyucaipōevare. Ne eaiyede ũi yebai, coyurīdurejaquemavu ũi āme decoboaiye báquede, ne majinaiyiyepe ayu. Ũbenita nácapūravu ye majibedejaquemavu. Dinumuita faraóre ũcuidore jípōecu Joséde āruri, yópe arejaquemavu:

—Israecacu cucube āmeina teivure jēni jacoĩñami, decoboaiyede majicu. Yure aru mi páu dacaipōecu bácuře ñuje decoboaiye báquede coyúáme. Aru yópe ũi coyuiye báquepedeca vaiávũ ñujare, arejaquemavu faraóre.

Diede jápiarī, Joséde davaicōjenejaquemavu faraón ũi yebai. Ũi eaiyede, faraón arejaquemavu ũre:

—Decoboavu yu. Ũbenita yure coyucaipōeva coyuiye majibetema yure aipe aiyuede ji decoboaiye báquede. Aru “Decoboaiyede coyuiye majibi José”, yure ji ũcuidore jípōecu abi yure, arejaquemavu faraón.

—Jūmenijicurecabe yure majide dacuyu aipe aiyuede mi decoboaiye báquede, arejaquemavu José.

Dinumu yópe arī coyurejaquemavu faraón:

—Iya Nilo āmicuriya jia ēcaruita cocorī nútevu yu. Aru ji jáiyede oteivecua siete paivu jiacurivu jiare etarī mama. Nore cōriáre āivu, apevu oteivecua siete paivu jiacubevu jiare etarī, mari, jiacurivure āri jebema ina jiacubevu. Que teni coedavu yu. Aru cojedeca cāriduvaicu yu. Aru āme decoboavu yu cojedeca. Veañuare jávuicu yu. Diñuáre veavua siete paivua uravua pīarī davu. Aru dinumure siete paivua veavua yaivua obebeyabea curivua pīarī darī meavuare āri jebavu, arī coyurī buojarejaquemavu faraón.

—Cūinārora coyuiño cuvū mi puque āme decoboaiye báque. Ũi daquiyede mure coyuyube Jūmenijicu. Ina siete oteivecua jiacurivu aru veavua uravua siete paíjuapebu. Aru ina siete oteivecua jiacubevu aru veavua yaivua ape siete paíjuapebu.

Daiujua siete paiujua āiye curī, vainí tuquiyebu. Ubenita no yóboi, ape siete paiujua āiye cubequiyebu. Que baru pōecu majicure voiyə jauvu mure, yebacavure ũi cójijovaicōjequiyepé ayu āiyede imuroa coapa siete paiujuare, caivu maje ārajiiyepé ayu diujuare āiye cubequijujuare, arejaquemavu José faraóre.

Ũi que aiyede jápiarī, yópe arejaquemavu faraón:

—Mi pueno pōecu majicu cubebi. Jāmenijicu majide daquemavu mure caiye iyede. Que baru jabotede daquijivu mure caivu Egiptocavure aru purucavaicōjequijivu mure caiye Egiptoquede, arejaquemavu Joséde.

José Egipto āmicurijoborōcavure ũi jaboteino mácarō

Génesis 41.37-50

(Hechos 7.11-16, Hebreos 11.21-22)

Treinta paiujua cuvacuta, memecarī búrejaquemavu José faraóre, Egipto āmicurijoborōcavure jaboteyu. Nomicurejaquemavu Egiptocacoque, Asenat āmicucu. Pucarā mamara ũmu jueдова cuvarejaquemavu, Manasés āmicucu aru imacu Efraín āmicucu.

Siete paiujuare José epeicōjenejaquemavu ũre memecaivure āiyede epeiñamia jívui. Diujua vainíburu yóboi, āiye cubeno darejaquemavu. Que baru Egiptocavure bojedaránurejaquemavu āiyede José yebai, iñamia āiye epeiñamiare. Aru apenoa joborōai máre āiye cubedejaquemavu. Que baru dijoborōacava máre āiyede bojedaránurejaquemavu Joséde.

Aru Canaán āmicurijoborōi máre āiye cubedejaquemavu. Que baru Jacob mamarare yópe arī coyurejaquemavu:

—Egiptoi āiye cue jápuravu. Que baru muja bojedaránujara āiyede nore, arejaquemavu.

Népacu ũi aiyepé darī, nurejaquemavu Joséi mamina Egiptoi. Ubenita néyocu Benjamíne jarobedejaquemavu népacu náque. Que baru mautedejaquemavu jipacunque. Egiptore eaivu, Joséde āiye jēniarejaquemavu ũi mamina, ũre nacachini, jacoyurādaivu. Cūiná náre coreóvarejaquemavu Josécapūravu. Ubenita ũre coreóvabedejaquemavu na.

—¿Árocavurū muja? arejaquemavu náre.

—Ñuja Canaácavutamu. Cūinácuí mára doce paivubu ñuja. Ubenita cūinácu ñujeyocu bácu yaiqué mavu. Aru apecu mau-teame ñujepacunque. Áiyede bojedarádaivubu, arejaquemavu jiburā Joséde.

Náre arejaquemavu José:

—Ijoborōre jári coenínivubu muja. ¿Que teni dupini jára-daivu batenáru muja? Yure meyuyaivubu muja. Que baru cūinácu mujacacu davajacurī mujeyocure yore. Aru apevu mujare epequijivu ámeina teivure jēni jacoñami jívui ũi dai-yeta, arejaquemavu José.

Yóbecurijāravua yóboi, bedióva coyurejaquemavu náre:

—Yu Jūmenijicure pue dayutamu. Que baru mujare jaetova-quijivu. Cūinácu mujacacu mautejacurī. Aru apevu mujevure áiyede nuvarajaramu. No yóboi davajarā mujeyocure ji yebai, arejaquemavu José jiburāre.

Ũi que aiyede jápiaiva, jiburā pare chīorejaquemavu. Aru yópe arejaquemavu ne baju:

—Maje bajurecabu ñai jabocu ũi ámeina daimara. Majeyocu José bácuře maje ámeno daiye báque boje, Jūmenijicu maja boropateivure jári, ñájine dayube, ne baju arī coyurejaquemavu.

Aru némamicu, Rubén, arejaquemavu:

—“Ámeno dabenajarevu majeyocure”, arīducacu yu mujare. Ubenita ye jápiabeteavū muja yure. Que baru maje ámeno daiye báque boje, ñájivubu maja cari, arejaquemavu Rubén.

Ne que aiyede jápiabecupe teyu José, etarī nurejaquemavu. Nácacu, Simeón ámicucu, buoicōjenejaquemavu ámeina teivure jēni jacoñami jívui. Aru apevu jiburāre copainuicōjenejaquemavu ne joborōi. Dinumu ũi yebacavure yópe arī daicōjenejaquemavu:

—Ne adaicurubua jívui áiyede adacajarā náre. Buidícurubua dajarā dicurubua. Aru tāuturare, ne bojedaráduiye báquede, adajarā dicurubuai, arejaquemavu José.

Que teni jiburā áiyede bojedará jebedejaquemavu. Aru Canaán ámicurijoborōi copainurejaquemavu na. Mái nure nuivu bácuva járavu joarō, ne cārajinoi earī, cūinácu nácacu ũi curubure jōdeni, āocuyu ũmaiāimacure, járejaquemavu ũi curubu jívui tāuturare, áiyede ũi bojedaráduiye báquede. Aru caivu ne

curubua jívui jári, nopedeca ne tāuturare earejaquemavu. Jári cuecumari, jidurejaquemavu. “¿Aipe dacuba majare Jūmeni-jicu?” arejaquemavu ne baju. Que arī buojari, nure nurejaquemavu. Ne joborōi earī, yópe arī coyurejaquemavu népacure:

—Ñujeyocu Benjamíne urī darobi Egiptocacu jabocu. Ére nuvamevu, bedióva nuiye majibevu ñuja. Áiyede ĩnanuiva nuiye majibevu, arī coyurejaquemavu népacure.

Népacure coyurī jebeniburu yóboi, úcapūravu chĩoñu, yópe arejaquemavu:

—Benjamíne, jímacure, ye mujaque jarobevu yu. Jímacu bácu cūinácu jave bíjaquemavu. Aru apecu jímacu, Simeón, ne buoimu cucu ámeina teivure jēni jacoĩnami jívui jápurabi. Que baru jímacu, Benjamín, jiburā ne teiyepe bíjainore ubevu, arejaquemavu népacu.

No yóboi, áiyē cūinéjaquemavu náre. Cūiyede jári, yópe arejaquemavu Jacob ũi mārare:

—Egiptoita áiyede bojedarānujara muja, arejaquemavu.

Ũi que aiyede jápiarī, ju arejaquemavu.

—Ñujaque Benjamín ũi numenu Egiptoita, ñuja nuiye majibevu, arejaquemavu népacure.

Que teni Rubén Judámaque yópe arejaquemavu:

—Jāveneca aivubu, “Mímacure Egiptoita dajocabenamu”. Ére ĩni copaidarājaramu ñuja, arī coyurejaquemavu népacure.

Ne que aiyede ju arejaquemavu ũi:

—Dinumu apa nuvajara Benjamíne, arejaquemavu népacu.

Que teni tāutura urarō aru cuve ure nuvarejaquemavu, Egiptoi nuivu. Jacob ũi mára néyocu Benjamíque Egiptoi earejaquemavu. Ne eaiyede, “¿Mujepacu curi?” jēniari járejaquemavu José. Ne ju aiyede jápiarī, aru ĩmacure Benjamíne jáñu, torojurejaquemavu. Torojucu, jiburāre ũi cūrami Benjamíque cuturī, “Áradajarā”, arejaquemavu. Aru Simeóre máre, ne buoimu mácare, jaetovarejaquemavu jacoĩnamine jocarī. Ũi cūramine ne earĩburu yóboi, áiyede jīni, ĩmacure urarō áiyede jidejaquemavu. Aru caivu torojurejaquemavu.

Ne āriburu yóboi, ũi yebacacure yópe arejaquemavu José:

—Ne puecurubuare áiyede buivájacu mu. Aru bedióva ne áiyē bojedarĩduiye báque, ne tāuturare dicurubuare adajacu mu cojedeca. Tāuturare adarī, néyocui puecurubui ji

ũcuido bojecuridore adajacu mu, arĩ coyurejaquemavu ñai yebacacure José.

Aru ũta ju arĩ, José ũi ãaicõjeiyepe ãacunurejaquemavu ã. Aru cõmiáijãravuita ne joborõĩ copainuridurejaquemavu José jivu. Ne nurĩburu yõjĩboi, maumena ina nure nuivure boquecunurejaquemavu ñai yebacacu náre. Boqueni, yópe arejaquemavu:

—Ji jabocui ũcuido bojecuridore ñavarebu muja, arejaquemavu ñai yebacacu.

—¡Aichĩa, bítamu! Mi aidore ñavamevutamu ñuja. Ácui curubui didore eaya, ũre boarĩ jaravajacu mu. Aru ñuja cariva cãreja mi jabocui yebacavu tenajivu quéda, arejaquemavu.

Ne que aiyede, ne ãiye curicuruare jodeni, voarĩ, vorejaquemavu ã. Benjamín ũi curubuita dido ũcuidore earejaquemavu. Diede jãri, cucumari, jidurejaquemavu Joséi mamina. Ñai yebacacucue copainurejaquemavu José yebai.

Earĩ, nacachinejaquemavu ũi yebai. Aru ũcapũravu yópe arĩ jēniari jãrejaquemavu:

—¿Aipe paino yure ñavararu muja? Ji ũcuidore iñu mácu ji yebacacu bacuyáme. Mujacapũravu copaiye majivu muja, arejaquemavu José.



Ëi que aiyede, Judá arejaquemavu:

—Mu, ji jabocu, coyauquijivu mure. Benjamín ñujeyocure pare jecubi ñujepacu. Apecu ñujeyocu José ámicucu bácu yai-quémavu. Que teni ñujepacu pare chõoimi. Que baru jýyocu ñi memejuroede memequijivu yu. Mi yebacacu jacojacu yure. Benjamín ñi copaibedu, copaini majibevu yu jipacu yebai, arejaquemavu Judá.

Ëi que aiyede jápiarī, José coyurīdurejaquemavu náre. Que teni Egiptocavu caivu ñi yebacavure etaicōjenejaquemavu. Ne etarīburu yóboi, José ñ jivunque mautedejaquemavu. Que teni José yópe arī coyurejaquemavu jiburāre:

—Yábu José. ¿Jipacu curi cāreja? arī jēniari járejaquemavu José.

Ne ju arīburu yóboi, duibajīeneca yávarejaquemavu jību-rāre:

—Muje bajo “Joséde ámeina dávū maja”, abejarā. Jāmeni-jicu bateáme yure Egiptoi daroyu, meadacuyu caivu mujare, mujevure máre, áiye cubede. Caride pucaujua áiye cubeno nuivu. Aru jauvu cāreja cūinápurape paiujuata. Que baru mau-mena nujara muja. Jipacure, aru ñ jivu caivure, ne cuvae cai-yeque davajarā muja yui, arī coyurejaquemavu José.

Que teni José jiburāre ĩmacu Benjamíque copaicōjenejaquemavu ne joborōi. José ñ jivure ñi coyuiyede jápiarejaquemavu faraón. Ëre jápiayu, torojurejaquemavu.

—Mipacu caivu mamaraque yuita dajarāri, arejaquemavu faraón Joséde.

Que teni José jipacure cuvede jarorejaquemavu. Caipucapuruape paivu ũmaiāimara cuve méne nuvari, aru apecu caipucapuruape paivu mái daivu ne ārajyede nuwarejaquemavu. Nui-vure jáñu José, “Meajarari caivu”, arejaquemavu. Aru “Que bazarāri”, arī ju arejaquemavu Benjamín jiburāque.

Obediujua vaidējaquemavu, Jacob mamacure ñi jámeno. Que baru “José mīmacu aputebi” arī, ne coyuiyede jápiayu, “Jāve ámevu”, arīdurejaquemavu Jacocapūravu. Ëbenita José ñi daroicūare jáñuvata, “Jāvetamu. Jīmacu José cucube cāreja. Ji yaiquíye jipocai ĩre jácunuquijivu yu”, arejaquemavu Jacob.

Que teni Jacob mamaraque Egiptoita nurejaquemavu, macu Joséde jácñu. Noita ne eaiyede, pare torojurejaquemavu José. Que teni José jipacure faraón yebaita nuwarejaquemavu,

ũi jacoyuquiyepa ayu ũre. Aru mearo ðarejaquemavu faraón náre. Jacore caivu ũ jivuque Gosén ámicurijoborõi epedejaquemavu faraón. Aru Egiptocavu Jacob jivure ámidorejaquemavu Jacob ámicuriyajubo. Torojucu curejaquemavu Jacob nore dieci-siete paiujuare ũi yaiquíye jipocai.

—Ūbenita yure ji yainíburu, yui jaruvabejarã ji baju bácarõre. Ji joborõi, Canaán Jūmenijicu majare ũi epeijoborõ mácarõi yure jaruvajarã ji baju bácarõre, arejaquemavu Jacob.

Que baru José jípacu bácuí yainíburu yóboi, ũ jivuque torojurĩ curejaquemavu. Obediujua José Egiptocavu ne jabocu barejaqué mavu. Que baru faraón ũi joborõcavuque Joséde jecurejaquemavu. Jūmenijicu cadatedejaquemavu Joséde, Egiptocavu ne jabocure. Que teni mearo ðarejaquemavu Jacob ũi pōeva mácavure.

Egiptocavu Israecavure ne ámeno ðaino mácarõ

Éxodo 1

(Hechos 7.17-19, 13.17, Hebreos 11.23)

José aru Benjamín jiburãque Israel ámicuriyajuboa doce paiyajuboa buipōeva marejaqué mavu. Curejaquemavu Egipto ámicurijoborõi pu ne yaiyeta. Aru na mácavu ne yainíburu yóboi, névucapūravu Egiptoĩ curejaquemavu. Obedivu juedocuvarejaquemavu na.

Obediujua yóboi, obedivu cūpururejaquemavu. Dinumure apecu faraón Egiptocavure jabotedejaquemavu. Ũ José bácare coreóvabedejaquemavu. Ũ mácare ye árumenejaquemavu. Que teni obedivu Israecavu ne nuiyede jáñu, pare coenínejaquemavu. “Maja Egiptocavu maje pueno parure nuñama ina Israecavu”, arejaquemavu. Que ayu, náre jidurejaquemavu. “Apeno joborõcavu pōeyajuboa ne boarádaru majare, ina Israecavu náque boajébu majare”, arejaquemavu.

Náre jiducu, caivu Israecavure pare parurõ baju memecõjenejaquemavu faraón. Ũi memecõjeimara ũi yebacavu barejaqué mavu na. Yajuboa, yajuboa epeyu, mamaĩmaroa ne oteiyede epeñamia curiĩmaroare ðaicõjenejaquemavu faraón, jobotucaruare ðaicõjeñu. Ne memeyede, pare ñájine ðarejaquemavu

náre coreipõeva Egiptocavu. Ina Egiptocavu ne ámeno ðaiyedeca Israecavure, obedivu juedocuvavivu barejaquémavu na.

Que baru faraón yópe arĩdurejaquemavu ina nomiva corei-nomivare Israecavu nomiva ne juedocuvaede:

—Israecavu nomiva ne juedocuvaede, ũmu juedocu ũi pōetedu, boarí jaruvajarā ũre. Ũbenita nomi juedoco ōi pōetedu, boarí jaruvabejarā ōre, arĩdurejaquemavu.

Ũi que aiyedeca, ina nomiva coreinomiva ũi cōjeiyepe ðabe-ðejaquemavu, Jūmenijicure ne puedaiye boje. Ũmu juedojĩna boarí jaruvabedejaquemavu. Ne boabéde jáñu, torojurejaque-mavu Jūmenijicu. Náre torojucu, obedivu juedocuvare ðareja-quemavu Israecavu nomivare. Ũbenita faraócapūravu yópe arejaquemavu caivu ina Egiptocavure:

—Israecavu ũmu juedovare ne pōeteniburu yóboi, náre jiai jaruvajarā, arejaquemavu náre.

Moisés Israecavure ũi cadateiyurĩduino mácarō *Éxodo 2.1-22*

(Hechos 7.20-29,35, Hebreos 11.23-27)

No yóboi, cūinácu Israecacu, Amram ámicucu, aru jímare-paco, Jocabed ámicuco, Leví bácu ũi pāramena curipinidu teivu ũmujicure juedocuvarejaquemavu. Némajicu meajicu bareja-quémavu. Que baru jípaco nijicure jiaita jaruvaiyubedejaque-mavu. Que teni yóbecurā aviáva bajo nijicure yavedejaque-mavu ne cūrami jívui. Ũbenita no yóboi, “Bucure nuñure, ya-veni majibevu maja”, arejaquemavu.

Que baru yópe ðarejaquemavu ō. Puede cōenóque jĩjovareja-quemavu, oco cobequiyepe ado. Que ado, dipue jívui adarejaque-mavu mamajicure. Ōi adarĩburu yóboi, ĩni, ěmeni nuri jia ěcarui jórejaquemavu nijicure. Puechĩabo jēneboi yavedejaque-mavu ũre. Que ðado, nijicui paco mamacore noi joijicure jári jaroicōjenejaquemavu.

—Jári cujuconujaco pue ĩmarijicure, arejaquemavu mama-core, nijicui mamicore.

Quĩjino yóboi, Egiptocavu ne jabocui máco, faraóĩ máco, ěmeni, cuyaconurejaquemavu ō jiai. Que tēdo, ěmedo, puede

jári, òi yebacacore “Davacajaco yure dipuede”, arí jarorejaquemavu òre. Òi davaiyede dipuede, voarí, ne jáiyede oyú barejaquemavu nijicu. Que oyure jári, cõmaje ároje járejaquemavu ò nijicure. Que daiyede jádo, nijicui mamico yópe arejaquemavu faraói mácore:

—Israecacore voconucojivu, nijicure nuoicõjecodo, arejaquemavu ò.

Que ado, nijicui pacore earí, cuturí, davarejaquemavu nijicui mamico faraói máco yebaita. Aru faraói máco bucuóvaicõjenejaquemavu òre. Que baru nijicui paco úre nuvarejaquemavu òi cūrami, úre bucuóvacacodo. Aru faraói máco bojedarejaquemavu, òi bucuóvaiye boje. Òi bucuríburu yóboi, jípaco úre nuvari faraói máco yebai jídejaquemavu, òi cuvacojiyepe ado mamacupe. Òre cuvacota cari, Moisés ámidorejaquemavu.

No yóboi, Moisés bojuyo nurejaquemavu. Cūinájáravu cucunurejaquemavu ù. Que teyu, Israecavu ne ámeno vaiyede meimeivure járejaquemavu. Ámeno vainí ne memeyede, cõmaje

ároje járejaquemavu. Cūinácu Egiptocacu Israecacure ùi boaiyede, jorojini járejaquemavu Moisés. Jorojĩnu, apevu ne jáme jēneboi, ñai Egiptocacure boarí jaruvarí, ùi baju bácarõre ēpacūi yuarí jaruvarejaquemavu Moisés.

Apejāravui bedióva cojedeca cucunurejaquemavu. Que teyu, pucarā Israecavure ne baju ádamateivure járejaquemavu. Ne ádamateiyede jáñu, cūinácu nácacu apecure boayúre jári, jararejaquemavu úre. Òi jaraiyede jápiayu, úre boayúcapūravu úque joro-



jīnejaquemavu. Que jorojīñu, yópe arejaquemavu Moiséde:

—Mu ñuje jabocu ámevu mu. ¿Ënoare Egiptocacure mi boarí jaruvaiye báquedepedeca yure boarí jaruvacudayu batecúrũ mu? arejaquemavu.

Ëi que aiyede jápiayu, jidurejaquemavu Moisés. “Caivu Egiptocavu ji boarí jaruvaiye báquede majima caride”, arí dápiayu, jidurejaquemavu ñ. No yóboi, faraón Egiptocacure Moisés ñi boarí jaruvaiye báquede jápiarejaquemavu. Que jápiayu, Moisés ñi boarí jaruvaiye báque boje, ñre boarí jaruvaiyarĩdurejaquemavu.

Que baru Moisés Egiptoi cucu bácu, dupini nurejaquemavu Madián ámicurijoborõi. Noita earí, dijoborõcacu sacerdoteque curejaquemavu. No yóboi, ñi máromivacaco cūináco Séfora ámicucoque nomicurejaquemavu Moisés, Aru na ñmujicure juedocuvarí, Gersón ámidorejaquemavu.

Israecavure Jūmenijicu ñi cadateicõjeino mácarõ Moiséde

Éxodo 2.23-4.31

(Mateo 22.32, Marcos 12.26, Lucas 20.37, Hechos 7.30-35)

Obediujua yóboi, Egiptocavu ne jabocu bácu yainíburu yóboi, apecu Egiptocavu ne jabocu bacuyú oatuvarejaquemavu, ñ máre faraón ne aimu. Egiptocavu Israecavure, ne yebacavure, ñájine darejaquemavu. Diede jári, Jūmenijicu cadateiyurejaquemavu Israecavure, ñi pōevare. Que baru Moisés ñi cuede Madián ámicurijoborõi, ñre cuetedejaquemavu Jūmenijicu.

Cūinájáravu ñi vácui oteiāimarare jári coreyu barejaqué-mavu Moisés pōecubenoí. Jári coreyu, Horeb ámicuricū cūrácūi eayu, jocujicu uruijicure járejaquemavu. Dicu cainumua éni cūiménejaquemavu. Dicure jáñu, dicu yebaita eayu, Jūmenijicu ñi ámiáre órejarejaquemavu, “Moisés” arí. Aru Moisés ju arejaquemavu ñre. Dinumure Jūmenijicu yópe arejaquemavu ñre:

—Yútamu Jūmenijicu. Miñecuva Abraham, Isaac, aru Jacob ne ju aimumu yu. Mu núvu caride joborõ mearo bají, ji cue boje yui. Aru yúbu meacu baju caivu pueno. Que baru dujacu mu mi

curaidoare, pueđacuyu yure. Yu jáivu ji pōeva urarō ñájivure no joborō Egiptoi. Yu jápiaivu ne oiyede. Que baru daivu yu, meadacudayu náre. Nujacu cari. Jacopaiyovaquijivu mure Egiptoita, mi jaetovaquiyepi ayu ji pōevare nore jocarī. Náre nava-cuyumu yu Canaán āmicurijobōroi, dijoborō meajoborōi, miñe-cuva mácavu ne curijoborō mácarōi. Noita torojurī curājarama na, arejaquemavu Jūmenijicu Moiséde.

Cadatecudayu, nore Moiséde Egipto āmicurijoborōi jaroreja-quemavu Jūmenijicu, yópe arī:

—Moisés, mu Egiptocavu ne jabocu yebai yávacunujacu mu. Múcapūravu Israecavure, Egiptoi curivure, jaetovacunujacu, arejaquemavu.

Ũi que aiyede jápiarī, Moisés ju abedejaquemavu.

—Diede, mi aiyede, daiye majibevu yu, arejaquemavu.

—Múque cuscuyumu yu. Que baru oacuyumu mu, arejaquemavu Jūmenijicu Moiséde.



—Ji eaiyede Israecavu yebai, yure jēniari járajarama. ¿Aipe arī coyūquijidi yu ne jēniari jáiyede? Jūmenijicare arī jēniari járejaquemavu Moisés.

Aru Jūmenijicucapūravu arejaquemavu ūre:

—Yópe arī coyujacu náre: “Jūmenijicu, Abraham, Isaac, aru Jacob ne ju aimu, darobi yure, mujare cadatecuyu”. Iyede coyujacu Israecavu bucuvare. Mi coyurīburu yóboi náre, muja caivu nujara faraón yebai, coyurājivu ūre yópe arī: “Jūmenijicu pōecubenoí nuicōjeimi ñujare, yóbecurijāravua baju ñuje nurajinoita, oteiāimarare ñuje boarí, juarí. jámuóri, mearore jínajiyeye ayu ūre”, arī coyujarā faraóre. Ūbenita muje que aiyede jápiayu, mujare jaetovabecube. Ūi jaetovabede jári, yúcapūravu Egiptocavure āmeno baju vaidé dacuyumu yu. Ji que darīburu yóboi, ū mujare jaetovacuyume. Pare muje nuiyede ucuyume ū. Que baru mujare nuicōjecuyume, arejaquemavu Jūmenijicu.

Ūi que aiyede jápiayu, Moisés yópe arejaquemavu:

—Israecavu bucuvu mi aiyepedeca ji coyuru, ju abenama na, arejaquemavu ū.

Ūi aiyede, Jūmenijicucapūravu Moiséde ūi tuturiteiyore joborōita jūaicōjenejaquemavu. Aru ūi jūaiyede diyore, āda tedejaquemavu. Āda teiyede jáñu, pīcomura jēicōjenejaquemavu ūre Jūmenijicu. Ūi jēiyede, ādacapūravu tuturiteiyo mautejaquemavu cojedeca. Ūi que darīburu yóboi, Jūmenijicu Moiséde ūi purure jajuídorī adaicōjenejaquemavu ūi cuitótecaje jívui ñareba yebai. Moisés ūi cōjeiye báquepedeca darejaquemavu. No yóboi, ūi puru ĩni jaetovaiyede, churiá pojeipuru curejaquemavu. Bedióva cojedeca ūi purure jajuídorī jacorejaquemavu ūi ñareba yebai cuitótecaje jívui. Aru ūi puru ĩni jaetovaiyede, churiá cubepuru, meapuru mautejaquemavu. Ūi que daiyede, Jūmenijicu yópe arī coyurejaquemavu ūre:

—Iyo mi tuturiteiyoque darī jádovaru, mi puruque darī jádovaru máre, Israecavu bucuvu mure ju arājichuma. Ūbenita mure ne ju abedu, ocore jiai ĩni, yuarí, jūari joborōi, dioco jivetequiyebu. Que teni mure ji jaroiyede majinajarama, arejaquemavu Jūmenijicu.

Ūi que aiyede, Moisécapūravu Jūmenijicu ūi daicōjeiye báquepe daiyubecu jidurejaquemavu. Aru jiducu, yópe arejaquemavu:

—Ye, nurié yávabevu yu. Jiducubu yu, arejaquemavu Moisés.

Ëi que aiyede jápiayu, Jūmenijicu yópe arejaquemavu:

—Iyede ārajacu. Yu Jūmenijicubu. Que baru yávacari mi jijecāmure darejacacu yu. Ji aiyepede dacunujacu mu. Mi que dacunuru, cadatecuyumu, mearo mi yávaquiyepede ayu, arejaquemavu.

Ëi que aiyedeca, Moisés ñi aiyede báquipedeca daiyabedejaquemavu. Apecure jaroicōjenidurejaquemavu Jūmenijicure. Diede ubeni, Jūmenijicucapūravu jorojīnejaquemavu éque. Que jorojīñuvacari, yópe arejaquemavu Moiséde:

—Dinumu apa mure mimamicu, Aarón, cadatecuyume. Mure coyucuijivu, aru mácapūravu ére coyucuyumu ji coyuiyede báquede. Mi coyuiyu mácu coyucacuyume mure. Egiptoita mi eaiyede, copucuyume mure, arí coyurejaquemavu Jūmenijicu Moiséde.

Que coyurí buojarí, ñi vácú yebaita copaini nurejaquemavu. Ëi Egiptoita nuquinore ñi vácure coyurejaquemavu.

—¿Ji Egiptoita nariburu, meaquijidi yure, mi dápiaru? arí jēniari járejaquemavu ñi vácure.

Ëi que arí jēniari jáiyede jápiayu, ju arejaquemavu ñi vácú, Jetro āmicucu. Ëi ju aiyede jápiayu, nurejaquemavu Moisés, jímarepaco aru némacuque Egiptoi.

No jipocai, Jūmenijicu Moiséde Aaróre copuicōjenejaquemavu. Que teni Egiptoita ne nuiyede, náre mái copurejaquemavu Aarón. Ëi copuiyede, Moisés coyurejaquemavu ére caiye Jūmenijicu ñi coyuiyede báquede. Que teni Egiptoita ne eaiyede, ina pucarā caivu Israecavu bucuvaque cójijidejaquemavu. Caiye Jūmenijicu ñi coyuiyede báquede Moiséde Aarón coyurejaquemavu ina bucuvare. Ëi coyuríburu yóboi, Moisés ñi tuturiteiyoque āda darí jádovarejaquemavu náre. Aru ñi ĩniburu yóboi, ñi tuturiteiyo jocuyo tedejaquemavu. No yóboi, ñi puru churiá curipurure darí jádovarejaquemavu náre, aru dipuru meateiyede máre. Ëi que daríburu yóboi, ina Israecavu bucuvayópe arí dápiarejaquemavu: “¿Jāveneca Jūmenijicu majare cadatecudayuba?” arí dápiarejaquemavu. Que arí dápiaivu, mearore jídejaquemavu Jūmenijicure.

Egiptocavu ne jabocu Israecavure ũi
nuicōjemeno mácarō
Éxodo 5-10

(*Hechos 7.36, Romanos 9.17, Apocalipsis 8.7-8, 12, 9.3, 9.20-21,*
11.6, 16.4, 10, 21)

Dinumure Moisés Aarōmaque faraón yebaita earejaquemavu. Faraōcapūravure, Egiptocavu ne jabocure, yópe arejaquemavu:

—Jūmenijicu pōecubenoī nuicōjeimi ñuja ũi pōevare, ñuje torojave tenajipe ayu, ũre ñuje pueðarājiipe ayu, arejaquemavu.

—Numejara muja. Yure cārijovaiyurivubu. Maje memeyede dajocare daiyurivubu muja. Que baru mi pōevare nuicōjemevu yu, arejaquemavu faraón.

Que arī buojari, ũre memeicaivure, Israecavure, yópe daicōjenejaquemavu:

—Jipocai ne memeiye báque pueno caride parurō memeicōjējara Israecavure. Cōriá ne jobotucarua ðaiyede jibejarā náre. Cōriáre vorāñujarari na. Ũbenita ne memeiye báquepedeca cūináturu jobotucarua ðajarāri na jāravua coapa. Pōecubenoī torojave tenanūvu āmema na, jurācurivu. Ye memeyubema na, arejaquemavu faraón.

Ũi que cōjeiyede, Israecavu ne cōriá cuvabe boje, jobotucarua ure ne daiye báquepedeca jipocamia ðabeni, quéða obetucarua ðarejaquemavu. Jobotucarua ure ne ðabede jáivu, ne jabova Egiptocavu náre pare jarapopedejacquemavu. Que ðaiyede jáivu, Moisés Aarōmaque jorojīnejacquemavu. Moiséjā faraōque ne boroteniburu yóboi, Israecavu no jipoca ne ñájino mácarōpe pueno ñájinejaquemavu. Faraón náre parurō memeicōjenejaquemavu. Que baru Israecavu Moiséjāque jorojīnejacquemavu. Ne jorojīyede jáñu, Moisés Jūmenijicuque borotecunurejaquemavu:

—¿Aipe ðayu ñujare, yópe ðayurū mu? Jipocai ne ñájino mácarō pueno Israecavu ñájiñama caride, arī coyurejaquemavu Jūmenijicure.

Aru Jūmenijicu arejaquemavu Moiséjāre:

—Corejarā cāreja. Ji aiye báquepedeca ðacudayubu yu. Caiye ji aiye báquepedeca nuquiyebu. Faraón mujare jaetovacuyume.

Que baru Canaán āmicurijoborōi nuvacuyumu mujare. Dijoborōre mujare jícuyumu arejaquemavu Jāmenijicu Moiséjāre.

Ëi que aiyede jápiaivu, Israecavu bucvare coyurānurejaquemavu. Ne coyuiyedeca, náre jápiaiyubedejaquemavu.

Que teni Moisés Aarōmaque faraón yebaita earejaquemavu cojedeca. Noita earī, Aarón ñi tuturiteiyore joborōi jūarejaquemavu. Ëi que jūaiyede, āda tedejaquemavu. Ëi que jádovaiyedeca, faraón cuturīdurejaquemavu Egiptocavu yavié daipōevare, nopedeca ne đarājiyepe ayu abujuvai jabocui paruéque. Ûbenita āda, Aarón ñi tuturiteiyo bácarōque daimu, yavié daipōeva ādavare ne daimarare āri jaruvarejaquemavu. Que teiyedeca, faraón náre ju abedejaquemavu.

No yóboi, Jāmenijicu Moiséde jiaita ñi tuturiteiyoque joicōjenejaquemavu. Ëi joiyede, diya jia jivetedejaquemavu. Que teiyede diyacavu moa yainí cūinéjaquemavu. Que baru pōeva ne ũcujuroe oco cubedejaquemavu. Que teiyedeca, faraón Israecavure jaetovaiyubedejaquemavu. Ëi jaetovaiyubede jáñu, ure āmeno vaidé đarejaquemavu Jāmenijicu Egiptocavure.

Momavare dijoborōi jarorejaquemavu Jāmenijicu, ne cārijo-varajiyepe ayu Egiptocavure ne ecoiyede caiñamia cūramia



coapa. Ubenita que teiyedeca, faraón Israecavure jaetovaiyubedejaquemavu.

No yóboi murevare jarorĩ, aru no yóboi nuravare máre jarorejaquemavu, ne ñájine darājiyepe ayu Egiptocavure. Ubenita que teiyedeca, faraón Israecavure jaetovaiyubedejaquemavu.

No yóboi, Egiptocavu ne oteivecavure ijino darejaquemavu. Nópe teni, yainí cūiné darejaquemavu ne oteivecavure. Ubenita Israecavu jinacapūravu ne oteivecava yaibédejaquemavu. No yóboi, Egiptocavure bojodo churiá teni, ijíé tede darejaquemavu náre, pōevare aru oteiāimarare máre. Ubenita Israecavu ijíé tebedejaquemavu na aru ne oteiāimara máre. No yóboi ocare darejaquemavu cojedeca jājariyabea yópe cūrajiboape caino Egiptocavu ne curōi. Ubenita Gosén āmicurijoborōre, Israecavu ne curōre, diyabea tubedejaquemavu. Apevu Egiptocavu aru ne oteiāimara cūrami cāchinoi curivu yaibédejaquemavu. Ubenita obedivu jedevai curivure yainí cūiné darejaquemavu diyabea tuiye. Ubenita caiye iye Jūmenijicui nópe daiyedeca, Israecavure jaetovaiyubedejaquemavu faraón.

No yóboi, mujuñuvare jarorejaquemavu Jūmenijicu Egiptocavu ne joborōi. Ina mujuñuva ne oteiye pupuiyede āri jebedejaquemavu. No yóboi, Egiptocavu ne joborōi ñemino tede darejaquemavu. Ubenita Israecavu ne curōi ñemino tebedejaquemavu jāravure. Ina Egiptocavucapūravure yóbecurijāravua baju ñemié tarejaquemavu. Que dayu nueve paiye baju āmeno vaidé darejaquemavu Jūmenijicu Egiptocavure.

Cūiná caiye iye ũi āmeno daiye báquede vainíburu yóboi, faraón Israecavure nuicōjenidurejaquemavu pōecubeno yópe ne jēniaiye báquepe. Que nuicōjeñuvacari, Jūmenijicu náre āmeno ũi vaidé daiye báquede dajocaiyede jāñu, faraócapūravu bedióva cojedeca náre nuicōjemenejaquemavu. Cūiná yópe arĩ coyucōjenejaquemavu Moiséde Jūmenijicu faraóre:

—Mure boarí jaruvajebu yu. Que boaicōjeñuvacari, cuicōjequijivu mure, caivu ji paruéde pōeva ne jārajiyepe ayu, arĩ coyucōjenejaquemavu Jūmenijicu Moiséde.

Faraón Israecavure ũi nuicōjeino mácarō

Éxodo 11.1-13.6

(Lucas 2.23, Hechos 7.36, 13.17, 1 Corintios 5.6-8, Hebreos 11.28, Judas 5)

Faraón, Egiptocavu ne jabocu, Israecavure ũi nuicōjemene jáñu, cūiná āmeno vaidé dacuyu barejaquémavu Jūmenijicu Egiptocavure. Caivu ũmuva Egiptocavu mamapōteivure aru ne oteiāimara mamapōteivure máre boarí jaruvacuyu barejaquémavu Jūmenijicu ũi daroimu, ángele. Ũbenita Israecavure boacúdayu āmenejaquemavu. Jūmenijicu coyurejaquemavu Moiséde aru Aaróre máre, yópe arí:

—Muje daiyede yópe ji daicōjeiyepa jáñu, mujemarare aru muje oteiāimarare máre mamapōteivure boaicōjemecubu yu. Ñai aviá buijāravu caipucapuruaape paijārvuaa yóboi, cūramia-



cavu coapa ovejare o cabrare beorí ijarari. Ũmure, cūináju cuvavure, aru meacure, āmeno cubecure beojarāri na coapa. Ũbenita cūinādamicavu obebejīna curivu baru, apedāmicavūque cójijini, na pucadāmicavu cūinácu āimacure beojarāri na. Que beoivu bācavu, ũre meadajarāri yóvaicuvaijāravua baju. Dinumu ina oteiāi-

marare boajārāri na. Boarí buojarí na mácavure, jivede ĩni, jįjovajarari cūramia coapa caipucapūrvuaa bieive yebai aru bieive puenoi máre. Ne jįjovariburu yóboi, cūramicavu diñamita curí, miadáe tujārāri na. Noi ne cuede, ne boaimu mácure joajārāri caicure. Joaríburu yóboi, jāme-

nicu jěiduaque aru páu bucure daiye cubeque ájarari caivu Israecavu. Que áivu bácvu, áimacu bácu cūadoare aru jiaru pupuiyede máre jáivu, juarí jaruvajarári. Ne curaidoare doivu bácvu, ne cuvede meadaivu bácvu, aru ne tuturiteiyoare cuvarivu maumena ájarari na, arejaquemavu Jūmenijicu.

Ŭi que aiyede jápiayu, Moisécapūravu caivu Israecavu bucuvare diede coyurí jebedejaquemavu. Ŭi coyuiyede, ũi aiyé báquepedeca darejaquemavu ina Israecavu diñami. Aru ne que daiyedeca, caivu Egiptocavu némarare aru ne oteiáimarare máre mamapōeteivu bácvure boarí jaruvarejaquemavu Jūmenijicu ũi daroimu. Ŭbenita Israecavu ne cūramia jedevacobecapūravu jive ne jījovaiye báquede jári, diñamicacu mamapōeteyure boarí jaruvabedejaquemavu Jūmenijicu ũi daroimu. Ne cūramia puenoi vaidéjaquemavu. Ŭi vainíburu yóboi, Jūmenijicu ũi daroimu diñami ũi vaiñami “Pascua” ámidorejaquemavu Jūmenijicu, vaiñami aiyurō.

Ŭi que daiñami ñami corica baji, Jūmenijicu ũi daroimu boarí jaruvarejaquemavu caivu Egiptocavu ne mamapōeteivu bácvu ũmuvare, pōevare aru oteiáimarare máre. Ñai jabocu faraói mácu bácu máre yaidéjaquemavu. Diñamimareca faraón Israecavure nuicōjenejaquemavu. Páu bucure daiye cubede nuvarejaquemavu. Ape ne cuvede máre nuvarejaquemavu. Ne nurajiye jipocai, úruque ne daimeare, ne daitarabutare máre ape nópe árojaene jēniarejaquemavu Egiptocavure. Cuitótecajeare máre jēniarejaquemavu náre. Aru ne jēniaiyede Egiptocavu jidejaquemavu. Que teni diñami ina Israecavu Egiptoi curivu bácvu, seiscientos mil paivu baju ũmuva bojovu nuri, aru ũmuva bucuva, nomiva, aru jueдова máre nurejaquemavu Egiptore jocarí. Aru obedivu ne oteiáimarare nuvarejaquemavu. Israecavu curejaquemavu Egipto ámicurijoborói cuatrocientos treinta paiujua baju. Ne nuiyede, Sucot ámicuriimarói earejaquemavu.

Jūmenijicu ũi jaetovaiye báquede ũi pōevare Egipto ámicurijoboróre jocarí, áruicōjenejaquemavu náre aru caivu népāramena curipinidu teivu bárājivure máre ujuá coapa diñami mácarō, ne nuiñami mácaróre. Que baru ne torojave tenajiyede epedejaquemavu ũ, “Pascua” aiyuróre. Diñami mácarō áruriñami ujuá coapa ovejare o cabrare boarí joaicōjenejaquemavu Jūmenijicu Israecavure. Dijāravu jipocai, páu bucure daiyede

jaruvaicōjenejaquemavu náre cūramia coapa. Que teni cūínasu-manareca, páu bucure daiye cubede áicōjenejaquemavu ina Israecavure, torojuve teivure.

Aru Jūmenijicu yópe arī daicōjenejaquemavu Israecavure:

—Mujemarare aru muje oteiāimarare máre ũmuva matuiye mamapōeteivure, “Jūmenijicu jina majarári na”, ajarā muja, arejaquemavu.

Que ayu, Israecavu ne oteiāimarare mamapōeteivure, ũmu-vare, ovejavare aru cabravare máre, boarí, juarí, jámuóri, me-
rore jícōjenejaquemavu Jūmenijicu ũi baju. Aru apevu ne oteiāi-marare, yópe asnope paivure, boarí juaicōjemenejaquemavu mamapōeteivure. Quénora ne oatuvaimara, ovejare o cabrare boarí, juaicōjenejaquemavu. Que darí jádovaicōjenejaquemavu Egiptoí curivu bácvure Jūmenijicu ũi jaetovaiye báquede ārui-cōjeñu náre. Ne que daru, Jūmenijicu némarare caiye diede coyucōjenejaquemavu. Ne coyuiyede, diñamine Jūmenijicu Israecavure ũi me jaetovaiye báquede majidejaquemavu némara.

Jia urada Jūariya āmicuriyare Jūmenijicu Israecavure ũi jatare daino mácarō

Éxodo 13.17-15.21

(Hechos 7.36, 1 Corintios 10.1-2, Hebreos 11.29, Apocalipsis 15.3)

Ina Israecavu, Egiptoí curivu bácvu, Canaán āmicurijo-borōi yauéda nuiyarīduivu barejaquémavu. Ma nurinima ne nájurorima Filisteo āmicuriyajubocavu ne joborōi carejaque-mavu. Ũbenita Israecavu ne boaiyube boje Filisteovare, noi ne nuiyedeca, ina Filisteova Israecavure “Boainomu” ayu, ape-noita nuvarejaquemavu Jūmenijicu náre. Que baru ne joborōre jatuturejaquemavu.

Dipūravui ne nuino joarí vaidéjaquemavu. Sucot āmicuriī-maroi earejaquemavu. Nore ne nuiyede, Jūmenijicu náre nu-vañu, bicope ārojaroque jádovarejaquemavu ne nurajinore. Que teni náre jipocateino marejaquémavu. Jāravure ocopenibope ārojaro járorí aru ñamine toabope ārojaro járorejaquemavu no bicope ārojaro.

Ina Israecavu ne nuiyede Egiptore jocarī, nuvarejaquemavu náque néñecu José bácuī cūadoa báquede, yópe ũi daicōjeino mácarōpe jiburāre, ũi yaiquíye jipocai. Que baru Canaán āmicu-rijoborōi yuarī jaruvarājivu barejaquéjavu dicūádoa báquede.

Sucot āmicuriīmarore jocarī, Etam āmicurō, pōecubenoī earejaquemavu. Dipūravui nuīvu, jia uradare earejaquemavu, Jūariya āmicuriya. Aru jataiyurīdurejaquemavu. Ūbenita diya ēcarui cāicōjenejaquemavu náre Jāmenijicu.

“Israecavu nuiye maji-bema”, faraón ũi arī dāpiai-yede urejaquemavu Jūmeni-jicu. Náre faraōja ne cujurī nuiyede urejaquemavu. Israecavu ne nuriburu yóboi, ne dupini nuiyede coyurejaquemavu apevu ñai faraóre. Que baru ne coyuiyede já-piayū, yópe arejaquemavu:

—¿Aipe teni ina Israecavure nuicōjedeba maja? Ye memecabenama majare cojedeca. Náre jaetovaivu, ārumevuva jaetovarebu maja, arejaquemavu faraón, jarayū.

Que ayū, ũi churaravare cuturī, cójijovarī, ne jātu-ruicūa aru caballovaque Israecavu ne yóboi cujurejaquemavu. Aru faraón ũi baju jipocatedejaquemavu ũi churaravare. Israecavure bo-quenti, diya ēcarui curivure járejaquemavu. Ne daiyede jáivu, jidurejaquemavu na. Jidurivu, pare Jūmenijicure jēniari járejaquemavu, náre ũi cadatequiyepe aivu. Aru Moiséde yópe arī jararejaquemavu:



—Egiptoi ñuje copaidu, meajebu ñujare, arejaquemavu.

Ne jaraiyede jápiayu, Moisés yópe arejaquemavu náre:

—Jidubejarã. Corejarã cãreja. Majare Jūmenijicu cadatecuyume. Egiptocavu churarava bījarī nurajarama, arejaquemavu Moisés.

Jūmenijicu yópe ðaicōjenejaquemavu Moiséde:

—Israecavure ne cavede meadaicōjejacu caride, muje nurajipepe ayu, arejaquemavu.

Que cōjeñuvacari, bediόva arejaquemavu cojedeca:

—Mi tuturiteiyore jāmuόjacu Jūariya puenoi. Mi que ðaru, diya coricai cainima tenevepe oco cubeno nuquiyebu, arejaquemavu Moiséde.

Que ðayu, bicope náre jipocateino mácarōre ne yόboi epedejaquemavu Jūmenijicu. Ũi que ðaiyede, bicope paiye náre jacoturejaquemavu Moiséjāre. Que baru ina Egiptocavu churarava náre jāmenejaquemavu. Jacotuiyede, náre maumena nainējaquemavu. Que teni ðiñamine ũmevu parurō darejaquemavu ðiyare, cainiteneve nure ðaquino. Que baru Israecavu ðitenevei popoinoi vaivārī nurejaquemavu na. Vaivārī earejaquemavu apeduveita. Diteneve pucapūravua bieiba ðaiyepe earejaquemavu oco.

Dimai ne nuitenevede jāivu, Egiptocavu churarava náre cunjūrī, dimai nuridurejaquemavu. Ne nuiyede, Jūmenijicu āmeno vaidé darejaquemavu náre. Ne jāturuitarabua durī nure darejaquemavu. Que baru nuiye majibedejaquemavu na.

Que teni Israecavu ðiyare ne mearo vaivārī nuiyede jāñu, Jūmenijicu yópe ðaicōjenejaquemavu Moiséde:

—Mi purure jabiόvajacu mu iya puenoi, arejaquemavu.

Ũi que aiyede jápiayu, Moisés darejaquemavu yópe ũi aiyebáquepedeca. Nópe ũi jabiόvaiyede, ðiaque oco bediόva cojedeca náropedeca mautedejaquemavu. Que teni ina Egiptocavu churaravare ðiteneve nuivure muivári, yainí cūiné ðarejaquemavu. Ũbenita ina Israecavucapūravu mearo vaidéjaquemavu. Yópe Jūmenijicu cadatedejaquemavu ina Israecavure, Egiptocavu ne boqueni jēnadaiyuede jāñu.

Ũi que ðaiyede jāivu ina Israecavu, cucumarejaquemavu. Cucumaivu, Jūmenijicure mearo āruri parurejaquemavu. Que teni Jūmenijicure yuriarejaquemavu, náre ũi cadateiye báque boje. Yópe arī yuriarejaquemavu: “Jūmenijicu majare ũi cada-

teiyede úque torojurí, ‘Meacu, parucube’, arājaramu. Majare jári jipocateyu, Egiptocavure jacorí jaruvayu bácube jia Jūariyai. Ye Jūmenijicupe dayu cubebi. Ñ majare jári coreyube. Que baru Canaán āmicurijoborōi nuvañume majare mearo”, arī yuriarejaquemavu Moiséjá.

**Israecavu Jūariya āmicuriya ēcarui curivu bācavu
Sinaí āmicuricū cūracūi ne eaino mácarō**

Éxodo 15.22-17.16

(Juan 6.31,49, Hechos 7.36, 1 Corintios 10.3-4, 2 Corintios 8.15, Hebreos 9.4, Apocalipsis 2.17)

Ina Israecavure, Jūariya ēcarui curivu bācavure, nuvarejaquemavu Moisés apeno joborō pōecubenoí, Shur āmicurōi. Yóbecurijāravua baju vaivárejaquemavu dijoborōi. Aru na ye oco eabedejaquemavu. Nuivu, Mara āmicurōi earejaquemavu. Noi oco doaicobe curejaquemavu. Ubenita dicobe cue oco jūmenejaquemavu. Die ocore ūcuri jáivu na, jorojīnejaquemavu Israecavu. Que baru Moiséde āmeno yávarejaquemavu. Ne āmeno yávaiyede jápiayu, Moisés Jūmenijicure yópe arī jēniari járejaquemavu:

—¿Aipe daquijidica yu? arejaquemavu.

Ñi que aiyede jápiayu, Jūmenijicu jocujicure jáðovarejaquemavu ūre. Aru arejaquemavu:

—Nijicure dicobe jívui davarí jaboáru, die oco jūmemaque ēmijuricoro nuquiyebu, muje ūcurajiyepe ayu, arejaquemavu ũ.

Nijicunque darejaquemavu Moisés yópe Jūmenijicu ñi aiyebáquepe. Que teni na caivu ūcurejaquemavu die me ocore. Noi Mara āmicurōi ne cuede, yópe arī coyurejaquemavu Jūmenijicu náre:

—Cainumua yure ju ajarā muja. Muje ju aru yure, ñájine dabecubu mujare yópe Egiptocavure ji ñájine daiye báquepedeca, arejaquemavu.

No yóboi, Elim āmicurōi earejaquemavu na. Noi doce paicobea oco doaicobea curejaquemavu. Que baru mautedejaquemavu noi, jabuóvarājivu cāreja.

Elim āmicurōi curivu bācavu, pōecubenoī nurejaquemavu. Que baru bediōva cojedeca Moisède, yópe arī jararī búrejaquemavu:

—Egiptoi āiye cuteávū. Yui, pōecubenoī, curivu āvuéque yai-nájaramu. Que baru Egiptoi űje copaidu, meajebu űjare, arī jaraivu arejaquemavu Moisède.

Ne que aiyede, Moisés yópe arejaquemavu náre:

—Yure jaraivu āmevu muja. Quénora Jūmenijicacapūrave jaraivubebu muja. Ŭcapūravu majare āiye jíye majibi, arejaquemavu náre.

No yóboi, obedivu tucuráva Israecavu ne cārajitavai eare đarejaquemavu Jūmenijicu nainú baji. Ina Israecavu ne āraji-marare jēnejaquemavu. Apejāravu javejīnai ure āiye boe járo-rejaquemavu joborōi. Que teni Moisés yópe arī coyurejaquemavu náre:

—Jūmenijicu űmuita mujare űi daroiye āiye maná āmicuede. Maje ārajiye jícuyume ű. Jāravua coapa iye manáre aru űamiá coapa ina tucurávare ārurivu baru, iye āiyede cóji-jovarāñujara muja. Cūinácu coapa pucalitros iye manáre ĩjara muja. Quénora ĩjara muja. Bediōva ĩmejara. Die āiyede meadarī, cōmiámejara. Muje que meadaru, die āiye ju cue nu-quiyebu. Ŭbenita maje jabuóvaihāravu sábadoi iye āiyede ĩmejara. Quénora jipocacajāravui yóvaicuvailitros cūinácu coapa ĩjara muja. Jabuóvaihāravuque ārajiyede maje ĩni meadaru, ju cubebu āiye, arī coyurejaquemavu Moisés.

Ŭi que aiyede, ina Israecavu die āiyede boe jevarī cójiovarejaquemavu. Apevu majiívarō adaivuvacari, apevu urarō adaivuvacari, cūináturu epedejaquemavu. Ŭbenita apevu majiívarō die ne jevaiye báquede meadarī cōmiáridurejaquemavu. Que teni Moisés űi đaicōjeiye báquepedeca đabedejaquemavu. Que baru ne meadaiyede die āiyede, ju cue nurejaquemavu die āiye, yópe űi aye báquepedeca náre. Aru űrojurī vaidējaquemavu. Die āiye ju cue nuiyede jáivu, yópe Moisés űi coyuiye báquepedeca náre “Jāvenecabu”, arī dāpiarejaquemavu na. Aru apevu ne jabuóvaihāravu jipocacajāravu yóvaicuvailitros cūinácu coapa epebedejaquemavu, yópe Moisés űi đaicōjeiye báquepe. Na máre űre vainí turejaquemavu. Que epebevu, dínúmure ne āiyede vorĩdurejaquemavu na jabuóvaihāravui. Ŭbenita eabedejaquemavu. Ne

jabuóvaiyede urejaquemavu Jūmenijicu. Que baru dijāra-vure memecōjemenejaquemavu náre. Aru ye āiyede jíbde-jaquemavu dijāravui.

Iye ne āiye maná āmicue yópe cilantro āmicue yabeape aru mumicoro vaijuepe barejaquemavu. Apenumua die manáre jatúorī buojarī, aru apenumua coacávarī buojarī ārejaquemavu.

No yóboi, yópe Jūmenijicu ũi aicōjeiye báquepe Moisés areja-quemavu Aaróre:

—Cūinátōcu cuvede adaitōcu daicōjejacu, maje ārurajitōcu Jūmenijicu “Yópe darājaramu” ũi aiyē báquede. Aru puebu pu-calitros curibu die manáque buivájacu mu. Buivárī buojarī, epejacu dibure ditōcu jipocai. Yópe dajacu majepāramena curi-pinidu teivu bárājivu ne majinajiyēpe ayu aipe ārojaene die maná, arejaquemavu Moisés.

Ũi que arīburu yóboi, caiye ũi daicōjeiye báquepedeca dare-jaquemavu Aarón. Que teni ina Israecavu jāravua coapa die āi-yede jevarejaquemavu. Ubenita ne jabuóvaijāravu matuiyeda jevabedejaquemavu. Que baru Canaán āmicurijoborōi eaivuta, die āiyede ārejaquemavu cuarenta paiujuare.

No yóboi, Refidim āmicurōi eaivu, mautedejaquemavu. Nore oco cubedejaquemavu. Que baru Moiséde jararejaquemavu bedióva cojedeca.

—Cūiñóvainoque yainájaramu maja, arejaquemavu na.

—Jūmenijicure jarabejarā muja, arī coyarejaquemavu náre Moisés.

Que baru Jūmenijicure ũi daquinore jēniari jārejaquemavu. Ũi jēniari jáiyede yópe arī ju arejaquemavu ũre:

—Diyo mi tuturiteiyo, Egipto mi cuvariyo bácarō, mi popo-vare daiyo bácarō Jūariyare, davajacu diyore. Aru Israecavu bucuva máre davajacu cūrava yebai. Diva yebai eayu, mi tutu-riteiyoque cūravare jādojacu, arejaquemavu Jūmenijicu.

Ũi daicōjeiypedeca, Israecavu bucuva ne jári jaroinoi, Moisés diva cūravare jādorejaquemavu. Ũi jādoriburu yóboi, divai oco etarejaquemavu, pōeva ne ũcurajiye.

No yóboi, Amalec āmicuriyajubocavu Israecavure boaiyu-rīdurejaquemavu. Ina Isaac bácuí mácu Esaú āmicucu bácuí pāramena curipinidu teivu barejaquemavu. Ne edai-yede jáñu Moisés, Israecavu churaravare jarorejaquemavu, náque ne boarájiyepe ayu. Israecavu churarava ne jabocu

Josué āmicurejaquemavu. No jipocai, Amalecavuque jorojīnejaquemavu Jāmenijicu. Que jorojīñu, Moiséjāre boarí jebeicōjenejaquemavu náre. Moisés ũi āmuveare jāmuóñu, ina Israecavu vainí turī nurejaquemavu. Ũbenita ũi āmuveare jāmuómecu, ina Amalecavu vainí turī nurejaquemavu. Que baru Moisés uetayu, Aarón aru Israecacu bucucu, Hur āmicucu, ũi āmuveare cututurejaquemavu. Que teni Israecavu Amalecavure boarí, vainí turejaquemavu. Nópe ne daiyede, Moisécapūravu Josuéde náre boarí jebeicōjenejaquemavu.



**Sinaí āmicuricū cūracūi Jūmenijicu Israecavure
“Yópe dajarā” pucapuruafe paiye daicōjeiyede ūi
epeino mácarō**

Éxodo 19.1-20.20

*(Mateo 5.21,27, 12.2,10, 15.4, 19.17-19, Marcos 2.24, 3.2, 7.10, 10.19,
Lucas 6.2,7, 13.14, 14.3, 18.20, 23.56, Juan 1.7, 5.10,18, 7.19, 9.16,
Hechos 7.38,53, Romanos 2.21-23, 13.9, Gálatas 3.17-19, 4.21-30,
Efesios 6.1-3, 1 Timoteo 1.8-10, Hebreos 12.18-20, Santiago 2.11,
1 Pedro 2.9, Apocalipsis 4.5, 5.10, 8.5)*

Ina Israecavu yóbecurā aviávare ne nuriburu yóboi Egipto āmicurijoborōre jocarī, Sinaí āmicuricū cūracū yebai earejaquemavu. Noita earī, mautedejaquemavu. Ne mauteiyede, dicūi Moiséde muicōjenejaquemavu Jūmenijicu. Ūi eaiyede dicū puenoi, Jūmenijicu yópe arejaquemavu ūre:

—Iyede ārure dajacu Israecavure: Ina Egiptocavure āmeno vaidé dacacu yu, Israecavure cadatecudayu. Que teni inare me jári meadayu, yuita davacacu yu. Que baru inaque “Yópe darā-jare”, arī yávaquijivu caride. Ji jáiyede ina Israecavu yure me ne ju aru, ji aiye báquepedeca ne daru, náre apevu pueno mearo dacuyumu. Apevu pueno ubeni curivu āmevu muja. Caivu ijoborōcavu pueno jabocu cucuyumu. Israecavure ji pōeva mārājivu dacuyumu. Que teni ji cuede jádovarajarama na apevu pōevare, arejaquemavu Jūmenijicu Moiséde.

Ūi que aiyede jápiayu, dicūre ēmeni, Israecavure coyurejaquemavu Moisés. Aru ūi coyuiyede jápiaivu, ju arejaquemavu Jūmenijicu ūi daicōjeiyede. Ne ju aiyede jápiayu Moisés, bedióva cūracūita muri nuri, diede coyurejaquemavu Jūmenijicure. Ūi coyuiyede, yópe arejaquemavu Jūmenijicu:

—Caride icū cūracū écarui biaidope dajarā. Nāi jári curayu bájuocure icū cūracū turuvare, boarí jaruvajarā muja. Pōecu baru aru oteiāimacu baru, apenumua cūraboaque apenumua tāuyoaque dūvarī, boarí jaruvajarā muja náre. Que teni ye icūre mumejarari, arejaquemavu Jūmenijicu.

Ūi que aiyede jápiayu, bedióva ēmenejaquemavu Moisés, diede ūi coyuquiyepe ayu Israecavure. Meadaicōjenejaquemavu náre, ne mearore jínajiyepe ayu Jūmenijicure, yópe arī:

—Yóbecurijāravua yóboi Jūmenijicu jōdacuyume dicūi. Que baru muje cuitótecajeare joajarā. Aru mujemarebucuvaque

cubejarā, meadarājivu muje bajure ũi daquiye jipocai, arejaquemavu Moisés.

Yópe ũi aiyede báquepe darejaquemavu na. Aru yóbecurijā-ravua ũi coyuriburu yóboi, ocopenibo cūracūre taorejaquemavu. Dinumu ōpoturī, yaroni, bicorejaquemavu. Que teni jápiarejaquemavu japuiyo, trompeta āmicuriyo, bujinore aru Jūmenijicui yávainore máre. Que baru āmei jidurejaquemavu ina Israecavu. Dicū cūracū cāchinoi Israecavure cójjicōjenejaquemavu Moisés. Ũi que cōjeiyede, Jūmenijicu Moiséde muicōjenejaquemavu bedióva cojedeca dicūi. Ũi muriburu yóboi, dicūi muicōjemenejaquemavu Jūmenijicu Israecavure, yópe arī:

—Dicū ēcarai biaidope ne epeino mácarōre vaicōjemejacu náre, ne jámenajiyeye ayu yure, arī jarorejaquemavu Moiséde.

Ũi que aiyede jápiayu, bedióva cojedeca ēmenejaquemavu Moisés. Dicū cūracū cāchinoi ũi cuede, dicū puenoi cucu Jūmenijicu jāve coyurejaquemavu, yópe arī:

—Yu, Jūmenijicu, muje jabocubu yu. Egipto āmicurijoborōi muje yebacacuede jáñu, mujare cadatecacu. Que baru yópe dajarā muja.

‘Apecu “Jūmenijicu” ne aimure, mearore jíbejarā. Yu matuiyeda mearore jījarā.

‘Mujare jecurī vaivu yu. Que baru pēpeimarare, muje daimarare, “Jūmenijinamu” abejarā. Aru mearore jíbejarā muje daimarare.

‘Muje yávaiyede, yajubeni meyuyabebejarā ji āmiáque.

‘Jabuóvaijāravu, mujare ji epeijāravu bácarōre, mearo jabuóvajarā muja. Sumana coapa seis paijāravuare memeiye majivu muja. Ūbenita dijāravua yóbocajāravui muja aru muje oteiāimara máre mememenama. Iye ji coyuquiyede ārujara muja: Ijborōre aru cavarōre máre cuedarejacacu yu seis paijāravua baju. Seis paijāravua vaiyede, cuedarī dajocarī buojarejacacu yu. Dijāravu, muje jabuóvaijāravu, ubeni curijāravu āmevu. Muje jabuóvaijāravubu.

‘Ju ajarā mujebucuvare. Muje que daru, curājaramu obediujare ijāravui.

‘Pōevare boarī jaruvabejarā.

‘Cuvabejarā apeco mujemarepacore jaruvarī aru apecu mujemarepacure jaruvarī.

‘Ñavamejara apecu ũi cuvaede.

'Borodabejarā apecure.

'Apecu ũ jiede āujimejara. Ũi cūramine, ũi márepacore, ũi yebacacure, ũi yebacacore, aru ũi oteiāimarare máre āujimejara, arejaquemavu Jūmenijicu Israecavure.

Jūmenijicu ũi nópe arī coyuiyede, jidurejaquemavu Israecavucapūravu. Jidurivu, bedióva Jūmenijicu ũi yávaiyede jápiaiyubedejaquemavu.

—Jūmenijicucapūravu ñujare yaué coyubejacurī. Jūmenijicu ũi yávaiyede bedióva jápiaivu, yainájaramu ñuja, arejaquemavu Moiséde.

Ubenita Moisécapūravu náre arejaquemavu:

—Jidubejarā muja. Jūmenijicure ju abeni, āmenore daivu baru, jidurájaramu muja. Ubenita ũre ju arī mearore daivu baru, jidubenajaramu muja, arejaquemavu Moisés ina Israecavure.

Jūmenijicu Moiséde ũi coyuiño mácarō ape daicōjeiyede Éxodo 20.21-23.33

(Mateo 5.38, 15.4, Marcos 7.10, Hechos 23.5, Apocalipsis 10.5-7)

Bedióva cojedeca Sinaí āmicuricū cūracū muri nurejaquemavu Moisés. Dicūi bicope taorejaquemavu. Aru nore coyurejaquemavu Jūmenijicu ũique:

—Caride mure ji coyuiyede coyurī jebejacu ina Israecavure. Caride ji yávarī jaroiyede, jápiaima na. Diede ārure da-jacu náre. Na pēpeimara úruque, plataque ne daimarare yápe ārojarivure dabejarāri. Náque ne mearore jiyede ubevu yu. Ubenita yure mearore jiyurivu baru, dajarāri ne oteiāimarare juai-vare, náre ne juarī jínajiyepe yure, arejaquemavu.

No yóboi, ne yebacavure mearo daicōjeni, yópe arejaquemavu Jūmenijicu:

—Mujacacu judiōcure muje bojedaru, ũi yebacatequiyepe ayu, memejacurī ũ seis paiujuare. Aru diuju yóbocaujui ũi jabocu jaetovajacurī ũre, bojedabecuva. Ñai yebacacu nomicubecu baru, cūinácu etacuyume. Jímarepaco cuvacu baru ũi yebacateni buiye báquede, ina pucarā etarājarama. Ubenita ũi ja-

bocui jídu jímarepacore, ò némaraque mautenajarama jabocuque yebacacu ùi etaiyede. Que baru jímarepacore, mamarare máre, dajocaiyubecu baru, aru mauteiyucu baru ùi jabocuque cainumua, cobede daicõjejacurĩ ùi cámuicare.

'Majacacu mamacore ùi bojedaru, óre yebacateni, yebacaco bacodóme ò cainumua. Yebacarõmiva jaetovabejarãri. Óre ãiyede aru cuitótecajeare jini, jabocuque óre cue jauvu. Apecore nomicucuvacari ùi yebacacoque úre cue jauvu. Jabocu ùi mácure yebacacore nomi jíyu baru, óre mearo ðaiye jauvu, yópe ùi máco bajupe.

'Jabocu ùi boaiyede yebacacure, ùi yacorure o ùi cõpiyore úre bíjare daru, úre jaetovaiye jauvu, yópe bojedaiyepe yacoru bácarõ o cõpiyo bácarõ boje. Yebacacure aru yebacacore máre yópe ðaiye jauvu, arejaquemavu Jūmenijicu.

No yóboi, ðaicõjeni coyure nurejaquemavu Jūmenijicu, yópe arĩ:

—Cūinácu apecure ùi boarĩ jaruvaru, úre boarĩ jaruvajarãri. Ubenita árumecuva apecure ùi boarĩ jaruvaru, no yóboi, ùi dupinuquinore jádovacuyumu, yaiyú bácu jivu ne boarĩ jaruvabenajiyepe ayu ñai boarĩ jaruvayure. Ubenita apecure ùi urõma boarĩ jaruvaru, úre boarĩ jaruvajarãri. Parurõ "Yure boabéjarã" ùi aiyedeca, úre boarĩ jaruvajarãri.

'Cūinácu apecure ùi dupini ñavaru, aru ùi ñavaimu ùi cuvaru o ùi bojedaru apecure, boarĩ jaruvajarãri ñavañu mácure. Cūinácu ùi bucuvare ámeno yávayure, boarĩ jaruvajarãri úre.

'Cūinácu apecure churi ùi daru, aru ñai ijimuvacari yaibécu, ñai churi ðayu bácu boarĩ jaruvabejarãri. Ubenita bojedajarãri ùi ijimure ùi juoquiyede aru ùi memejuroede máre.

'Cūinácu apecu ùi oteiãimacure ñavañu maru, ùi ñavaimu mácu cuvacu baru, úre upacure jacopaiyovacyume. Que jacopaiyovaya, apecu oteiãimacure jíye jauvu. Ubenita ùi ñavaimu mácu jini bojedayu baru o boayú baru, úre upacure urarõ bojedaiye jauvu. Oteivecure ùi ñavariburu yóboi, cūinápurupe paivu oteivecuvare jini bojedajarãri. Aru ovejare ùi ñavariburu yóboi, yóvaicuvaivu ovejavare jini bojedajarãri.

'Cūinácu ùi oteiye curõre ùi juaiyede, árumecuva apecu ùi oteiye curõre ùi juaru, bojedaiye jauvu no upacure. Juayu bácu ùi oteiye curõre oteiyeque bojedacuyume no upacure.

‘Iye ji daicōjeiyebu caivu Israecavure ji daicōjeiye baju. Que baru cūinácu apecure āmeno daru, bojedaiye jauvu, arī coyurejaquemavu Jūmenijicu.

Iye daicōjeiyede epedejaquemavu Jūmenijicu Israecavure, apecure mearo ne darājiyepe ayu. Aru ape daicōjeiyede epedejaquemavu náre, aipe darī ne pueđarājiyepe ayu barejaquémavu ūre. Que teni yópe arī coyurejaquemavu Moiséde, ūi coyūquiyepe ayu Israecavure:

—Muja apenocavu bateávū Egipto āmicurijoborōi. Que baru apenocavu muje yebai ne edaiyede, mearo đajarā náre. Apevu Israecavu “Tāuturare jījarā cāreja” mujare ūi jēniaiyede, boje ubevūva jījarā náre. Nomiópevare aru tēumarare āmeno đabejarā náre. Jūmenijicure jārī coenímajara. Muje jabovare āmeno yávabejarā. Oteiāimacu yaiyú bácare jáivu baru, āmejara. Cōmaje ārojarivure jáivu baru, mearo đajarā náre. Apevu mujare ne meyuyaru, ne meyuyaiyede ju abejarā. Aru meyuyabejarā muja, arī coyurejaquemavu Israecavure Jūmenijicu.

Que arī buojarī, yópe arejaquemavu Jūmenijicu:

—Canaán āmicurijoborōre “Mujare jícuyumu”, arī buojacacu yu. Que ayu, nore mujare navacuyure aru mujare corecuyure ángelede epequijivu. Ūre muje mearo daru jáñu, Canaácavu mujare ne boarú, cadatecuyume mujare. Canaácavure nore caride curivure vainí turājaramu muja. Pōeyajuboa nócavure muje boarú, ne yainí cūiníburu yóboi, dijoborōre jīni jebequijivu mujare. Muje joborō maquiyébu. Ubenita nócavūque borotebejarā. “Maja cūinároi curājare”, abejarā náre. Aru “Jūmenijinamu” ne arī coyūimarare mearo jibejarā. Yu matuiyeda mearore jījarā. Que baru oteiāimarare ne juaivare ne mearore jicaivare jaruvarī jebejarā. Aru nócavure boarí jebejarā muja. Muje nópe đabedu, mujare meyuyarī, “Jūmenijinamu” arī, ne pēpeimarare mearore jícōjenajarama mujare. “Que đainomu” aivu, náre boarí jebejarā, arejaquemavu Jūmenijicu.

Nopedeca arī coyurejaquemavu Jūmenijicu Moiséde Sinaí āmicuricū cūracū puenoi, Israecavure daicōjeñu.

Israecavure jiveque jajiéni, Moisés ũi jádovaino mácarõ Jūmenijicure ne ju aiyede

Éxodo 24

(Hebreos 9.18-21)

Moisécapūravu caiye Jūmenijicu ũi coyuiye báquede ũre cūracūi; Sinaí āmicuricūi, Israecavure coyurejaquemavu. Ũi que arī coyuiyede jápiaivu, iye daicōjeiyede ju arejaquemavu na.

Ne ju aiyede jápiayu, iye daicōjeiyede toivarī jebedejaquemavu Moisés.

Apejāravui javejīnara Moisés ũi coedaiyede, oteiāimarare juaivare darejaquemavu. Doce paiyajuboa pōeyajuboa curejaquemavu ina Israecavu. Que baru divare darejaquemavu doce paiva cūravaque. Sinaí āmicuricū cūracū cāchinoi diede darejaquemavu. Que dayu, bojūvure oteivecuvare boaicōjenejaquemavu. Ne boarīburu yóboi, oteivecūva juarī, jāmuóri, Jūmenijicure mearore jicōjenejaquemavu. Que daiva, oteivecūva jive corica baji jorobua epedejaquemavu Moisés. Coricai epeni, apede jajiédejaquemavu diva puenoi. Que teni Moisés jári borotedejaquemavu ina Israecavure iyoca paperayocare, Jūmenijicu náre ũi daicōjeiyede toivaiyoca mácarõre. Que teni caiva ina Israecavu “Ju aivubu ũi daicōjeiyede”, arejaquemavu.

Ne que aiyede jápiayu, Moisés jorobuaque jivede ina Israecavure jajiédejaquemavu. Que jajiéyu, yópe arejaquemavu:

—“Ju aivubu iye daicōjeiyede” Jūmenijicure muje aiyede, “Jāvenecabu” muje arājiyepa ayu, jivede jajiéni jēovu mujare, arejaquemavu Moisés Israecavure.

No yóboi, cojedeca Moisés muri nurejaquemavu dicū cūracūi. Ũque muri nurejaquemavu jībucu Aarón, aru Aarói mára, Nadab aru Abiú āmicurivu, aru apevu setenta paivu Israecavu bucūva máre. Jūmenijicupūravu náre muicōjenejaquemavu. Ũbenita caiva apevure muicōjemenejaquemavu. Que teni Moiséjá cūracūi muri nuivu, Jūmenijicu járocure járejaquemavu. Aru no yóboi, dicūre ēmenejaquemavu na.

No yóboi, Jūmenijicu dicūi muri nuicōjenejaquemavu Moiséde cūinácūra ũi yebai bediõva cojedeca. Dicūi ũi cuede, pucavea cūraveare Jūmenijicu ũi daicōjeiyede ũi toivacaivea báquede jidejaquemavu Moiséde. Moisés ũi muri nuquiye jipocai,

Aaróre aru Hure máre ina Israecavure cōjenajivure epedejaquemavu. Ñi muriburu yóboi, ocopenibope ārojaroi Jūmenijicu ñi yávaino jápurarejaquemavu. Aru cuarenta pajāravua aru ñamiá máre mautedejaquemavu Moisés dicū puenoi Jūmenijicuque.

**“Āimara cajeáque mearore jíñami cūrami maquinóre
Israecavure ðaicōjejacu” Jūmenijicu Moiséde ñi arī
coyuno mácarō**

Éxodo 25.1-31.11; Levítico 24.1-9

(Hechos 7.44, Hebreos 5.1-4, 7.11-28, 8.1-6, 9.1-6, 10.19-20, Apocalipsis 8.3)

Sinaí āmicuricū cūracūi Moisés ñi cuede, Jūmenijicu ñi cūrami maquinó ñi ðacaquinore coyurejaquemavu. Diñami Jūmenijicure pōeva ne mearore jíñami maquinó marejaquémavu. Yópe arī coyurejaquemavu:

—Israecavure jíñami cūrami maquinó ne memenajiyede diñami cūramique baquiyéde cójijovaicōjejacu mu. Diñami āimara cajeáque ne ðaiñami baquiyébu. Mujare ji coyuquinope diñami maquinóre cūináturu ðajarā.

Yópe baquiyébu diñami. Diñami jipocai tāibu veintidós paimetros coricai vaibó aru cuarenta y cinco paimetros ūmujuro cuquiyebu. Jedevacobe avia ðainocapūravui cuquiyebu. Ditāibu écarui biaido cuquiyebu, cuitótecajea lino āmicurica-jeaque muje yuyaicajea baquiyé. Puejīno muje núvaicua báquede ðicajeare yuyaicajea baquiyébu. Yóbo nuivu ðuarājaramu dicuáre. Diñami cūrami veinte paimetros ūmujuriñami aru cūinápurupe paimetros vaibó baquiyébu. Diñamique bieiba jocuveaque bieñami baquiyé núvarajaramu muja. Diveáre cainitācuveaque cutuárājaramu muja. Tāutarabuaque núvaiveare muja pēvarajaramu. Ditarabuaita jajuidorājaramu muja. Muibare yóbecuricajeaque ðarājaramu muja. Muje yóbecuricajeare ðaru, jājaro mautequiyebu. Cāchinocarō cuitótecajea baquiyébu. Dicajea pueno querubín āmicurivu ārojarivu ángelevape muje nareni jēoicajea baquiyébu. Dicajea puenoi cabra āmicuriāimacui poðaque ðaicajea baquiyébu. Aru apecajea puenocacajea bubaicajea

ũmu cabra ũi podaque darājaramu muja, oco yubequiyepe aivu, arejaquemavu Jūmenijicu Moiséde.

Aru yópe arĩ coyure nurejaquemavu Jūmenijicu:

—Nópe darĩburu yóboi, pucatucubua darājaramu muja. Ditucubua pucatucubua cuitótecajearque coricōpavaitucubua baquiyébu. Uratucubu meatucubu sacerdoteva ne yure memecaitucubu aru quĩjitucubu pueno meatucubu sacerdotevare jaboteipōecu ũi yure memecaitucubu baquiyébu. Cūinátōcu muje jocueaque daitōcu maquinó cuquiyebu ditucubu jívui. Ditōcu muje āruritōcu maje “Que darājare” aitōcu úruque cūmaitōcu jívure aru puenore máre cuquiyebu. Ditōcu moaino úruque daíno maquinó pueno pucarā pēpeimara querubín āmicurivu ārojarrivu ángelevape curājarama. Ne baju copu jǎrajarama, aru ne caveáque ditōcure taoivu, sacerdotevare jaboteipōecu ũi bojedacaquino yure pōeva ne āmeina teiye boje. Ditōcu moaino puenoiyu, Jūmenijicu, Israecavuque yávacyumu. Que yávayu, ne darājínore coyucyumu yu. Uratucubu jívui cūináva tuoiva, úruque cūmaiva maquinó cuquiyebu. Diva puenora páuboa doce paíboa cuquiyebu, yure, Jūmenijicare, ne jínajiyede sacerdoteva aru ne ārajiyede máre. Aru ditucubu uratucubu jívui cuquiyebu cūinájarabo pēoibua tuoíjarabo, úruque cūmaíjarabo baquinó. Jocucu cóvua curicupe ārojaricu baquiyébu. Dijarabo siete paíyoa pēoiyoa cavaquiyebu. Aru ditucubu uratucubu jívui máre cuquiyebu cūinátōcu mumijuede juaitōcu, úruque cūmaitōcu maquinó.

’Diboá páuboa doce paíboa baquiyé divai curiboare mumijueque jajiénajarama sacerdoteva. Sumana coapa muje jabúvavajāravua coapa, divaqueda meadarājarama ina sacerdoteva. Que daivu, diboáre páuboare pucatucuboa tuorĩ, seis paíboa cūinátucubore aru apeboa seis paíboa apetucubore máre tuorājarama. Dinumure die páure javeque páure ārājarama ina sacerdoteva. Apevucapūravu die páure āmenajarama. Pēoiyoare máre jǎri meadarājarama ina sacerdoteva. Jārvuare aru ñamiáre máre pēoiye jauquiyebu diyoá siete paíyoa pēoiyoare.

’Aru diñami jedevai tāibu coricai pucarōa núvaiye jauquiyebu. Cūináro cuquiyebu sacerdoteva āimarare ne juaitōcu, bronce āmicuritāuque daitōcu maquinó, ne boarĩ, juarĩ, jāmúorĩ, jínajiyepe aie yure, Jūmenijicare. Aru apeno máre cuquiyebu, ocobu urabu, bronce āmicuritāuque daibu

baquinó, sacerdoteva ne puruá cojarājibu. Iye ji cūramiquede nuvarajaramu muja, apenoita nuivu. Que teni iye ji cūramiquede cainitarabuare cuvarājaramu muja. Naiyuriva baru, jocucuaare di'arabuita jajuídorī, turī nurajaramu muja, arejaquemavu Jūmenijicu.

Moiséde bedióva coyurejaquemavu Jūmenijicu, yópe arī:

—Apede máre diñamique baquiyéde dajarā muja: Jororua úruque daidua baquiyé aru cōaiñua úruque daiñua maquiyé máre darājaramu. Bronce āmicuritauque dajarā caiye iyede, sacerdoteva ne memenajiyede āimarare ne boarī, juarī, jāmúorī, jínajiyepe aivu yure, Jūmenijicure. Jorobua āimara jivede ne nuvarajibua aru toabore máre ne nuvarajibua bronceque dajarā, ina sacerdoteva ne yuarājiyepe aivu iye jivede aru ne juarājiyepe aivu die āimajiaruare máre ditōcu puenoi.

'Die mumijue ji cūrami āimara cajeáque muje daiñami maquinó jívui juarī, jāmúoíye baquiyébu. Apenoi juarī jāmúoícōjemejara die mumijuede. Apejāravua die mumijuede cuvae majibenamu muja.

'Aru Aarón ūi pāramena mārājivuque, ūmuva matuiye, sacerdotevape epequijivu yu, Jūmenijicu, ne memecarājiyepe ayu yure. Na matuiye ji cūramiquede memenajarama na. Que baru cuitótecajea jícua máque ārojae ne dorājiyede yópe ji coyuiyeppe dajarā ina sacerdotevare. Dicajeacapūravu meacajea lino āmicuricajea baquiyébu. Caivu ina sacerdoteva coapa dorājarama ne jívuyaicaje, aru ne camisa ūmujuricaje, ne jārióicāva, aru ne moibo máre.

'Aru Aarón, sacerdotevare jaboteipōecu, jícua máque cuvacyume apecaje ūmujubecaje ūi arubo yebai bieicaje pucajīboa cūrajīboa bojecurijīboaque. Nijīboa cūinápūravui cūinājībo seis paiāmia ina Israecavu ne yajuboa ne āmiá toivaijībo curī aru asepūravui apejībo apeāmia seis paiāmia ina Israecavu ne yajuboa ne āmiá toivaijībo cuvacyume. Aru ūi ñarebara apecaje cuvacyume. Doce paiboa cūrajīboa bojecurijīboa cuquiyebu dicajena. Aru diboá puenora toivaino maquiyébu ne āmiá coapa, ina doce paiyajuboa Israecavu yajuboa. Puenocacaje máre docuyume Aarón. Aru dicaje pinidu bujidijīboa, campanitas āmicurijīboa, nareni jēoijīboa cuquiyebu, bujiquiyeppe aiye ūi cuiyede. Aru ūi moiborā ūi tūtuvai cūináve úruque ñaive buoive baquiyébu. Dive puenoi toivaino maquiyébu, yópe arī: "Jūmenijicure

memecayũ. Que teni ina sacerdoteva torojuve teiyepe darāja-rama na, arejaquemavu Jūmenijicu.

Aru Moiséde coyure nurejaquemavu, yópe arĩ:

—Dinumu olivo āmicuricu jēidua córoque jajiécuyumu mu ina sacerdoteva ne jipobui, “Yópe darājare” yu, Jūmenijicu, ji coyuiye báquede muja Israecavure ārurivu. Ina sacerdoteva ne ecoiyede diñami, yure ne mearore jíñami, “Yópe darājare” maje arĩ coyuiye báquede ārurajaramu caivu muja Israecavu, arĩ coyurejaquemavu Jūmenijicu.

Que teni caiye ũi cūramiquede daicōjenejaquemavu Jūmenijicu pucarā ũmuvare. Cūinācu Bezaleel āmicucu, Judá āmicuriyajibocacure aru apecu Aholiab āmicucu, Dan āmicuriyajubocacure coyurĩ epedejaquemavu Jūmenijicu, ne darājiyepe ayu diñamiquede.

**Israecavu Jūmenijicure ne vainí tuino mácarō
oteivecujĩcupe ārojacu ne pēpeimu mácuque
Éxodo 31.18-34.35**

(Hechos 7.39-41, 13.18, 1 Corintios 10.7, 2 Corintios 3.7,13, Apocalipsis 3.5)

Cuarenta paijāravuare mautedejaquemavu Moisés Sinaí āmicuricū cūracū puenoi. Dicū puenoi ũi cuede, Israecavure ũi daicōjeiye báquede toivarĩ epeyu barejaquému Jūmenijicu. Ũi que epeiye, Israecavu Moiséde cūracū cāchinoi coreivu ueturejaquemavu. Que uetaivu, Aaróre yópe arĩ coyurejaquemavu:

—Majecu bacuyú Jūmenijicupe páyu dajacu mu. Écapūravu mi daquijimu nuvacuyume majare maje joborõi, arejaquemavu na Aaróre.

Ne que aiyede jápiayu, Aarócapūravu ne úrure náre davaicōjenejaquemavu. Nomiva ne cámucauyuyiitarabuare davarejaquemavu Israecavu. Die úrure toaijiede uitarabuare darĩ, córo teiyede jári, pēpenejaquemavu Aarón oteivecujĩcupe ārojacure. Que teni yópe arĩdurejaquemavu náre:

—Israecavu, jápiajarā muja. Ñaime mujecu jūmenijicu. Ñaime mujare Egipto curivu bācavure jaetovayu bācu. Yore mujare davayu bācu, arĩdurejaquemavu Israecavure.

Que arī buojarī, apejāravu cōmiáijāravu ne torojuve tenajijāravu daicōjenejaquemavu Aarón. Ũi daicōjeiyede, āimarare boarī, juarī, jāmuóri, mearore jidejaquemavu ñai pēpeimure.

Ne āmeno daiyede jáñu Jūmenijicu, Moiséde cūracūita cūcure jōdaicōjenejaquemavu. Israecavu, ũi daicōjeiyede vainí turī, ne pēpeimure mearore jidejaquemavu. Ne āmeno daiyede jáñu, jorojīnejaquemavu Jūmenijicu.

—Náre boarī jebecuyumu yu. Mare aru mimarepacore aru mīmarare, muja matuiyeda obediyauboa dacuyumu yu, arejaquemavu Jūmenijicu.

Ũi que aiyede jápiayu, Moisés yópe arejaquemavu ũre:

—Náre boabéjacu mu. Abrahāre, Isaare, aru Jacore mi aiye báquede ārujacu mu. Aru “Mipāramena curipinidu teivu bárājivu obedivu pōeva mujare dacuyumu”, mi ávarede ārujacu mu. Que baru iyede máre ārujacu mu. Inare mi boaiyede jáivu baru, yópe arī dápiarājarama ina Egiptocavu: “Israecavure, Egipto curivu bácvure, āmeno dacuyu jaetovaquemavu Jūmenijicu”, arī dápiarājarama na. Que baru náre boabéjacu, arejaquemavu Moisés Jūmenijicu.

Ũi que aiyede jápiayu, Israecavure boabédejaquemavu.

Que arī buojarī, Moiséde jōdaicōjenejaquemavu. Pucavea Jūmenijicu ũi daicōjeiyede toivaiveare ĩni jōdavaridurejaquemavu. Que jōdañu, dicū cāchinoita jōdacuearejaquemavu. Noi eayu, oteivecujīcupe ne pēpeimure ne mearore jiyede jáñu, jorojīnejaquemavu Moisés. Nópe jorojīñu, diveáre joborōita davarī jaruvarejaquemavu. Tōarī cūinéjaquemavu diveá. Que dayu bácu, Aaróre pare jarayu, oteivecujīcupe ārojacure ĩni, toaboi davarī jūari, éipena máque jadavarī ocoi, die báquede ũcuicōjenejaquemavu ina Israecavure. Que darī ũi jaraiyedeca, yópe arī ju arīdurejaquemavu Aarón:

—Ina pōeva yure jūmenijicupe páyu pēpeimure daicōjema, majare maje joborōita nuvarajimu. Que baru ne cāmucayuyuiyede úruque daiyede yure ne jidu, diede toaboita davarī jūaiyede oteivecujīcupe ārojacu cūiná etabi, arī meyuyarejaquemavu Aarón Moiséde.

Ũi que aiyede jápiayu, Israecavure Jūmenijicu ne vainí tuiyede jáñu Moisés, yópe arejaquemavu:

—Jūmenijicu bajuque cuiyurivu baru muja, ji yebai núrada-jarā muja, arejaquemavu.

Ëi que aiyede jápiaivu, Leví ámicuriyajubocavu ùi yebaita núraearejaquemavu. Ëi yebai earĩ, náre ne boaicarovea coapa ícõjeni, boarĩ jaruvaicõjenejaquemavu apevu Israecavure, ina mearore jívu bácvure ñai pēpeimu mácvure, ne ðabenajiyepe ayu pēpeimure bedióva cojedeca. Que teni yóbecurimil paivu ùmuva mácvu yaidéjaquemavu dijāravui.

No yóboi, Moisés Jūmenijicure yópe arejaquemavu:

—Ina Israecavu ne ámeno daiye báquede árumetejacu mu caride. Náre boropaðabejacu, arejaquemavu Jūmenijicure.

Ëi que aiyede, Jūmenijicu yópe arejaquemavu:



—Caride apeno joborõita nuvajacu náre. Muje nuiyede, cūinácu ángele muje jipocai jarorĩ, jipocateicõjequijiva yu. Yácapūrava majaque puque numecuyumu, arejaquemavu Moiséde.

Ëi que aiyede jápiaya, Moisécapūravu yópe arejaquemavu:

—Ñuja Israecavuque nujacu mu, pare arĩ jēniarejaquemavu Jūmenijicare.

Aru ñi que aiyede, Jūmenijicu ju arejaquemavu ũre.

Que ayu, pucavea cūraveare jádori, daicõjenejaquemavu. Ëi que daicõjeiyede, diveáque cūracũita muicõjenejaquemavu. Bediõva ñi toivaiye báquepedeca toivarejaquemavu Jūmenijicu diveái. Que teni dicũ puenoi Moisés ñi eaiyede, Jūmenijicu ũre coyurejaquemavu cojedeca:

—Muja Israecavu Canaán āmicurijoborõcavure yóvabejarā. Que baru jūmenijnape paivure ne pēpeimarare mearore jibejarā muja, arĩ coyurejaquemavu Moiséde.


Ëi que arĩburu yóboi, die ñi daicõjeiye báquepe Moiséde toivaicõjeni epedejaquemavu Jūmenijicu. Que teni bediõva cuarenta pajāravua baju mautedejaquemavu Moisés dicũ cūracũ puenoi, Jūmenijicu ñi coyuiyede ũre caipucapuruaape paiye ñi daicõjeiyede aru ape daicõjeiyede máre. Diede diveái toivarĩ epedejaquemavu Moisés. Toivarĩ buojarĩ, diveáre ñni, jōdarejaquemavu. Jōdañu, ñi jiva jícua pēorejaquemavu. Jūmenijicuque ñi cuede, ñi yávaiye báque boje ũque cojidejaquemavu. Ëi jiva pēoiyede jámenejaquemavu ñi baju. Ubenita Aarója ñi jiva cojinore jáivu jidurejaquemavu. Nópe ñi cojiéde jáivu, copu numenejaquemavu ũre. Ne jiduéde jáñu, cuitótecajeque ñi jivare taorejaquemavu Moisés. Que baru caiyede Jūmenijicu ñi daicõjeiyede náre coyurĩ jebedejaquemavu.

Jūmenijicu ñi cūrami āimara cajeáque ne daiñamine Israecavu ne daino mácarō

Éxodo 35-40

(Hechos 7.44, Hebreos 8.1-6, 9.1-6, 15.5, 8)

No yóboi, Israecavu caivure cójijicõjenejaquemavu Moisés. Ne cójijini cūiyede jáñu, Moisés náre yópe arĩ coyurejaquemavu:



—Jūmenijicu ũi cūrami āimara cajeáque daiñami maqui-
nóre daicōjeimi majare. Que baru diñamique baquiyéde dava-
jarā, maje darājiyepede diñamine. Que baru diñamiquede me-
meiye majidivu cadatenadajarā. Bezaleel aru Aholiab āmicu-
rivu iye memeyede cōjenajarama, arī coyurejaquemavu Israe-
cavure Moisés.

Ũi que aiyede jápiaivu, torojurejaquemavu ina Israecavu.
Que torojurivu, diñami maquinóre ne darājiyede méne davaiye
jebedejaquemavu. Ure davarejaquemavu. Que baru “Obedivu
pōeva memenajivu”, arejaquemavu. Ure davaivu ne uróre javai-
yoivu davarejaquemavu na. Que baru “Quénora davajarā”, are-
jaquemavu náre Moisés.

Que teni Jūmenijicu ũi aiye báquepedeca diñamique baqui-
yéde mearo darī jebedejaquemavu. Jocuveare aru cuitóteca-
jeare máre, tuoivare aru mumijuede juaitōcure máre darī jebede-
jaquemavu. Caivu Israecavu ne davaiye báqueque diede da-
rejaquemavu. Aru die tāutura ne bojedaiye báqueque ape diña-
mique baquiyéde darejaquemavu. Sacerdoteva ne dorājicajea
meacajeare darejaquemavu. Que teni caiye ne darī jebeyede
jáñu, Moisés “Cūinátura Jūmenijicu ũi coyuiye báquepe davu
mujá”, torojucu arejaquemavu.

Que arī, diñamine ne buojarīburu yóboi, mumijuede jajiécō-jenejaquemavu Jūmenijicu diñami puenoi, “Jūmenijicu jiñami maquinómu” ayu. Que arī buojarī, ina sacerdoteva ne memeni buijāravui torojuve teijāravure darejaquemavu, yópe Jūmenijicu ũi ñaicōjeiye báquepedeca.

Dinumure cūináju vaidējaquemavu ne etarīburu yóboi Egipto āmicurijoborōre jocarī. Diñamine ne buojarīburu yóboi, ocopenibope diñami puenoi mautedejaquemavu. “Jūmenijicu iñami cubi”, arejaquemavu ina Israecavu ne jái-yede no ocopenibo diñami puenoi. Que teni náre apenoita nuicōjecuyu, no ocopenibo náre jipocatede darejaquemavu Jūmenijicu. Sinaí āmicuricū cūracūi ne nuiyede, náre jipocatedejaquemavu no ocopenibo.

Israecavure Jūmenijicure ne jínajiyede Moiséde Jūmenijicu ũi coyuíno mácarō

Levítico 1-7, 17; Números 5, 15.1-31, 28.1-15

(1 Corintios 5:7, 9.13, Colosenses 2.16, Hebreos 8.1-6, 9.6-14, 10.11, 13.11)

Jūmenijicu yópe arī coyurejaquemavu Moiséde:

—Israecavu yure ne jínajiye cūinápurape paiye ne jínajiyede coyurī báquijivu. Mamarumu coyauquijivu āimara muje boarājimara juarī jaruvarājimarare. Caivu muje jínajimarare yópe ñaiye jauquiyebu mujare: Oteivecu ũmure, cabra ũmure, oveja ũmure máre aru jureco muje jíyuru, caivura muje jínajimara marajárama. Na āimara meara āmeno cubevu curāja-rama na. Āmenare jíye majibenajarama Israecavu. Oteivecure davayu ji cūrami jedevacobe yebai, ũi jipobui ũi purure tñoyu, ũre boacáyume ñai davayu bácu. Ũi boaiyede jáñu, cūinácu sacerdote oteivecui jivede āimarare juaitōcu puenoi jajiécuyume. Que jajiéyu, oteivecu baju bácarōre ditōcu puenoi juarī jaruvcuyume. Ũi nópe ñaiyede jáñu, ũre cojucuyumu yu. Oteivecure davayu ũi āmeina teiyede bojedacudayabe, oteivecure ũi jíyede yure. Ũi nópe jíyede jáñu, ũque torojucuyumu yu, arejaquemavu Jūmenijicu.

Aru oteivecure ne cuvabedu, mearejaquemavu Jūmenijicure ne jíyede apevu āimarare, ovejare, cabrare, aru jurecore máre.

Náre máre apenumu boarí, juarí jaruvarejaquemavu Israecavu. Āimara ne boarí, juarí, jāmuóri, jínajimara ne jiaruare āicōjemenejaquemavu Jūmenijicu Israecavu sacerdoteva āmevure. Quénora sacerdoteva iye jiaruaquede āicōjemenejaquemavu Jūmenijicu apede iye jiaruaquede ne juarí jebeniburu yóboi. Que baru oteivecavare aru ovejare aru cabrare ubeni carōi boai-cōjemenejaquemavu. Āimara jiaruare āiyurivure sacerdoteva yebaita āimacure boai-cōjemenejaquemavu Jūmenijicu. Que teni sacerdotevaque coavaiye jaurejaquemavu āimara jiaruare.



Jurecore ne boaiyede Jūmenijicu náre ne boaimu ũi jivede yui-cōjenejaquemavu joborōita.

Jūmenijicu ape ũre ne jínajiyede yópe arī coyurejaquemavu:

—Oteiyabea aru harina āmicue oteiyabeaque daiye máre muje jínajiyequē yure pueðarājaramu muja. Oteiyabea muje jínajiyede yópe daiye jauquiyebu mujare: Trigo āmicue oteiyede olivo āmicuricu jēidua córoque jīvarajaramu. Jīvaiye mautequiyebu. Apeyabeare me caroiyede olivo āmicuricu jēidua córoque jīvaiyede jínajaramu yure. Diyabeaque mumijue jīvariburu yóboi, juarī, jāmuóri, jínajaramu yure. Ape oteiyequē me carorī, páure ðarī jínajaramu yure. Oteiyabea muje jīyede, cainumua yuquiraque jīvarajaramu muja. Muje nópe jīvaiyede, páu bucure daiye aru mumicorore máre diyabeaque jīvamejara. Israecacu diyabeare aru diyabeaque ðaiyede yure jíyucu ũi davaru, cūinácu sacerdote apenumu obebeyabeare ĩni, apenumu quījino yabeaque ðaiyecarōre ĩni, mumijuede juaitōcure nuvari, juarī, jāmuóri, jícuyume diede yure. Aru caiye ũi davaiyede, mumijuede juarī jebecuyume. Ũi nópe ðaiyede, papuiyede ũi juabede sacerðoteva ārajarama. Que teni ubeni curivu yure mearore jínadarājarama. Ũbenita sacerðotevacapūravu diede davarī yure mearore jíyurivu, mumijuede juaitōcui diede juarī jebenajarama, arejaquemavu Jūmenijicu.

Jūmenijicu ape ũre ne jínajiyede, cārijimene ðacuyu náre ũque, ne yóvarājiyepe ayu ũre, yópe arī coyurejaquemavu:

—Cūinácu Israecacu jíyucu baru ũ jiede yure, ji cārijimene ðaquiyepe ayu ũque, ñuje yóvarājiyepe ayu, yópe ðacuyume: Davacuyume cūinácu ũi oteiāimacure ji cūrami jedevacobe yebai. Davacuyume oteivecure, ovejare, cabrare cūinácare, ũmure āmeno cubecure, nomióre āmeno cubecore. Ũi davaimu ũi jipobui ũi purure tuoyu, ũre boacúyume ñai davayu bácu. Ũre boarīburu yóboi, cūinácu sacerdote ũi jiveque jajiécuyume āimarare ne boarī, juarī, jāmuóri jaruvaimarare juaitōcu puenoi aru cāchinoi máre. No yóboi ũi boaimu mácu baju bácarō jívuquede, ũi cōrebuare, ũi penibore, aru caiye ũi neore máre juacuyume āimarare juaitōcu puenoi. Ovejare ũi davaru, ũi pīcomure máre juacuyume ñai sacerdote, arejaquemavu Jūmenijicu.

Jūmenijicu ape ũre ne jínajiyede, ne āmeina teiyede bojeðarājivu, yópe arī coyurejaquemavu:

—Cūinácu āmeno dayu baru, āimacure jícuyume yure. Sacerdote āmeno dayu baru, oteivecu ūmure, āmeno cubecure, ji cūrami jedevacobe yebai, ūi jipobui ūi purure tuoyu, ūre boacáyume ñai davaya bácu. Ūre boaríburu yóboi, ūi jiveque jajiécuyume dicaje cuitótecaje coricōpavaicajede ji cūrami jívui siete paiye baju. Aru mumijuede juaitōcure máre epecuyume die jive. Aru yuacuyume āimarare ne boarí, juarí, jāmuóri jaruvaimarare juaitōcu cāchinoi die jive pupuiyede. No yóboi ñai oteivecu bácu baju bácarō jívunque. ūi cōrebuare, ūi penibore, aru caiye ūi neore máre juacuyume āimarare juaitōcu puenoi. Ape ūi baju bácarō pupuiyede juacuyume ne ĩmaro jedevai.

'Apenumu caivu Israecavu ne āmeno daru, davarājarama oteivecu ūmure, āmeno cubecure, ji cūrami jedevacobe yebai. Israecavu bucava ūi jipobui ne puruáre tuoivu, ūre boarājarama na. Ūre boaríburu yóboi, ūi jiveque jajiécuyume ñai sacerdote-vare jaboteipōecu dicaje cuitótecaje coricōpavaicajede ji cūrami jívui siete paiye baju. Aru mumijuede juaitōcure máre epecuyume die jivede. Aru yuacuyume āimarare ne boarí, juarí, jāmuóri jaruvaimarare juaitōcu cāchinoi die jive pupuiyede. No yóboi ñai oteivecu bácu baju bácarō jívunque, ūi cōrebuare, ūi penibore, aru caiye ūi neore máre juacuyume āimarare juaitōcu puenoi.

'Apenumu Israecavu ne jabocu ūi āmeno daru, apecu Israecacu máre ūi āmeno daru, davacuyume cabra ūmure, āmeno cubecure, ji cūrami jedevacobe yebai. Ūi jipobui ūi purure tuoyu, ūre boacáyume. Ūre boaríburu yóboi, cūinácu sacerdote epecuyume die jivequede āimarare ne boarí, juarí, jāmuóri jaruvaimarare juaitōcure. Aru yuacuyume ditōcu cāchinoi die jive pupuiyede. No yóboi ūi neore juacuyume ditōcu puenoi, arejaquemavu Jūmenijicu.

Jūmenijicu ape ūre ne jínajiyede, ne boropateiyede bojedarájiva, yópe arí coyurejaquemavu:

—Cūinácu ārumecava Jūmenijicu ūi daicōjeiyede vainí tuyu baru, cabra ūmure, āmeno cubecure jícuyume ūi āmeina teiye boje. Apecure meyuyayu baru Jūmenijicui āmiáque, ū máre cabra ūmure, āmeno cubecure davacuyume, Jūmenijicure jícuyu. “Jūmenijicui āmiáque jāveneca ayu” ūi arí meyuyaiye boje, ñai cabrare jícuyume. Ñai cabrare ūi boaríburu yóboi, sacerdote ūi jivede jajiécuyume āimarare ne boarí, juarí, jāmuóri

jaruvaimarare juaitōcu puenoi. Que jajiéyu, ũi cōrebuare, ũi penibore, aru caiye ũi neore máre juacuyume. Nópe darī buojaiyede, ina sacerdoteva cabra bácu jiaruare āiye majinajarama na. Apecu ũ jiede meyuyarī ĩñu maru, ũi íye báquede jacopaiyovacuyume ũi meyuyarī ĩmu mácu. Nópe jacopaiyovayu, pueno máque jícuyume ũi meyuyarī ĩmu mácu yópe darī: Cūinápurupe paiyede ĩñu maru, jacopaiyovacuyume seis paiyede, arejaquemavu Jūmenijicu.

Apede máre jíyede urejaquemavu Jūmenijicu. Ũi coreóvaihāravu eaiyede jícōjenejaquemavu ũ. Jāravua coapa pucarā ovejava ũmuvare, āmeno cubevare, cūináju cuvarivare, jícōjenejaquemavu Jūmenijicu, javejīnara ne jíquijimu cūinácu aru aviá doiye bajure ne jíquijimu apecure. Aru ovejavare ne juarī jíyede, apede máre jícōjenejaquemavu Jūmenijicu. Trigo āmicuriyabea oteiyabea pucakilos bajure olivo āmicuricu jēidua córoque jīvarejaquemavu. Aru dieque vino úyaicorore máre jídejaquemavu. Aru ne jabuóvaihāravua coapa cūináuru jídejaquemavu Israecavu. Ũbenita ne oteiyabea yóvaicuvaikilos bajure jídejaquemavu. Aru aviáva coapa mamabuijāravui yópe darī jídejaquemavu Jūmenijicure: Pucarā oteivecuvare, cūinácu cabrare, aru siete paiva ovejavare máre boarī, juarī, jāmuóri, jídejaquemavu Jūmenijicure. Na mácuque trigo āmicuriyabea oteiyabeare olivo āmicuricu jēidua córoque jīvarejaquemavu. Aru dieque vino úyaicorore máre jídejaquemavu.

Sacerdoteva ne memeni buino mácarō

Levítico 8-9

(Lucas 10.31, Hebreos 3.1, 4.14-15, 5.1-4, 7.11-28, 8.1-6, 9.6-14, 10.11)

Sinaí āmicuricū cūracūi Moisés ũi cuede, Jūmenijicu úre coyurejaquemavu sacerdoteva ne memenaiyede. “Yópe darājaramu muja”, arī coyurī jebedejaquemavu. Que teni Israecavu yebai jōdañu, eayu, náre cójijicōjenejaquemavu Moisés. Jūmenijicui cūrami āimara cajeáque ne daiñami jipocai cójijidejaquemavu caivu ina Israecavu.

Nópe darī buojarī, Aarón aru ũi mára ũmuvare cuyavarejaquemavu Moisés. Náre cuyavarī buojarī, Aaróre sacerdotevare

jaboteipõecui doicajede doarejaquemavu. Aarõi mårare ubeni curivu sacerdoteva ne doicajeare doarejaquemavu. Nópe darĩ buojarĩ, diñamine jajiédejaquemavu mumijueque. Diñami-quede máre jajiédejaquemavu, aru sacerdotevare máre. Ëi nópe darĩburu yóboi, Aarón mamaraque oteivecui jipobu puenoi ne puruáre tuorĩ, boaréjaquemavu úre. Ne ámeina daiye boje úre boaréjaquemavu. Úre boarĩ buojarĩ, áimacui neore juarejaquemavu áimarare ne boarĩ, juarĩ jaruvaimarare juaitõcu puenoi. Ëi baju bácarõ pupuijiaruare ne ímaro jedevai juarejaquemavu.

No yóboi, cūinácu cabrare boarĩ, caicura Jūmenijicure jídeja-quemavu. Apecu cabrare boarĩ, sacerdotevare ne cámuca écaru meapūravucarure, ne ámuyo urado meapūravucadore, aru ne cubodo urado meapūravucadore máre jījovarejaquemavu die jivede. Jījovari buojarĩ, jījovari pupuiyede yuarejaquemavu ditõcu áimarare juaitõcu puenoi aru cāchinoi máre. Que teni ũi cõrebuare, ũi penibore, ũi pīcomure. caiye ũi neore, aru ũi ārado meapūravucadore aru páu bucure daiye cubede máre jí-dejaquemavu Aaróre aru ũi mårare. Ne jíniburu yóboi diede Jūmenijicure, jacopaiyovarejaquemavu Moiséde, ũi juarĩ jíqui-yepe aivu Jūmenijicure.

No yóboi, Aarón ũi máraque yóbocacu cabra pupuijiaruare jatuorĩ árejaquemavu. Páu bucure daiye cubede máre áreja-quemavu. Die caiye ne daru, cūinásumanaque baju curejaque-mavu die áiye. Die pupuiye curu, juaicõjenejaquemavu diede Jūmenijicu. Ina sacerdotevare mauteicõjenejaquemavu Jūmenijicu ũi cūrami jedevacobe yebai disumanare. Disumana pinidui Aaróre juarĩ jícõjenejaquemavu Moisés caivu ina áimarrare Jūmenijicure yópe ũi daicõjeiye báquepedeca, Israecavu ne bojedarājīyepe ayu ne ámeina teiyede. Que teni caivura áimarare jídejaquemavu Jūmenijicure. Que baru ina Israecavu ne ámeina darĩburu yóboi, Jūmenijicure jídejaquemavu Aarón. Oteiyabeare máre jídejaquemavu Jūmenijicure. Ina Israecavu Jūmenijicu ũi daicõjeiye báquepedeca darĩ jebedeja-quemavu. Ne nópe daiyede jáñu, ocopenibo toaboque curibore jarorejaquemavu Jūmenijicu. Nópe ũi jaroiyede, dibo toa-boque úre ne jíye báquede juarĩ jebedejaquemavu Jūmenijicu. Nópe ũi juarĩ jebeiye de jáivu, “Jūmenijicu mauteiyucube”, arejaquemavu ina Israecavu.

**Jūmenijicu ũi coyuiño mácáro sacerdotevare ũi
daicōjeiyede**
Levítico 21-22

Sacerdotevacapūravu Jūmenijicu ũi memeyede ne daru, náre jícua máque ārojaene daicōjeiyede epedejaquemavu Jūmenijicu. Apevu Israecavu, sacerdoteva āmevu, iyepe paiye daicōjeiyede cuvabedejaquemavu. Yaiyú bácuí baju bácarōre ũicōjemenejaquemavu ina sacerdotevare. Yaiyú bácuí baju bácarōre ũivu baru, docucurivupe ārojarajarama na Jūmenijicu ũi jáiyede. Nópe teivu, ina sacerdoteva ne memeyede daiye majibema na. Que baru “Névu bácuí ne yainíburu jáivu, na mácavare ũinomu aivu”, arejaquemavu. Ina matuiyeda yuaiye majidejaquemavu ne yaiyede: Ne bucuvare, némarare, néyovare, némaminare, ne yaiyede jáivu, yuarī majidejaquemavu. Néyorōmiva ũmucubenomiva ne yainíburu, yuaiye majidejaquemavu. Ũbenita ina sacerdoteva nomicuiyurivu, apecu ũmuque cucore aru nomiópecore máre nomicurī majibedejaquemavu. Aru sacerdotevare jaboteipōecu ape daicōjeiyede cuvarejaquemavu. Ũcapūravare apevu pueno daicōjenejaquemavu. Ũ jivare yaivu bácuí ye cūinácu yuaiye majibedejaquemavu. Ũi bucúva bácuí cuedeca ye yuaicōjemenejaquemavu. Aru nomiópecore nomicurī majibedejaquemavu ũ. Que baru meabaju curivu matuiye sacerdoteva teicōjenejaquemavu. Āmeteivure bucuvata ne bajure āmeteivure náre sacerdoteva teicōjemenejaquemavu.

Que teni docucubevupe Jūmenijicu ũi jáiyede, sacerdoteva ne āiyede āiye majidejaquemavu. Ne āiye barejaquému apevu Jūmenijicure ne jíye báquede. Sacerdoteva jivu máre diede āiye majidejaquemavu na. Ina āimarare, Jūmenijicure pōeva ne jímarare, āmeno cubevure, ne jiaruaquede nuvari āicōjenejaquemavu sacerdotevare Jūmenijicu.

**Pucarā Aarōi mára ne yaino mácáro Jūmenijicure
ne vainí tuiye boje**

Levítico 10.1-7

Aarōi mára sacerdoteva curejaquemavu. Némamina pucarā, Nadab aru Abiú āmicurejaquemavu. Ũbenita sacerdotevavacari ne memeyede Jūmenijicu ũi daicōjeiyede dabedejaquemavu.

Toaboque mumijuede juarĩ jínidurejaquemavu Jūmenijicure. Ne nópe jíyede jáñu, ne cūináture dabede jáñu, náre jári cojube-dejaquemavu Jūmenijicu. Que baru toaboque boarí jaruvareja-quemavu náre, ne cuede ũi cūrami jívui. Náre ũi boarí jaravai-yede jáñu, Moisés yópe arejaquemavu:

—Jūmenijicu “Yópe dajarā” ũi aiyede jápiaivu, ũi aye bá-quepedeca daiye jauvu mujare, arejaquemavu Moisés.

Nópe ayu, Aarói pacumacui mārare cuturĩ jarorejaquemavu. Cuturĩ jarorĩ buojarĩ, Aarói mára mácavui bajuá báquede ĩni etavaicōjenejaquemavu ne ĩmarore jocarĩ. No yóboi, Aaróre aru apevu ũi mára pucarāre yópe arĩ coyurejaquemavu Moisés:

—Mumijueque mujare ji jajiéniburu yóboi, Jūmenijicui cū-rami jívui sacerdoteva muje memeyede daiye majivu muja. Mujare nópe ji jajiéniburu yóboi, mujevu yaivu bácavu yebai na mácavure orānumejara muja, arejaquemavu Moisés náre.

Na pucarā Eleazar aru Itamar āmicurejaquemavu. Ũi nópe cōjeiyede jápiaivu, ũi aye báquepedeca darejaquemavu na.

Israecavure ape āiyede Jūmenijicu ũi āicōjemeneno mácáro

Levítico 11

*(Mateo 15.11, 23.24, Marcos 7.15, Hechos 10.9-16, 27-29, 11.5-10,
Colosenses 2.16, Hebreos 9.10)*

Apevu āimarare āiye majidejaquemavu ina Israecavu. Ne cubojaraboa pucajaraboa curivure aru ne āiyede bedióva jaeto-varĩ jājuivure āri majidejaquemavu na. Ina āimarare ārejaque-mavu na: oteivecuvare, ovejavare, cabravare, ñamavare, qué-vura āimarare ārejaquemavu. Ubenita apevu āimarare, vāri-vare, conejovare, camellovare, aru apevu nápe paivure āicōje-menejaquemavu Jūmenijicu náre. Ũi āicōjememarare ne yainíburu yóboi, ũicōjemenejaquemavu na mácavure Israeca-vure Jūmenijicu. Moare chīchiá curivure aru doaivea curivure āri majidejaquemavu. Ubenita ne nópe āiyedeca, apevu jiaca-vure āicōjemenejaquemavu Jūmenijicu. Obedivu āimara vui-vure āiye majidejaquemavu na. Āimara vuivure ne baju jēni āi-vure, ũrojurivure āivure, aru mījinare máre āicōjemenejaque-mavu Jūmenijicu. Apevu āimara, mujuñuvape paivure āri

majidejaquemavu na. Ubenita báyvape paivure aru jiabuvape paivure máre, ina papeivure áicōjemenejaquemavu Jūmenijicu. Que baru Israecavure ũi áicōjememarare “Docucurivu” arī, náre ámidorejaquemavu Jūmenijicu. Ina áimara docucurivupe Jūmenijicu ũi jáiyede ne yainíburu yóboi, pōecu ũi cuvaede cōcaru, ũi cuvae docucuepe árojarejaquemavu Jūmenijicu ũi jáiyede. Docuteiyede jáivu Israecavu, joarejaquemavu na. Ina áimara docucurivupe ne bajuá báquede taru jobocōaiñu jívui, diñure cobarī jaruvaicōjenejaquemavu Jūmenijicu aru diñui cue báquede docucuepe árojarejaquemavu Jūmenijicu ũi jáiyede.

**Jūmenijicu ũi coyuno mácarō Moiséde
docucurivupe ne teiyede aru docucubevupe
ne dare daiyede ũi jáiyede**
Levítico 12-15; Números 19

*(Mateo 8.2-4, 23.27, Marcos 1.40-45, Lucas 2.22-24, 5.12-14, 11.44,
17.11-14, Juan 7.22-23, Hebreos 9.6-14)*

Cūiná mae Israecavu jícua daivu docucurivupe nuivu barejaquémavu Jūmenijicu ũi jáiyede. Nópe docucurivure pōeva ne curitavare nuicōjemenejaquemavu Jūmenijicu. Ũi cūramine máre náre nuicōjemenejaquemavu. Que baru docucurivupe Jūmenijicu ũi jáiyede docucuiyubevu yópe darejaquemavu: Na cuyarejaquemavu. Que teni ne cuitótecajeare joarejaquemavu. Cūinácu bae docucucupe áimacure jíyucu, áimacureca jídejaquemavu. Míjinare jíyucu, míjinareca jídejaquemavu. Apevupe paivure jíyurivu, apevupe paivureca jídejaquemavu Jūmenijicure, ne baju meadarājivu yópe docucuede joaiyepe. Iye caiyede coyurejaquemavu Jūmenijicu Moiséde.

Yópe daicōjenejaquemavu jue docuvarinomivare. Ũmujicure jue docuvaco báco cuarenta paijāravua baju docucurejaquemavu Jūmenijicu ũi jáiyede. Cūínasumana yóboi, ũi pōeteníburu yóboi, ũmujicu ũi cajede buraicōjenejaquemavu Jūmenijicu. Que teni cuarenta paijāravua yóboi, oveja ũmure, cūináuju cuvacure, jídejaquemavu sacerdotede, ũi boarī, juarī, jāmuóri jíquiyupe ado Jūmenijicure. Aru jurecore máre davarejaquemavu, ōi ámeina teiye boje, Jūmenijicure jícodado.

Ócapūravu nópe dado, docucubecope ārojarejaquemavu Jūmenijicu ũi jáiyede.

Nomi juedojícore juedocuvaco báco ochenta paijāravua baju docucurejaquemavu Jūmenijicu ũi jáiyede. Que teni ochenta paijāravua yóboi, oveja ũmure, cūináju cuvacure, jídejaquemavu sacerdotede, ũi boarí, juarí jāmuóri jíquiyepe ado Jūmenijicure. Aru jurecore máre davarejaquemavu, ōi āmeina teiye boje, Jūmenijicure jícodado. Ócapūravu nópe dado, docucubecope ārojarejaquemavu Jūmenijicu ũi jáiyede. Que teni ñai sacerdote ōi jíye báquede, ōre ũi jícaríburu yóboi, ō máre docucubecope mautedejaquemavu Jūmenijicu ũi jáiyede.

Aru churiá pojeiye curivure sacerdoteva ne darājiyede coyu-rejaquemavu Jūmenijicu Moiséde aru Aaróhare máre. “Yópe ne churiá pojeiyede majinajaramu”, arí coyarí jebedejaquemavu Jūmenijicu náre, āmebaju ne cuede ne majinajiyepe ayu. Āmebaju ne cuede jáñu, sacerdotecapūravu náre “Docucurivupebu Jūmenijicu ũi jáiyede”, arejaquemavu. Que baru pōevare ne yebai nuicōjemenejaquemavu. Nópe docucucuvacari “Yu ji churiá pojeiyevacari papaiyebu” ũi que aiyede, sacerdote ũi churiáre me jáiye majidejaquemavu. Jáveneca die papaiyede jáñu, pōecubeno ñai churiá pojeyu bácu ũi curō mácarōre jocarí copai-cōjenejaquemavu sacerdote ĩmaroi. Pucarā mǐjinare nuvarejaquemavu. Nópe nuvañu, cainijororu puenoi, ocoque curijororu puenoi, cūinácare boarí jaruvarejaquemavu. Boarí buojarí, die jivede ocoque jivari, ñai pōecure, churiá pojeyu bácare, jajiédejaquemavu. Siete paiye baju jajiédejaquemavu ũre. No yóboi, ñai mǐjicu yaiyá bácu jiveque jáñuvarejaquemavu apesu mǐjicure, apucure. Jáñuvari buojarí, ñai mǐjicure dajocarí jarorejaquemavu. Sacerdote ũi nópe daríburu yóboi, ñai churiá pojeyu bácu ũi cuitótecajede joarí, jevu vuvinoque, ũi podare me bureni jebení, cuyarejaquemavu. Seis paijāravua yóboi, ũi daiye báquepedeca darejaquemavu bedióva cojedeca. Nópe ũi daríburu yóboi, cūinájaravu yóboi, pucarā ovejava ũmuvare, āmeno cubevure aru cūináco oveja nomió cūináju cuvacore davarejaquemavu Jūmenijicui cūrami jedevacobe yebai. Āimarare, mǐjinare máre jícōjenejaquemavu sacerdotevare churiá pojeyu bácare ũi āmeina teiye boje, jícōjeñu Jūmenijicu. Náre ũi davaiyede sacerdotede, yópe darejaquemavu churiá pojeyu bácu, meadacuyu ũi baju Jūmenijicu ũi jáiyede, yópe docucuede

joaiyepe. Ñai churiá pojeyu bácare ũi ámeina teiye boje, majió-varō áimacui jivede ĩni, ũi cámuca écaru meapūravucarure, aru ũi ámuvo urado meapūravucadore, aru ũi cubodo urado meapūravucadore máre jĭjovarejaquemavu. No yóboi, majióvarō ũi davaiye báque olivo ámicuricu jéidua córore ĩni, cūináture ũi daiye báquepedeca die jiveque darejaquemavu die córoque. Ũi nópe darĭ buojaiyede, ñai churiá pojeyu bácu “Docucubecupe árojavu mu ji jáiyede”, arĭ coyurejaquemavu Jūmenijicu.

Churiá bojo etayu máre Jūmenijicu ũi jáiyede docucucupe árojarejaquemavu. Caiye ũi yuaiye báque docucurejaquemavu. Caivu pōeva ũi yuaiyede cōcaivu bácu docucurivupe barejaquémavu Jūmenijicu ũi jáiyede. Nópe docucurivupe nuivu, ne cuitótecajear joarĭ, cuyarejaquemavu. Nópe darĭ buojarĭ, avia ũi doiyede docucubevupe nurejaquemavu cojedeca. Avia ũi doiyede, apejáravu buijáravu barejaquémavu Israecavu ne dápiayede. Que teni, avia ũi doiyede, docucubevupe árojarejaquemavu, dijáravu cūiyede. Que teni ñai churiá cucu bácu ũi churiá papaiyede jáñu, pucarā jurevare nuvarejaquemavu sacerdote yebai, ũi jíquiyepa ayu Jūmenijicu. Cūinácu jurecore ũi ámeina teiye boje jícuyu barejaquémavu. Apecore caico bajure juarĭ jídejaquemavu. Nópe darĭ buojarĭ, docucubecupe mautedejaquemavu churiá bojo etayu bácu Jūmenijicu ũi jáiyede.

Aru ũmu nomióque cucu baru, pucajáravua docucurivupe barejaquémavu Jūmenijicu ũi jáiyede. Ũmu nomióque cucu bácare aru nomío ũmuque cūco bácore cuyaiye jaurejaquemavu. Aru nomiva pāuvainomiva máre siete pajáravua ne pāuvaiyede docucurivupe barejaquémavu Jūmenijicu ũi jáiyede.

Apevu yópe docucurivupe nurejaquemavu Jūmenijicu ũi jáiyede: Yaiyá bácare ũivu aru yaiyá bácu ũi cūadoa paraiñami ecoiva máre, docucurivupe nurejaquemavu. Cūínasumana docucurivupe mautedejaquemavu. Que teni yóbecurijáravua nuiye bajure apevu docucubevupe docucurivupe ocoque jaiyédejaquemavu. Aru siete pajáravua nuiye bajure, bedióva cojedeca jaiyédejaquemavu. Córo sacerdoteva ne daiye báquede otevecuco jūaco báco caico ne juaimo mácore ne juaipena máque jĭvaiye barejaquémavu. Avia ũi doiyede, docucubevupe mautedejaquemavu na Jūmenijicu ũi jáiyede. Aru caivu pōeva docucurivupe Jūmenijicui cūramine ecoiye majibedejaquemavu.

**Jūmenijicu epeyu ape daicōjeiyede Moiséde ũi
coyuino mácarō**
Levítico 18-20

*(Mateo 5.33, 19.19, 22.39, Marcos 12.31, Lucas 10.27, Romanos 10.5, 13.9,
Gálatas 3.12, 5.14, Santiago 2.8, 1 Pedro 1.16)*

Ape daicōjeiyede coyurejaquemavu Jūmenijicu Moiséde. Israecavu ne ju ārajyipe ayu. Yópe arejaquemavu Israecavure: “Ji daicōjeiyede muja mearo ju aivu baru, jāravua coapa yúque curājaramu muja”, arejaquemavu náre. Ape daicōjeiyede yópe arī epedejaquemavu: “Muja mujevuque āmeno dabejarā. Pucarā ũmuva curivu muje baju āmeno dabejarā. Pucarōmiva máre muje baju āmeno dabejarā. Āimaraque āmeno dabejarā. Pāuvainomivaque cubejarā”, arī coyurī jebedejaquemavu Jūmenijicu.

Canaán āmicurijoborōcavu ne baju āmeno daivu barejaqué-mavu. Que baru Jūmenijicu náre, dijaborōi curivure, jaruvacuyu aru dijaborōre Israecavure jícuyu barejaqué-mavu. Diede coyurī jebedejaquemavu Jūmenijicu. Caivu ũi daicōjeiyede ju aivure “Náre jaruvaiyubevu”, arī dápiarejaquemavu. Que baru Israecavure yópe arī epedejaquemavu:

—Yu Jūmenijicu bajubu. Āmeno cubecubu yu. Que baru muja máre āmeno cubevu cūjarā. Mujare ji daicōjeiyede mearo ju ajarā muja. Mujebucuvare puedajarā. Muje jabuóvajāravure jabuóvajarā. “Jūmenijicube” arī, muje pēpeimure dabejarā. Ũavamejara. Apevure āmeno dabejarā. Ji āmiáque āmidorī yajubejarā. Mujare memeni coreivure jāravua coapa bojedajarā dijāravu cūiyede. Jápiabevure, jári eabevure, cōmaje ārojarivure, apenocavure máre mearo dajarā. Mujacavure jári coenímejara. Apevu mujare ne āmeno daru, náre máre muja āmeno darī cojediovabejarā. Muje bajure mearo daiyepedeca mearo dajarā apevure máre. Ape paiyede bojedaivu cūináturu bojedajarā. Apevu némarare boaivu, “Jūmenijicube” arī, ne pēpeimarare mearore jínajivu barejaqué-mavu. Nópe daivure boarí jaruvajarā náre. Caiye mujare ji daicōjeiyede me ju ajarā muja. Nópe daivu, Canaán āmicurijoborōita mearo curājaramu muja, arī coyurejaquemavu Jūmenijicu.

Jūmenijicu Israecavure ũi epeino mácarō cūinájāravu ũre ne mearo jínajijāravure

Levítico 16, 23; Números 28.16-29.40

*(Mateo 26.2,5,17-19, 27.15, Marcos 14.1-2,12,14,16, 15.6,
Lucas 22.1,7-8,11-15, Juan 2.13, 7.10-24, 11.55-56, 12.1,12, 13.1, 18.28,39,
Hechos 2.1, 12.3, 20.6, 27.9, 1 Corintios 5.6-8, Colosenses 2.16,
Hebreos 6.19-20, 9.6-14, 10.1-4, 13.11)*

Ne jabuóvarājijāravu sumana coapa Israecavu jabuóvaicō-
jeñu, yópe arī epedejaquemavu Jūmenijicu náre: “Sábado jā-
ravu yure muje mearore jínajijāravu baquiyébu. Seis paijā-
ravua memenajaramu. Dijāravua yóboi, sábado jāravu, jabuó-
varājaramu muja”, arī epedejaquemavu Jūmenijicu.

Apejāravuare torojuve tenajijāravuare epedejaquemavu Is-
raecavure. Ũi epeijāravu jabuóvajijāravu, dijāravu Pascua āmi-
curijāravu barejaqué mavu. Dijāravu Jūmenijicu Egipto āmicu-
rijoborōi curivu bácvure ũi jaetovajijāravu bácarō ne ārurajijā-
ravure epedejaquemavu náre ũjuá coapa. Dijāravu ne torojuve
teijāravu páu bucure daiye cubeque ne ārajijāravu barejaqué-
mavu. Cūinásamana baju torojuve tedejaquemavu na. Dijā-
ravua ne torojuve teijāravua buijāravure aru bubaijāravure
máre jabuóvaicōjenejaquemavu náre. Pucajāravua jabuóvaicōje-
nejaquemavu náre. Dijāravua ne torojuve teijāravuare jāravua
coapa páu bucure daiye cubeque ārejaquemavu na. Que teni di-
sumana jāravua coapa āimarare boarí, juarí, jāmuóri, jídeja-
quemavu Jūmenijicure. Jāravua coapa pucarā otevecuva ũmu-
vare, cūinácu cabra ũmure, aru apevu siete paivu ovejavare cūi-
náuju cuvarivure boarí, juarí, jāmuóri, jídejaquemavu Jūmeniji-
cure, mearore jínajivu. Áimarare jíni, trigo āmicue oteiyede
máre jídejaquemavu Jūmenijicure. Apecu cabrare máre boarí,
juarí. jāmuóri, jídejaquemavu, ne āmeina teiye boje.

Que teni páu bucure daiye cubeque ne torojuve teijāravua
jēneboi, apejāravua torojuve teicōjenejaquemavu náre. Dijā-
ravu ne torojuve teijāravu oteiyē curōquede jēiduare diujui ne
ĩni buijāravure ne ĩye báquede Jūmenijicure jídejaquemavu.
Que teni dijāravui “Oteiyē curōque jēiduare maje ĩni buiye jēi-
duare maje jījāravu baquiyébu”, arejaquemavu. Die jēiduare
jídejaquemavu sacerdotevare, Jūmenijicure ne jínajiyēpe aivu.
Ovejare máre boarí, caicura juarí, jāmuóri, jídejaquemavu

Jāmenijicure. Trigo āmicue oteiyede olivo āmicuricu jēidua córoque jīvari buojarī, juarejaquemavu. Aru vino úyaicorore yuarī jídejaquemavu Jāmenijicure. Die oteie curōquede mamarumu ne íye báquede, Jāmenijicure ne jínajiye jipocai, apedua jēidua ne oteie curōque jēidua āiye majibedejaquemavu. (Canaán āmicurijoborōi ne earājiye jipocai, oteie curō cuvabedejaquemavu. Que baru cuipōeva marejaqué-mavu. Ne torojuve teijāravure memeiye majibedejaquemavu. Nópe ne đarī majibedeca, Jāmenijicu dijāravure náre epedejaquemavu, yóboi Canaáita ne cuede ne đarājiyepe ayu.)

Que teni dijāravui ne corevaijāravu buiyede cincuenta paijāravua yóboi Pentecostés āmicurijāravu torojuve teijāravu epedejaquemavu náre. Dijāravu ne torojuve teijāravu apedua ne oteie curōque jēidua jícōjenejaquemavu náre Jāmenijicu. Que baru dijāravui siete paivu ovejava cūináju cuvavure, cūinácu oteivecu ūmure, aru pucarā cabravare boarī, juarī, jāmuóri, jícōjenejaquemavu náre. Que teni apecu cabrare ne āmeina teiye boje, aru apecu pucarā ovejavare, cūináju cuvavure, Jāmenijicu ūi cārijimene đaquiyepe aivu náre, boarī, juarī, jāmuóri, jícōjenejaquemavu náre. Dijāravure, Pentecostés āmicurijāravure, Jāmenijicu jabuóvaicōjenejaquemavu ina Israecavure. Yore máre đaicōjenejaquemavu náre:

—Muje oteie curōque jēidua ĩni jebebejarā. Apede dajocarī pupujarā, cōmaje ārojarivu ne ārajiepe aivu. Que teni yebai tuiyede ĩmejara diede máre, cōmaje ārojarivu ne ārajiepe aivu, arī đaicōjenejaquemavu náre.

Ujuá coapa siete paiaviava yóboi, diavia buijāravu torojuve teijāravure đarejaquemavu Israecavu. Ne torojuve teijāravu buiyede, trompetas āmicuriyoa japuiyoare japurejaquemavu. Dijāravu ne torojuve teijāravu bedióva cojedeca ne jabuóvarāji-jāravu barejaqué-mavu. Que teni caivu ina Israecavu Jāmenijicui cūrami yebai cójijidejaquemavu. Nópe cójijivu, āimarare boarī, juarī, jāmuóri, jídejaquemavu Jāmenijicure, mearore jívu. Cūinácu oteivecu ūmure, cūinácu cabrare, aru siete paivu ovejavare, cūináju cuvavure boarī, juarī, jāmuóri, jídejaquemavu. Náre caivura juarī jídejaquemavu Jāmenijicure. Que teni āimarare jíni, oteiyede máre olivo āmicuricu jēidua córoque jīvari buojarī, juarī jídejaquemavu. Aru apecu cabrare

boarí, juarí, jámuóri, jídejaquemavu Jūmenijicare, ne āmeina teiye boje.

Ujuá coapa siete paiaviava yóboi, diavia caipucapuruaape paijāravua yóboi, torojuve teijāravure darejaquemavu. Dijāravu ne torojuve teijāravu “Jūmenijicu maje āmeina teiyede ūi ārumeteijāravu” āmicurejaquemavu. Dijāravu ārurijāravu ubeni curijāravu āiye āmenejaquemavu. Dijāravu Israecavu diujui ne āmeina teiye báquede Jūmenijicare ne coyurāijijāravu barejaquémavu. “Ñaje āmeina teiyede ārumetejacu mu”, Jūmenijicare ne arí jēniarajijāravu barejaquémavu. Dijāravu máre ne jabuóvarāijijāravu barejaquémavu. Que baru ye mememenejaquemavu. Dijāravui sacerdotevacapūravu Jūmenijicui cūrami ūi jipocai jádovarejaquemavu Israecavu ne āmeina teiyede, Jūmenijicare ārumeteicōjeivu. Dijāravumica Jūmenijicu ūi curitucubu baji, sacerdotevare jaboteipōecu ūi memecaitucubure, ecorejaquemavu ñai sacerdotevare jaboteipōecu. Ditucubui Jūmenijicu jitōcu curejaquemavu. Ditōcu puenoi noi cuede jádovarejaquemavu oopeniboque. Ditucubure sacerdotevare jaboteipōecu matuiye ecorí majidejaquemavu. Ū matuiyeda ditucubure coricōpavaicajede vainí, ecoiye majidejaquemavu. Nópe ecoyu, cūináturu daiye jaurejaquemavu ūre. Cūináturu Jūmenijicu ūi daicōjeiye báquepedeca dabecu baru, yaijébu. Ditucubuita ūi ecoquiye jipocai, ūi daicōjeiye báquepedeca docucubecupei teiye jaurejaquemavu. Que teni boricajeare ūi doicajeare, docucubecajeare doiye jaurejaquemavu ūre. Cūinácu oteivecu ūmure, cūinácu cabrare, aru siete paiva ovejavare, cūináuju cuvarivure boarí, juarí, jámuóri, jíye jaurejaquemavu, ūi āmeina teiye boje. Apevu sacerdoteva aru caivu apevu Israecavu máre ne āmeina teiye boje, Jūmenijicare āimarare boarí, juarí, jámuóri, jídejaquemavu. Apecu cabrare davarí, boarí, caicura Jūmenijicare juarí, jámuóri, jídejaquemavu. Nópe davayu, Israecavu ne āmeina teiye boje ūi boaquijimure, ñai cabrare duvarí járejaquemavu, ūre majicuyu. Apecu cabra, pōecubenoita ūi jaroquijimu marejaquémavu. Jūmenijicu ūi curitucubuita, sacerdotevare jaboteipōecu ūi memecaitucubuita, ecorejaquemavu. Nópe ecoyu ĩmarijororure cojidichīchia ūi íye báquede juaitōcure jocarí ĩni nuwarejaquemavu. Que teni pucapurua ūi nuvainope mumijuede toaboi duvarí jūari jaruvarejaquemavu. Que teni mumijuede ūi juaino jēneboi ditucubure

ecorī nurejaquemavu. Ecorī earī oteivecu bácu ūi jivede ditōcu, Jūmenijicui “Que darājare” arī, ūi āruritōcu puenoi jajiédejaquemavu. No yóboi, Jūmenijicui cūramine etarī, ne cūramia cainiva yebai earī, ne āmeina teiye boje cabrare boarī, juarī, jāmuóri, jidejaquemavu Jūmenijicure. Boarī buojarī, ūi jivede īni, bedióva cojedeca mumijueque Jūmenijicu ūi caritucubui ecorī nurejaquemavu cojedeca. Ecorī buojarī, ditōcu, Jūmenijicu “Que darājare” arī, ūi āruritōcu puenoi jajiédejaquemavu. Jūmenijicui cūrami mamaecoitucubure, sacerdoteva ne memecaitucubure, āimarare boarī, juarī, jāmuóri jītōcu puenoi máre jajiédejaquemavu die jivede. Nópe darī buojarī, ñai cabra apucu ūi jipoba puenoi ūi puruáre tuorejaquemavu ñai sacerdotevare jaboteipōecu. Tuorī buojarī, Israecavu caivure ne āmeina teiye báquede coyurejaquemavu ū. Ūi coyurī buojaiyede, apecu pōecubenoita ñai cabrare nuwarejaquemavu. Noita eavayu, ūre jaetovarejaquemavu. Ūi que ñaiyede diujui Israecavu ne āmeina teiye boje joarōita ūi nuvajuroe jauédeca ñai cabra bíjarejaquemavu. Nópe darīburu yóboi, sacerdotevare jaboteipōecu ūi cuitótecajeare durī, apede dorejaquemavu. Dorī buojarī, cainivai etarī núrejaquemavu. Apevu ne āimara boaimara mácavure jidejaquemavu Jūmenijicure cojedeca. Apevu āimara boaimara mácavure caivura juarī jebedejaquemavu. Ne āmeina teiye boje, ne jímara mácavu bajuáque ne neore juarī jebedejaquemavu. Que teni cūinácu noi memenu, ne āmeina teiye boje, ne jímara bajuá báquede papuiyede juarī jebedejaquemavu. Israecavu ne curitava yebai juarejaquemavu diede. Dijāravumica apevu āimarare boaiye jaurejaquemavu ina Israecavure. Cūinácu oteivecu ūmure, cūinácu cabrare, aru siete paiva ovejavare, cūináju cavarivure, boaiye jaurejaquemavu, caivura Jūmenijicure ne jínajimarare. Na caivaque, oteiabeare máre jidejaquemavu. Apecu oveja ūmure boarī juarī, jāmuóri, jidejaquemavu Jūmenijicure, ne āmeina teiye boje.

Ujuá coapa siete paaviava yóboi, diavia buijāravu quince pajāravua yóboi, torojuve teijāravure ñarejaquemavu Israecavu cūinásumana baju. Dijāravure, ne torojuve teijāravu buijāravu, úcūa ñarejaquemavu. Aru úcūai curejaquemavu cūinásumana baju. Que baru iye torojuve teiyede úcūa ñarī torojuve teijāravua āmicurejaquemavu. Que teni cūinásumana baju torojuve tedejaquemavu. Disumana buijāravure Israecavu

jabuóvarejaquemavu. Bubaijāravure máre jabuóvarejaquemavu. Que teni dijāravuai Jūmenijicui cūrami cójjijidejaquemavu na. No jipocai, Israecavu Egipto curivu bācavu, nuridurejaquemavu. Canaán āmicurijoborōi nuivu barīdurejaquemavu. Nópe nuivu, úcūai curejaquemavu na. Nópe ne daiye báquede ne ārurajipepe aivu, úcūai curivuta no torojave teijāravua darejaquemavu. Canaán āmicurijoborōi ne earīburu yóboi, torojave teijāravua darejaquemavu. Dijāravuare Israecavu torojurejaquemavu. Jūmenijicu náre mearo oteiye curōre ūi jīdu, ape méne ūi jīdu, na ne torojurājimure “Meavu” arejaquemavu. Dijāravuare āimarare boarí, juarí, jāmuóri, caivura jīdejaquemavu Jūmenijicure. Aru apevu āimarare jīdejaquemavu ūre, ne āmeina teiye boje.

Moiséde Jūmenijicu ūi corevaicōjeino mácarō

Israecavure

Números 1-2

Israecavu Egipto āmicurijoborōi curivu bācavu cūináju ne nuriburu yóboi, Jūmenijicu náre corevaicōjenejaquemavu. Moisés, Aarón, aru apevu jabova Israecavure corevarejaquemavu. Ina doce paiyajuboa barejaquémavu. Diyajuboa coapa jabova bárājivure beorejaquemavu Jūmenijicu. Moisés Aarómaque náre cójjijicōjenejaquemavu. Caivu Israecavu veinte paiujua cuvarivure aru bucuvare máre, ūmuva matuiyeda corevarejaquemavu na. Ne yajuboa yópe āmicurejaquemavu: Rubén, Simeón, Judá, Isacar, Zabulón, Efraín, Manasés, Benjamín, Dan, Aser, Gad, aru Neftalí āmicurejaquemavu na. Diyajubocavure corevarejaquemavu. Leví ūi yajubocavure corevabedejaquemavu. Ne corevaimara caivu seiscientos tres mil quinientos cincuenta paivu baju ūmuva marejaquémavu.

Que teni Israecavure ne curitavai “Iyajubocavu yui curājarama”, arī corevarí epeicōjenejaquemavu Jūmenijicu Moiséde. Nópe corevayu, Jūmenijicui cūrami āimara cajeáque ne daiñami mácarōre ne curitavai coricai epedejaquemavu. Diñami avía dainocapūravui curejaquemavu iyajuboa ne cūramia: Judá, Isacar, aru Zabulón. Aru Jūmenijicui cūrami avía daino cācopūravui curejaquemavu iyajuboa ne cūramia: Rubén, Simeón, aru Gad. Jūmenijicui cūrami avía doinocapūravui cureja-

quemavu iyajuboa ne cūramia: Efraín, Manasés, aru Benjamín. Aru Jūmenijicui cūrami aviá daino meapūravui curejaque-mavu iyajuboa ne cūramia: Dan, Aser, aru Neftalí. Ne cūramia āimara ne cajeáque aru cuitótecajéque ðarejaquemavu.


Jūmenijicu ũi beoino mácarō Leví ũi yajubocavure sacerdotevare cadatenajivure

Números 3-4, 7-8

(Lucas 10.32)

Israecavu Sinaí āmicuricū cūracūi ne earīburu yóboi, Jūmenijicu Leví bácu ũi yajubocavure beorejaquemavu sacerdotevare cadatenajivure. Diyajubocavure Levitas āmidorejaquemavu. Que teni ina Levitas Moisés Aarójare máre cadatenajivu barejaquémavu. Aru ina sacerdotevare máre cadatenajivu barejaquémavu. Moisés Leví bácu ũi yajubocacu barejaquémavu. Ūbenita sacerdote āmenejaquemavu ũ. Aru Levita āmicuriyaju-bocacu máre āmenejaquemavu ũ.

Jūmenijicu Aarón, ũi mārare aru ũi pāramena curipinidu teiva bárājivure máre sacerdotevare beorī epedejaquemavu.



Sacerdoteva áimarare boarí, juarí, jámuóri, jídejaquemavu Jūmenijicure, mearore jívu. Ubenita ina Levitacapūravu sacerdoteva ne memeyede dabedejaquemavu. Sacerdoteva matuiyeda mearore jídejaquemavu Jūmenijicure. Ina Israecavu apenoi ne nurajiye jipocai, ina Levitas Jūmenijicui cūramine, áimara cajeáque ne daiñamine, duvarí, ĩni, turí nuvaivu barejaqué mavu. Diñamique caiyede nuvarejaquemavu na máre. Que teni sacerdoteva ne memeyede cadatedejaquemavu ina Levitas.

Leví bácu yóbecurá mamara cuvarejaquemavu. Ĕi mára Gersón mácu, Coat bácu, aru Merari bácu ámicurejaquemavu. Coat bácu ĩi pāramena curipinidu teivu Moisés, Aarón, aru apevu sacerdoteva barejaqué mavu. Apevu Coat bácu ĩi pāramena curipinidu teivu Jūmenijicui cūrami jívuquede turí nuvaivu barejaqué mavu. Gersón mácu ĩi pāramena curipinidu teivu diñamique cajeáre turí nuvaivu barejaqué mavu. Merari bácu ĩi pāramena curipinidu teivu diñamiquede jocucure, tācucure, cūraabodoare, aru jocuveare máre turí nuvaivu barejaqué mavu. Diñamine ne duvarí buojaiyede, turí nuvarejaquemavu diñamiquede.

Israecavu doce paiyajuboacavu ne pueno jabovacapūravu jāturuicūare aru oteivecure jídejaquemavu Levitare. Seis paicūa jāturuicūa jabuborejaquemavu pucarā oteivecure dicūá coapa. Ina Levitas ne memenajiyede ne cadatenajiyepa aivu davarejaquemavu ina oteivecure dicūáque. Gersón mácu jācapūravu pucacūa jāturuicūare nuvarejaquemavu, ne memenajicūare. Merari bácu jācapūravu yóvaicūa jāturuicūare nuvarejaquemavu, ne memenajicūare. Coat bácu jācapūravu jāturuicūaque mememenejaquemavu. Jūmenijicu náre jēicōjemenejaquemavu ĩi cūrami jívuquede ne puruáque. Que baru náre jēitarabuaque jajuídorí, turí nuvaicōjenejaquemavu Jūmenijicu ĩi cūrami jívuquede. Caivu Levitare ne ámene, yópe joaiyepe, jaruvaicōjenejaquemavu Jūmenijicu. Ĕi memeyede darājivure mearare, ámeno cubevare, cuicōjenejaquemavu náre. Que baru ne ámene, yópe joaiyepe, pucarā oteivecure boarí, juarí, jámuóri, jídejaquemavu Jūmenijicure. Cūinácure caicura jídejaquemavu. Apecure ne ámeina teiye boje jídejaquemavu.

Ina Levitas Jūmenijicui cūrami yebai ne cāitava cuvarejaquemavu. Avia dainocapūravui, Moisés, Aarón, aru sacerdoteva ne cāitava curejaquemavu. Apevu Coat bácu jā avia doinocapū-

ravui curejaquemavu. Avia daino cācopūravui Gersón mácuja curejaquemavu. Aru avia daino meapūravui Merari bácuja curejaquemavu.

Jūmenijicu “Mívu bárājivu nazareo pōeva” arī, ũi coyuno mácarō Moiséde

Números 6

(Lucas 1.15, Hechos 18.18, 21.23-26)

Apevu Israecavu, ũmava aru nomiva máre, apejāravua Jūmenijicu jivu bárājivu curejaquemavu, nazareo āmicuriyajubocavu. Aru apevu cainumua ne curijāravuare ũ jivu bárājivu curejaquemavu. Cūinácu nópe cucu, iye daicōjeiyede daiye jaurejaquemavu ũre.

Ũre yóbecue daicōjeiye curejaquemavu. Ye vino úyaicorore ũre ũcuicōjemenejaquemavu. Ũi podare yuvaicōjemenejaquemavu. Aru yaiyú bácu bajo bácarō yebare nuicōjemenejaquemavu. Yaiyú bácu yebai eayu baru ũ, docucucupe curejaquemavu Jūmenijicu ũi jáiyede.

Ina apejāravuare nazareo teivu ne corevajāravu eaiyede, dajocarājivu ne nazareo teiyede, ovejare cūináju cuvacure, āmeno cubecure, boarī, caicura juarī, jāmuóri, jidejaquemavu Jūmenijicure. Aru oveja nomióre cūináju cuvacore, āmeno cubecore jidejaquemavu Jūmenijicure, ũi āmeina teiye boje. Aru cūinácu cabrare jidejaquemavu, Jūmenijicu ũi cārijimene daquiyepe ayu ũre, ne yóvarājiyepe ayu. Páure máre davarejaquemavu, Jūmenijicure jícudayu. Nópe ũi davaiyede, cūinácu sacerdotevacacu die caiyede Jūmenijicure jicarejaquemavu ũre. Ũi nópe darī buojaiyede, Jūmenijicui cūrami jedevacobe yebai ũi podare yuvarī jebedejacquemavu. Nópe ũi yuvarī jebeiye de jáñu, caiye ũi podare toaboi juarejaquemavu. Jūmenijicure ũi jacopaiyovaiye báqueque ũi podare juarī jebedejacquemavu. Nópe darī buojarī, sacerdote cabra bácu tōarure aru páu bucure daiye cubede máre ĩni, nazareore jidejaquemavu. Aru nazareocapūravu diede Jūmenijicure jidejaquemavu. Que teni cabra bácu tōaru meapūravu curitōarure aru ñarebare máre jidejaquemavu sacerdotede. Diede darī buojayu, Jūmenijicure


ũi aiye báquepedeca đarĩ bubarejaquemavu. Nópe đarĩ buo-
jayu, bedióva cojedeca vino úyaicorore ũcurejaquemavu.

**Sinaí āmicuricũ cūracũ yebai curivu Israecavu ne
nuino mácarō Canaán āmicurijoborōi**

Números 9.15-10.36

Jūmenijicui cūrami āimara cajeáque ne daiñamine Moiséjã
ne nuvariburu yóboi, ocopenibo diñami puenoi curejaquemavu.
Jāravure curejaquemavu. Ñamine máre diñami puenoi me mia-
đáro marejaqué mavu. Que baru no ocopenibo diñami puenoi
curu, Israecavu mautedejaquemavu. Egiptoi curivu bácavu ne
nuriburu yóboi cūináju apeju daiye bajure, no ocopenibo di-
ñami puenoi curō mácarō nuri jipocatedejaquemavu náre. Nópe
nuiyede jáivu, Israecavu no ocopenibo yóboi nurejaquemavu.

Judá, Isacar, aru Zabulón āmicuriyajuboacavu nuri búreja-
quemavu. Ne yóboi apevu Leví āmicuriyajubocavu, Gersón
mácu aru Merari bácu ne pāramena curipinidu teivu, Jūmeni-



jicui cūramine duvarī, jocuveare, cainicajeare máre ĩni cujuivu barejaquémavu na. Rubén, Simeón, aru Gad āmicuriyajubocavu ne yóboi nurejaquemavu. Ne yóboi apevu Leví āmicuriyajubocavu, Coat bācui pāramena curipinidu teivu, Jūmenijicui cūrami jivuquede ĩni, turī, nūvarejaquemavu. Ne yóboi, Efraín, Manasés, aru Benjamín āmicuriyajubocavu cūjurejaquemavu náre. Que teni ne yóboi, Dan, Aser, aru Neftalí āmicuriyajubocavu nuri pinidu tedejaquemavu.

Puque bajo Israecavu ne cārijino mácarō
Jūmenijicure jaraivu
Números 11

(Hechos 13.18, 1 Corintios 10.6)

Dinumure Israecavu āmeno vaidéjaquemavu. Cārijivu barejaquémavu jaraivu. Ne nópe jaraiyede jáñu, Jūmenijicu náque jorojīnejaquemavu. Que jorojīñu, toabore jarorejaquemavu ne cāitava yebai. Urarō énejaquemavu. Aru yópe arejaquemavu Israecavu Moiséde:

—Jūmenijicure toabore codavaicōjejacu, arejaquemavu ūre.

Nópe ne aiyede jápiayu, ne aiyepedeca Jūmenijicure codavai-cōjenejaquemavu. Nópe ũi cōjeiyede, codavarejaquemavu toabore Jūmenijicu.

Apenumu Israecavu manáre āivu bācavu ueturejaquemavu. Nópe uetuiyu, Egiptoi curivu bācavu ne āiye báquede ārurejaquemavu. Que baru jararejaquemavu. Nópe ne jaraiyede jáñu, Jūmenijicu jorojīnejaquemavu náque cojedeca. Moisés máre náque jorojīnejaquemavu. Que jorojīñu, ne jabocu teiyubedejaquemavu. Que baru “Yure cadatejacu”, arejaquemavu Moisés Jūmenijicure. Ũi que aiyede jápiayu, yópe arejaquemavu Jūmenijicu Moiséde:

—Setenta paiva bucuva mujacavure cōjijicōjejacu. Mure ji majide daiyepedeca náre máre majide dacuyumu yu. Majidivu baru, mure cadatenajarama na Israecavure mi cōjeiyede. Que ayu, yópe arī coyujacu Israecavure: “Āimara jiaruare pare jēniaivu muja yure. Dijiáruare jícuyumu mujare. Urarō jícuyumu mujare cūinácu aviá bajo muje ārajyipe ayu. Que teni dijiá-

ruare áivu ueturájaramu muja. Yure muja jári coeníniburu, di-
jiáruare jári yayuyare dacuyumu mujare”, ajacu náre, arejaque-
mavu Jūmenijicu Moisésde.

Ũi que aiyede jápiayu, yópe arī Moisés jēniari járejaque-
mavu Jūmenijicure:

—Israecavu seiscientos mil paivu bajubu ũmuva matuiyeda
ñuje corevaimara. ¿Aipe darī náre caivure áiyede jījebarica
mu? arī jēniari járejaquemavu Jūmenijicure Moisés.

—Caiyede daiye majivu yu. Ji daiyede jácuyumu mu, arī ju
arejaquemavu Jūmenijicu.

Ũi que arī buojaiyede, setenta paivu bucuware cuturī cójijo-
varejaquemavu Moisés. Ne nópe cójijiyede jáñu, náre me ma-
jide dare darejaquemavu Jūmenijicu ũre. Majidivu nuivu, Moi-
séde cadatedejaquemavu na. No yóboi, obedivu tucurávare Is-
raecavu ne curitava yebai vurī edare darejaquemavu Jūmeni-
jicu. Nópe ne vurī edaiyede jáivu, Israecavu náre obedivu boarī



juyovarejaquemavu. Nópe náre añuvacari, Jūmenijicu jorojīnejaquemavu náque. Nópe jorojīñu, cainumua ne jararī nuriburu, ijié tede darejaquemavu náre. Die ijié teiyeque nácavu bácavu obedivu yaidéjaquemavu.

Miriam Aarómaque Moiséde ne tebutino mácarō

Números 12

(Hebreos 3.2-5)

Tucurávare Jūmenijicu ũi jarorīburu yóboi, Miriam, Aarómaque néyocure, Moiséde, āmeno yávarī búrejaquemavu. Moisés ũi márepaco Cus āmicuriyajubocaco ōi cuede jári, coenínejaquemavu ōre. Cus āmicuriyajubocavu Israecavu āmenejaquemavu. Que baru ōre jári coenínejaquemavu. Que teni “‘Apevu pueno majicubu yu’, arī dápiaibi ũ”, arī jararejaquemavu Moiséde. Ūbenita Moisés nópe dápiabedejaquemavu. Que baru ne nópe aye ũre jāve āmenejaquemavu. Moisés “¿Meacu bária yu?” abedejaquemavu.

Moiséde ne āmeno yávaiede majicu Jūmenijicu, Miriāre, Aaróre, aru Moiséde máre ũi cūrami cójijicōjenejaquemavu. Diñamita ne ecoiyede jáñu, Miriāre aru Aaróre jararejaquemavu Jūmenijicu, Moiséde ne āmeno yávaie boje. Yópe arejaquemavu:

—Moisécapūravu ji urōpe daibi. Ṹque yávayu, ji copuinoi yávaivu ṹque. Apevure copuyi ye yávabevu yu, arejaquemavu Jūmenijicu náre.

Que arī buojarī, Miriāre ijié tede darejaquemavu. Ōre churiá pojede darejaquemavu. Nópe ōi ijié teiyede majicu, Moisés yópe arejaquemavu Jūmenijicure:

—Ōi churiá pojeiyede papare dajacu mu, arejaquemavu Moisés.

Ũi que aiyede jápiayu, Jūmenijicu ōi churiāre papare darejaquemavu. Die papaquiye jipocai, ō Israecavu ne curitavare curī majibedejaquemavu. Ditavai ēcarui curejaquemavu cūnásu-mana baju. Cūnásu-mana vainíburu yóboi, curī majidejaquemavu cojedeca Israecavu ne curitavai.

Israecavu Canaán āmicurijoborōi dupini járajivure ne jaroino mácarō

Números 13-14

(Hechos 13.18, Hebreos 3.16-18, Judas 5)

Ne curitavai Miriam bedióva cojedeca ōi copainiburu yóboi, Parán āmicurōi nurejaquemavu caivu ina Israecavu. Noita ne eaiyede jáñu, Jūmenijicu Moiséde Canaán āmicurijoborōi dupini járajivure jaroicōjenejaquemavu. Ūi aye báquepedeca, Moisés dupini járajivure jarorejaquemavu. Nópe jaroyu, yópe arejaquemavu náre:

—Nócavure aru ne joborōre máre me jájara muja. Me jári buojarī, coyurādajará ñujare, arejaquemavu Moisés ina doce paivu dupini járajivure.

Que teni Canaán āmicurijoborōi dupini járaearejaquemavu. Cuarenta pajjáravua yóboi copaini darejaquemavu na, jára-nuivu báca. Copaini edarī, náre ne jáiye báquede coyurī jebedejaquemavu, yópe arī:

—Meajoborō matevú. Ūbenita nócavucapūravu jidojarī vaima. Ne ímaroa me biaidoa curiīmaroa matevú. Apevu dai-vure ne jacoturājiye batevú, arī coyurejaquemavu ina dupini járaeaiyu báca.

Ne nópe aiyedeca, Josué Calemaque, na pucarā yópe areja-quemavu:

—Canaán āmicurijoborōcavure vainí turānurajare, arīdure-jaquemavu. “Jūmenijicu majare cadatecuyume”, arī dápiareja-quemavu na pucarā.

Ne que aiyede, caipucapuruaape paivu dupini járaeaiyu báca-vure Josuéjáre jápiayubedejaquemavu apevu Israecavu, ne jidué boje ina Canaán āmicurijoborōcavure. Nópe jidarivu, Moiséde jararī búrejaquemavu cojedeca.

—Egipto āmicurijoborōi maje yainiburu, meajebu majare. Egiptoī copainajare, arīdurejaquemavu na.

Ne que aiyede jápiayu, Jūmenijicu Moiséde yópe arejaque-mavu:

—¿Aipino joe ina pōeva yure jári coenínajidi? Náre boarī jebecuyumu. Múque, mímarare obedivu pōevare dacuyumu yu, arīdurejaquemavu Jūmenijicu Moiséde.

Ére ne āruri parubeniburu, “Jūmenijicu majare cadatecuyume” ne abe boje, náque jorojīnejauquemavu. Ēi que aiyede jápiayu, Moisés yópe arejaquemavu ére:

—Egipto āmicurijoborōcavure inare mi boaquíyede jápiaivu baru, yópe arājarama: “Jūmenijicu Israecavure Canaán āmicurijoborōcavure vainí taiye majibecu Israecavucapūravure boacáyume”, ajebu mure, arejaquemavu Moisés Jūmenijicure.

Nópe arī buojayu, Israecavure ne āmeina teiyede ārumeteicōjenejaquemavu Jūmenijicure. Ēi que arī cōjeiyede jápiayu, yópe arejaquemavu Jūmenijicu:

—Ne āmeina teiyede ārumetecuyumu ya. Nópe ārumeteyu-vacari, inare yure āruri parubevu cuarenta paiujua bajo pōecubenoí nurajarama na. Nópe nuivu, pōecubenoí yainájarama na. “Jūmenijicu Canaán āmicurijoborōi jícuyume mujare” ne arī dápiabe boje, ne nure nuinomica yaicōjecuyumu. Josué Calemaque na matuiyeda Canaái earājarama. Apevu yainí cūinájarama, arejaquemavu Jūmenijicu.

Ēi que aiyede jápiayu, Moisés diede ina Israecavure cōyurejaquemavu. Ēi que aiyede jápiaivu, na pare chīorejaquemavu. Nópe chīoivu, “Canaácavure vainí turājare” arejaquemavu, náque boarānuivu. Ne nópe daiyedeca, Jūmenijicu cadatebedejaquemavu náre. Jūmenijicu ēi aye báquepedeca, cuarenta paiujua bajo pōecubenoí curājivu barejaquémavu.

Jūmenijicure Coré, Datán, aru Abiram ne jaraino mácáro Números 16-17

(Hechos 13.18, 1 Corintios 10.10, Hebreos 9.4, Judas 11)

Cūinájāravu Coré āmicucu, Leví bácuí pāramecu curipinidu teyu, Moiséde ju abedejaquemavu. Pucarā Rubén ēi yajubocavu máre ēi aiyepedeca dápiarejaquemavu. Na Datán aru Abiram āmicurejaquemavu. Apevu doscientos cincuenta paivu jabova nopedeca arī dápiarejaquemavu. Nópe arī jápiaivu, Moiséjá yebai earī, yópe arejaquemavu:

—¿Aipe teivu muja Israecavu pueno jaboteiyurāru? Apevu-capūravu jaboteivu majima. Apevure vainí tuiyurivubu muja, arejaquemavu Moiséjāre.

Ne que aiyede jápiayu, Moisés jararejaquemavu Coréde. Ũ Leví āmicuriyajubocacuvacari, Jūmenijicui cūrami jívunque de turí nuvaivucacuvacari, ye memeyubedejaquemavu náque. Sacerdote teiyucu barejaquémavu ũ. Nópe memeyubecure jáñu, Moisés ũre jararejaquemavu. Que baru yópe arejaquemavu náre:

—Javena sacerdotevare Jūmenijicu beorí epecuyume, arejaquemavu náre.

Nópe arí buojarí, Datáre, Abirāre cuturí nurejaquemavu. Nópe ũi cutuiyedeca, nuiyubedejaquemavu na.

—Múmu meyuyaiipōecu. Ñujare meajoborōita nuvametevu mu. Ũbenita pōecubenoita nuvavu mu ñujare. Ñujare jaboteiye majibevu mu, arejaquemavu Moiséde.

Que teni Moisés Coréde yópe arejaquemavu:

—Caivure ñujare jaraivure cójijicōjejacu. Na caivu ne jororua mumijue curijororuare davajarāri. Jūmenijicui cūrami jedevacobe yebai cójijijarāri, arejaquemavu Moisés.

Ũi que aiyede jápiaivu, ũi aye báquepedeca darejaquemavu. Ũbenita ina yóbecurā Moiséde jaraivu bácvure ne cūramia yebare núicōjenejequemavu Moisés névuque. Ne nópe daiyede, joarōita cuicōjenejaquemavu apevu Israecavure. Que teni joborō Coréjā ne curō coturí nurejaquemavu. Cotuino mácarōi, na ũre jaraivu bácvu ne cūramiare, néne máre turí cūiné darejaquemavu Jūmenijicu. Que teni toabore jarorí, éni, bíjare darejaquemavu ina doscientos cincuenta paivu jabovare, mumijuede jiyuríduivu bácvure. Na marejaquémavu Moiséde jaraivu bácvu. Aru nópe éne dayu, Aarón ũi beoiye báquede majide dayu barejaquémavu. Aarón, sacerdotevare jaboteipōecu, Jūmenijicu ũi jacoimu ũi cuede náre majide dayu barejaquémavu caivu pōevare Jūmenijicu.

Apejāravui Israecavu jararí búrejaquemavu be-dióva cojedeca. Yópe arí jararejaquemavu Moiséde aru Aaróre:

—Coréjā mácvure boarí jaruvavu muja, arí jararejaquemavu na.

Ne que aiyede jápiayu, Jūmenijicu náque jorojĩñu, náre boarí jaruvajurocu baridurejaquemavu. Ñi que aiyede majicu, Moisés yópe arejaquemavu Aaróre:

—Israecavu yebaita mumijuede juacunujacu. Mi que daiyede jáñu, Jūmenijicu ijié tede dabecuyame, arejaquemavu Moisés.

Ñi que aiyede jápiayu, ñi aye báquepedeca darejaquemavu Aarón. Ñi nópe daiyede, catorce mil paiva bajo Israecavure yaidé darejaquemavu Jūmenijicu. Que darí buojari, yópe arejaquemavu Moiséde:

—Israecavure yópe arí coyujacu: Na doce paiyajuboa-cavu ne tutaiyoare diyajuboa coapa davajarāri. Que teni diyajuboa-cavu jabova ne tutaiyoarā toivarí jēojacu mu ne āmiā coapa. Nópe toivarí buojayu, Aarón ñi āmiāre ñi tutaiyorā toivarí jēojacu. Nópe toivayu, ji cūrami curitucubui, sacerdotevare jaboteipōecui memecaitucubui, tuojarā diyoā tutaiyoare. Mi nópe tuoiyede, sacerdote bacuyá, ji beoimu, ñ jiyore yoca pīaré dacuyumu yu, arejaquemavu Jūmenijicu.

Ñi que aiyede jápiayu, ñi aye báquede coyurejaquemavu Moisés Israecavure. Ñi nópe arí coyuiyede jápiaiva, ne tutaiyoare davarejaquemavu. Que baru diyoāre Jūmenijicui cūrami sacerdotevare jaboteipōecui memecaitucubui tuorejaquemavu Moisés. Cōmiāijāravu diyoāre jácunurejaquemavu. Aarón jiyore yoca curiyore járejaquemavu. Cōvua curiyo aru jēidua curiyo barejaquemavu. Diyore jári, doce paiyoare ñni, etavarí diñami tuoie báquede jádovarejaquemavu Israecavure. Que teni Aarón jiyore yoca curiyore járejaquemavu Israecavu. Que baru Aaróre Jūmenijicu ñi beoiyede majidejaquemavu na. Aru yópe arejaquemavu Jūmenijicu Moiséde:

—Aarón jiyore ji cūrami tuojacu cojedeca. Mi tuoiyede diyore, majinajarama Israecavu āruriva bediōva yúque ne jorojĩmenajiyepa, arejaquemavu Jūmenijicu.

Ñi que aiyede jápiayu, ñi aye báquepedeca Moisés Aarón jiyore ñni, Jūmenijicui cūrami ecorí, tuorejaquemavu.

Moisés Aarómaque Jūmenijicure ne vainí tuino mácarō

Números 20.1-13, 22-29

(Hechos 7.36, 13.8, 2 Pedro 2.15, Judas 11, Apocalipsis 2.14)

No yóboi, Israecavu Cades āmicurōi earejaquemavu. Noita ne eaiyede, ne ūcurajiye oco cubedejaquemavu. Oco cubede jáivu, Moiséde jararī būrejaquemavu cojedeca:

—Majare caivure Jūmenijicu ūi boarī jaruvavu, meajebu majare. Egipto āmicurijoborōi curivu bācavure űujare yuita mi daviyede, āmeno baju vaivu űuja. Ye baquiyé āmevu yore. Ijoborō meamevu. Aru űuje ūcurajiye cubevu, arī jararejaquemavu na.

Ne que aiyede jápiaivu, Moisés Aarómaque, Jūmenijicui cūrami jedevacobei earejaquemavu. Ne eaiyede, Jūmenijicu yópe arejaquemavu Moiséde:

—Mi tutaiyore ĩcunujacu. Que teni mu Aarómaque cójijicōjajara ina Israecavure. Muje cójijiyede jáñu, cūravare yávajacu. Mi nópe yávaiyede, diva cūrava oco etaquiyebu, arejaquemavu Jūmenijicu Moiséde.

Ūi que aiyede jápiaivu, Moisés Aarómaque Israecavure cójijicōjenejaquemavu. Ne cójijiyede jáñu, jorojĩñu yópe arejaquemavu Moisés náre:

—Muje jabovare cainumua jararī núrivubu muja. ¿Nópe jaraivavacari, yare oco jēniaivuru muja? ¿Iva cūravare oco etare dajebarica yu, muje ūcurajiyepe ayu? arī coyurī jararejaquemavu náre.

Que arī buojarī, cūravare jádorejaquemavu. Puque jádorejaquemavu. Nópe ūi jádoiye, oco etarejaquemavu. Pōeva, āimara, ne ūcuru me earejaquemavu náre. Nópe teiyedeca, Jūmenijicure ne āruri parube boje, Moiséjāque jorojĩnejaquemavu Jūmenijicu. Moiséde cūravaque yávaicōjenidurejaquemavu. Nópe ūi yávaicōjeiyedeca, divaque yávabecuvacari, jádorejaquemavu. Ūi nópe daiye boje, yópe arejaquemavu Jūmenijicu Moiséde:

—Canaán āmicurijoborōi Israecavure nuvari, eabecubu mu, arejaquemavu Moiséde.



Aaróre máre nopedeca arejaquemavu Jūmenijicu. Obebejā-ravua yóboi, Aarón mácu yaidéjaquemavu. Ū mácu i yaiyede, ũ mácu mácu némamicure, Eleazar āmicucure, sacerdotevare jaboteipōecu jacorejaquemavu. Jípacu bācure oatuvayu sacerdotevare jaboteipōecu tedejaquemavu.

Obedivu Israecavure ādava ne cūri jaruvare dano mácarō

Números 20.14-21, 21.4-9

(Juan 3:14, Hechos 13.18, 1 Corintios 10.9)

Cuarenta paiujua eaiye bajure, Israecavu űeturejaquemavu. Jararī búrejaquemavu cojedeca. Moiséde aru Jūmenijicure jara-rejaquemavu na. Canaán āmicurijoborōi nuivu barīdurejaque-mavu. Ūbenita Edom āmicurijoborōcavu ne joboróre vaicōjeme-nejaquemavu. Nócavu Jacob bācu i mamicu, Esaú bācu i pāra-mena curipinidu teivu barejaquémavu. Que baru Israecavure

ubedejaquemavu. Que teni joai pōecubenoī nure nuīvu ūetureja-
quemavu Israecavu.

Maná āmicue āiyede āīvu ūeturejaquemavu. Nōpe ūetuīvu,
jararī búrejaquemavu cojedeca. Nōpe ne jaraiyede jápiayu,
obedīvu ādavare jarorejaquemavu ne curitava yebai Jūmeni-
jicu. Que teni obedīvu pōevare cūri jaruvarejaquemavu. Nōpe
cūri jaruvaiyede jáīvu, yōpe arejaquemavu ina Israecavu:

—Āmeno đavu űuĵa. Jūmenijicare aru mure jaraīvu, āme-
nore đavu űuĵa. Que baru ādavare Jūmenijicare jaruvaicōje-
jacu, arejaquemavu Moiséde.

Ne que aiyede jápiayu, Moisés Jūmenijicare arī jēniareja-
quemavu:

—Ādavare jaruvajacu, arejaquemavu.



Ëi que aiyede jápiayu, Jūmenijicu yópe arejaquemavu Moiséde:

—Bronce āmicue tāuque dajacu ādare. Jocuyo ũmujuriyorā jēori jāmuójacu. Que teni caivu ādavare cūimara mácavu ũre jáivu, āmeno vainí, yaibénajarama, arejaquemavu Jūmenijicu.

Ëi que aiyede jápiayu, Moisés ādare bronce āmicue tāuque darī, jāmuórejaquemavu. Aru caivu ũi daimu mácure jáivu āmeno vainí, yaibédejaquemavu.

Israecavu pucarā jabova jinaque boarí ne vainí tuino mácārō

Números 21.21-35

No yóboi, Israecavu nurejaquemavu Amorreo āmicuriyajubocavu ne joborōi. Ne joborōi vainí nuiyurivu barīdurejaquemavu. Nópe vaiyurivu, Amorreocavu cūinácu ne jabocu Sehón āmicucure boro jarorejaquemavu. Yópe arī boro jarorejaquemavu: “Mi joborōre vainájaramu ñuja. Ye mujare bedióva cārijovamenamu ñuja”, arī toivarejaquemavu. Nópe ne toivarī jaroiyedeca, ne jabocu ju abedrejaquemavu. Nópe ju abecu, ũi churavare cójijovarejaquemavu, Israecavuque boarājivu. Ne que daiyede jáñu, yópe arejaquemavu Israecavure Jūmenijicu:

—Jidubejarā inare. Vainí ture daquijivu mujare. Mujare cadatequijivu, arejaquemavu náre.

Apevu Amorreocavu Basán āmicurōcavu curejaquemavu, ne jabocu Og āmicucu. Israecavu náre boarí, vainí turejaquemavu. Aru náre boaríburu yóboi, dijoborōi curejaquemavu na, Israecavu.

Moab āmicurijoborōcavu ne jabocu Balāare Israecavure “Āmeno nujarori mujare” arī, ũi bojedarīduino mácārō

Números 22-25, 31

(Hechos 13.13, 1 Corintios 10.8, 2 Pedro 2. 15-16, Judas 11, Apocalipsis 2.14)

No yóboi Moab āmicurijoborōi Israecavu ne cāitava darejaquemavu. Noi Jordán āmicuriya jia apeduvei Canaán āmicuri-

joborō marejaquémavu. Noi ne cuede jáivu, Moab ámicurijoborōcavu náre jidurejaquemavu. Puque ne boaránuiyede jáivu bácvu, pōeva obedivu ne cuede jáivu, jidurejaquemavu náre. Que teni ne jabocu Balaam ámicucure boro jarorejaquemavu, yópe aicōjeñu ũ jinare:

—Egipto ámicurijoborōi curivu bácvu caride yui cuma. Ñujare vainí tujebu. Obedivu bajubu na. Que baru múcapūravu náre “Ámeno nujarori mujare” acunujacu, ũ jinare arī jarorejaquemavu Balaam yebai.

Nópe ũi jaroimara ne aiyede jápiayu, yópe arejaquemavu Balaam náre:

—Cari ñamine yui cājara. Jūmenijicu yure ũi coyuru, mujare coyucuyumu yu, arejaquemavu Balaam.

Que teni diñamine Jūmenijicu ũre Moacavure boaicōjeme-nejaquemavu. Que baru Israecavure “Ámeno pueno vaibéjarōri” aicōjenejaquemavu Balāare.

—Náre Israecavure mearo dacudayubu yu, arejaquemavu Jūmenijicu ũre.

Ũi que aiyede jápiayu, Balaam Moacavure yópe arejaquemavu:

—Jūmenijicu yure nuicōjememi mujaque. Que baru Israecavure “Ámeno nujarori mujare” arī majibevu yu, arejaquemavu náre.

Ũi que aiyede jápiaivu, copainurejaquemavu ne jabocure Balaam ũi aye báquede coyurānuivu. Ne nópe coyurīburu yóboi, ne jabocu pueno jabovare Balaam yebai jarorejaquemavu. Ũi yebai eaiyu, Balāare parurōreca cutuicōjenejaquemavu ne jabocure.

—Israecavure “Ámeno nujarori mujare” mi arīburu, urarō bojedajebu mure ñuje jabocu, arejaquemavu Balāare.

Ne que aiyede jápiayu, Balaam Jūmenijicure jēniari járejaquemavu. Ũi jēniari jáiyede, Jūmenijicu coyurejaquemavu ũre.

Náque ũi nuiyede ubenidurejaquemavu Jūmenijicu. Nópe ubecuvacari, “Nujacu” arejaquemavu Balāare. Que baru Jūmenijicu ũi daroimure, ángelede, jarorejaquemavu ũi nuquijimare jacotucuyure. Que teni Balāacapūravu burro ámicucu ũi puenoi tubarī nurejaquemavu. Nópe nuña, burrocapūravu ñai ángelede jacotuyure járejaquemavu. Ubenita Balāacapūravu jámenejaquemavu ũre. ũre járobedejaquemavu. Nópe jáñu, burro



jatuturī vaidéjaquemavu. Majiówarima ma ěcarui nuiyede
 jáñu, Balaam ũi burrore jaraboarejaquemavu. Ũi nópe đarĩ-
 buru yóboi, bediówá cojedeca jacoturejaquemavu ũre ñai
 ángele. Ũi jacotuiyede náre, nurejaquemavu biaidoa cūra-
 vaque daidoa jēneboi. Nore ũre upacu ũi cubobare jāorejaque-
 mavu. Nópe jāoiyede jáñu, bediówá cojedeca burrore jaraboare-
 jaquemavu Balaam. Nópe ũi jaraboarĩburu yóboi, bediówá ñai
 ángele jacoturejaquemavu ne nuimare. Noi ne nūrōi, pucapūra-
 vuareca jocucua nūrejaquemavu. Que baru jatuturī vainí maji-
 bedejacquemavu. Bediówá ángele ũi jacotuiyede jáñu, burro
 pararejaquemavu ma coricai. Nópe ũi paraiyede jáñu, jarayu
 ũre pare jaraboarejaquemavu. Nópe pare ũi jaraboaiyede jáñu,
 Jūmenijicu burrore yávare đarejaquemavu. Yópe arejaque-
 mavu ũ, burro:

—¿Aipe đayu yure yóbecue boayúrū mu? Mure āmeno đabe-
 tevu yu, arejaquemavu Balāare.

Balaam ju arejaquemavu burrore:

—Yure mi cārijovariburu, mi yajurīburu yure, mure boavú yu, arejaquemavu Baalam.

Ëi que aiyede, burro ju arejaquemavu ùre:

—Ji puenoi cainumua tubavavu yure mu. Mure vainí tabe-vavu yu. ¿Quédecaba, mi dápiaru? arejaquemavu ù.

—Nopedecabu, arī ju arejaquemavu Balaam.

Ëi nópe aiyedeca, Jūmenijicu ñai ángelede núcure járe ðare-jaquemavu. Boaicarovede cuvarejaquemavu ñai ángele. Aru Balāare jararejaquemavu.

—¿Aipe teyu mi burrore yóbecue jaraboayurū mu? Mure ja-cotuyu batevú yu, mure boaicōjeiyubecu. Mi burro jatuturī vai-béniburu, mure boarī jaravajebu yu, arejaquemavu ñai ángele.

Ëi que aiyede jápiayu, Balaam yópe arejaquemavu:

—Mi nuicōjemenu, numecubu yu. Copaiquijivu yu, arīdure-jaquemavu ñai ángelede.

—Mi nuriburu meaquiyebu. Nópe nuñu, Jūmenijicu ùi aye báquepedeca ajacu mu. Jícua abejacu, arejaquemavu ñai ángele.

Que teni Moacavu ne jabocu pueno parucu, Balac āmicucu yebai earejaquemavu ù, Balaam. Cūinájāravu ùi earīburu yóboi, cūracū Bamot-baal āmicuricūita muri nurejaquemavu ina pucarā. Dicū puenoita eaivu, Israecavu ne cāitavare jári jōðavarejaquemavu. Cūracū puenoi siete paiyutuboare Balare ðaicōjenejaquemavu Balaam. Diyutuboa coapa puenoi oteivecu ūmu cūinácure aru cabra cūinácure máre ina pucarā boarī, juarī, jāmuóri, jídejaquemavu Jūmenijicure, jēniaicōjeivu. Que baru siete paivu oteivecuvare aru siete paivu cabravare máre jídejaquemavu. No yóboi, “Corejacu” ayu, joajīe máqueta ù matuiye nurejaquemavu Balaam, Jūmenijicuque yávacuñu. Que teni Jūmenijicu ùre ùi coyurī buojaiyede, Balac yebai copaini nurejaquemavu. Copaini, earī, yópe arejaquemavu:

—Israecavure “Āmeno nujarori mujare” aicōjeñu yure cuturī jarorebu mu. Mi nópe cōjeiyedeca náre, “Āmeno nujarori mujare” aye majibevu yu. Náre urarō mearo ðacudayube Jūmenijicu. Náre obedivu cūpurure ðacube ù. Náre corevaivu oabenamu maja, arejaquemavu Balaam Balare.

Ëi que aiyede jápiayu, Balac jorojīnejaquemavu. Nópe jorojī-ñure jáñu, yópe arejaquemavu ùre Balaam:

—Yure Jūmenijicu ũi cōjemenu, mi cōjeiye báquepedeca daiye majibevu yu, arejaquemavu ũre, jabocure.

Apecū cūracū, Pisca āmicuricūi, Balare ĩni, muri nurejaquemavu Balaam. Dicū puenoita eaivu, Israecavu ne cāitava ēcarure jări jōdavarejaquemavu. Cūracū puenoi siete paiyutuboare bediōva đarī, siete paivu oteivecava ũmuvare aru siete paivu cabravare máre boarī, juarī, jāmuóri, jídejaquemavu Jūmenijicure diyutuboa coapa puenoi. No yóboi, bediōva “Corejacu” ayu, joajīe máqueta ũ matuiye nurejaquemavu Balaam, Jūmenijicure yávacuñu. Que teni Jūmenijicu ũre ũi coyurī buojaiyede, Balac yebai copaini nurejaquemavu. Aru bediōva cojedeca yópe arejaquemavu:

—Pōeva ne teiyepe teyu āmemi Jūmenijicu. Ũcapūravu ũi aiyepedeca dayube. Ye oatuvabebi ũ. Que baru ũre jícua daicōjemevu yu. Yure ju abecube ũ. Israecavuque cubi ũ. Que teni náre “Āmeno nujarori mujare” ji aiyede, ye baquiyé āmevu, arejaquemavu Balaam ũre.

Ũi que aiyede jápiayu Balac, torojubedejaquemavu. Apecū cūracū, Peor āmicuricūi, muri nurejaquemavu ina pucarā. Dicū puenoita eaivu, pōecubenojări jōdavarejaquemavu. Cūracū puenoi siete paiyutuboare bediōva cojedeca đarī, siete paivu oteivecava ũmuvare aru siete paivu cabravare máre boarī, juarī, jāmuóri, jídejaquemavu Jūmenijicure diyutuboa coapa puenoi. Ne nópe daiyedeca, Israecavure Jūmenijicu mearo ũi đaquinore majicu “‘Náre āmeno nujarori’, abecuyumu yu”, arī dápíarejaquemavu Balaam. Que teni Israecavu ne cāitavare jări jōdavarejaquemavu ũ, Jūmenijicui Espírítu ũi cadateinoque yópe arejaquemavu:

—Caride yure majide dayube Jūmenijicu. Israecavu ne aipe tenajinore járe dayube yure. Jūmenijicu ũi cadateinoque pararivu nurajarama na. Náre jări jaraivure, vainí turājarama na Jūmenijicu ũi cadateinoque. Caivure Israecavure āmeno daivure āmeno đacuyume Jūmenijicu. Caivure náre mearo daivure mearo đacuyume ũ, arī coyurejaquemavu Balaam.

Ũi que aiyede jápiayu, jorojĩni vaidéjaquemavu ñai jabocu Balac. Nópe jorojĩñu Balāare ũi cūramita jarorejaquemavu. Nópe ũi jaroquiye jipocai, yópe arejaquemavu Balāare:

—Mi cūrami copaijacu. Mure urarō bojedacudayu barīduvu yu. Que baru mure jabocu jacocudayu barīduvu yu, arejaquemavu Balāare.

Ëi que aiyede jápiayu, Balaam yópe arejaquemavu:

—Nucuyumu. Ji nuquiye jipocai, yópe acuyumu. Israecavure majicōjeñu Jūmenijicu yure yópe dayabe. No yóboi, cūinácu Israecacu jabocu baju bacuyúme. Ë Moacavure, Edōcavure, Amalecavure, aru Quenitacavure máre vainí ture dacuyume, arejaquemavu Balaam.

No yóboi, Moacavu aru Madiácavu máre ne mearore jiyede ne pēpeimure āmeno darejaquemavu Jūmenijicu ñi jáiyede. Nócavu ne nomiva Israecavu yebaita curānurejaquemavu. Que teni ne torojuve teijāravui náre cuturejaquemavu. Que teni cūinácu bae Israecavu náre jári, “Jūmenijicube” ne arī coyumu ne pēpeimure mearore jídejaquemavu. Que teni nócavu nomivaque āmeno darejaquemavu. Ne que daiyede jáñu, Jūmenijicu jorojini vaidéjaquemavu. Nópe jorojñu, Moiséde apevu Israecavu jabovare nópe āmeno daivure boarí jaruvaicōjenejaquemavu. “Jūmenijicube” ne arī coyumu ne pēpeimure ne mearore jiye boje, náre boarí jaruvaicōjenejaquemavu.

Madiácavu Israecavure ne āmeina teiyede daicōjenejaquemavu. Ne āmeno daicōjeiyede jáñu, náre máre ijié tede darejaquemavu Jūmenijicu. Que teni dijoborōcavuque boaicōjenejaquemavu Israecavure. Que teni Israecavu ne churaravare cójijovarejaquemavu, Madiácavuque boaránurajivu. Balāare aru Madiácavu ũmuvare boarí jaruvarejaquemavu. Que teni nócavu nomivare, némarare jēni, buorejaquemavu. Que teni nócavu ne oteivecuvare, ape paiye ne cuvaede máre ñi nuvarejaquemavu. Nópe nuvaivu ne buoimarare, ne íye báquede, Moisés aru Eleazar yebai ñi edavarejaquemavu. Eleazar sacerdotevare jaboteipōecu barejaquémavu. Que baru Israecavu churaravacapūravu Madiácavu nomivare ne boabéde jáñu, jorojinejaquemavu Moisés. Dinomiva Israecavure “Jūmenijicube” ne arī coyumu ne pēpeimure mearore jicōjeinomiva marejaquémavu. Que baru dinomivare ne boabéde jáñu. Moisés jorojinejaquemavu. Caivure dinomivare boarí jaruvarejaquemavu. Némarā ũmu jueдовare máre boarí jaruvarejaquemavu. Nomiva bojurōmivare ũmuque cubenomivare boabédejaquemavu.

Que teni yaivu bácvu ne bajuá báque yebai curivu Israecavu docucurivupe árojarejaquemavu Jūmenijicu ũi jáiyede. Nópe docucurivupe ne cuede, náre árrure darejaquemavu. Diede majidiva, Jūmenijicu ũi daicōjeiye báquepedeca, die docure yópe joaiyepe darejaquemavu. Ape ne cuvaede toaboque toaijie darī, die docure yópe joaiyepe darejaquemavu. Ne nópe darī-buru yóboi, Moisés Eleazaque Madiácavure ne tatoiyé báquede coavarejaquemavu. Churaravare, Levitare aru apevu pōevare máre coavarejaquemavu.

Bedióva cojedeca Israecavure Moisés ũi corevaino mácarō

Números 26

(1 Corintios 10.5, Hebreos 3.16-18, Judas 5)

Moab ámicurijoborōi Jordán ámicuriya jia yebai Israecavu ne cuede, Jūmenijicu Moiséde Israecavure corevaicōjenejaquemavu cojedeca. Cuarenta paiujua vaidéjaquemavu, mamarumu Israecavure ne corevarīburu yóboi. Que baru bedióva náre corevaicōjenejaquemavu. Nópe corevaivu, veinte paiujua cuvavure, ũmuva bucuvare corevarī búrejaquemavu. Náre ne corevayede, seiscientos un mil setecientos treinta paivu ũmuva marejaquémvu. Nópe corevarī buimara Canaán ámicurijoborōi ne earīburu yóboi, dijoborōre coavarejaquemavu na. Obediva curiyajuboa urarō joborōre cuvarājivu barejaquémvu. Aru obebevu curiyajuboa majióvarō joborōre cuvarājivu barejaquémvu. Leví ámicuriyajubocavure náque corevabedejaquemavu. Na matuiyeda joborō cuvabevu barejaquémvu. Que teni jícua corevarejaquemavu diyajubocavure máre. Ũmuva matuiye ne corevayede, na veintitrés mil paivu barejaquémvu. Cūinácu aviá cuvarivure corevarī búrejaquemavu. Aru bucuvare corevarī jebedejaquemavu. Nópe corevarī buojaivu, yópe arī majide darejaquemavu Moisés Eleazamaque: Mamarumure Sinaí ámicuricū cūracūi ne corevaimara mácvu yainí cūinéjaquemavu. Moisés, Josué, Caleb na matuivuva yaibédejaquemavu. Na yaivu bácvu Jūmenijicu árruri parubevu barejaquémvu. Que teni “Majare Canaán ámicurijoborōre jicuyume

Jūmenijicu”, arī dāpiabedejaquemavu. Nópe ne ārume boje, Jūmenijicu náre pōecubenoita cuicōjeni yaidé darejaquemavu. Que teni ũi aiye báquepedeca yaidéjaquemavu na mácavu.

**Pucayajuboacavu aru apeyajuboa coricacavu
Jordán āmicuriya jia aviá dainocapūravui
curijoborōre ne jēniaino mácarō Moiséde**

Números 32

Rubén aru Gad āmicuriyajuboacavu ure oteiāimara cuvarejaquemavu. Nópe cuvarivu, Jordán āmicuriya jia aviá dainocapūravui curijoborōre meajoborōre jáivu, dijoborōre urejaquemavu. Nópe urivu, yópe arejaquemavu Moiséde aru Eleazare:

—Ijoborō meajoborōmu. Ũuje oteivecava ne ārajiye cōriá caiye cuvū. Jordán āmicuriya jia āniduvede nuiyubevu űuja. Que baru ijoborōre jíjacu űujare, arejaquemavu Moiséde.

Ne que aiyede jápiayu, Moisés jorojīnejaquemavu náque.

—Mujevure Israecavure āruri parubede darājaramu mġja, Canaán āmicurijoborōre nuiyubevu. Mġje bucava bácavu quédeca Canaáre dupini járidurejaquemavu. Que baru mġja máre na mácavure jári, mujevure jidure darājaramu mġja. Nópe jidurivu, Canaái nuiyubenajarama, arejaquemavu Moisés.

Ũi que aiyede jápiaivu, yópe arejaquemavu ũre:

—Ũuje oteiāimara epenajibiaidoare darājaramu. Que teni űujemara ne bucurōmivaque ne curājiimarore darājaramu. Que baru űujacapūravu apevu űujevuque Canaái nurajaramu. Dijoborōcavure boarí cadatenajaramu apevu Israecavu űujevure, arejaquemavu na Moiséde.

Ne que aiyede jápiayu, ju arejaquemavu Moisés. Que baru Jordán āmicuriya jia aviá dainocapūravui ne curijoborōre Moisés diyajuboacavure jídejaquemavu. Rubén aru Gad āmicuriyajuboare aru Manasés āmicuriyajubo coricacayajubore dijoborōre epejaquemavu náre.

Canaán ámicurijoborõre ne coavaino mácarõ
Jūmenijicu Israecavure nore ne eabedeca
Números 27.1-11; 34-36

No yóboi Canaán ámicurijoborõre Jūmenijicu coyurejaquemavu Moiséde, “Quéno bajubu Canaán joborõ” ayu. Nópe coyuyu, Israecavu dijoborõre coavarejaquemavu nore ne eabedeca. Nueve paiyajuboacavu apeyajubo coricacavuque dijoborõre coavarejaquemavu. Que yajuboa Jordán aviá doinocapūravui curijoborõi curājivu barejaqué mavu. Josué Eleazamaque dijoborõre coavarājivure epedejaquemavu Jūmenijicu. Josuécapūravu Moiséde oatuvacuyu, Israecavure cõjecuyu barejaqué mavu. Eleazar sacerdotevare jaboteipõecu barejaqué mavu. Nópe epeyu, diyajuboacavure Moiséjäre coavaivure cadatenajivure epedejaquemavu.

Nópe epeyu, yópe arī coyurejaquemavu:

—Põecu ũmu juedocure cuvabecuva ũi yainíburu yóboi, ũi joborõre ũi máromiva cuvarājarama. Dijoborõre cuvarivu, diyajubocavure ũmucurivu cūrajarama, arī epedejaquemavu Jūmenijicu náre.

Nópe ũmucurivu, dijoborõre cūináyajubocavu matuiyeda cuvarājarama.

Leví ámicuriyajubocavure coavabedejaquemavu. Nópe coavabevvacari, cuarenta y ocho paiĩmaroare jídejaquemavu náre. Diĩmaroa écaruare máre jídejaquemavu ne oteiāimara ne núvarajijoborõre. Apeyajuboacavu diĩmaroare Leví ámicuriyajubocavure jídejaquemavu. Urajoborõ cuvarivu, obediĩmaroare jídejaquemavu Leví ámicuriyajubocavure. Urajoborõ cuvabevu, obebeĩmaroare jídejaquemavu. Seis paiĩmaroare Leví ámicuriyajubocavu “ne dupiĩmaroare”, arī amidorejaquemavu. Que teni cūinácu apecure boarí jaruvayu, cūináĩmaro ne dupiĩmaroi dupinuri curejaquemavu. Diĩmaroi ũi cuede, ũi boaimu mácu jicu boaiye majibedejaquemavu ũre. Põecure boaiyurī bojedayucapūravu ũ jicu bácu boje, ñai boayú bácu ũi nuru ne dupiĩmaro jedevai, ũre ũi eaiyede noita ũre boarí majidejaquemavu. Ubenita ñai boayú bácu ũi cuede dupiĩmaro jívui, ũre boarí majibedejaquemavu. Que baru apevure boaiyu ne dupinajĩmaroa marejaqué mavu. Que teni noi eayu, diĩmaromia cue jaurejaquemavu pu sacerdotevare jaboteipõecu ũi yaiyeta. Æ

mácuí yainíburu yóboi, dupiĩmarore etarĩ majidejaquemavu ñai boayú bácu. Nópe etayu, ũi ĩmaroi copaiye majidejaquemavu, copaiyucu baru. Sacerdotevare jaboteipõecu ũi yaiquíye jipocai, ñai boayú bácu dupiĩmaroi ũi etaiyede jidojarejaquemavu ũre. Nore ũi etaiyede ũi boaimu mácu jivu ũre boaiye majidejaquemavu. Nópe ne boaiyede jáivu, apevu náre boaiye majibedejaquemavu. Que teni dupiĩmaroa yóbecuriĩmaroare epeicõjenejaquemavu Jūmenijicu Jordán āmicuriya jia aviá dainocapūravui aru yóbecuriĩmaroare epeicõjenejaquemavu diya aviá doinocapūravui.

Põecubenoí bucuivre Moisés ũi coyuno mácarõ *Deuteronomio 1-11*

(Mateo 4.4,7,10, 22.37, 23.5, Marcos 12.29-30, Lucas 4.4,8,12, 10.27)

Israecavu Egipto āmicurijoborõĩ curivu bácvu dijoborõre ne nuriburu yóboi, cuarenta paiujua vainíburu yóboi, Canaán āmicurijoborõĩ earĩ curejaquemavu. “Mujare ĩjoborõre jíquijivu” Jūmenijicu ũi aijoborõre ne earājino majióvarõ jaurejaquemavu. Dijoborõ ũi eaquiye jipocai, “Yaicýumu” Jūmenijicu ũi aiye báquede ārucu Moisés, “Dijoborõita eacuyumu”, arĩ dápiabedejaquemavu. Que teni ũi yaiquíye jipocai, Jūmenijicu ũi daicõjeiyede ārure darejaquemavu Israecavure. Sinaí āmicuricũ cūracũĩ ũi daicõjeiyede náre ũi jíye báquede ārure darejaquemavu. Põecubenoita joe ne nure nuiyede, apevu Israecavu pøetedejaquemavu. Que teni die daicõjeiyede náre ārure darejaquemavu. Nópe coyuyu náre, yópe arejaquemavu Moisés:

—Canaán āmicurijoborõĩ muje bucuivre āraicõjeimi Jūmenijicu. Que baru na mácvu ne borore mujare coyquijivu. Doce paivu muje bucuivre dupini járajivure nore jarorejaquemavu. Nópe ũi dupini jáicõjeni jaroiyede, dijoborõre járejaimada. Meajoborõre nore jáivuvacari, nócvure jidurejaimada. Jūmenijicu ne vainí tuiyede jáñu, náre Canaán āmicurijoborõre eaicõjemenejaquemavu. Que baru cuarenta paiujua bajo põecubenoí nuicõjenejaquemavu náre. Que teni põecubenoí nuivuvacari, yainí cūinéjaima muje bucuva. Muje bucuvacavu pucarā eaicõjenejaquemavu Jūmenijicu Canaán āmicurijoborõita.

Josué Calemaque earejaimada dijaboröre. Nácapūravu dupini jáivucavu bácvu, Jūmenijicure āruri parurivu, Canaácavure jidubedejaimada. Nópe jidubevu, noita nuiyurĩdurejaimada. Caride earājarama na máre Canaán āmicurijoborői. Amorreo āmicuriyajubocavure boarí vainí turejavū maja. Hesbón āmicuriīmarocavure aru Basán āmicurijoborōcavure máre, caivu ina Amorreoocavure, vainí turejavū maja. Que teni Rubén aru Gad āmicuriyajuboacavu aru Manasés āmicuriyajubocavu coricacavu maje vainí tuimara ne joborō mácaröre cuvama. Jordán āmicuriya jia aviá dainocapūravui ne curijoboröre cuvama. Yácapūravu Canaán āmicurijoboröre eabecubu. Jūmenijicu yure nore ɛaicōjemetebi. Ji yainíburu yóboi, Josué yure oatuvacuyume. Ũcapūravu muje jabocu bacuyúme, arĩ coyurejaquemavu Moisés náre.

Nópe arĩ buojarĩ, yópe arĩ coyurejaquemavu bedióva cojedeca:

—Canaán āmicurijoborō curājivu, Jūmenijicu ũi daicōjeiyede ju ajarā muja. Que teni mujepāramenare iye daicōjeiyede mearo buejarā muja. Apevu pōeva “Jūmenijicube” ne arĩ coyui-marare mearore jibejarā. Abiácvare, aviá ñamicacure, aviá járavucacure, náre mearore jibejarā. Muje mearore jídu, Jūmenijicu ñájine dacuyume mujare. Aru Canaán āmicurijoborői curivure jaetovacuyume. Apenoita nuicōjecuyume mujare. Pēpeimucapūravure muje bedióva mearore jídu, nuicōjecuyume mujare. Jūmenijicu mearo daibi mujare. Apevu pōeva pueno mearo daibi mujare. Jūmenijicu ũi yávaiyede jápiaivubu maja. Apevu pōeva majape ye Jūmenijicure jápiabema. Ũ majare Egiptoi curivu bácvure jaetovarejame. Apevure nópe ye dabe-dejame ũ. Majeñecuva mácvure Jūmenijicu “Yópe ðarājare” ũi aiye báquapedeca, majare máre mearo dacuyume. Majeñecuva mácvure que ayu barejaquémavu, arĩ coyuyu barejaquémavu Moisés caivu Israecavure.

Que arĩ buojarĩ, Jūmenijicu caipucapuruaape paiye ũi daicōjeiyede coyurĩ jebedejaquemavu. Sinaí āmicuricū cūracūi ũi daicōjeiye coyuiye barejaquémavu. Ape daicōjeiyede máre náre ārure ðarejaquemavu. Nópe arĩ coyuyu, ure Jūmenijicure ne jaraiye báquede náre ārure ðayu “Bedióva cojedeca ũre jarabe-jarārĩ” ayu barejaquémavu. Yópe arejaquemavu cojedeca:

—Āmeno dabejarā muja. “Jūmenijicu majare ñájine dabecuyume” arĩ, āmeno ðarĩ jámejara muja. Cuarenta paiujua baju

Jūmenijicu jári kujurejame mujare, “Yure ju arājarama” ayu. Muje bucuvare ávué yaidé darejame Jūmenijicu. Que darí buojarí, manáre jídejame náre. Que darejame ũ, áiyede ne ubenajiyeye ayu. Jūmenijicu jie yávaiyede ne uríburu daiyucu barídu-rejaquemavu ũ, arí coyurejaquemavu Moisés Israecavure.

Que ayu, yópe arejaquemavu:

—Jápiajarā muja, Israecavu. Jehová āmicucu maje jabocu Jūmenijicu bajube. Cūinácurabe. Que baru ũre pare jecurājare. Ũi daicōjeiyede cainumua ārurajare. Āri maje curōi ũi daicōjeiyede urí yávarājare. Que yávaivu, paperayocarā toivarí jēoivu iye daicōjeiyede aru quíjitōcu jívui buorājare. Ditōcuare maje tūtuvu coapa aru maje āmuve cācopūravucaāmuve coapa buorājare, iye daicōjeiyede maje ārurajiyeye aivu. Maje cūramiaque jedevacobea jocucua núricuai aru biaido jedevacobea curicuai iye daicōjeiyede toivarí jēorajare, arí coyurejaquemavu Moisés.

Que arí buojarí, yópe arejaquemavu cojedeca:

—Canaán āmicurijoborōre eaivu, nócavure boarí jebejarā. Āmeno baju daivubu na. Que baru náre “Mearo curājare”, arí borotebejarā. Aru náque purubuobejarā. Náque muje borotedu, náque muje purubuoru, nácapūravu mujare meyuyarí “Jūmenijicube” arí, ne pēpeimure mearore jíde darājarama mujare. Caiye ne yutuboa daiyede aru ne pēpeimarare máre jaruvarí jebejarā muja. Muja máre náre “Jári arurí dainomu” aivu, nóque ne mearore jíyede jaruvarí jebejarā. Jehová matuiyeda mearore jijarā muja. Ũ matuiyeda Jūmenijicube, arí coyurejaquemavu Moisés Israecavurə.

Nópe arí buojarí, yópe arejaquemavu:

—Maje mearo daiyede Jūmenijicu majare beobedejaquemavu. Majare jecucu majare beorejaquemavu ũ. Que teni maje darājiyepe ayu yópe majeñecuva mácavu, Abraham, Isaac, aru Jacob, ũi aye báquepedeca ne daiye báquepe majare beorejaquemavu. Canaán āmicurijoborōi curivu, mearo curivu, Jūmenijicure ārumetebejarā. Canaán āmicurijoborōcavu ne āmeno cuede jáñu, ne joborō mácarōre jícuyume mujare. Mearo muje cuede, dijoborōre jíyu āmemi. Jūmenijicu Jehovácapūravu majiívarō majare daicōjeñume. Ũre maje mearore jíyede ubi ũ. Ũi daicōjeiye báquepedeca daicōjeimi mujare. Que baru ũre majare pare jecuićojeimi ũ. Ũi daicōjeiyede majare, cūináro maje curājiyepe ayu epedejame majare. Iyede ārujara muja. Iye ji

aquiyede árujara muja. Ijoborõre, cavarõre máre cuedayu bácu Jūmenijicu baju majeñecuva mácavure aru majare beorejaquemavu ñ jina mǎrajivure, arĩ coyurejaquemavu Moisés.

Que arĩ buojarĩ, yópe arejaquemavu:

—Jūmenijicu ñi daicõjeiyede muje ju aiyede jáñu, ácapū-ravu Canaán ámicurijoborõcavure jaetovacuyume. Nópe ñi jaetovarĩburu yóboi, dijoborõre mujare jícuyme. Nópe jíyu dijoborõre, oco dare dacuyume muje oteiye báquede, jēidua me jēquiyepu ayu, arejaquemavu Moisés Israecavure.

Jūmenijicu ñi daicõjeiyede Moisés ñi árure daino mácarõ Israecavure

Deuteronomio 12-26

(Mateo 5.31, 18.16, 19.7, 22.24, Marcos 10.4, 12.19, Lucas 20.28, Juan 1.45, 5.45-56, 8.17, Hechos 3.22-23, 7.37, 1 Corintios 9.9, 2 Corintios 13.1, Gálatas 3.13, 1 Timoteo 5.18-19, Hebreos 10.28)

Jūmenijicu ñi daicõjeiyede árure dayu Israecavure, die daicõjeiyede ju aicõjenejaquemavu Moisés. Sinaí ámicuricū cūracuĩ ne cuede, Jūmenijicu ñi daicõjeiyede coyurejaquemavu cojedeca náre. Ape daicõjeiyede máre coyurejaquemavu. Die daicõjeiye ñi jipocai Jūmenijicu ñi daicõjeiyede coyuiye bareja-quémavu. No yóboi, Israecavu pueno jabocure ne jacoiyuede ne darājiyede coyucõjenejaquemavu Moiséde Jūmenijicu. Que baru Moisécapūravu coyurejaquemavu diede Israecavure. Apeno joborõcacu ne pueno jabocure jacoicõjemenejaquemavu. Que teni ne jabojaocimure obedivu caballova, obedivu nomiva, aru urarõ táutura cuvae jaubedejaquemavu. Aru ne jabocu “Bediõva cojedeca maje curõ mácarõi, Egiptoi, copaini nurajare” ñi arĩburu, meamenejaquemavu. Nópe aiye jaubedejaquemavu. Que teni ne pueno jabocu Jūmenijicu ñi daicõjeiyede toivaiyocare cainumua cuvae jaurejaquemavu. Nópe cuvacu diyocare, bueiye jaurejaquemavu úre cainumua, járavua coapa. Diede coyurejaquemavu Moisés náre.

Que teni Jūmenijicu jiede coyucaipõecu bacuyáre coyuyu, yópe arejaquemavu:

—Yavié daipõevare ye jápiabejarã. Apeno joborõcacavu náre jápiadama. Ubenita mujacapūravu nópe dabejarã. No yóboi,

Jūmenijicu jiede coyucaipōecu, ji teiyepe cucuyu, muje yebai nucuyume. Ũcapūravu Jūmenijicu ũi daicōjeiyede mujare coyucuyume. Ũre muje jápiabedu, Jūmenijicu mujare ñájine dacuyume. “Jūmenijicu jiede coyurī jipocateyubu”, cūinácu mujare ũi aiyede jápiaivu, die ũi aye “¿Jāvenecaba?”, arī majinajaramu muja. Meyuyaivu ne cuede máre majinajaramu muja. Meyuyaipōecu ũi cuede, Jūmenijicu ũre jarobecuyume. Que baru Jūmenijicu ũre ñájine dacuyume, arī coyurejaquemavu Moisés.

Moisés náre yópe arī coyurejaquemavu:

—Mujacacu ũi āmeno daru, āmeno daiyede jáivu coyurī adarājaramu muja. Nópe coyurī adaivu, pucarā coyurī adajarārī. Cūinácu coyurī adaiye majibebi. Que darī, ne coyurī adarīburu yóboi, āmeno dayure ñájine daiye majima. Que teni cūinácu āmeno dayure ñájine daivu, ũi ñamemure buorī, yuyarī, boarī jaruvaivu cūinájáravumia ũi baju bácarōre yuarī jarujarā. Nópe darī, muje buorī, yuyarī, boarī jaruvaimara āmeno daivu bácvubu na. Ne āmeno daiyede jáñu, cūinájáravuma yuarī jaruvaicōjeimi Jūmenijicu.

‘Míjina juaidoare eaivu, ne jíne aru némarare muje ĩnu, meaquiyeu. Nópe ĩvu, ne bucarōmivare ĩmejara.

‘Amón aru Moab āmicuriyajuboacavure mujaque cuicōjemejara. Nácapūravu Balāáre mujare, Israecavure, “Āmeno nuja-rori mujare”, arī aicōjenidudemavu. Que teni mujaque cue majibema.

‘Ũyaimu curijiore vainá nuivu, dijióque jēiduare āiye majivu muja. Noma muje āri jebedu, meaquiyeu. Ũbenita apecūare ĩni, copaiye majibevu muja. Ape jioquede jēiduare noma āri jebeiye majivu muja. Nópe daivu, ñavaivu ānevū muja.

‘Cūinácu jímarepacore jaruvaiyucu, ōre toivarī jījacurī cūiná-yoca “Mure jaruvayubu yu” aiyocare.

‘Cūinácu ũi bucuva ne āmeno darīburu, némacu náre āmeno daiye majibebi. Némara ne āmeno darīburu, népacure ñájine darī majibema. Ũi baju āmeno darīburu, ũre ñájine daiye majima.

‘Cūinácu ũi āmeno daiye boje, ñájine daivu ũre, cuarenta paiye baju ũre jaraboaiye majima. Cuarenta paiye baju jaraboarī, dajocaiye jauvu. Nópe jaraboaiyu, puque jaraboaiye jaubevu.

'Ñai oteiāimacu uracu memecayu mujare, buobejarā úre ũi jijecāmure, ũi āmequiyeye aivu úre ũi cūocaiyedeca mujare muje oteiyabeare ũi curaiyede diede.

'Cūinácu juedocuvabecu ũi yainíburu, ĩmacucapūravu ũ mácuí márepacore purubuoíye jauvu, juedocuvacuyu. Aru némacu mamaramu pōteyu ñai yaiyú bácuí āmiáre cuvacyume ũ, pōeva ne ārumenajiyeye ayu ñai yaiyú bácuire. Maja nópe daivu, yaiyú bácuí joborōre cuvacyume némacu, arĩ coyurejaquemavu Moisés Israecavure.

**Israecavure Jūmenijicu jiede Moisés ũi coyurĩ
bubaino mácarō
Deuteronomio 27-30**

(*Gálatas 3.10*)

Bedióva cojedeca Moisés Israecavure Jūmenijicu jiede coyurejaquemavu:

—Jūmenijicu ũi daicōjeiyede ye vainí tubejarā. Ũi daicōjeiyede muje vainí turu, mujare ñájine dacuyume Jūmenijicu. Jordán āmicuriya jiare jatarĩ eaivu, Ebal āmicuricū cūracūi nujara. Noita eaivu, uraboa cūraboaque cainiyutubo dajarā. Nópe daivu, diyutubo puenoi Jūmenijicu ũi daicōjeiyede toivarĩ jēojara. Nópe toivarĩ buojaivu, Jūmenijicure muje mearore jínajiye diyutobore dajarā. Diyutobore darĩ buojarĩ, āimarare boarĩ, juarĩ, jāmuóri, jíjarā Jūmenijicure. Nópe daivu, torojuve teijāravu dajarā, arĩ coyurejaquemavu Moisés.

Aru coyurĩ nurejaquemavu, yópe ayu:

—Jūmenijicu muje mearo ju aru, ũ mearo dacuyume mujare. Muje oteíye me jēquiyebu. Muje oteiāimara obedivu cūpurajarama. Aru muja máre obedivu juedocuvarājaramu. Mujare jári coenínivure boarĩ, vainí turājaramu muja. Ubenita Jūmenijicure muje vainí turĩburu, ũ mujare āmeno vaidé dacuyume. Nópe vainí tuivu, ijíé tede dacuyume. Aru muje joborōre ocabequiyebu. Que baru āvué yainājaramu muja. Mujare jári coenínivaque muje boaiyede, nácapūravu mujare vainí turājarama. Mujare jári coenínivu apenoita mujare nuvarajarama. Apeno joborōita mujare coateni nurajarama, Jūmenijicure

mujé vainí turíburu. Que baru dijoborôita mearo cubenamu muja, arí coyurejaquemavu Moisés Israecavure.

Que arí buojari, yópe arejaquemavu:

—Jūmenijicure vainí tuivu, “Jūmenijicube” mujé arí pēpeimure mearore jivu baru, āmeno vainájaramu. Mujé joborō máre āmeno vaiquíyebu. Jūmenijicu mujare ñájine dacuyume. Ũi ñájine daiyede jáivu, apeno joborōcavu Jūmenijicu mujare ũi ñájine daiyede majinajarama. Bedióva cojedeca Jūmenijicure mearore jivu baru, ũi daicōjeiyede me daivu baru, mearo vainájaramu muja. Jūmenijicu mujare mearo dacuyume. Ũi daicōjeiyede mujé majidu, maiyójabevu. Que baru iye daicōjeiyede mearo daivu baru, curājaramu. Ũbenita iye daicōjeiyede vainí tuivu baru, yainájaramu muja. Mearo mujé curājiyede beojarā muja. Jūmenijicure jecujarā. Ũre mearo ju ajarā, arí coyurejaquemavu Moisés.

Moisés bácuí yainíburu yóboi Josué ũi oatuvaino mácarō

Números 27.12-23; Deuteronomio 31-34

(Judas 9, Apocalipsis 10.5-7)

Israecavure yópe arejaquemavu Moisés:

—Caride ciento veinte paiujua cuvavu yu. Majióvarō jauvu ji yaiquíno. Josué yure oatuvayu cubi. Ũ mujare Canaán āmicurijoborōi nuvacuyume. Muja parurivu cujarā. Josué, mu máre, parucu cujacu, arejaquemavu Moisés.

Que arí buojari, caiye Jūmenijicu ũi daicōjeiyede toivarí jēori jebedejaquemavu paperayocai. Toivarí buojari, Leví āmicuriyajubocavure, Israecavu bucvare máre, diyoca paperayocare ũi cāriáiyocare jídejaquemavu. Nópe jíyu bácu, iye daicōjeiyede buení jebeicōjenejaquemavu. Israecavu ũmuva, nomiva, némara, caivu ne jápiayede diyocare ũi toivaiye báquede bueicōjenejaquemavu Moisés náre. Seis paiujua vainíburu, yóbo-cauju Israecavu ne jabuóvaiuju eaiyede, ne jabuóvaijārvua, úcūare ne darí torojuve teijārvuai, iye daicōjeiyede bueicōjenejaquemavu Moisés.

No yóboi, Moisés ũi yaiquíye jipocai, yópe arejaquemavu Jūmenijicu ũre:

—Majióvarō jauvu mi yaiquíno. Que baru Josuéde cuturī nujacu. Nópe cuturī nuñu, ji cūrami yebai nujara, arejaquemavu Jūmenijicu Moiséde.

Ũi que aiyede jápiayu, ũi aiye báquepedeca darejaquemavu Moisés. Ũi nópe daiyede jáñu, ocopeniboque edayu, Josuéde yópe arejaquemavu Jūmenijicu:

—Yure mearo āruri parujacu. Ye jidubejacu. Máque cucu-yumu. Que teni Canaán āmicurijoborōi mívure, Israecavure, mi nuvaru, mure cadatecuyumu, arejaquemavu Josuéde.

Que arī buojari, Moiséde yópe arejaquemavu:

—Caivu Israecavu ne jáiyede, Josuéi jipobu puenoi mi purure tuojacu, arejaquemavu.

Ũi que aiyede jápiayu, ũi aiye báquepedeca darejaquemavu Moisés. Nópe dayu, Josuéde ũi jabotequiyede Israecavure jádovarejaquemavu.

No yóboi, Moisés Josuémaque ne yuriaiye Israecavure yuriarejaquemavu. Nópe yuriaivu, Jūmenijicu ũi parué cuede



coyurejaquemavu. Ëi majino jidojarōque coyurejaquemavu. Nópe coyuiyu, Jūmenijicure vainí tuicōjemenejaquemavu Israecavure. Coyurī buojarī, caiyajuboare Israecavure “Mearo cujarā Jūmenijicucue”, arejaquemavu náre. Que darī buojarī, Nebo āmicuricū cūracūi nurejaquemavu Moisés. Parucu ñi baju aru me jáñu marejaqué mavu ñ. Ë Israecavucacu Jūmenijicu jiede coyurī jipocateyu barejaqué mavu. Que teni apevu Jūmenijicu jiede coyuiyu pueno meacu āruri parucu barejaqué mavu ñ. Dicū puenoi eayū, Canaán āmicurijoborōre jári jōdavarejaquemavu. Nópe jári buojarī, dicū puenoi yaidéjaquemavu. Jūmenijicu ñi baju bácarōre yuarī jaruvarejaquemavu. Ubenita pōeva ñi baju bácarōre jaruvaicobede eabedejaquemavu.

Nópe ñi yaiyede majidivu Israecavu, pare orejaquemavu ñ mácure treinta paijāravua baju. Ne nópe orīburu yóboi, Josué jaboteni búrejaquemavu. Nópe jaboteyu, Jūmenijicu ũre cadate-dejaquemavu, mearo ñi majiquiyepe ayu.

Israecavure Jordán āmicuriya jiare Josué ñi jatare daino mácarō

Josué 1-5

(Mateo 1.5, Hechos 7.45, Hebreos 11.30-31, Santiago 2.25)

Moisés bácu yainíburu yóboi, Jūmenijicu Josuéde yópe arejaquemavu:

—Caride Jordán āmicuriya jiare jatajarā. Mívuque nujacu Canaán āmicurijoborōi. Dijoborōre mujare jíquijivu yu. Nócavucue boaiyu, vainí turājaramu muja náre. Mujare cada-tequijivu yu. Que baru parucu bájacu. Ye jidubejacu, arejaquemavu Jūmenijicu Josuéde.

Que teni Josué yópe arejaquemavu Israecavu ne jabo-vare:

—Majevu Israecavure yópe arī coyurānujara. “Muje nuva-rajiyede meadarī corejarā. Jordāre jatarājivubu maja. Canaán āmicurijoborōre Jūmenijicu majare ñi jíjoborōre ecorājivubu maja”, arī coyujarā náre, arī coyucōjenajaquemavu Josué ũcavu jabovare.

Que arī buojarī, Rubén aru Gad āmicuriyajuboacavure aru Manasés āmicuriyajubocavu coricacavure yópe arejaquemavu:

—Ijoboröre jiaame Jūmenijicu mujare. Nópe ūi jíyedeca, muja mujevure ñujare cadatenajaramu muja. Canaán āmicurijoborői ñuje boaiyede, muja ñujare cadatenajaramu. Canaán āmicurijoborői ñuje boaiyede, ñujare tatorī cadateni buojarī, yuita copaini darājaramu muja muje joborői, arejaquemavu Josué.

Que arī buojarī, Canaán āmicurijoborōcaīmaro, Jericó āmicurői, jarorejaquemavu Josué náre, pucarāre, dupini jáicōjeni. Que teni na nuivū, Jericó āmicuriīmaroi earejaquemavu. Noita eaivū, Rahab āmicuco ōi cūrami dupini nainéjaquemavu. Ō ōi baju bojedado ūmuvaque āmenore ðaðo barejaquémaavu. Ōi cūrami ne cuede jápiayu, diīmarocacu jabocu ūi yebacavure jarorejaquemavu ōi cūrami. Yópe arejaquemavu na ōre:

—Mi cūrami dupini curivure jįjaco ñujare. Maje ĩmarore dupini járadaivu batenáma na, arejaquemavu ōre.

Nópe ne arājiye jipocai, ō ina pucarā Israecavure yavedejaquemavu. Ōi cūrami puenoi curivai náre yavedejaquemavu. Noreta ne cūrami pueno cainiva curejaquemavu. Que teni náre ne jįcōjeiyede, yópe arī ō ju arejaquemavu:

—Quédecabu. Pucarā ji yebai edama. Náre ji majibedeca, ji yebai ecorī dama. Que teni nainí tuiyede, nurama na. Que baru majibevu yu ári ne nuiyede, arejaquemavu ō.

Ōi que aiyede jápiaivu, copaini nurejaquemavu náre vorā-daivu bācavu. Nópe ne nuriburu yóboi, dupini jáipōevare coyū-conurejaquemavu ō. Yópe arejaquemavu náre:


—Muja, Israecavu, caivure ijoborōcavure vainí tarājaramu muja. Jūmenijicu mujare ūi cadateiyede majivu ñuja. Que baru caride ji cadateiyepedeca mujare, cadatejarā yure aru ji cūramicavure máre. ĩmarocavure boarājivu muja, ji cūramicavure boarí jaruvabejarā, arejaquemavu ō.

Ōi que aiyede jápiaivu, ju arejaquemavu ina dupini jáipōeva ōre. Diīmarocarō biaidoi curejaquemavu ōi cūrami. Dibiáídomia jáicobe curejaquemavu. Que teni dicobei cuitótēme urameque náre jōðavarejaquemavu. Aru ōi jōðavacojiye jipocai, yópe arī coyurejaquemavu:

—Yóbecurijāravua baju dupijarā cāreja dicū cūracūi, mujare “Cujurī, boqueni jēinomu” aivu. Muje nópe darīburu yóboi, copaini nujara muje curōi, arī coyurejaquemavu ō.

Ōi que aiyede, na yópe arejaquemavu ōre:

—Ijoborōre ñujevuque ñuje daiyede jádo, cuitótème jūari-mene icobe jáicobede buorī yuyajaco. Que buorī yuyado, mi cūramicavure iñamima cuicōjejaco. Etaicōjemejaco náre. Diñamita ne cuede jáivu, ñuja náre boarí jaruvabenamu, arī coyurejaquemavu ōre.



Ne que aiyede jápiado, ju arejaquemavu ò. Nópe arī coyurī buojarī, nurejaquemavu na. Nópe nuivu, yóbecurijāravua ne cūrācūi dupiniburu yóboi, Israecavu yebaita copaini nurejaquemavu. Copaini earī, yópe arī coyurejaquemavu Josuéjāre:

—Jāveneca batevú. Dijoborōre jícube majare Jūmenijicu. Caivu nócavu majare jidurivu bateimá, arī coyurejaquemavu na Josuéde.

No yóboi, Jūmenijicu yópe arejaquemavu Josuéde:

—Jordán āmicuriya jia ēcarui sacerdotevare nuicōjenejaquemavu. Ditōcu maje “Yópe darājare” aiyede āruritōcure nuvarajarama na, arejaquemavu Jūmenijicu.

Ūi que aiyede jápiayu, ūi aye báquepedeca daicōjenejaquemavu Josué sacerdotevare. Que teni sacerdoteva diyai ne jatarī nuiyede, bieni jacotuiyepé nurejaquemavu diya. Ye oco bejabe-dejaquemavu. Diya uradavacari nópe mautedejaquemavu. Oco bieiyepé mauteiyede, ina sacerdoteva diyare jatarejaquemavu. Ye oco cubedejaquemavu. Que teni Jūmenijicu jitōcure nuvaivu bācavu jia coricai núrejaquemavu. Ne núeneca, ne jēneboi jatarī nurejaquemavu apevu Israecavu. Nópe jatarī cūivure jáñu, doce paivu ūmuva, Israecavu ne yajuboa coapacavure cūrabore jia coricai curiboare turī nuvaicōjenejaquemavu. Cūiná-yajubocacu cūinábo cūrabore nuvarējaquemavu. Apeyajubocacu máre cūinábo cūrabore nuvarējaquemavu. Nopedeca nuvaicōjenejaquemavu Josué ina doce paivure. Nópe turī nuvaivu, ne curājinoita epedejaquemavu. Dijāravui Jūmenijicu ina jataivure ūi cadateiyede ne ārurajiyepé ayu, nópe daicōjenejaquemavu Josué. Ne nópe darīburu yóboi, sacerdoteva ditōcure nuvaivu jatarī earejaquemavu. Ne jatarī earīburu yóboi, diya bejarī nurejaquemavu cojedeca. Aru dijāravu ne jataijāravui, diya yaborejaquemavu.

Mamaramure pōecubenoī obedivu Israecavu juedocuvarejaquemavu. Que teni pōecubenoī ne juedocuvamara barejaqué-mavu jiare jataivu. Náre pōecubenoī pōeteivure ūmuva ne cajeáre burabedejaquemavu. Jūmenijicu Abraham mácure ūi buraicōjeiyepé dabedejaquemavu na. Que teni diyare ne jatarī eaiyede jáñu, Jūmenijicu Josuéde caivu ūmuva ne cajeáre buraicōjenejaquemavu.

Diujure mamabuiavia barejaqué-mavu. Que teni diavia buiyede catorce paijāravua yóboi, Pascua āmicue torojave teiyede

darejaquemavu na. Nópe daivu, Canaáque trigo ámicue oteiya-beaque páure darejaquemavu. Ubenita páu bucure daiye cubeque darejaquemavu. Pascua ne torojuve teijāravure daivu, die páure ārejaquemavu. Canaán ámicurijoborōi curivu āiyede cuvarejaquemavu. Que baru Jūmenijicu náre manáre jíbedejaquemavu.

**Jericó ámicuriīmarocavure Israecavu ne boarí vainí
tuino mácarō**
Josué 6

(Mateo 1.5, Hechos 13.19, Hebreos 11.30-31)


Jericó ámicuriīmarocavu Israecavure jidurejaquemavu. Nópe jidurivu, ne īmarocabiaido jívui curejaquemavu. Dibiáido-que jedevacobea caiye biedejaquemavu. Que teni náre vainí tuicōjeñu, yópe arejaquemavu Jūmenijicu Josuéde:

—Caivu mi churaravaque aru sacerdotevaque máre diīmarore cainitarabu darī jāpurinanujara. Sacerdotevacapūravu jítōcure nuvarajarama. Que teni seis paijāravua baju cūinátarabura vāijára jāravua coapa. Nópe nuivu, bíjiena nujara. Aru seis paijāravua yóbocajāravu nūjurorō baji, siete paitarabua baju darī dajocajarā. Nópe tarabuare daivu, sacerdoteva cabrava ne javaroare japujarāri. Ne nópe japuiyede jápiaivu, muje churarava caivu codobobojarāri. Ne nópe codoboboiyede, diīmarocabiaido tuquiyebu. Diīmarocavure nājine dacuyumu. Caivu náre boarí jaruvajarā. Ne oteiāimarare máre boarí jaruvajarā. Caiye ne táuque daiyede ji cūrami epejarā. Nópe darī, diīmarore juarī jebejarā. Mujevu, Israecavu, diīmaroque ape paiyede īmejara, arī coyurejaquemavu Jūmenijicu Josuéde.

Ūi que aiyede jápiayu, yópe ūi aiye báquepédeca coyurī jebedejaquemavu Josué ū jivure, Israecavure. Diīmarocavure boarí jebeicōjenejaquemavu. Ubenita Rahab ōi cūramicavu matuiyeda boaicōjemenejaquemavu. Ina īmarore dupini jáivu bácvure ōi cadateiye báque boje, boaicōjemenejaquemavu.

Que teivure jáivu, Israecavu churarava diīmarore cūiná corī nuri, nócavure boarí jebedejaquemavu. Ne oteiāimarare máre boarí jebedejaquemavu. Rahab ōi cūramicavuque matuiyeda

boabédejaquemavu. Apevure ne boaiye jēneboi, diīmarore dupini jáivu bácavu ôi yebai nuri, ôre, ôi cūramicavuque cuturī etavarejaquemavu. Nópe náre īni etavaivu, Israecavu ne curitavai cuvarejaquemavu na. Nópe darī buojarī, Jericó āmicurīmarore juarī jebedejaquemavu.



**Cūinácu Israecacu Jūmenijicure ũi ju abe boje
Israecavu ne vainí tubeno mácarō Hai
āmicuriīmarocavure**

Josué 7-8

(Hechos 13.19)

Cūinácu Israecacu, Açán āmicucu, Jūmenijicure ju abede-
jaquemavu. Que teni Jericó āmicuriīmaroquede úrure, tāutu-
raturava plataque daituravare, aru moaicaje meacajede
jáñu, diede pare ucu, ĩnejaquemavu. Jūmenijicu ũi ĩcōjeme-
neca ĩnejaquemavu. Diīmarore ne juarājiye jipocai, ĩnejaque-
mavu diede. Nópe ĩñu, ũi cūrami āimara cajeáque daiñami
jívui ũi ñavaiye báquede yuarejaquemavu. Ũi nópe íyede,
apevu ye majibedejaquemavu.

No yóboi, Israecavu ne churarava Hai āmicuriīmarocavure
boarídurejaquemavu. Uraīmaro āmenejaquemavu. Que baru
caivure Israecavu ne churaravare jarobedejaquemavu. Diī-
maroi ne eaiyede, nócavure pare boaivu, Israecavure vainí ture-
jaquemavu. Ne nópe vainí
tuiyede jáivu, pare chōre-
jaquemavu Israecavu.
Que teni Josué diede jē-
niari jácudayu, Jūmeniji-
cuque borotedejaque-
mavu. Nópe ũi jēniari jái-
yede, Jūmenijicu yópe are-
jaquemavu ũre:

--Mujecu, Israecacu,
yure ju abeteame. Jericó
āmicurōquede ji ĩcōje-
mene ĩame. Que baru
mívu Israecavu Hai āmi-
curōcavure vainí tabe-
teima, ji cadatebe boje,
arī coyurejaquemavu Jū-
menijicu Josuéde.

Ũi que arī, cōmiáijā-
ravui Jūmenijicu ñai ju



abecure majide darejaquemavu náre. Ë Judá āmicuriyajubocacu, Acán āmicucu, barejaqué mavu. Ëi āmeno daiyede majicu, yópe arejaquemavu Josué ũre:

—¿Aipe dacurū mu? Coyujacu yure, arī jēniari jǎrejaquemavu.

—Jericó āmicurōquede jǎñu, pare útecacu yu. Nópe ucu diede, ji cūrami yavecacu diede, arī coyurejaquemavu Acán Josuéde.

Ëi que aiyede jápiayu, apevu Israecavu ũmuvare Acán yebai jarorejaquemavu Josué. Ëre, ũ jivre, ũ oteiāimarare, caiye ũ jiede máre ne curitavare jocarī nuwarejaquemavu na. Nópe náre nuvaivu, cūraboaque dūvarī boarī jaruvarejaquemavu.

Ne que darī buojaiyede jǎñu, Jūmenijicu yópe arejaquemavu náre:

—Jidubejarā. Hai āmicuriīmarocavure boarǎnujara. Náre vainí tarǎjaramu muja, arejaquemavu Jūmenijicu.

Que teni churarava cūináyajubocavure, treinta mil paivu baju, ñami jarorejaquemavu Josué, ne dupini pararǎjiyepe ayu diīmaro ēcarui. Apevu Israecavu churarava diīmaro ēcarui cúyarī jidurivu daiyepe tedejaquemavu. Ëbenita na meyuyaivu barejaqué mavu. Ne cúyaiyede jáivu, diīmarocavu churarava náre cujurī, náre boarǎnuridurejaquemavu. Nópe ne daiyede jáivu, ina dupini paraivu bācavu diīmarore ecorī nurejaquemavu. Nópe ecoivu, diīmarore juarejaquemavu. Nópe ne juaiyede jáivu, ina apevu Israecavu copedini jǎrejaquemavu. Copedini jáivu, náre cujuivu bācavure boarī jaruvarī jebedejaquemavu. Nópe ne boarī jaruvarī jebeiyepe, diīmaroquede, ne oteiāimarare máre ne ĩnu, “Meajebu”, arejaquemavu Jūmenijicu.

No yóboi, Ebal āmicuricū cūracūi Jūmenijicure ne mearore jínaiyede cūraboaque yutubore darejaquemavu Josué. Ëi nópe daiyede jáivu, diyutubore Israecavu sacerdoteva āimarare boarī, juarī, jāmuóri, Jūmenijicure mearore jídejaquemavu. Mamaramu Moisés bācure Jūmenijicu ũi jíye báquede die daicōjeiyede cūraveai toivarī jēorejaquemavu ũ mácu. Que baru dicūi ne cuede diyutubo cūraboai Jūmenijicu ũi daicōjeiyede toivarī jēorejaquemavu Josué. Toivarī jēori buojarī, Israecavu ne jápiarǎjiyepe ayu, die daicōjeiyede buedejaquemavu. Yópe arī buedejaquemavu:

—Jūmenijicu ũi ðaicōjeiyede muje mearo ðaru, ũ mujare mearo ðacuyume. Ubenita ũi ðaicōjeiyede muje vainí turu, āmeno vainájaramu muja, arī buedejaquemavu náre.

No jipoca, Moisés bácuí yaiquiye jipocai, nópe bueicōjeneja-quemavu Israecavure. Que teni ũi aiyé báquepedeca buedeja-quemavu Josué náre.

Gabaón āmicuriīmarocavu ne meyuyaino mácarō Israecavure

Josué 9

Canaán āmicurijoborōi Gabaón āmicuriīmaro curejaquemavu. Nócavu Israecavure jidurī vaidéjaquemavu. Israecavu apenoa īmaroacavure ne boarí vainí tuiyede jápiarejaquemavu. Que baru jidurejaquemavu. Nópe jidurivu, Israecavure meyuyarānurajivu barejaquemavu. Ne nurajiye jipocai, javecacajea cuitótecajeare dorī, aru cuitóboiye páure nuvarī, Israecavu yebaita earejaquemavu. Joarōita daivupe teni, ðarī jáðovareja-quemavu Israecavure, náre meyuyaivu. Yópe arī meyuyareja-quemavu na:

—Joarōcavubu ñuja. Que baru ñujaque mearo cujarā muja. Maje baju boabénajare. Mearo curājare, arejaquemavu Josuéde.

Ne que aiyede jápiaivu, Josuéjá diede Jūmenijicure jēniari jámenejaquemavu. Que teni ina Gabaóçavu ne coyuiyede jápiaivu, yópe arejaquemavu náre Israecavu:

—Boabénajarevu. Maja mearo curājarevu, arejaquemavu Gabaóçavure.

Nópe aivu, Gabaóçavure boabédejaquemavu Israecavu. Yóbecurijāravua ne nópe arīburu yóboi, Gabaóçavu copainuri earejaquemavu ne curōre. Dinumu majidejaquemavu Israecavu ne meyuyaiyede. Nópe majidivuvacari, apevu Israecavu ne curōi nurejaquemavu. Ubenita ne “Mearo curājare” aiyé báque boje, náre boabédejaquemavu. Nópe boabévu, náre memeni coreivu jacorejaquemavu Israecavu. Que teni Gabaóçavu Israecavure pecare buracaivu, ocore joracaivu barejaquemavu.

Obediĩmaroare Israecavu ne vainí tuino mácarō

Josué 10-12

(Hechos 13.19)

Canaán āmicurijoborōi Jerusalén āmicuriĩmaro curejaquemavu. Diĩmarocacu pueno jabocu curejaquemavu, Adonisedec āmicucu. Gabaóçavu Israecavure “Mearo curājare” ne aiye báquede jápiarejaquemavu ũ. Nópe jápiayu, jidurejaquemavu Israecavure aru Gabaóçavure máre. Que teni Jerusalécavu apevu yóvaicuvaiĩmaroacavuque ne churaravare cójijovarĩ, Gabaóçavure boarānurejaquemavu. Ne nópe boarādaiyede jáivu, Gabaóçavu Israecavure náre cadateicōjeivu, “Maje bajo boabénajare. Cadatenadajarā” arĩ, cuturĩ jarorejaquemavu Israecavure, ne cadatenajiyepe aivu. Ne nópe cuturĩ jaroiyede jáñu, Jūmenijicu Josuéde yópe arejaquemavu:

—Jidubejacu. Náque muje boarú, mujare cadatequijivu, arejaquemavu Josuéde.

Ũi que aiyede, Josué churaravare ũi cójijicōjeniburu yóboi, ina cūinápurupe paiĩmaroacavu ne churaravare boarānurejaquemavu Israecavu ne churarava. Nópe ne boaiyede jáñu, Jūmenijicu náre Israecavure mearo cadatedejaquemavu. Ũi cadateiyede, cūinápurupe paiĩmaroacavu ne churaravare vainí turejaquemavu. Ne boarĩ pupuimara dupini cūyarejaquemavu. Ne nópe dupini nuiyede jáivu, náre cujurĩ nuri, obedivure boarĩ jaruvarejaquemavu. Yópe cadatedejaquemavu Jūmenijicu Israecavure. Ocare darejaquemavu jājarĩboa cūrajiboape. Que teni diboá obedivu churaravare, Israecavure jári coenínivure, boarĩ jaruvarejaquemavu. Israecavu ne churarava ne boaino pueno boarĩ jaruvarejaquemavu diboácapūravu. Nópe ðayu, Israecavure cadateyu barejaquémvu Jūmenijicu.

Iyede máre náre cadatedejaquemavu. Ne boaiyedeca, nainé nurejaquemavu. Nópe nuiyede jáñu, Josué nócavure cūinájáravuma boarĩ jaruvarĩ jebeiyucu, Jūmenijicure jēniari járejaquemavu. Avíá jāravucacure mauteicōjeñu jēniarejaquemavu. Nópe ũi jēniaiyede jápiayu, ñai jāravucacure mautede darejaquemavu Jūmenijicu. Dijāravure joarijāravure darejaquemavu. Ũi que ðaiyede, Israecavu náre jári coenínivure vainí turejaquemavu. Náre vainí turĩ buojarĩ, ne boaimara mácvu ne ĩmaroaita

nurejaquemavu. Diĩmaroare eaivu, noi curivure pupuimarare boarĩ jaruvarĩ jebedejaquemavu.

Ne nĩpe daiyede jĩpiarejaquemavu Hazor āmicurĩĩmaro-
cavu ne pũeno jabocu, Jabĩn āmicucu. Que jĩpiayu, apenoa
ĩmaroacavu ne pũeno jabovaque cĩjijidejaquemavu. Cĩjijini
buojarĩ, nĩque boroteni buojayu, nĩna churarava Israecavure
boarĩnuridurejaquemavu. Caballozare aru ne jabuboicũa jĩtu-
ruicũare cuvarejaquemavu na. Ne nĩpe cũvaedeca, Jũmenijicu
yĩpe arejaquemavu Josuĩde:

—Jidubejacu nĩre. Javena dinumu paiyemica boarĩ jaruvarĩ
jebenajaramu muja. Mujare cadatequijivu, arejaquemavu ũre.

Ũi nĩpe aiyede jĩpiayu, Josuĩ ũi churaravare nuwarejaque-
mavu, Hazocavuque boaicĩjeñu. Nĩpe boaiyu, Israecavu nĩre
jĩari coenĩnivure vainĩ turĩ, boarĩ jaruvarĩ jebedejaquemavu.



Que ďarĭ buojarĭ, dicŭá jĭturuicŭare juarejaquemavu. Aru ina caballova ne ħradoare puyorejaquemavu. Nĕre nŏpe ďarĭ buojarĭ, Hazor ħmicurĭĭmaroi nurejaquemavu. Noita eaĭvu, nŏcavure mĕre vainĭ turejaquemavu. Dĭĭmarore juarejaquemavu. Que ďarĭ buojarĭ, apenoa ĭmaroai eaĭvu, dĭĭmaroacavure mĕre vainĭ turejaquemavu. Ina cŭĭnĕpurupe paĭvu jabovare boarĭ jaruvarejaquemavu. Aru ne ĭmaroare vainĭ turejaquemavu. Dĭĭmaroque cŭramiare cobodovarĭ najuĕrejaquemavu. Que tenĭ nŏcavu ne oteiĕĭmarare aru ne cuvaede ĭni, nuvarejaquemavu Israecavu ne curĭtavai. Nŏpe boaĭvu Israecavu obediĭmaroacavure Canaĕn ħmicurĭjorŏcavure vainĭ turejaquemavu. Nŏpe vainĭ tuĭvu, dijororŏre nŏcavure tatorejaquemavu.

**Canaĕn ħmicurĭjorŏre Josuĕ ĩi coavaino mĕcarŏ
Israecavure
Josuĕ 13-22**

(*Hechos 7.45, 13.19*)

Israecavu obediĭmaroacavuque ne boaicorica obediujua vai-
dejaquemavu. Que tenĭ dĭĭmaroare vainĭ turĭburu yŏboi, Josuĕ
bucutedejaquemavu. Yŏpe arejaquemavu Jŭmenĭjicu ĩre:

—Apenoa ĭmaroacavu jauma mujare, muje vainĭ turĕji-
mara. Nŏpe jauĕdeca, caride dijororŏre, Canaĕn ħmicurĭjor-
rŏre coavajacu Israecavure. Nueve paiyajuboacavure, apeya-
jubo corĭcacavure, dijororŏre coavajacu. Jordĕn ħmicurĭya ĭia
aviĕ dainocapŭravŭi curĭjororŏ cuvabevure ĭjororŏre coavajacu,
arejaquemavu Jŭmenĭjicu Josuĕde.

Ėi que aiyede jĕpiayu, ĩi aĭye bĕquepedeca ďarejaquemavu
Josuĕ. Eleazar, sacerdotevare jaboteipŏecu, aru apevu Israe-
cavu jabova ĩre cadatedejaquemavu ĩi coavaiyede. Dijororŏre
ĭnajĭvure majĭnajĭvu duvarĭ yajurejaquemavu.

Caleb noi curejaquemavu. Ė ĭpocamia ina doce paĭvu
dupĭni jĕĭvucacu barejaquĕmavu. Ne coyuiye bĕquede Moĭsĕs
bĕcure, ũ Josuĕmaque jĕve coyurejaquemavu ne jĕĭye bĕquede,
ĭĭdubevava. Que baru nŏpe ĭĭdubevure jĕĕn, Moĭsĕs bĕcu yŏpe
arejaquemavu nĕre:

—Dupini jáivuque muje eaijoborō mácarō muje joborō maquiyébu. Mujepāramena ne joborō maquiyébu, arejaquemavu Moisés bácu náre.

Ëi que aye báquede ārucu, dijoborōcaīmarore jēniarejaquemavu Caleb Josuéde. Nópe arī, ïi jēniaiyede ju arejaquemavu Josué.

Nópe ayu, Hebrón āmicuriīmarore jídejaquemavu ũre. Nópe ũi jíyede, Calejā Hebrócavure boarī vaini turejaquemavu náre. Nópe náre vaini tuivu, diīmarore tatorejaquemavu ũ náre. Calecapūravu Judā āmicuriyajubocacu barejaquémavu. Que baru ũre jíīmaro Judā āmicuriyajubocarōque curejaquemavu diīmaro. Aru Josué máre jēniarejaquemavu cūináro īmarore, Timnat-sera āmicuriīmarore. Josuécapūravu Efraín āmicuriyajubocacu barejaquémavu. Que baru ũre jíīmaro Efraín āmicuriyajubocarōque curejaquemavu diīmaro.

Canaán āmicurijoborōcarō aviá daino cācopūravucarō curejaquemavu. Dijoborōi curejaquemavu Jerusalén āmicuriīmaro. Diīmarocavu Jebuseo āmicuriyajubocavu barejaquémavu. Náre vaini turī majibedejaquemavu Israecavu. Que baru ina Jebuseocavu Israecavuque cūináīmaroi curejaquemavu. Canaán āmicurijoborōcarō aviá daino meapūravucarō curijoborōre Efraín āmicuriyajubocavure aru Manasés āmicuriyajubo coricavure jídejaquemavu. Apevu Manasés āmicuriyajubocavu Jordán āmicuriya jia apeduve ne curijoborōre ĩnejaquemavu jipocai.

Aru Silo āmicuriīmaroi Jūmenijicu ũi cūrami āimara cajeáque ne dāīnamine núvarejaquemavu Israecavu. Diñamine ne núvaijāravure siete paiyajuboacavure coavabedejaquemavu cāreja ne curāijoborōare. Que baru diyajuboacavure coavarejaquemavu Canaán āmicurijoborōre. Simeón, Benjamín, Zabulón, Isacar, Aser, Neftalí, aru Dan āmicuriyajuboacavu ne curijoborōre jídejaquemavu. Nópe coavarī buojarī, sacerdotevare máre, Leví āmicuriyajubocavure máre, cuarenta y ocho paiīmaroare jídejaquemavu. Nácapūravure joborō bajure jíbedejaquemavu. Ubenita diīmaroare, ne curiīmaroare, jídejaquemavu náre. Diīmaroacaīmaroare, seis paiīmaroare, epedejaquemavu ne dupinajiīmaroare. Pōevare ārumena boarī jaruvaivu diīmaroaita ne dupini eaiyede, ne boarī jaruvaimara mácavu jivu náre boarī jaruvarī majibedejaquemavu.

Dijoborõre coavarĩ buojari, Josué yópe arĩ coyurejaquemavu ina Rubén aru Gad ámicuriyajuboacavure aru Manasés ámicuriyajubo coricacavure:

—Jūmenijicu ũi ñaicōjeiye báquepedeca ñavu muja. Mujevure “Náre Canaácavure boarĩ cadatenajaramu” muje aiye báquepedeca ñavu muja. Caride Jordán ámicuriya jia apedavei muje joborõai copainujara muja. Nópe copaini eaivu, Jūmenijicu ũi ñaicōjeiyede mearo ñajarã muja. Ëre pare jecujarã muja. Que baru ũi ue báquepedeca ñajarã muja, arejaquemavu Josué diyajuboacavure.

**Josué Jūmenijicu jiede coyurĩ ũi bubaino mácarõ
Israecavure
*Josué 23-24***

No yóboi, bucucu baju Israecavu ne jabovare cuturĩ jarorejaquemavu Josué. Yópe arĩ coyurejaquemavu:

—Ijoborõre Jūmenijicu jiamе majare. Que baru ijoborõre maje cavarãjiyepe ayu, majare ũi cadateiyede jávu maja. Nópe jáivu, Moisés bácu majare ũi ñaicōjeiyede ũi epeiye báquede majare vainí tubejarã muja. Cūinácu bae Canaán ámicurijoborõcavu ijoborõi cuma cãreja. Náre yóvabejarã. Náque purubuobejarã. Que baru ne pēpeimara “Jūmenijinamu” ne arĩ coyumarare mearore jíbejarã. Náre muje yóvaru, ne pēpeimarare muje mearore jíyede jáñu, Jūmenijicu mujare cadatebecube. Canaán ámicurijoborõcavure mujare jaravacabecube ũ. Que teni yui mauteivu, mujare ámeno ñare ñarãjarama. Majare urarõ cadateame Jūmenijicu. Nópe cadateyuvacari, ũ majare maje vainí turu aru ne pēpeimarare maje mearore jíyede jáñu, jorojĩni vaicúyume majaque. Nópe jorojĩñu, ijoborõre tatocuyume majare. Majeñecuva Abrahãja mácavure Jūmenijicu me cadatedejaquemavu. Majare máre mearo ñaibi ũ. Jūmenijicu matuiyeda mearore jíjarã, arĩ coyurejaquemavu Josué.

Ëi que aiyede jápiaivu, ju arejaquemavu Israecavu.

Ne nópe arĩburu yóboi, ne joborõi copaini nurejaquemavu. Dijoborõ Israecavu ne joborõ Canaán ámicurijoborõ mácarõ

āmiá oatuvarejaquemavu. Dinumure Israel āmicurijoborō búrī āmicurejaquemavu.

Náre nópe arī coyurīburu yójīboi, Josué bácu yaidéjaquemavu. Ũ mácuí nópe yaiyede jáivu, ũi ĩmaroi ũ mácuře nuvari, yuarī jaruvarejaquemavu. Josué bácu ũi curinumure, Israecavu Jūmenijicure mearore jídejaquemavu. Jūmenijicu náre coenínivunque ne boaiyede cadateyure jáivu, Jūmenijicure mearore jídejaquemavu.

Dijoborō mearo curī búrejaquemavu. Aru José yaiyá bácu ũi cūa máquede Canaán āmicurōi yuarejaquemavu.

Israecavu Jūmenijicure ne ju abeni buino mácarō *Jueces 1.1-3,6*

Josué bácu aru apevu Israecavu bácvu, Canaácvunque boaivu bácvu, ne yainíburu yóboi, apevu Israecavu, némara, Jūmenijicu ũi daicōjeiyede ju abeni búrejaquemavu. Apenoa ĩmaroacavu Canaán āmicurōcvure vainí tubedejaquemavu Israecavu. Que baru diĩmarocavu caivure boabédejaquemavu. Apenoa ĩmaroacavunque “Maje baju boabénajarevu”, arī borotedejaquemavu diĩmaroacavure, boje íyurivu Israecavu náre ne boabé boje. Que teni ne cuede dijoborōi, Israecavu nócvu ne pēpeimarare mearore jíní búrejaquemavu. Aru némaraque purabuorejaquemavu. Que teni Jūmenijicu ũi daicōjeiyede vainí tuivu barejaquémvu na. Jūmenijicu náre dijoborōcvure boarī jaruvaicōjeniduyu bácvureca, nópe darejaquemavu na. Que baru ne que daiyede jáñu, jorojīnejaquemavu Jūmenijicu. Que teni náre nócvunque purabuoicōjemenidurejaquemavu. Nócvunque yóvaicōjemenidurejaquemavu. Ne pēpeimarare “Jūmenijinamu” ne arī coyumarare mearore jícōjemenidurejaquemavu. Ũi que daicōjemeneca, ũre ju abedejaquemavu na. Nópe ne ju abede jáñu, Jūmenijicu ũi daroimure, ángelede, jarorejaquemavu, náre coyucōjeñu. Yópe arejaquemavu ñai ángele náre:

—Jūmenijicure muje ju abe boje, ũ mujare cadatebecuyume. Ijoborōcvure jaetovacabecube. Que teni ijoborōi curivu mujare ámedarājarama. Mujare jári coenínivu barājárama, arejaquemavu ñai ángele Israecavure.

Ëi que aiyede jápiaivu, Israecavu pare chïorejaquemavu. Nópe chïoivu, áimarare boarí, juarí, jámuóri, jídejaquemavu Jūmenijicure.

Que teni Canaán āmicurijoborōcavuque dijoborōi curejaquemavu na. Aru bediōva dijoborōcavu ne pēpeimarare “Jūmenijinamu” ne arī coyumarare mearore jīni būrejaquemavu cojedeca. Nópe daivu, nócavuque purubuorejaquemavu. Nópe ne daiyede jáñu, jorojīnejaquemavu Jūmenijicu. Nópe jorojīñu, náre jári coenínivure boaicōjenejaquemavu. Ne boaiyede jáivu, Israecavu Jūmenijicure jēniarejaquemavu:

—Ñujare cadatejacu, arī jēniarejaquemavu.

Ne nópe jēniaiyede jápiayu, Jūmenijicu ñi beoimure “Yópe daiye jauvu” aipōecure epedejaquemavu ne jabocuva. Ëi epeimu náre ñi cadatedu, nácapūravu Jūmenijicure mearore jīni majidejaquemavu. Ubenita beoipōecu bácu yainíburu yóboi, “Jūmenijinamu” arī ne pēpeimarare, mearore jīni būrejaquemavu cojedeca. Obediujua cainumua nópe matuiye dare nurejaquemavu na.

**Jūmenijicu ñi epeino mácarō Israecavure ñi
beoimarare “Yópe daiye jauvu” aipōevare
Jueces 3.7-5.31**

(Hechos 13.20, Hebreos 11.32-38, Apocalipsis 16.16)

Apenocavu, Mesopotamia āmicurijoborōcavu, Israecavure vainí turí jipocatenajivu barejaquému. Apenocavu náre vainí tubedejaquemavu cāreja. Ubenita Israecavu “Jūmenijinamu” ne arī coyumarare ne pēpeimarare ne mearore jíye boje, apenocavure náre vainí ture darejaquemavu Jūmenijicu. Nópe ne vainí tuiyede, Mesopotamia āmicurijoborōcavu ne jabocu Israecavure pueno jabotedejaquemavu. Ocho paiujua baju náre cōjeipōecu barejaquému. Que baru Israecavu Jūmenijicure jēniarejaquemavu:

—Ñujare cadatejacu, arī jēniarejaquemavu.

Ne que aiyede jápiayu, Jūmenijicu náre cadatedejaquemavu. Nópe dayu, Otoniel āmicucure náre cadateicōjenejaquemavu. Ë Caleb ñi pacumacu barejaquému. Que teni ñ ñi

churaravaque Mesopotamiacavure boarí vainí turejaquemavu. Jūmenijicu náre ne boaiyede cadatedejaquemavu. Que teni Otoniel Israecavure “Yópe daiye jauvu” aipōecu barejaqué mavu cuarenta paiujua baju.

Otoniel bácuí yainíburu yóboi, Israecavu Jūmenijicure ju abeni búrejaquemavu cojedeca. Nópe vainí tuivu, Moab āmicurijoborōcavure boarí vainí turejaquemavu. Israecavu ne ju abe boje, āmeno vaidējaquemavu na. Nópe náre vainí tuivu, Moab āmicurōcavu ne jabocu Israecavu ne pueno jabocu curejaquemavu. Dieciocho paiujua baju ne jabocu barejaqué mavu. Que teni Israecavu Jūmenijicure jēniarejaquemavu cojedeca.

—Ñujare cadatejacu, arī jēniarejaquemavu.

Ne nópe jēniaiyede jápiayu, Aod āmicucure Israecavure cadateicōjenejaquemavu Jūmenijicu. Nópe ūi cadateiyede, Jūmenijicu ūre Moab āmicurōcavure boaicōjeñu, náre vainí ture darejaquemavu. Ina Moab āmicurōcavure ne vainí turīburu yóboi, Israecavu mearo curejaquemavu. Ochenta paiujua baju mearo curejaquemavu. Dinumure apecu Israecavure caia-teipōecu curejaquemavu. Ũ āmicurejaquemavu Samgar. Oteivecavure ne totarī cujiyoque seiscientos paivu baju Filisteo āmicuriyajubocavure boarí jaruvarejaquemavu.

Que darī buojarī, Aod bácu aru Samgar bácu ne yainíburu yóboi, Israecavu Jūmenijicure ju abeni búrejaquemavu cojedeca. Ne nópe ju abede, Canaán āmicurijoborōcavu náre boarí vainí turejaquemavu. Jūmenijicucapūravu náre nópe teicōjenejaquemavu. Que teni Israecavure vainí turī, náre jabotedejaquemavu. Ina Cananeo āmicuriyajubocavu churarava ne jabocu Sísara āmicurejaquemavu. Aru veinte paiujua baju Israecavure āmeno darejaquemavu ũ. Ũi nópe daiyede, Israecavu Jūmenijicure jēniarejaquemavu cojedeca:

—Ñujare cadatejacu, arī jēniarejaquemavu.

Dinumure ne jēniaiyede, Jūmenijicu ūi beoimore, “Yópe daiye jauvu” aipōecore epedejaquemavu Israecavure. Débora āmicuco barejaqué mavu ō. Aru Jūmenijicu ōre yópe arejaquemavu:

—Tabor āmicuricū cūracū yebai nuicōjejaco Barac āmicucure. Caipucapuruaape paimil churaravare ícōjejaco ūre. Que teni Sísara ūi churaravaque boarájarama na. Nópe

boaivu, Barac ũi churaravaque náre jári coenínivure vainí turājarama na, arejaquemavu Jūmenijicu óre.

Ũi que aiyede jápiado, ũi aye báquepedeca ò coyurejaquemavu Barare. Nópe òi coyuiyede, ũcapūravu jidurejaquemavu. Nópe jiducu, óre yópe arejaquemavu:

—Yúque mi naru, nucuyumu. Ũbenita mi numenu, nuncabu, arejaquemavu ũ.

—Jau, nucojivu. Ji nópe nuiyede, Sísarare boarí jaruvacodome cūináco nomió. Múcapūravu ũre boarí jaruvabecubu. Jūmenijicu mure boarí jaruvaicōjemecube, cūinácu mi nuiyebede, arejaquemavu ò ũre.

Que teni Barac Déboraque Israecavu churaravare cójjjovarí nurejaquemavu. Nópe nuivu, Cananeo āmicuriyajubocavu churaravaque boarānurejaquemavu. Nópe boaivu, Cananeocavare vainí turejaquemavu. Ne nópe vainí tuiyede, Sísara dupini nurejaquemavu.

Nópe dupini nuñu, Quenita āmicuriyajubocacu, Heber āmicucu ũi cūrami āimara cajeáque ne ðaiñami dupinidurejaquemavu. Quenitacavu Cananeocavauque mearo curīdurejaque-



mavu. Diñamine ũi eaiyede, Heber ũi cubede, jímarepaco cūi-nácova curejaquemavu. Ő Jael āmicuco barejaqué mavu. Que baru ũi eaiyede jádo, ũre ecoicōjenejaquemavu.

Ŭi ecoiyede, opecore ũre jídejaquemavu, ũcuicōjedo. Ŭi ũcuri buojaiyede, ũre yavenidurejaquemavu. Nópe yavedo, ubeni nópe darī, borocuco barejaqué mavu ũre. Israecavure cadatedo barejaqué mavu. Que teni Sísara uetuyu cārejaquemavu. Aru ũi cāiyede, jocuyore jádoiduque ũi jipobure jádori, boarí jaruvarejaquemavu. No yóboi, Barac Sísara bácu ũi yaiye báquede majibecu, ũre boacúdayu, ũi baju bácarōre jádovarejaquemavu ũre. Que teni dijāravu Israecavu Cananeocavure boarí vainí tarejaquemavu. Que teni Barac Déboramaque Jūmenijicu náre ũi cadateiye báquede coyurī, mearo yuriarejaquemavu. Nócavure ne vainí turīburu yóboi, Israecavu mearo curejaquemavu cuarenta paiujua baju.

Gedeón Israecavure ũi cadateino mácarō Madián āmicuriyajubocavure ne boaiyede

Jueces 6.1-8.28

(Hebreos 11.32-38)

No yóboi, Débora bácoi yainíburu yóboi, bedióva Israecavu Jūmenijicure ju abeni búrejaquemavu. Nópe ne ju abede jáñu, náre ñájine darejaquemavu Jūmenijicu. Náre Madián āmicuriyajubocavu boarí vainí tarejaquemavu. Jūmenijicu náre vainí ture darejaquemavu. Nópe boarí vainí taivu, siete paiujua baju jabotedejaquemavu Israecavure Madiácavu. Que teni Madián aru Amalec āmicuriyajuboacavu Israecavure āmeno darejaquemavu. Ne oteiyede jaruvarejaquemavu. Que baru náre āiye cubedejaquemavu. Nópe āmeno vaivu, Israecavu Jūmenijicure jēniarejaquemavu cojedeca:

—Ñujare cadatejacu, arī jēniarejaquemavu.

Nópe arī, ne jēniaiyede jápiayu, Jūmenijicu yópe arejaquemavu:

—Cainumua mujare ji cadateiyedeca, yure ju abevu muja.
“Jūmenijinamu’ muje arī coyumarare muje pēpeimarare

mearore jíbejarā”, ji aye báquede mujacapūravu yure jápiabe-teavū, arejaquemavu náre.

Nópe ayuvacari, náre cadatecudayu barejaqué mavu. Ángele ũi daroimure, Israecacu Gedeón āmicucu yebai jarorejaquemavu. Ũi yebai eayu, yópe arī coyurejaquemavu ũre:

—Jūmenijicu mure cadatecuyume. Múcapūravu mi ũmu-vaque Madianitacavure boarí vainí turājaramu, arejaquemavu ñai ángele ũre.

—Yure maiyójavu, arī ju arejaquemavu Gedeón.

Ũi que aiyede, Jūmenijicu yópe arī ju arejaquemavu ũre:

—Yácapūravu náre vainí tuquijivu. Yu náre vainí ture ðaquijivu mujare, arī ju arejaquemavu Jūmenijicu.

Nópe ayu, ũre “Jūmenijinamu” ne arī coyuimarare ne pēpeimarare mearore jácaivare jaruvaicōjenejaquemavu. Aru Gedeói pacu ũi ðaiva barejaqué mavu diva. Baal āmicucu ne pēpeimu ũi mearore jácaiva barejaqué mavu. Aru jípacure jiducuvacari, Jūmenijicure ju arejaquemavu. Ũi aye báquepedeca ðarejaquemavu. Ũbenita jiducu, ñami divare jaruvarejaquemavu. Miadárōi ũi jaruva iyede jáivu, ũi ímarocavu ũre boarí jaruvaiyurídurejaquemavu. Ne nópe boaiyuede jáñu, jípacu yópe arejaquemavu náre:

—Baal Jūmenijicu baju baru, Gedeóre ñájine ðajebu, arejaquemavu Gedeói pacu.

Ũi que aiyede, na Gedeóre boabédejaquemavu.

Dinumu Gedeón jáðovaicōjenejaquemavu Jūmenijicure, yópe arī:

—Ovejacajede ji epequijicajede cari ñami jedevai, mie tuiyede yauraque ēnuvajacu. Ũbenita caino joboróre ēnure ðabejacu, arejaquemavu Jūmenijicure Gedeón.

Aru ũi nópe aye báquepedeca ðarejaquemavu Jūmenijicu. No yóboi, bedióva cojedeca Jūmenijicure jáðovaicōjenejaquemavu, yópe arī:

—Cari ñami ovejacajede ji epequijicajede, mie tuiyede ēnure ðabejacu. Ũbenita caino joboróre yauraque ēnuvajacu, arejaquemavu.

Aru bedióva cojedeca ũi nópe aye báquepedeca ðarejaquemavu Jūmenijicu, jáðovañu jáve ayu bácare Gedeóre “Mure cadatecuyumu” ũi aye báquede.

No yóboi, Madianitacavu Amalecitacavuque ne churarava obedivure cójijovarejaquemavu, Israecavu ne joborõi eaivu. Ne nópe eaiyede jáñu, Gedeón máre ùi churaravare cójijicõjenejaquemavu. Nópe ùi cõjeiyedeca, Jūmenijicu yópe arejaquemavu úre:

—Mi churarava obedivu bajubu. Muja obedivu mujare jári coenínivure vainí tuivu baru, “Maje baju maje paruéque náre vainí tavu” arājaramu muja. Que baru jidurivure cūrami copai-cõjejacu, arejaquemavu úre.

Ùi que aiyede, ùi aye báquepedeca darejaquemavu Gedeón. Aru veintidós mil paivu copaidejaquemavu. Ùbenita caipucapuruape paimil baju Gedeóque mauteivure jáñu, Jūmenijicu yópe arejaquemavu úre:

—Mi churarava obedivu baju cuma cāreja. Que baru náre ìni ĕmejacu tui pávai, arejaquemavu Jūmenijicu úre.

Ùi que aiyede, ùi aye báquepedeca Israecavu churaravare ìni ĕmenejaquemavu Gedeón. Nópe ìni ĕmeivu, náre ũcuicõjenejaquemavu. Trescientos paivu baju ina churarava ne puruáque ocore ìni, jemedoque ũcuivu barejaquémavu, yavimiva ne ũcuiyepe. Náre Gedeóre jipocateicõjenejaquemavu Jūmenijicu. Aru apevu ñuatutarĩ ũcuivure copaide darejaquemavu ne cūramiai. Ùbenita ne copainajiye jipocai, ne jorobuare aru ne japuiyoare máre epeicõjenejaquemavu. Diñami caivure ina trescientos paivu churaravare jorobuare, ne nuvarajibulare cācopūravacapurui, aru japuiyoare máre, ne nuvarajiyoare meapūravacapurui, jídejaquemavu náre coapa Gedeón. Cáma-veare máre jídejaquemavu náre coapa. Diveá cáma-vea jorobua jívuĩ nuvaivu ne moarajibua barejaquémavu. Náre jári coenínivure ne cáma-veare “Jámejarari” aivu, diveá cáma-veare moari jacotuicõjenejaquemavu náre. Nópe ne jacotuiyede, Gedeón ùi japuiyede jápiaivu, Israecavu churarava máre japurejaquemavu. Nópe japuivu ne jorobuare cobarejaquemavu. Cūnáturu, ñami corica baji nópe darejaquemavu. Dibúare cobarĩ-buru yóboi, na caivu yópe arĩ codoboborejaquemavu:

—Gedeóque Jūmenijicu mujare vainí tacuyume, arĩ codoboborejaquemavu.

Nópe codoboborĩ buojaivu, ina trescientos paivu churarava nomiá Madianitacavu churarava ne cāitava ĕcarui núrejaquemavu. Que teni náre jápiaivu, náre jári coenínivu cuezumaivu

jidurejaquemavu. Que jidarivu, mamateni, ne baju boaréjaquemavu na. Nópe boaiavu, jidurĩ cúyarejaquemavu. Nópe ne cúyaiyede jáivu, apevu Israecavu churarava cujurĩ nuri, cúyaiyure boarĩ jaruvarejaquemavu. Que teni Jordán ámicuriya jia apeduvei Madianitacavu churarava ne jataiyede, apevu Israecavu churarava náre jacotarĩ, boarĩ jaruvarejaquemavu. Pucarã ne jabovare máre boarĩ jaruvarejaquemavu. No yóboi, Jordán apeduvei Gedeója eaiavu, apevu Madianitacavu ne pueno jabovare jēni, boarĩ jaruvarejaquemavu.

Que teni Gedeója Madianitacavure ne vainĩ turĩburu yóboi, Israecavu úre ne jabocu jacoiyurĩdurejaquemavu. Ne nópe jacoiyuede majicu, yópe arejaquemavu Gedeón náre:

—Yu muje jabocu ámevu. Jímacu máre muje jabocu áme-cube. Jūmenijicucapūravu muje jabocu bacuyúme, arejaquemavu Gedeón.

Que arĩ buojarĩ, náre jārĩ coenínivure ne tatoiyé báquede tarabua úruque daitarabuare jēniarejaquemavu ũ. Ditarabuare ne davaiyede diecinueve paikilos ducurejaquemavu. Dinumu camisa ũmujubecaje sacerdotevare jaboteipōecu ũi doicajepe painore dārejaquemavu. Aru dicaje bieiyede dārejaquemavu



die úruque. Dicajede ne darĩburu yóboi, Israecavu “Jūmenijicube” arĩ, yópe ne mearore jíye báquapedeca ũre, dicajede mearore jídejaquemavu. Ubenita Jūmenijicare mearore jíbedejaquemavu, dicajede mearore jívu. Nópe ðaivavacari, cuarenta paíjuu baju, Gedeón ũi yaiyeta, Israecavu mearo curejaquemavu.

Jūmenijicu ũi epeino mácarō Israecavure apevu ũi beoimarare “Yópe ðaiye jauvu” aipōevare

Jueces 8.29-12.15

(Hebreos 11.32-38)

Ũi yaiquíye jipocai, Gedeón setenta paívu baju jueocavarejaquemavu. Obedivu nomicurejaquemavu. Aru apecure jueocavarejaquemavu ũi yebacacoque. Ōi mácu Abimelec āmicurejaquemavu. Aru Gedeón mácu yainĩburu yóboi, Israecavu pēpeimarare āimarare boarĩ, juarĩ, jāmuóri, jĩni búrejaquemavu cojedeca. Cūinájāravu Abimelec Siquem āmicurĩmaro earejaquemavu. Diĩmaro jĩpacoĩ curĩmaro mácarō marejaquémavu. Noita eayu, nócavure yópe arejaquemavu:

—Mujare jaboteiyavu yu, arejaquemavu.

Que teni nócavu ũre jaboꝓoiyurivu barejaquémavu. Aru ũcavuque Abimelec ĩmarare sesenta y nueve paivure boarĩ jaruvarejaquemavu. Jotam cūinácurata boabédejaquemavu. Ũcapũravu náre dupidejaquemavu. No yóboi, Siquem āmicurĩmaro ēcarui eayu, joarōita núcu, nócavure yópe arĩ codoboborĩ jarorejaquemavu:

—Jipacu bácu mujare ũi cadateiye báquedeca, ũi mārare āmeno dāvũ muja. Muja máre, Abimelejā, jimamina mácavure muje boarĩ jaruvaiye boje, āmeno vainájaramu muja, arĩ codoboborĩ jarorejaquemavu náre.

Que teni yóbecuriꝓua yóboi, Abimelec Siquem āmicurōcavuve ne baju boaréjaquemavu. Nópe boaivu, Abimelec nócavure, Siquem āmicurōcavure, vainí turejaquemavu. Que teni uradāmi cūrami ne cuede Siquem āmicurōcavu, diñamine juarĩ jaruvarejaquemavu Abimelejā. Nópe juarĩ jaruvaivu, nócavure boarĩ jebedejaquemavu. No yóboi, apeno ĩmarocavure Abimelec

ũi boaiyede, cūináco nomió, ũmujuriñami cūrami caco, cūrabo urabo oteiyabeare òi cūoibore duvarĩ najuári jipobu baji, boarĩ jaruvarejaquemavu ũ mácure.

Abimelec bácuí yainíburu yóboi, Tola āmicucu Israecavure “Yópe ðaiye jauvu” aipōecu barejaquémavu veintitrés paiujua baju. Ũ mácui yainíburu yóboi, Jair āmicucu Israecavure “Yópe ðaiye jauvu” aipōecu barejaquémavu veintidós paiujua baju.

No yóboi, Filisteo aru Amón āmicuriyajuboacavu Israecavure boaívu, náre vainí tarejaquemavu. Náre nópe vainí tuívu, náre Jūmenijicui beoimara “Yópe ðaiye jauvu” aipōeva jabotedejaquemavu. Dieciocho paiujua baju náre āmeno jabeteni yajurejaquemavu. “Jūmenijinamu” ne arĩ coyumarare ne pēpeimarare Israecavu mearore ne jíye boje, Jūmenijicu náre ñájine ðayu barejaquémavu. Nópe āmeno vaívu na, Jūmenijicare jēniarejaquemavu cojedeca:

—Ñujare cadatejacu, arĩ jēniarejaquemavu.

Ne nópe aiyede, Jūmenijicu yópe arĩ coyurejaquemavu náre:

—Muje mearore jímarare, “Jūmenijinamu” muje arĩ coyumarare muje pēpeimarare jēniaívu muja. Caride muje āmeno vaidú, nácapūravu mujare cadatenajarama, arejaquemavu Jūmenijicu.

Ũi que aiyede jápiaívu na, “Jūmenijinamu” ne arĩ coyumarare ne pēpeimarare mearore jíbedejaquemavu na. Nópe dajocarejaquemavu. Ne nópe dajocaiyede jáñu, bedióva cojedeca Jūmenijicu náre cadatedejaquemavu. Dinumure apescu Israecacu, Jefté āmicucu, churara meacu barejaquémavu. Jípacu ũmuvaque āmeno ðado barejaquémavu. Que baru jípacuĩ mára ũre jári coenínivu, ne cūramine cuicōjemenejaquemavu ũre. Ũbenita jári coenínivuvacari, Amócavu churaravare náre ne boaiyede jáívu, jípacuĩ mára ũre jabojaicoiyurejaquemavu. Que baru ũre yópe arejaquemavu:

—Majare jári coenínivure boarĩ vainí tuívu baru, mure jabojaacorājaramu. Ñujare cōjecuyu jabojaacorājaramu mure, arejaquemavu ũre.

Aru ju arejaquemavu ũ náre. Nópe arĩ buojarĩ, Amócavu ne jabocure yópe arĩ jēniari járejaquemavu Jefté:

—¿Aipe teni Israecavunque boaiyurāru muja? arĩ jēniari járejaquemavu.

Ëi nópe arĩ jēniari jáiyede, Amócavu ne jabocu yópe arĩ ju arejaquemavu úre:

—Muja Israecavu ñuje joborõre tatoávũ muja ñujare. Muje nópe daiye báque boje, mujaque boaiyavu ñuja, arĩ ju arejaquemavu.

Ëi nópe arĩ ju aiyede, Jefté yópe arĩ coyurĩ jarorejaquemavu úre:

—Muje joborõre tatobetecará ñuja, arĩ ju arejaquemavu.

Ëi nópe aiyedeca, Amócavu ne jabocu úre jápiayubecu, Israecavure boaicõjenejaquemavu ñi churaravare. Ne nópe boaiyede, Israecavucapũravu náre vainí turejaquemavu.

Névure, apevu Efraín āmicuriyajubocavure, coyubevuvata, náre jári coenínejaquemavu. Ne nópe coyubede jáivu, Efraín āmicuriyajubocavu Jeftéjāque jorojīnejaquemavu. Que teni Jefté ñi yajubocavuque Efraícavure boaréjaquemavu. Nópe boaivu, obedivu Efraícavu yaidéjaquemavu.

No yóboi, Jefté bácuí yainíburu yóboi, Ibzán āmicucu Israecavure “Yópe daiye jauvu” aipõecu barejaquémavu siete paiujua baju. Ë mácuí yainíburu yóboi, Elón āmicucu caipucapuruape paiujua baju Israecavure “Yópe daiye jauvu” aipõecu barejaquémavu. Ë mácuí yainíburu yóboi, Abdón āmicucu ocho paiujua baju náre “Yópe daiye jauvu” aipõecu barejaquémavu.

Sansón ñi cadateino mácarõ Israecavure Filisteo āmicuriyajubocavu náre ne vainí tuiyuede

Jueces 13-16

(Hebreos 11.32-38)

No yóboi, Abdón mácuí yainíburu yóboi, Israecavu bedióva Jūmenijicu ñi daicõjeiyede ju abedejaquemavu. Nópe ne ju abede jáñu, Jūmenijicu náre ñájine darejaquemavu. Náre jári coenínivu Filisteo āmicuriyajubocavure boarí vainí turejaquemavu. Ne vainí tuiyede quéda dápiarejaquemavu Jūmenijicu. Que teni ina Filisteocavu Israecavure cõjeipõeva marejaquémavu.

No yóboi, Jūmenijicu ángele ũi daroimure cūináco Israecáco yebai jarorejaquemavu. Óre coyucōjeñu jarorejaquemavu. Óca-pūravu juedocuvabeco barejaquénavu. Yópe arejaquemavu ñai ángele óre:

—Juedocuvabecobu mu. Nópe pádovacari juedocuvacodomu mu. Mímacu bacuyú nazareo ámicuriyajubocacu Jūmenijicu jicu bacuyúme. Que baru poda yuvabecu bacuyúme. Ye ũi podare yuvaicōjemecube ũ macuyú. Vino úyaicoro boqueicorore ũcumejaco mu. Aru áimara docucurivape daivure Jūmenijicu ũi jáiyede ámejaco. Mímacu bacuyú Filisteocavure boarí vainí tucuyume, arejaquemavu ñai ángele óre.

Nópe arí buojarí, nurejaquemavu. Ũi nuiyede jádo ō, jímare-pacure diede coyuconurejaquemavu. No yóboi, bedióva cojedeca Jūmenijicu ñai ángelede coyucōjeñu ne yebai jarorejaquemavu. Nópe jaroyu úre, ũi coyuiyede náre ne jápiaiyede, “Jāvenecabu” arejaquemavu na. Nópe arí, ũi coyuiye báquepedeca vaidéjaquemavu. Ō juedocuvarejaquemavu. Nópe juedocuvaco, nijicare Sansón ámidorejaquemavu. Aru Jūmenijicu nijicare cadatedejaquemavu. Ũi nópe cadateiyede,, parucu nurejaquemavu ũ. Que teni bucucu nuñu, obedivu Filisteocavure boarí jaruvarejaquemavu. Aru ne oteiyede juarí jebedejaquemavu. Ũ Israecavure “Yópe daiye jauvu” aipōecu barejaquénavu veinte paiujua baju.

Que teni Filisteocavu úre boarí jaruvaiyurĩdurejaquemavu. Nópe boaiyurivu, cūináco nomióre, úque borotecodore, yópe arejaquemavu:

—Sansón ũi paruéde majiyuvu ñuja. Úre jēniari jájaco. Mure ũi coyuru, ñujare coyujaco. Úre vainí turādarājivubu ñuja. Ñuje aye báquepedeca mi daru, mure bojedarājivubu ñuja, arejaquemavu óre, Delila ámicucore.

Ne que aiyede jápiado, ō ju arí, Sansóre jēniari járejaquemavu:

—¿Aipe teyu parucu bajurū mu? ¿Aipe teni mure vainí tujebarica apecu? arí jēniari járejaquemavu úre.

Ōi que aiyede jápiayu, yópe arí meyuyarejaquemavu óre:

—Siete paimea témutarabua ne daimea popovabeque yure ne buoru, ye parubecu ubeni cucupe bájebu yu, arí meyuyarejaquemavu óre.

Ëi que aiyede, úre òi cāoriburu yóboi, ò apevu Filisteocavu dimeáre ðavaicōjenejaquemavu. Dimeáque Sansóre buorejaquemavu ò. Ére buorĩ buojarĩ, yópe arĩ codoboborejaquemavu:

—Filisteocavu mure jēnadaivubu, arĩ codoboborejaquemavu ò úre.

Na jāveneca úre jēnadaivu barĩdurejaquemavu. Ubenita úcapūravu cūiná dimeáre burare ðarejaquemavu.

No yóboi, bedióva cojedeca úre jēniari járejaquemavu ò:

—Yure meyuyavu mu. Jāve coyujacu yure. ¿Aipe teyu paracu bajurũ mu? ¿Aipe teni mure vainĩ tujebarica apecu? arĩ jēniari járejaquemavu úre.

Òi que aiyede jápiayu, yópe arĩ meyuyarejaquemavu óre cojedeca:

—Cuitótemea uramea mamameaque yure ne buoru, ye parubecu ubeni cucupe bájebu yu, arĩ meyuyarejaquemavu óre.

Ëi que aiyede, úre òi cāoriburu yóboi, ò apevu Filisteocavu dimeáre ðavaicōjenejaquemavu. Dimeáque Sansóre buorejaquemavu ò. Ére buorĩ buojarĩ, yópe arĩ codoboborejaquemavu:

—Filisteocavu mure jēnadaivubu, arĩ codoboborejaquemavu ò úre.

Na jāveneca úre jēnadaivu barĩdurejaquemavu. Ubenita úcapūravu cūiná dimeáre burare ðarejaquemavu. Que teni Filisteocavu òi cūrami curivavacari, úre jēmenejaquemavu.

No yóboi, bedióva cojedeca úre jēniari járejaquemavu ò:

—¿Aipe teyu paracu bajuũ mu? ¿Aipe teni mure vainĩ tujebarica apecu? arĩ jēniari járejaquemavu úre.

Òi que aiyede jápiayu, yópe arĩ meyuyarejaquemavu óre cojedeca:

—Ji podaque siete paiyede ne pēoru ne javiíoique, ye parubecu ubeni cucupe bájebu yu, arĩ meyuyarejaquemavu óre.

Ëi que aiyede, úre òi cāoriburu yóboi, nópe ùi coyuiye báquepedeca ðarejaquemavu ò ùi podare. Pēori buojarĩ, yópe arĩ codoboborejaquemavu:

—Filisteocavu mure jēnadaivubu, arĩ codoboborejaquemavu ò úre.

Ubenita bedióva cojedeca meyuyayu bácu, paracu coedarejaquemavu. Que baru ina Filisteocavu, òi cūrami curivu, úre jēni majibedejaquemavu.

No yóboi, bedióva cojedeca meyuyarejaquemavu óre. Nópe ùi meyuyaiyede, bedióva jēniari járejaquemavu cojedeca.

—Yure jecucu baru, meyuyabejebu mu. ¿Aipe teyu parucu bajurū mu? arī jēniari járejaquemavu úre.


Cainumua úre òi cārijovaiyede jápiayu, ù ueturī óre jáve coyurejaquemavu:

—Ji pōteiyede Jūmenijicu yure beoquemavu. Û jicu bacuyá, yure beoquemavu. Que baru ji podare yuvaicōjemevu. Yure ji podare mi yuvarī vūveni jebedu, ye parubecu ubeni cu-
cupe bájebu yu, arejaquemavu óre.

Ûi que aiyede jápiado ò, Filisteocavure cuturī nurejaque-
mavu. Que teni, Sansóre cāorejaquemavu. Ûi cāiyede jádo, cūinācu ūmure ùi podare yuvarī vūveni jebeicōjenejaquemavu. Úre yuvarī vūveni jebeiye-
de jádo, bedióva cojedeca ò Sansóre arī codoboborejaquemavu:

—Filisteocavu mure jēnadaivubu, arī codoboborejaquemavu ò úre.

Òi que aiyede jápiayu, coedayu majibedeca Jūmenijicu úre ùi dajocai-
yede, ādamatenidurejaquemavu ina Filisteocavūque. Ubenita Jūmenijicu ùi
cube boje úque, parubedejaquemavu. Que baru úre jēni buorejaquemavu.
Que teni ùi yacoruare jōmeni



jaetovarī, tāumeaque buorejaquemavu ūre. Buorī buojarī, ne joborōcaīmaro Gaza āmicurīīmaroi memeicōjenejaquemavu ūre yópe ne oteiāimarape ne oteiyabeare cūoinoi.

Que teni ūi noi cuede, ūi poda pīarī, bucarī búrejaquemavu. No yóboi, ūi poda ūmujue nuiyede, paracu nuñure majibedejaquemavu Filisteocavu. Que teni cūinájāravui, “Jūmenijicube” ne arī coyumu ne pēpeimure, Dagón āmicucure, mearore jínajivu, torojuve teijāravure darejaquemavu. Obedivu Filisteocavu aru caivu ne jabova máre cójijidejaquemavu cūinádami cūrami uradāmi. Nópe ne cójijiyede, Sansóre cuturī davaicōjenejaquemavu, ūre, yacocubecure, ne yajurājiyepe aivu. Ne davaiyede ūre, yópe arejaquemavu Sansón.

—Bucuporaediveare jēni jáiyuvu yu. Die bucupora yebai yure núvajacu, arejaquemavu bojuyore, ūre jabuboyure.

Ūi que aiyede jápiayu, ūi aiye báquepedeca darejaquemavu ñai bojayo. Die bucupora puenoi diñami mearo tubarejaquemavu. Que baru Jūmenijicure yópe arī jēniarejaquemavu Sansón:

—Yure parure dajacu. Yure cadatejacu ina Filisteocavure ji ñájine daquiyepe ayu, jēniarejaquemavu.

Que arī buojarī, cūinápuruque cūiná bucuporaedivede jēni, aepuruque aepūravucaedivede jēnejaquemavu. Nópe jēñu, die bucuporaediveare japuporī, diñamine ture darejaquemavu. Diñami tuiyede, caivu ina diñami curivure chītori jebedejaquemavu. Sansón mácu máre yaidéjaquemavu. Nópe yaiyú bácuva-cari, obedivu Filisteocavure yaidé darejaquemavu, apucu bácu ūi boarī jaruvaiye báque pueno. No yóboi, ū jivu ū mácu bajú bácarōre ĩni, jaruvarejaquemavu cūracobei.

Rut āmicuco Jūmenijicure ōi ju aino mácarō

Rut 1-4

(Mateo 1.5, Lucas 3.32)

Israecavure Jūmenijicui beoimarare “Yópe daiye jauvu” aipōevare ūi epeiyede, āvué nurejaquemavu ne curijoborōre. Dinumure cūinácu ūmu, Elimelec āmicucu, Judá āmicuriyaju-bocacu, āiye cube boje ūi curijoborōi, Moab āmicuriyajubocavu

ne joborōi cucunurejaquemavu. Nópe cucunuri, jímarepaco, Noemí āmicucore, aru mamara pucarāre nuvarejaquemavu. Que teni, noi Elimelec bácu yaidéjaquemavu. Ũ mácu yainíburu yóboi, ũ mácu mára purubuorejaquemavu Moab āmicuriyajibocarōmivaque. Jíbusu, Mahlón āmicucu, purubuorejaquemavu Rut āmicucoque. Aru ĩmacu, Quelión āmicucu, purubuorejaquemavu Orfa āmicucoque. Ũbenita juedocuvabevu ina pucarā ũmuva mácavu yaidéjaquemavu.

No yójiboi, Noemí āiye curōre Israel āmicurijoborōi borore jápiarī copaiyurejaquemavu ōi joborōi. Nópe copaiyuco, ōi várōmivare yópe arejaquemavu:

—Copaijarā muja mujevuque. Purubuojarā apevu muje curōcavuque, arejaquemavu Noemí náre.

Nópe ōi aiyede jápiaivu, Orfa copaidejaquemavu. Ũbenita Rucapūravu mautedejaquemavu ōi vácoque. Őre yópe arejaquemavu Rut:

—Máque cucodomu yu. Mure cadatecodomu. Mívu jívape bajarári. Aru Jūmenijicure, mi mearore jímure, mearore jícodomu yu, arejaquemavu.

Nópe arī buojarī, Noemí Rumaque copaidejaquemavu ōi pōeteiīmaro mácarōi, Belén āmicuriīmaroi. Ũbenita noi oteiye cuvabedejaquemavu. Ne noi eaiyede, nócavu cebada āmicue oteiye jēni buivu barejaquémavu. Que teni Rut yópe arī jēnia-rejaquemavu ōi vácore:

—Yópe Israecavu cuve cuvabevu ne cōmajiye daiyepu, daicō-jejaco yure. Oteiye curōi nuicōjejaco yure, ji ĩcojiyepu oteiye, memepōeva ne burabede, arejaquemavu.

Ői aiyede jápiado, nuicōjenejaquemavu. Nópe nuño, Booz āmicucu, cuve cuvacu, ũi oteiye curōi earejaquemavu. Boocapūravu jímarepacu bácu jicu barejaquémavu. Ũi jáiyede ōre memedore aru ũi coreóvaiyede ōre Mahlón mácu márepacore, cōmaje āroje járejaquemavu. Aru yópe arejaquemavu ōre:

—Meavu yure mi memeiye yui, arejaquemavu.

Ũi que aiyede jápiado, yópe arejaquemavu:

—Yúbu apenocaco. ¿Aipe teni mearo dayurū mu yure? arejaquemavu.

Ői que aiyede jápiayu, ju arejaquemavu:



—Mure mearo dayubu yu, mi mearo daiye boje mivacore. Aru Jūmenijicu mearo dacuyume mure, mi ju aiye boje ũre, ju arejaquemavu.

Nópe arīburu yóboi, āiye jídejaquemavu ōre. Aru ũre memecaipōevare oteiyede ne jējuroede tavarī najuáicōjenejaquemavu, ōi īcojiyepes ayu. Que teni ure oteiyede īni nuvarejaquemavu Noemí cūrami. Ape oteiyede īni nuvari oabedejaquemavu.

Rut ōi vácore ōi coyuiyede ōi memeyede Booz ũi oteiyecurōi, torojurejaquemavu Noemí. Ōi coyuiyede jápiado, ōre memecōjenejaquemavu nore caijāravua. Nópe ado, Booz Rumaque ne purubuiyede urejaquemavu. Nópe uco, Israecavu ne cōmajiye daiye boje yópe Moisés bácu daicōjeiye báquepedeca: “Cūinácu juedocuvabecu ũ mácu yainīburu, īmacucapūravu ũ mácu márepacore purubuiyede jauvu, juedocuvacuyū”, toivarī epedejaquemavu Moisés bácu. Que baru Noemí ōi vácore Booz yebai nuicōjenejaquemavu, ne coyurājiyepes ado aipe ne darājiyede.

Rut ōi eaiyede ũi yebai, yópe arejaquemavu Booz ōre:

—Mure cadateiyuvu yu. Múque purubuiyuvu yu. Ūbenita apesu ji pueno múque purubuiicōjeimu cubi. Ūque meadacuyumu yu maje purubuorājiyepes jipocai, arejaquemavu.

Nópe arī buojari, cuarenta paikilos cebada āmicue oteiyede jídejaquemavu óre, ōi jícojiyepe ayu Noemíne. No yóboi, dijā-ravu baji diīmaro biaido jedevacobe yebai nurejaquemavu, ne cōmajie daiyepe coyuiyarivu baru apecuque. Noi ñai apecure coyucunurejaquemavu Booz. Apecu ūi vaiyede, yópe arejaquemavu Booz ūre:

—Pacomá, majecu Mahlón mácuí márepaco daquemavu yui ōi vácoque. ¿Ū mácuí joborōre bojedaiyucurū mu? ¿Aru óque purubuoiyucurū? arejaquemavu.

Nópe ūi aiyede jápiayu, yópe arī ju arejaquemavu:

—No joborōre bojedaiyucubu yu. Ūbenita óque purubuoiyubevu yu, arejaquemavu.

Nópe ūi aiyede jápiayu, Boocapūravu yópe arejaquemavu:

—Óque mi purubuoiyube boje, yúvacari óque purubuoquijivu aru no joborōre bojedaquijivu, arejaquemavu.

Ne purubuoīburu yóboi, juedocuvarejaquemavu na. Némacure Obed āmidorejaquemavu. Ūbenita Mahlón mácuí mácupe barejaquémavu, yópe Moisés bácuí daicōjeiye báquepedeca. Noemí ōi pāramecu ūi pōteiyede pare torojurejaquemavu, Ōvacari ūre bucúovarejaquemavu. Caivu Belécavu nomiva máre torojurejaquemavu, Jūmenijicu ūi jíye boje juedocure Noemíne, ōi bucuteiyede óre cadatecyure. Obed bucurī, purubuoī juedocuvarejaquemavu. Mamacure Isaí āmidorejaquemavu. Aru Isaí bucurī, purubuoī juedocuvarejaquemavu. Israecavure jabotecuyu barejaquémavu Isaí mácu bacuyú, David.

Jūmenijicu ūi beoino mácarō Samuede ū jiede coyucaipōecu bacuyúre 1 Samuel 1-3

(Lucas 1.46-55, Hechos 13.20, Hebreos 11.32-38)

Dinumure cūinácu Israecacu, Elcana āmicucu, curejaquemavu. Leví āmicuriyajubocacu barejaquémavu. Efraín āmicurijoborōi curejaquemavu ū. Pucarōmiva nomicucu barejaquémavu. Cūináco jímarepaco ye juedocuvabeco barejaquémavu. Ana āmicuco barejaquémavu. Apeco jímarepaco, Penina āmicuco, juedocuvacocapūravu ōi tebucore juedocuvabecore jári

yuriyo barejaquemavu. Nópe juedocuvabecore ôi yuriyede jápiado, pare chïorejaquemavu Ana. Ujuá coapa Elcana jímarebucuvare aru mamarare Silo ámicurôi nuvarejaquemavu. Noi Jūmenijicui cūrami, áimara cajeáque ne daiñami, curejaquemavu. Que teni noi eaivu, áimarare boarí, juarí, jámuóri, Jūmenijicure jídejaquemavu. Cūináju noi cūco, Ana Jūmenijicui cūrami jedevacobe yebai eado, ôi juedocuvacojinore Jūmenijicure jēniarejaquemavu:

—Yure mi juedocuvare daru, jímacu bacuyú mícu bacuyúme. Nazareo ámicuriyajubocacu “Jícu bacuyúme” mi aye báquepedeca, yu juedocuvaco baru, jímacu bacuyúre mure epecojivu, arejaquemavu ô Jūmenijicure.

Apejāravu Elcana, jímarebucuva aru ũi máraque ne cūrami copainurejaquemavu. Majióvarō noita ne eariburu yóboi, Ana micatedejaquemavu. Que teni juedoearí buojarí, mamacure cuvarejaquemavu. Nijicure Samuel ámidorejaquemavu.



No yóboi Samuel ũi nuri dajocarĩburu yóboi, jĩpacocapũ-ravu nijicure Jũmenijicui cũrami nuvarejaquemavu. Dinumu Elĩ ģmicucu sacerdotevare jaboteipõecu barejaquẽmavu. Diĩami eado, Elĩ yebai nuri, ũre epedejaquemavu mamacure. Que teni ócapũravu mamajicure ũre jíyo, yópe arejaquemavu:

—Ijĩcu jĩmajicube. Jũmenijicure ji jẽniaiyede, ijĩcure põetede ãaquemavu. Que baru ijĩcu Jũmenijicu jicu bacuyábe, arejaquemavu ò Elĩde.

Que arĩ buojarĩ, Jũmenijicure yópe arĩ coyurejaquemavu:

—Yure mu jueducuvare ãayu, mearo ãávũ yure. Que baru “Meavũ” aivu mure, arejaquemavu ò Jũmenijicure.

Nópe arĩburu yóboi, jĩmarepacu, Elcana, ũi márebucu-vaque aru apevu ũi máraque ne cũramita copainurejaquemavu. Samuel cũinácuva numenejaquemavu. Nijicu Elĩque mautedejaquemavu Jũmenijicui cũrami. Que teni ujuá coapa jĩmarepacuque Jũmenijicui cũrami copaini eado ò, Ana, Samuede cuitótecajeare nuvarejaquemavu.

Elĩcapũravu pucarã jueducuvarejaquemavu. Ũi mára ũmu jueдова barejaquẽmavu. Ofni aru Finees ģmicurejaquemavu. Nácapũravu Jũmenijicure ju abedejaquemavu. Āimarare Jũmenijicure mearore jĩpõeva ne mearore jĩnajimarare, ne boaiyede jáivu, nácapũravu cũiná ne jiaruare ĩnejaquemavu. Aru nomiva, Jũmenijicui cũramine coreĩnomivaque ģmeno ãarejaquemavu. Ne nópe ģmeno ãaiyede jáĩũ, népacu Elĩ náre jararĩdurejaquemavu. Ũbenita nácapũravu ye jápia-bedejaquemavu. Samuecapũravu ne ãaiyepe ãabedejaquemavu. Ũ Jũmenijicure me ju arejaquemavu.

Cũinájáravu Jũmenijicu jiede coyucaipõecu Elĩ yebai edarĩ, ũre coyurejaquemavu. Yópe arĩ coyurejaquemavu:

—Mĩmara Jũmenijicure ne ju abedeca jáĩũvacari, náre mearo coyubevu mu. Nópe mi coyube boje, mĩmara cũinájáravu yainájarama. Ne nópe yaiyede jáĩũ, mure ji aiye báquede jáveneca majicuyumu mu, arejaquemavu ñai Jũmenijicu jiede coyucaipõecu Elĩde.

No yóboi, Elĩ bucucu baju ũi cuede, cũináĩami Samuecapũravu Jũmenijicui cũrami ũi cãiyede, apecu ũre ũi órejaiyede jápiarejaquemavu. “Elĩbe yure órejayu”, arĩ ãapiarĩdurejaque-

mavu Samuel. Nópe arī dápíayu, Elí yebai cúyarī nuri earejaquemavu.

—Yui cavu, arejaquemavu Elíde.

Ëi que aiyede jápiayu, Elícapūravu yópe arejaquemavu úre:

—Mure órejabetevu, arejaquemavu úre.

Ëi que aiyede jápiayu, Samuecapūravu cācunurejaquemavu cojedeca. Nópe cāñu, bedióva úre órejaiyede jápiarejaquemavu. Nópe jápiayu, Elí yebai ñi eaiyede, yópe arejaquemavu:

—Yui cavu, arejaquemavu úre.

Que teni bedióva úre cācunucōjenejaquemavu Elí. Ëi cācunuiyede, nopedeca órejaiyede jápiarejaquemavu. Yóbecue úre ñi órejarīburu yóboi, majidejaquemavu Elí. “Jūmenijicubebu ñaine órejayu”, arī dápíarejaquemavu. Que baru yópe arejaquemavu Samuede:

—Bedióva corecunujacu, ñi órejaiyede jápiacuyu. Jūmenijicu mure ñi órejaiyede jápiayu, yópe arī ju ajacu úre: “Ji jabocu, coyujacu yure. Mure jápiayubu”, arī ju ajacu úre, arī coyurejaquemavu Elí Samuede.

Ëi que aiyede jápiayu, ñi aye báquepedeca bedióva ñi parainoi nuri coredejaquemavu, Jūmenijicu ñi órejaiyede jápiacuyu. Ëi nópe coreiyede, Jūmenijicu úre órejarejaquemavu cojedeca. Nópe ñi órejaiyede, Elí ñi aye báquepedeca ju arejaquemavu Samuel. Nópe ñi ju aiyede jápiayu, yópe arejaquemavu Jūmenijicu Samuede:

—Elí ñi mára ne āmeno daiyedeca, náre ye dajocare dabetebi. Nópe ñi dabe boje, úre aru ñi cūramicavure máre ñājine dacuyumu. Ne āmeno daiyede ye ārumetebecubu, arejaquemavu Jūmenijicu úre.

Nópe arīburu yóboi, mie tuiyede Samuede Jūmenijicu ñi coyuiyede Elíde coyuiyubedejaquemavu. Nópe ñi coyuiyubedeca, Elícapūravu úre coyucōjenejaquemavu. Nópe ñi coyucōjeiyede, Samuel úre coyurī jebedejaquemavu. Nópe ñi arī coyuiyede, Elí yópe arejaquemavu Samuede:

—Jūmenijicu ñi daiyurōpedeca dajacurī, arejaquemavu Elí.

Que teni Samuel ñi bojuyo teiyede, Jūmenijicu jiede coyuyu barejaquénavu. Ëi nópe arī coyuiye báquepedeca nurejaquemavu. Ë jiede coyucaipōecure epedejaquemavu

Jūmenijicu Samuede. Aru caivu Israecavu ũi nópe epeiyede majidejaquemavu.

Filisteo āmicuriyajubocavu Israecavure ne boarí vainí tuino mácarō

1 Samuel 4-7

(Hechos 13.20, Hebreos 11.32-38, Apocalipsis 11.6)

No yóboi, Filisteo āmicuriyajubocavu ne churaravare cójijovaicōjeni, Israecavure boarānurajivu barejaquémavu. Nópe ne cójijovaiyede jáivu, Israecavu máre ne churaravare cójijovarejaquemavu na máre. Cójijini buojarí, Filisteocavure boarānurejaquemavu. Nópe ne boaiyede, ne boarí buijāravui, Filisteocavu náre vainí turejaquemavu. Nópe ne vainí taiyede jáivu, yópe arejaquemavu Israecavu ne baju:

—¿Aipe paino cari jāravure Jūmenijicu majare nópe tede daidi? Jūmenijicui cūrami curitōcure, ũ majeñecuva máca-vuque “Yópe đarājare” ne aiye báquede maje āruritōcure, ĩna-nurajarevu. Yópe boaivu, ditōcure nuvarajarevu. Maje nópe đaru, ditōcuque majare jári coenínivure boarí vainí tujebu maja, arí cójijini borotedejaquemavu Israecavu ne baju.

Que arí buojarí, Silo āmicurō Jūmenijicu jitōcu curiīmarore jocarí apevu Israecavure ditōcure ĩni nuvaicōjenejaquemavu. Ditōcure nuvaivu, Israecavu churarava yebai eavarejaquemavu. Elí mára pucarā ditōcuque nuvarejaquemavu. Na sacer-doteva barīdurejaquemavu. Que teni ditōcure ina churarava yebai ne epeniburu yóboi, Filisteocavu churarava bedióva coje-deca boarānurejaquemavu. Nópe boaivu, Israecavure āmeno baju đarejaquemavu. Treinta mil paivu baju Israecavu churara-vare boarí jaruvarejaquemavu na. Ina pucarā Elí mārare máre boarí jaruvarejaquemavu na. Dijāravumareca Elí mára pucarā mácavure boarí jaruvarejaquemavu, yópe Jūmenijicu jiede coyucaipōecu ũi coyuiye báquepedeca. Boarí buojarí, Jūmeni-jicu jitōcure ĩni tatorejaquemavu ina Filisteocavu churarava. Nópe mamara mácavure ne boarí jaruvaiyede jápiayu, Elí dobacu bácu turí, ñamemu tōarí nuri, yaidējaquemavu. Ũi yai-

quíye jipocai, cuarenta paiujua Israecavure cōjeni beocuyu barejaquemavu.

Que teni Filisteocavu Jūmenijicu jitōcure, ne tatoitōcure, cavarīdurejaquemavu. Ubenita na āmeno ijíe teni búrejaquemavu. Nópe ijíe teivu, ditōcure cavarī majibedejaquemavu. Que baru ditōcure jāturuicū puenoi tuorī, pucarā oteivecuvare dicū jāturuicūre jabuborī nuicōjenejaquemavu ina oteivecuvare. Ari ne urōi ditōcure nuvaicōjenejaquemavu. Que teni ina oteivecava Israecavu ne īmaroi ditōcure jabuborī eavarejaquemavu. Nópe ne eavaiyede jáivu, Israecavu torojurejaquemavu. Nópe torojurivuvacari Israecavu ditōcure voarī járejaquemavu. Ditōcu ubeni curivare Jūmenijicu voarī jáicōjemenejaquemavu. Jūmenijicure ne ja abe boje, obedivu yaidéjaquemavu. Na mácvui nópe yayiede jáivu, chōioiva diīmarocavu ditōcure Quiriat-jearim āmicuriīmaroita jarorejaquemavu. Que teni veinte paiujua baju diīmaroi curejaquemavu ditōcu.

Elí bácuí yainíburu yóboi, Samuel Israecavure cōjeni beocuyu barejaquemavu. Ramá āmicuriīmaroi curejaquemavu. Ujuá coapa yóbecuriīmaroai nuri, nócavu ne āmeno cuede cadatedejaquemavu. Ubenita Israecavu “Jūmenijinamu” ne arī coyumarare ne pēpeimarare mearore jīni búrejaquemavu. Veinte paiujua yóboi ditōcure ne jacopaiyovaríburu yóboi, Israecavu ne curiīmaroai pēpeimarare ne mearore jýyede dajocarejaquemavu. Jūmenijicure cūinácura mearore jīni búrejaquemavu. Nópe ne āmeno daiyuede dajocaiyede jáñu, Samuel náre Mizpah āmicuriīmaroi nuicōjenejaquemavu. Nópe ūi nuicōjeiyede, na diīmaroi eaivu, ne āmeina teiyede chīori, Jūmenijicure coyurī vaidéjaquemavu. Nópe ne daiyedeca, Filisteocavu náque boarádaiyarejaquemavu cojedeca. Nópe ne boarádaiyuede jápiaivu, Israecavu jidurejaquemavu. Nópe jidarivu, Samuede Jūmenijicure jēniaicōjenejaquemavu. Nópe ne cōjeiyede, Samuel Jūmenijicure náre jēniacarejaquemavu, Israecavure cadateicōjeñu. Nópe ūi jēniaiyede jápiayu, Jūmenijicu náre cadatedejaquemavu. Pare ōpoturejaquemavu. Nópe ōpotuiyede jáivu, Filisteocavu jina churarava jidarivu copainurejaquemavu. Ne nópe teiyede jáivu, Israecavu churarava náre kujurī nuri, obedivu náre boarí jaruvarejaquemavu. Nópe āmeno vaivu, joe Filisteocavu Israecavure boarí dajocarejaquemavu.

Jūmenijicu ũi jabojacoino mácarō Saúl āmicucure Israecavu ne jabocu bacuyúre

1 Samuel 8.1-13.2

(Hechos 13.21)

Samuel bucucu baju nuñu, pucarā mamarare Israecavure cōjeni beorājivure epedejaquemavu. Ubenita nácapūravu népacu cūináturu ũi cōjeiyepe cōjemenejaquemavu Israecavure. Ne cūináturu cōjemene jáivu, Israecavu bucuvu Samuel yebai earī, yópe arejaquemavu:

—Mu bucucu bajubu. Que baru mímara ne daiyede jámevu. Mi cōjeiyepe dabema. Quénora mearo dama ina náre tāuturare jívure aru āmeno dama apevure. Que baru maje pueno jabocu bacuyúre beojacu mu. Nópe beoyu, jabojojajacu úre. Apevu pōeva ne jabocu ne cuvaepedeca ñuja máre jabocu cuvaiyurivu, arejaquemavu na Samuede.

Ne que aiyede jápiayu, Samuel diede cojubedejaquemavu. Que teni Jūmenijicure jēniari járejaquemavu. Nópe ũi jēniari jáiyede jápiayu, Jūmenijicu yópe arī ju arejaquemavu úre:

—Mure ne jabojaicōjeiyeppedeca dajacu mu. Mure jabocure jēniaivu, “Mure ubevu” aivu āmema. Yúcapūravure ne jabocure ji cuede ubema na. Que teni jabocure ne jēniaiyede jápiayu, ju ajacu náre. Nópe ayuvacari, jabocuque ne āmeno vainájinore coyujacu náre, arejaquemavu Jūmenijicu Samuede.

Ũi que aiyede jápiayu, Samuel Israecavure coyucunrejaquemavu:

—Yópe ārojacu muje jabocu cucuyume. Mujare boje ĩcuyume. Que teni ũi memeiyede mujare memeicōjecuyume. Muje jabocu ũi curĩburu yóboi, chīorajaramu muja. Nópe chīoivu, Jūmenijicure jēniarājaramu muja, ũi cadatequiyepe aivu. Muje nópe arī jēniaiyedeca, mujare ju abecube ũ, arī coyurĩdurejaquemavu Samuel Israecavure.

Ũi nópe arī coyurĩduiyedeca, Israecavu úre jabojaicōjenejaquemavu.

—Apevu pōeva ne jabocu ne cuvaepedeca, ñuja máre ñuje jabocu bacuyú cuvaiyuvu, arejaquemavu.

Que teni Jūmenijicu Samuede jabocure beoicōjeñu, “Ñai muje jabocu bacuyúme”, arī coyucudayu barejaquemavu. Yópe arejaquemavu ũre:

—Javena dinumu paiyemica Benjamín āmicuriyajubocacure mi yebai jaroquijivu. Ũre jáñu, ũi jipobui olivo āmicuricu jēidua córoque yuarī tuojacu. Nópe dayu, muja Israecavu pueno jabocu ũi cuquiyede majide dayu bacuyúmu mu. Filisteo āmicuriyajubocavure boarī vainí ture dacuyume ũ Israecavure, arī coyurejaquemavu Jūmenijicu Samuede.

Que teni apejāravui ũi aiye báquedepedeca, cūinácu pōecu earejaquemavu Samuel yebai. Saúl āmicucu barejaquemavu. Jípacu ũi oteiāimarare, burrova bíjaivure, vocueayu barejaqué-mavu. Ũi eaiyede, yópe arejaquemavu Jūmenijicu Samuede:

—Ēnoare ji coyuvamume ñai. Ji pōeva, Israecavu, ne pueno jabocu bacuyúme ũ, arī coyurejaquemavu Jūmenijicu.

Ũi que aiye de jápiayu, Samuel Saúre copurī, yópe arejaque-mavu ũre:

—Mi burrovare apecu earī buojabiya. Que baru náre urarō chīomejacu. Caride yáque ācudajacu. Javenaita mure coyurī jebequijivu, arī coyurejaquemavu Samuel Saúre.

Miadáe tuiyede Samuel Saúre ĩmaro ēcaruita nuvarejaque-mavu. Noita earī, olivocu āmicuricu jēidua córoque ũi jipobu puenoi yuarī tuorejaquemavu. Yuarī tuorī buojarī, Saúre yópe arī coyurejaquemavu:

—Israecavu ne pueno jabocu jabojacoyube Jūmenijicu mure, arī coyurejaquemavu Saúre.

No yóboi Saúl ũi cūramita copaini eayu, Samuel ũi coyuiye báquede ũre ũ jivure coyubedejaquemavu. Burrovare ne eaiye báquede Samuel ũi coyuiye báquede matuiyeda coyurejaque-mavu náre. No yóboi, Mizpah āmicurīĩmaroita nuicōjenejaque-mavu Samuel Israecavure. Noita eaivu, ne davarī yajuiyeque ne jabocu bacuyúre, Saúre earejaquemavu. Ũre earī buojarī, ũre vorānurejaquemavu. Ne epeitōcua jēneboi dupinidurejaque-mavu ũ. Que teni noi ũre earejaquemavu na. “Jabocure yópe ðaiye jauvu” arī, diede toivarī epedejaquemavu cāriáiyocare Samuel. Diede toivarī buojarī, diyocare Jūmenijicui cūrami jívui epedejaquemavu. No yóboi, Israecavure copaicōjeneja-quemavu ne cūramiai. Aru Saúl máre copaidejaquemavu ũi

cūrami. Ẽi cūrami copaiyu, Israecavu churaravacavure nuvare-jaquemavu.

Cūinácu aviá vainíburu yóboi, Amón āmicuriyajubocavu churarava cūináimarocavure boarānurejaquemavu. Diīmarocavu Israecavu barejaqué mavu. Nópe ne boaiyede jápiayu, Saúcapūravu Israecavu churaravare cójijovarī diīmarocavure boarī cadatenanurejaquemavu. Que teni Amócavure boarī vainí turejaquemavu. Aru Jūmenijicu náre cadateyu barejaqué mavu. No yóboi, ina Israecavu caivu Gilgal āmicuriīmaroi eaivu, āimarare boarī, juarī, jāmuóri, mearore jídejaquemavu Jūmenijicure. Nópe mearore jīni buojarī, dinumuita caivu ne jáiyede Saúre jabojacorejaquemavu Samuel. Dijāravui pare torojurejaquemavu na.

Ne noita cuede, Samuecapūravu náre mearo coyurejaquemavu. Jūmenijicu néñecuva mácavure ũi cadateiye báquede, yóbocavure máre ũi cadateiyede ārure darejaquemavu Samuel náre. Nópe ārure dayu náre, ne jabocure máre Jūmenijicu ũi daicōjeiyede mearo daicōjenejaquemavu. Nópe arī coyurī buojarī, yópe arejaquemavu:

—Mujare Jūmenijicure jēniacaquijivu, arī coyurejaquemavu náre Samuel.

Ẽi nópe arī coyurīburu yóboi, ñai jabocu Saúl yóbecurimil paivu baju churaravare áque curājivure beorejaquemavu. Ẽi mácu, Jonatán āmicucu churara barejaqué mavu. Aru ũ máre jípacuque curejaquemavu. Apevu Israecavu noi curivu copainurejaquemavu ne cūramiai.

Saúre Jūmenijicu ũi jaboteicōjemeno mácarō úre ũi ju abe boje

1 Samuel 13.3-15.35

(Hechos 13.21-22)

Filisteo āmicuriyajubocavu ne churaravare obedivu cójijini, Israecavu ne churaravare boarānuivu barejaqué mavu. Israecavu ne jabocu Saúcapūravu ũi churaravaque Gilgal āmicuriīmaroi curejaquemavu. Samuede coreyu barīdurejaquemavu. Āimarare boarī, juarī, jāmuóri, Jūmenijicure jēniaicōjecuyu

Samuede coreyu barejaquemavu. Ëbenita ye járobedejaquemavu ã. Nópe coreni uetuiavu, cūinácu, cūinácu ùi churarava dupini nuivu barejaquemavu. Que teni Saúcapūravu Samuel ùi járobede jáñu, ùi bajuma ãimarare boarí, juarí, jámuóri, Jūmenijicure jēniarejaquemavu. Diepe paiyede sacerdoteva matuiyeda daicōjenejaquemavu Jūmenijicu. Ëi nópe jēniarīburu yóboi, Samuel edarejaquemavu. Nópe edayu, Saúl ùi daiye báquede jápiayu, pare chīoñu yópe arejaquemavu Saúre:


—¿Aipe dayu nópe dacurū mu? arejaquemavu ùre.

Ëi que aiyede, yópe arī Saúl ju arejaquemavu:

—Ji churarava ne nuiyede jáñu, mi edabede jáñu, ye corebetevu. Filisteocavu ñujare boarádaivabu, arejaquemavu Saúl.

Ëi que aiyede jápiayu, Samuel coyurejaquemavu ùre:

—Árumecu teiyepe darebu mu. Jūmenijicure ju abetedebe mu. Mure, mipāramenare máre, Israecavure pueno jabo-jacojebu Jūmenijicu mujare. Ëbenita caride apecure beocuyume ã, mure oatuvacuyure, arī coyurejaquemavu Samuel Saúre.



Nópe arī coyurī buojarī, copaidejaquemavu Samuel. Que teni Saúl Jūmenijicure ju abecuvacari, Filisteocavu ne churara-vaque boarí vainí turejaquemavu ũi churaravaque. No yóboi, Saúl ũi churarava obedivu cuvarejaquemavu. Que teni Israecavure jári coenínivure boarí, obedivure náre vainí turejaquemavu. Nópe ne vainí tuiyede, Filisteocavu Israecavure boará-nuiyubedejaquemavu.

Aru no yóboi, Jūmenijicu ũi cōjeinoque Samuel Saúre yópe arejaquemavu:

—Amalec āmicuriyajubocavure boarānujara. Náre boarí jebejarā. Pōevare aru ne oteiāimarare máre boarí jebejarā, arejaquemavu Samuel Saúre.

Israecavure Egipto āmicurijoborōi curivu bācavure ne etaiyede, Amalec āmicuriyajubocavu obedivu na māvavure boarí jaruvarejaquemavu. Ne nópe daiye boje, náre “Boarí jebejarā” arejaquemavu Samuel Saúre.

Ũi que aiyede jápiayu, Saúl ũ jina churaravaque cójjini Amalecavu churaravare boarānurejaquemavu. Náre boarí vainí turejaquemavu Saújā. Amalecavure boarí jebedejaquemavu. Ũbenita ne jabocu cūinácura boabédejaquemavu. Ũre buorī nuvarejaquemavu. Que teni ne oteiāimara apevu meare rare jáivu, boabédejaquemavu. Āmena matuiyeda boarí jaruvarejaquemavu Israecavu. Saúl ũi cōjeiyepe daivu barejaqué-mavu. Nópe daicōjeñu, Saúl Jūmenijicure ju abedejaquemavu. Nópe ũi ju abede jáñu, yópe arejaquemavu Jūmenijicu Samuede:

—Saúre ji jabojaicoiye báquede chīoñumu yu caride. Yure ju abecube caride, arejaquemavu Jūmenijicu ũre.

Ũi que aiyede jápiayu, Samuel pare chīorejaquemavu. Nópe ũi chīoiye boje, Saúre vocunurejaquemavu. Vocunuñu, Gilgal āmicuriīmaroi earejaquemavu. Ũre ũi copuiyede jáñu, Saúl yópe arī búrejaquemavu:

—Jūmenijicu ũi daicōjeiye báquepedeca dayabu yu, arīdurejaquemavu Saúl Samuede.

Ũi que aiyede jápiayu, yópe arejaquemavu Samuel ũre:

—¿Jūmenijicu ũi daicōjeiye báquepedeca mi daiyedeca, aipe paino obedivu oteiāimara codoboboivu jápurari? arejaquemavu Samuel Saúre.

Ũi que aiyede, Saúl ju arejaquemavu:

—Ne oteiāimara meara matuiyeda boabétevu ñuĵa, Jūmeni-jicare jínajivu. Apevu ne oteiāimarare boarí jaruvavu ñuĵa, arí ju arejaquemavu Saúl.

Ëi que aiyede, Samuecapūravu ũre yópe arí coyurejaquemavu:

—Cari ñamine Jūmenijicu yure yópe abi: “Mamaramure Saúl ji beoimu mariduame. ¿Caride Amalecavure ji boarí jebeicōjeiyedeca, aipe paino náre boarí jebebetecuba? ¿Ne oteiāimarare ji ícōjemeneca, aipe paino ne oteiāimarare ícuba ũ?” abi yure Jūmenijicu, arí coyurejaquemavu Samuel.

Ëi que aiyede, yópe arí ju arejaquemavu Saúl:

—Jūmenijicare ju abecu āmevu yu. Amalecavure boarí vainí tuvuvu. Na caivure boarí jebeni, ne jabocure ĩni edavavu. Que teni ji churarava ne oteiāimarare ĩniduma, Jūmenijicare jínajivu, arí coyurídurejaquemavu Saúl Samuede.

Ëi que aiyede jápiayu, Samuel ũre yópe arejaquemavu:

—Āimarare Jūmenijicare mi jíye pueno ũre mi ju aiyede ubi ũ. Ũre maje ju aríburu, ubeni cuepe āmevu. “Jūmenijinamu” ne arí coyumarare ne pēpeimarare maje mearore jídu, meamevu. Nopedeca Jūmenijicu ũi aye báquepedeca maje dabedu, meamevu majare. Ũre mi nópe ju abede jáñu, Israecavu ne pueno jabocu jaboteicōjememi mure, arí coyurejaquemavu Samuel ũre.

Ëi que aiyede jápiayu, jidurí, Jūmenijicare ũi ju abede pare ārumeteicōjeiyurídurejaquemavu Saúl Samuede. Ëi nópe cōjeiyuríduiyede jápiayu, Samuel yópe arejaquemavu:

—Pōeva ne teiyepe tebebi Jūmenijicu. Ëi aye báquepedeca, mure oatuvacuyure beocuyume. Apecure Israecavu ne jabocu bacuyúre jacocuyume, arí coyurejaquemavu Samuel Saúre.

Ëi que aiyede jápiayu, Amalecavu ne jabocure boarí jarava-rejaquemavu Samuel. Ũre boarí buojarí, copaini nurejaquemavu. Saúl máre copaini nurejaquemavu. Que teni Saúl Israecavu ne pueno jabocu ũi cubequinore majicu pare chñorejaquemavu Samuel.

**Israecavu ne pueno jabocure oatuvacuyure
Jūmenijicu ũi beoino mácarō Davide**
1 Samuel 16.1-13

(Mateo 1.6, Hechos 13.21-22, Hebreos 11.32-38)

No yóboi, Jūmenijicu Samuede yópe arejaquemavu:

—Quénora Saúre ji jabojaetovaquijimure chñori dajocajacu. Chñomejacu mu. Caride apecure yu ji jabojaecoquijimure olivo āmicuricu jēidua córoque ũi jipobu puenoi yuarĩ tuojacu. Belén āmicuriĩmaroi nujacu. Noi cubi Isaí āmicucu mamaraque. Cũinácu nácacure beovu yu ji jabojaecoquijimure, arejaquemavu Jūmenijicu Samuede.

Ũi que aiyede jápiayu, ũi aĩĩmaro mácarōi earejaquemavu Samuel Isaí yebai. Isaícapūravu Israecacu, Judá āmicuriyaju-bocacu barejaqué mavu. Noita eayu, Isaí mácu némamicure jáñu, ũmujucure aru meacure ũi cuede jáñu, “Nainecabe Jūmenijicu ũi umu”, arĩ dāpiarĩdurejaquemavu Samuel. Ũi nópe arĩ dāpiarĩduiyedeca, yópe arejaquemavu Jūmenijicu ũre:

—“Meacu bajube”, arĩ dāpiabejacu. Mi arĩ dāpiaimure jabojaicoiyubevu yu. Pōeva ne jári cojuédeca, jári cojuépe arĩ dāpiabevu yu. Pōevacapūravu apecu ũi bajure jáivu, “Yópe āroja-cube” arĩ dāpiadama. Ũbenita yúcapūravu pōecu ũi dāpiaiyede majivu. Nópe majicu, pōeva ne cue báquede me majicu, me beorĩ majivu, arejaquemavu Jūmenijicu Samuede.

Ũi que arĩ coyurĩburu yóboi, Isaí apevu ũi mārare cuturĩ jarorejaquemavu. Que teni ũi yóboi edayure cojubedejaquemavu Jūmenijicu. Apevure máre cojubedejaquemavu. Ye cūiná-cure Jūmenijicu ũi cojubede jáñu, Samuel Isaíde jēniari járejaquemavu:

—¿Ye apevu mímara cubedi? arĩ jēniari járejaquemavu.

—Apecu cūinácu jaubi, néyocu bajo. Caride ovejavare jári capuyube, arĩ coyurejaquemavu Isaí.

Ũi que aiyede jápiayu, Samuel jípacure cutuicōjenejaquemavu mamacure. Ũi nópe cutuicōjeiyede, néyocure cuturejaquemavu. Ũi nópe cutuicōjeimu, ũi mácu, David āmicucu, edarejaquemavu ũi yebai. Nópe edayure jáñu, Jūmenijicu yópe arejaquemavu Samuede:

—Ñaime ji umu. Ũi jipobu puenoi olivo āmicuricu jēidua córoque yuarī tuojacu, arī coyurejaquemavu Jāmenijicu ũre.

Ũi que aiyede jápiayu, David ũi jipobu puenoi olivo āmicuricu jēidua córoque yuarī tuorejaquemavu Samuel. Jíburā ne jáiyede, néyocure yuarī tuorejaquemavu. Davicapūravu meacu baju barejaquemavu bojuyo. Ũi jipobu puenoi olivo āmicuricu jēidua córoque yuarī tuoriburu yóboi, Jāmenijicu ũi Espíritu ũque curejaquemavu. Nópe yuarī tuorī buojarī, Samuel ũi cūramita copaini nurejaquemavu.



**Arpa āmicurō biabeinoque David ũi biabeni
jǎdovaino mácarō ñai jabocu Saúre**

1 Samuel 16.14-23

Jāmenijicu ñai jabocu Saúre cadateiyubedejaquemavu. Nópe ũi cadatebede, apenumua cūinácu abujucu ũre curejaquemavu. Nópe ñai abujucu ũi cuede majidivu Saúl ũi yebacavu yópe arejaquemavu:

—Abujucu mure ameno dayube. Que baru pōecure voicōjeyacu arpa biabeni majicure. Que teni abujucu mure ũi āmeno ðaiyede biabeni jǎðovacuyume. Nópe ũi biabeni jǎðovaiyede, mure abujucu ðajocacuyume. Que baru meacu mauteacuyumu mu, arejaquemavu ũi yebacavu Saúre.

Ne que aiyede jápiayu, yópe arejaquemavu Saúl náre:

—Biabecuyure vojarā muja. Que teni ũre eaivu, ũre ji yebai davajarā, arejaquemavu náre Saúl.

Ũi que aiyede, cūinácu yebacacu yópe arejaquemavu:

—Me biabeni majicure majivu ya. Isaí mácube ũ. Meacube ũ, arí coyurejaquemavu Saúre.

Ũi que aiyede jápiayu, Saúl Davide, Isaí mácube, cuturĩ jarorejaquemavu ũi yebai. Nópe ũi cuturĩ jaroiyede, ũi aiyebáquepedeca Davicapūravu me biabedejaquemavu ũi arpare. Que baru Saúl Davide urejaquemavu. Que teni no yóboi, ñai jabocure cadateyu barejaquémavu David. Saúl ũi ðoicajeare, boacũñu ũi táucajeare ícayú barejaquémavu David.

**Filisteocacu churara uracure David ũi boarí
jaruvaino mácarō**

1 Samuel 17.1-18.5

(Hebreos 11.32-38)

No yóboi, Israecavu Filisteocavure boaivu curejaquemavu cūracũi. Que teni Filisteocavu ne churarava cūinácu cūracũi curejaquemavu. Aru Israecavu ne churarava apecũ cōchincacũ curejaquemavu. Ne noi cuede, Filisteocacu churara ne curicũi núrejaquemavu, Israecavu ne jári jaroinoi. Yóbecurimetros baju ũmujucu barejaquémavu. Que baru táucajea ũi

doicajea ducuricajeare doyu barejaquémavu. Goliat āmicucu barejaquémavu. Noi núcu, yópe arī codoboborī jarorejaquemavu Israecavure:

—Cūinácu mujacacure darojarā, yáque ūi ādamatequiyepe aivu. Ŋaja pucarā ādamatenajivu. Que teni mujacacu yure ūi vainí turu, jívu, Filisteocavu, muje yebacavu barājárama. Ubenita mujacacure ji vainí turu, mujacapūravu űuje yebacavu barājáramu, arī codoboborī jarorejaquemavu.

Nópe arī codoboboyure jápiaivu, Israecavu churarava jidurejaquemavu. Que baru ye cūinácu nácacu “Filisteocacunque ādamatequijivu” abedejaquemavu.

Dinumure David ūi mamina yóbecurā Saúl ūi churarava, Israecavu jina churaravaque curejaquemavu. David néyocucapūravu jípacu jinare oteiāimarare jári capyu barejaquémavu. Que teni cūinácu aviá bajo Goliat Israecavunque ūi ādamateiyuede codoboborī jaroiyede, Isaí macacure, Davide, churarava yebai jíburāre jáicōjenejaquemavu. “¿Jímara meari?” arī majiyacu, Davide jarorejaquemavu. Davide jíburāre āiyede nuvaicōjeñu, jípacu jarorejaquemavu űre ne yebaita. Nópe ūi jaroiyede, David jíburā yebai earejaquemavu. Noi eayu, Goliat Israecacunque ādamateiyucu, ūi codoboboiyede jápiarejaquemavu. Diede jápiayu, yópe arejaquemavu:

—Āñu Filisteocacu Jūmenijicu jina Israecavure vainí turī majibebi, arejaquemavu ūi yebai núrivure, apevu Israecavure.

Nópe ūi arīburu yóboi, űai jabocu Saúre yópe arejaquemavu:

—Yúcapūravu Filisteocacunque ādamatequijivu, arejaquemavu David Saúre.

Ŭi que aiyede, Saúcapūravu yópe arejaquemavu űre:

—Goliaque ādamateni majibevu mu. Bojuyobu mu. Churabe űcapūravu. Que baru cūinátura tebecubu mu, arejaquemavu Saúl.

Ŭi que aiyedeca, David jidubecu yópe arejaquemavu:

—Jípacu jina ovejavare jári capyu, yaviva náre ne āiyurīburu jáñu, na yavivare boarī jaruvavaivu. Náre ji nópe boarī jaruvaiyede, Jūmenijicu yure cadateáme. Que teni āñu Filisteocacunque ji ādamatedu, yure bedióva cadatecuyume Jūmenijicu, arejaquemavu David.

Ŭi que aiyede jápiayu, Saúcapūravu ju arejaquemavu:

—Jau, űque ādamatecunujacu mu, arejaquemavu.

Ūi cuitótecajea tãucajeare Davide jínidurejaquemavu, âdamatecuyu ũi doquijicajeare. Nópe ũi jýede, David dorĩ jářidu-rejaquemavu. Nópe dorĩ jáñu dicajeare, dorĩ cõmajiyu âme-nejaquemavu. Ūbedejaquemavu. Que teni tãucajea cubecu âdamatecunurejaquemavu. Nópe nuñu, cūrajíboaque ũi duvaima matuiyeda nuvarejaquemavu. Que teni jiajĩyaita ěmeñu, cūinápurupe pajĩboa cūrajíboare me yaridijĩboare ĩni, ũi curubui adarejaquemavu. Dijĩboare ĩni adarĩ buojarĩ, Goliaque âdamatecunurejaquemavu.



Que teni Goliat yebai ũi eaiyede jáñu, Goliacapūravu yuride-
jaquemavu Davide. Nópe ũi yuriyedeca, Davicapūravu yópe
arejaquemavu úre:

—Jūmenijicu bajure mearore jivu ñuja Israecavu. Écapū-
ravu yure cadatecuyume. Cari járavure ñujare ũi cadateiyede
járarama caivu pōeva, arejaquemavu David Goliare.

Ũi que aiyede jápiayu, Goliat ũi yebaita darejaquemavu.
Ũi nópe daiyede jáñu, David máre copu nurejaquemavu. Nópe
nuñu, ũi curubui curijibore ñni jaetovarĩ, ũi duvaimeita adarĩ
dijĩbo cūrajibore jāpuriovari ducarĩ jarorejaquemavu. Nópe ũi
duvarĩ jaroiyede, dibo cūrajibo Goliat ũi tūtava baji jārejaque-
mavu. Que baru ũi mácu yaidéjaquemavu. Nópe yaiyú, dorĩ
jātari nurejaquemavu. Nópe yainĩ jātāñure jáñu, Davicapūravu
ũi yebai cúyarĩ nuri, Goliat bácu ũi boaicarovede ñni jarorĩ, ũi
namemure burarĩ jaruvarejaquemavu. Ũi que daiyede jáivu,
Filisteocavu churarava jidurivu cúyarĩ nurejaquemavu. Ne
nópe cúyaiyede jáivu, Israecavu churarava náre cujurĩ nuri,
obedivu náre boarĩ jaruvarejaquemavu.

Caiye David ũi daiyede jáñu, Saúl ũi jina churarava ne jabo-
cure, Abner āmicucure, Davide cutuicōjenejaquemavu. Nópe ũi
cutuicōjeiyede, Davide davarejaquemavu Abner. Goliat bácu ũi
jipobu bácarōre cuvarejaquemavu cāreja David. Que teni
Saúl Davide ũi yebaita cuicōjenejaquemavu. Aru Saúl yebai
cucu, mamacure, Jonatāre me yóvarejaquemavu David. Nópe
yóvayu, Jonatācapūravu ũi boaicarovede Davide jidejaque-
mavu. No yóboi, Saúl Davide ũi churaravaque jarorejaque-
mavu, apevure boaicōjeñu. Que baru David me torojucure jáñu,
ũ jina churaravacacu epedajaquemavu Saúl úre.

Ñai jabocu Saúl Davique jorojĩñu, úre ũi boarĩ jaruvaiyurĩduino mácarō

1 Samuel 18.6-20.42

Apejāravu obedivu Filisteocavure boacúeāyu Israecavu
yebai copaini edayu barejaquémavu David ũi churaravaque.
Nópe ne edaiyede jáivu, Israecavu nomiva néna churaravare
copurānuivu, uparĩ búrejaquemavu. Davide aru Saúre máre
yópe arĩ uparejaquemavu:



—Saúl obedivu majare jári coenínivure boarí jaruvacube. Ubenita Davicapūravu ũi pueno obedivu majare jári coenínivure boarí jaruvacube, arī uparī tuorejaquemavu.

Ne nópe uparī tuoiyede jápiayu, Saúcapūravu Davique jorojini vaidéjaquemavu. Nópe jorojĩnu, yópe arī dápiarejaquemavu: “Davide ne jabocu jacoiyurivubebu”, arī dápiarejaquemavu. Nópe arī jápiayu, Davide me jári capurejaquemavu, “Yure vainí tuinomu” ayu. Apejāravui abujucu Saúre ũi cārijovaiyede, Davicapūravu ũi arpare biabedejaquemavu ũi jápiainoi. Nópe ũi biabeiye, Saúl bejodore cuvarejaquemavu. Nópe cuvacu, puque Davide boacáyu duvarĩdurejaquemavu. Nópe ũi duvaiyedeca, David veni turejaquemavu. Ũre boabédejaquemavu, Jūmenijicu ũi cadateiye boje Davide. Nópe ũi cadateiyede, majidejaquemavu Saúl. Nópe majicu, Davide jidurejaquemavu. Que teni ũre apevu ũi churarava ne

jabocuva epedejaquemavu. Náre jári coenínivure boaicō-jeni jarorejaquemavu, “David boarí yaijácurĩ” ayu. Davide nópe ũi yaicōjeiyedeca, ye ũre boabédejaquemavu ũi boaiyede. Náre jári coenínivure boarí vainí turejaquemavu ũ ũi churaravaque. Jāmenijicu ũre cadateyu barejaquémavu. Nópe cadateyure majicu, Davide jidurĩ vaidéjaquemavu Saúl. Ũbenita apevu Israecavucapūravu Davide jecurĩ vaidéjaquemavu.

Que teni Davide boaiyucu, Saúl ũre jēnidurejaquemavu. Ũbenita ye oabedejaquemavu. Ũi nópe boaiyucure jáñu, Davicapūravu dupini nuri, Saúl mácure Jonatáre jēniari járejaquemavu:

—¿Aipe painoque mipacu yúque jorojĩni? arĩ jēniari járejaquemavu Jonatáre.

Nópe arĩ ũi jēniari jáiyede, Jonatán majibedejaquemavu. Majibecuvacari, yópe arejaquemavu:

—Jipacu mure ũi boaiyuede jápiayu baru, mure coyucadaquijivu, arejaquemavu Jonatán Davide.

No yóboi, jípacu Saúl Davide ũi boaiyuede japiarejaquemavu Jonatán. Ũcapūravu Davide pare jecurejaquemavu. Que baru jípacu ũre jári coenícure majicu, Davide diede coyucunurejaquemavu. Que teni ũi coyurĩburu yóboi, Davicapūravu dupini nurejaquemavu.

Ñai jabocu Saúl Davide ũi boaiyuede, David ũi dupini nuino mácarō

1 Samuel 21-23


(Mateo 12.3-4, Marcos 2.25-26, Lucas 6.3-4)

David Saúre ũi dupini nuiyede apevu ũi yóvaimaraque, sacerdoteva yebai earejaquemavu. Cūinácu sacerdote Ahimelec āmicucu barejaquémavu. Nópe eayure, ñai sacerdotecapūravu yópe arĩ jēniari járejaquemavu Davide:

—¿Aipe teyu cūinácurũ mu? arĩ jēniari járejaquemavu.

Nópe arĩ ũi jēniari jáiyede, David meyuyayu ju arejaquemavu:

—Ñai jabocu Saúl apevu ne jámene ape paiyede yure daicō-jeñu jarobi yure. ¿Yore páu paiye cubedi? Cūinápurupe paiboa páuboare jíjacu yure, arejaquemavu David Ahimelede.



Ûi que aiyede jápiayu, Ahimelec yópe arī ju arejaquemavu:
—Ûbeni cue páu cubevu. Jūmenijicare ne jíye báquede
matuiyeda cuvū, arejaquemavu Davide.

Die páure sacerdoteva matuiyeda āicōjenejaquemavu Jūme-
nijicu javede. Apevure ũi āicōjemeneca, Ahimelec die páure
Davide jídejaquemavu. Joajīe máque David ũi yóvaimara core-
dejaquemavu ũre. Que teni die páure ne yebai nuvari,
náre jícuyu barejaquémavu David. Die páure ĩni buojarī, yópe
arī jēniari járejaquemavu bedióva cojedeca David Ahimelede:

—¿Boaicarove cubedi? ¿Dive cubedu, bejodocapūravu curi?
Diede cuvacu, jījacu yure, arejaquemavu David Ahimelede.

Nópe arī ũi jēniaiyede, boaicarovede jídejaquemavu. Dive
Goliat bácu jive barejaquémavu. David dive aru die páure
máre nuwarejaquemavu. Nópe nuñu, Gat āmicurīīmaroi, Filis-
teocavu ne ĩmaroi, earejaquemavu. Ûi eaiyede jáivu, nócavu
ũre majidejaquemavu. Nópe majidivure jáñu, David yópe arī
dápiarejaquemavu: “Īmarocacu jabocu yure boaicōjecuyume”,

arī dápīayu. Que baru noi cucu, ārumecu teiyepe meyuyareja-
quemavu nócavure.

Ëi que darīburu yóboi nuri, cūracū curicobe uracobei eayu,
dicobe jívui ñi ũmuvaque curejaquemavu. Dicobe Adulam āmi-
curicobe barejaquéma. Noi ñi cuede jápiarejaquemavu ũ jivu.
Nópe jápiaivu, ñi yebaita nurejaquemavu na máre. Obedivu
Saúl ñi jári coenímara David yebai earī, ũque curejaquemavu.
Que teni Davique curivu cuatrocientos paivu baju ũmuva cure-
jaquemavu. No yóboi, ñi bucuvare Moab āmicuriyajubocavu ne
jabocu yebai epedejaquemavu David. Noi jidurō cubeno cureja-
quemavu na. Náre ñi epeniburu yóboi, Jūmenijicu jiede coyucái-
pōecu, Gad āmicucucapūravu, Davide Judá āmicuriyajubocavu
ne joborōcarō macarōi dupicōjenejaquemavu.

Que teni Saúl Davide pare boaiyucu, ũre vorīdurejaque-
mavu. Ëbenita ye eabedejaquemavu ũre. Que teni ñai sacer-
dote Ahimelec Davide páure, boaicarovede máre ñi jíye
báquede jápiayu, jorojīnejaquemavu. Nópe jorojīñu, Ahime-
lede, apevu sacerdoteva ũque curivure, névure, aru ne oteiāi-
marare máre boarī jaruvaicōjenidurejaquemavu ñi churara-
vare. Ëbenita ñi churaravacapūravu ina sacerdotevare, Jūme-
nijicu ñi epeimara mácavure, ye boarī jaruvaiyubedejaque-
mavu. Que baru cūinácu Edom āmicurijoborōcacu noi cucure,
Doeg āmicucure, náre, sacerdotevajāre, boarī jaruvaicōjeneja-
quemavu Saúl. Nópe ñi cōjeiyede, Doecapūravu náre boarī
jaruvarejaquemavu. Cūinácura sacerdote, Ahimelei mácu,
dupini nurejaquemavu. Ë Abiatar āmicurejaquemavu. Nópe
dupini nuñu, David yebai earī, ũque curejaquemavu. Ëi eai-
yede jáñu, yópe arejaquemavu David ũre:

—Yure boaiyucu, mure máre boaiyubi. Que baru, ñujaque
mautejacu. Yui jidurō cubeno cucuyumu mu, arejaquemavu
Abiatare David.

Que teni Saúl Davide voyuvacari, ye eabedejaquemavu.
Jūmenijicu Davide cadateyu barejaquéma. Que baru Saúre
eare dabedejaquemavu. Davide ñi nópe voyede, Saúi mácu
Jonatán pōeva ne jámene Davide copurī, yópe arejaquemavu:

—Jidubejacu mu. Jipacu mure āmeno darī majibecube.
Yóbore caivu Israecavu ne pueno jabocu bacuyúmu mu. Jipa-
cure oatuvacuyumu mu. Que baru mi cāchinocacu jabocu

bacuyúmu yu. Jipacu diede majibi, arī coyurejaquemavu Jonatán Davide.

Ëi que arī buojaiyede, na pucarā “Mearoque curājare” arejaquemavu. No yóboi, Jonatán ùi cūramita copaini nurejaquemavu. Aru Davicapūravu macarōi ùi dupini curōita nurejaquemavu.

Saúl ùi churaravaque Davide boaiyurī vorīdurejaquemavu. Ëre ne voyede, “Israecavure boarādaivubu Filisteocavu”, arī boro earejaquemavu. Diede jápiayu, Davide vorī dajocarejaquemavu. Nópe dajocayu, Filisteocavure boarānurejaquemavu Saúl ùi churaravaque.

Puque David ñai jabocu Saúre jáñu, ùre ùi boaiyubeno macarō

1 Samuel 24-27

No yóboi, ñai jabocu Saúl Filisteocavunque boarī buojayu, bediόva cojedeca Davide vocunurejaquemavu, ùre boacúyu. David ùi curōre apevu ne coyuiyede jápiayu, yóbecurimil paivu baju churaravaque boacūnurejaquemavu. Noita eaivu, cūracū curicobe uracobe yebai earejaquemavu. Saúcapūravu macajacūñu corī nurejaquemavu. Dicobe pinidui David ùi ũmuvaque dupidejaquemavu. Que teni Saúl ùi corī daiyede jáivu, ùi ũmuva ùre boaicōjenidurejaquemavu. Ubenita Davicapūravu yópe arejaquemavu:

—Ññu Jūmenijicu ùi jabojaçoimume. Ye ùre boabécubu yu, arejaquemavu David ùi ũmuvare.

Nópe ayu, Saúl ùi macajaiye jēneboi, bíjīena nuri, ùi cuitótecaje puenocacaje piniducacajecarōre burarī ñejaquemavu. Yópe ùi burarī íyede, Saúcapūravu ye jámenejaquemavu. Nópe jámecu, dicobede etarī nurejaquemavu. Joajīe máque ùi nuiyede jáñu, Davicapūravu ùre órejarī jarorejaquemavu. Nópe óreyayu, ñuatutarejaquemavu, ùre puedayu. Que darī buojayu, ùi burarī ícaje bácarōre jádovarejaquemavu Saúre.

—Jūmenijicu yure cadatebi caride. Mure boajébu yu. Ubenita Jūmenijicu ùi jabojaçoimure boabécubu yu. ¿Aipe teyu múcapūravu yure boaiyucurū? Jūmenijicupūravu maje yópe ðai-

yede majibi. Que baru ũ mure ñájine dacuyume, arí órejarejaquemavu David Saúre.

Ũi que aiyede jápiayu, yópe arí ju arejaquemavu:

—Quédecabu. Mure ámeno dayu baríduivu. Nópe ámevu. Mure ji ámeno daiyuede, mearo dávũ mácapūravu yure. Yure boaiyucuvacari, boabétevu mu. Nópe mi boabéde jáñu, Jūmeni-jicucapūravu mearo mure dacuyume. Jāveneca Israecavu ne pueno jabocu bacuyúmu mu. Jabocu mi cuede, mearo curāja-rama caivu Israecavu. Que baru iye matuiyeda jēniaivu mure: Yóbo mu pueno jabocu teyu, jívure mearo dajacu mu, arejaquemavu Saúl Davide.

Ũi que aiyede jápiayu, David ũre ju arejaquemavu. Aru ũi ju aiyede jápiayu, Saúl ũi churaravaque copaini nurejaquemavu ne cūramiai. Ũbenita David ũi ũmuvaque cūracūi ũi dupinoita curejaquemavu.

Dinumure Jūmeni-jicu jiede coyucaipōecu Samuel bácu yai-déjaquemavu. Nópe ũ mácu iaiyede jápiaivu, caivu Israecavu chíoivu barejaquémavu.

Aru Davijā ne dupinoita curivu, caipucapuruape paivu ũi ũmuvare Nabal yebai jarorejaquemavu. Nabacapūravu cuve cuvacu barejaquémavu. Que teni David ũre ape paiyede jēniaicōjeñu, ũi ũmuvare jarorejaquemavu. Nabal yebai eaivu, yópe arejaquemavu David ũi jaroimara ũre:

—¿Aru cucurū mu? Mi ovejavare jári coreipōevare ye jícua dabetevu ñuja. Aru ñuje yebai ne cuedeca náre ye ñavametevu ñuja. Que baru cari jāravure ñujare mi jíyurōpe jarojacu ñuje jabocu Davide, arejaquemavu ina David ũi jaroimara.

Ne que aiyede jápiayu, Nabal jarayu náre ye jíbedejaquemavu. Nópe ũi jíyubede jáivu, David ũi jaroimara copaini nurejaquemavu. Copaini earī, Davide coyurejaquemavu. Que baru Nabal ũi jíyubede jápiayu David, ũi ũmuvaque Nabajāre boarānuiyurivu barejaquémavu. Ũbenita David ũi jaroimara ne copainaiye jipocai ũi yebai, cūinácu Nabare memecaipōecu Nabal ũi márepacore yópe arí coyucunurejaquemavu.

—David obebevu ũi ũmuvare mimarepacu yebai jarocube, ape paiyede jēniaicōjeñu. Ũbenita ne jēniaiyede, ũcapūravu náre jarayu jíbetcube. Ñuje ovejavare jári capuiyede, David ũi ũmuva ñujare mearo cadatema. Que baru Nabal náre ũi jaredu, meajebu. Ũbenita caride ũi jaraiye boje, ñájine darājarama

mimarepacure. ¿Aipe ďacodorŭ mu? Diede mearo ďapiajaco mu, arejaquemavu ōre űai memecaipōecu.

Ŭi que aiyede jăpiado, Nabal űi mărepaco, Abigail āmicuco, mearo ďapiarŭ yōpe ďarejaquemavu. Āiyede, jēiduare, űcuiyede măre urarō cōjijovarŭ, ō jina tubamarare, burrovare, tuoicōjenejaquemavu ōi yebacavure, Davijăre nuvacodo. Ne tuorŭ buojaiyede, Davijăre copu nurejaquemavu. Nuri, năre coparŭ, David űi jipocai űuatutarŭ, āiyede, űcuiyede quēda jŭdejaquemavu Davijăre. Nōpe jŭyo, jămarepacuque Davijăre boaicōjemenejaquemavu.

—Mu, ji jabocu, ārumetejacu jămarepacu űi jaraiye băquede mi űmuvare. Caivu yōcavu majidivu űre ārumecure. Caivure nōpe jaravaibi ű. Que baru iye āiyede aru űcuiyede ji jŭyede nuvajara. Aru jămarepacu ārumecure boabėjacu. Ŭre mi boarŭ,



Jūmenijicu mure ñájine ďacuyume. Que baru ũre boabéjacu, arejaquemavu ō Davide.

Ōi que aiyede jápiayu, Davicapūravu “Ōi nópe aye jávenecabu” ayu, ōi jíyede nuwarejaquemavu. Que baru ũre, jímarepacure, boabédejaquemavu.

Obebejáravua yóboi, Nabal bácu yaidéjaquemavu. Ũ mácuí nópe yaiye báquede jápiayu, “Ũre Jūmenijicu ñájine ďayu-bebu”, arī ďápiarī majidejaquemavu David. Que teni Nabal bácuí márepacore borotecunurejaquemavu, ōre nomicucuyu.

Que teni no yóboi, Saúl bedióva Davide boaiyurejaquemavu cojedeca. No jipocai, Davide boaiyubecuvacari, boaiyurejaquemavu cojedeca. Nópe boaiyucu, yóbecurimil paiva baju ũi churavaque Davide cujurejaquemavu. Nópe cujuivu, ne cārajitavare ďarī, cārejaquemavu. Ne nópe cāicorica, David cūinácu ũi yóvaimaracacucque Saújāre ne cāitavare earejaquemavu. Caivu ina Saújāre me cāorejaquemavu Jūmenijicu. Que teni Davijā ũi paraino yebai earejaquemavu. Noita eaivu, David ũi yóvaimu cūiná Saúre boarī jaruvaiyurīdurejaquemavu. Nópe ũi boarī jaruvaiyuedeca, Davicapūravu ũre yópe arī boaicōjemenenajaquemavu:

—Jūmenijicuta Saúre ñájine ďacuyume, arejaquemavu.

Ũi nópe ayu, Saúl ũi bejodore, ũi ũcuibure máre nuwarejaquemavu. Nuri, joajīe máque earī, David Abner āmicucure, Saúl jina churarava ne jabocure, yópe arī codoboborejaquemavu:

—Mu, Abner, ¿aipe teyu mi jabocure, Saúre me jári capubecurū mu? Āmeno ďavu mu, ũre jári capubecu. Ũi yebaita eavu ñuĵa. Que teni apecu ũre boarī jaruvajebu caride. Jájacu. Saúl ũi bejodo aru ũi ũcuibu cubevu, arī codoboborejaquemavu David Abnede.

Nópe ũi arī codoboboiyede, Saúcapūravu David ũi cue báquede ũi yebai majidejaquemavu. Nópe majicu, ũre yópe arī codoboborejaquemavu:

—David, ¿múru? arejaquemavu.

Ũi nópe codoboboiyede, David yópe arī codoboborejaquemavu:

—¿Aipe teyu yure cujuyarū mu? Mure āmeno ďabetevu, arejaquemavu David Saúre.

Ũi que aiyede jápiayu, Saúcapūravu yópe arejaquemavu:

—Quédecabu. Āmeno đavu yu, mure cujuyu. Bedióva mure boarí jaruvaiyubecubu, arejaquemavu Saúl.

Ēi que aiyede jápiayu, David Saúre yópe arejaquemavu:

—Múcacure jarojacu ji yebai. Que teni mi bejodore jacopaiyovaquijivu. Caride mure ji boarí jaruvaiyubenopedeca, apevu yure boarí jaruvabejarāri, arejaquemavu Saúre.

Ēi que arī buojaiyede, Saújā ne cūramia coapa copaini nurejaquemavu. Que teni Davijā máre ū jina yebaita copaini nurejaquemavu.

Que teni Saúl “Mure boarí jaruvabecubu yu” ūi aiyedeca, David ūre jidurī Filisteocavu yebai, Gat āmicuriīmaroi nurejaquemavu, seiscientos paivu baju ūi ūmvaque. Pucarōmiva ūi márebucuvare máre nuwarejaquemavu ū. Diīmaroita curivu, diīmarocacu jabocure yópe arī jēniarejaquemavu:

—Apeno īmaroi epejacu yure, ji cuquijīīmarore, arī jēniarejaquemavu David nócacu jabocure.

Ēi que aiyede, űai jabocu ūre jídejaquemavu Siclag āmicuriīmarore, ūi cuquijīīmarore.

űai jabocu Saúl aru ūi mára apevuque boarí ne yaino mácarō

1 Samuel 28-31, 1 Crónicas 10

(Hechos 13.21-22)

Filisteocavu jabova ne churaravare cójijovarī, Israecavure boarānūrajivu barejaqué mavu. Que teni Filisteocavu ne churava obedivu cójijiyede jáñu, űai jabocu Saúl náre jidurejaquemavu. Nópe jiducu, Jūmenijicare jēniari járidurejaquemavu. Filisteocavure ne vainí turājinore jēniari járidurejaquemavu. Nópe ūi jēniari járiduiyedeca, ye coyubedejaquemavu Jūmenijicu ūre. Vuorūmure máre coyubedejaquemavu. Ū jiede coyucaipōeva máre coyubedejaquemavu. Ūi nópe coyubede jáñu, yaviéde majicure yaivu bācavuque yāvayure vorejaquemavu Saúl, aipe ne tenajinore majicuyu. No jipocai, yaviéde majidivure yaivu bācavuque yávaivure, Israecavu ne curijoborōi carīva bācavure jaetovarejaquemavu Saúl. Nore ne cubedeca, cūinácore yavié majicore earejaquemavu Saúre memecaipōeva.

Endor āmicuriīmarocaco barejaquemavu. Óre ne nópe eaiyede, Saúl òi yebai nucuyu, jícua āroje máque cuitótecajeare dorī, “‘Saúbe’ arī, ne járī majinomu” ayu barejaquemavu. Òi yebai eayu, yaiyú bācure órejaicōjenejaquemavu óre. Òi nópe cōjeiyede, ò yaiyú bācure órejaiyubedejaquemavu, òi órejaiye boje “Yure ñájine ðaicōjeinomu” ado. Nópe òi jiduède jáñu, yópe arejaquemavu Saúl:

—Jūmenijicuque mure jāve ayubu yu. Mi nópe ðaiye boje, ye ñájine ðabecubu mure, arejaquemavu Saúl óre.

Òi que aiyede jápiado, jēniari járejaquemavu ò:

—¿Ácu bācure yure órejaicōjeñuru mu? arejaquemavu ò.

—Samuel bācure órejjaco, arejaquemavu Saúl.

Òi que aiyede jápiado, Samuel bācure órejarī, ũ mácure járī, codoboborejaquemavu. Codoboborī buojarī, Saúre jēniari járejaquemavu:

—¿Aipe painoque yure meyuyacurū mu? Múmu Saúl, arejaquemavu ò.

—Jidubejaco. ¿Yéde jácorū mu? arejaquemavu Saúl.

—Samuel bācure jávu yu, arī ju arejaquemavu ò.

Òi que arīburu yóboi, Samuel bácu Saúre yópe arejaquemavu:

—¿Aipe painoque yure cārijovañuru mu? arī jēniari járejaquemavu Saúre.

Òi que aiyede jápiayu, Saúcapūravu yópe arī ju arejaquemavu ũre:

—Filisteocavu ñujare boarádaivubu. Jūmenijicure ji jēniari jáiyedeca, ñuje aipe tenajinore coyubetebi yure. Que baru mure órejaicōjeivu, ñuje aipe tenajinore majicuyu, arejaquemavu Saúl.

Òi que aiyede, Samuel bácu ũre yópe arī coyurejaquemavu:

—Yure mi jēniari járu, ye baquiyé āmevu. Jūmenijicu mure járī coenícube caride. Amalec āmicuriyajubocavure ũi boarī jebeicōjeiyedeca, ju abetedebu mu. Que baru jipocare mure ji aipe báquepedeca, Jūmenijicu mure Israecavu ne pueno jabocu jaboteicōjemeteame. Javenare Filisteocavu ne churarava mujare vainí turājarama. Que baru mu mímaraque yainájaramu muja, arī coyurejaquemavu Samuel bácu Saúre.

Òi nópe arī coyuiyede jápiayu, jidurī vaidéjaquemavu Saúl.

Ina Filisteocavu churarava Israecavure boarí, vainí tureja-quemavu náre. Obedivu Israecavu jina churaravare boarí jaruvarejaquemavu. Ñai jabocu Saúre ũi mārare máre cujurí nuri, boarí jaruvarejaquemavu. Que teni yaidéjaquemavu ñai jabocu Saúl bácu. Jūmenijicure ũi ju abe báque boje, ñájine dayu barejaquemavu Jūmenijicu ũre.

Ñai jabocu Saúl bácu Davicapūravu ũi oatuvārī jaboteino mácarō

2 Samuel 1-6, 8-10, 1 Crónicas 11-16, 18-20, 26.29-27.34

(Hechos 13.21-22, Hebreos 11.32-38)

Saúl bácu yainíburu yóboi, cūinácu ũmu, Amalec āmicuriyajubocacu, borore nūvarejaquemavu David yebai. Noita eayu, Davide coyurejaquemavu Saúl bácu aru yóbecurā mamara mácavure máre ne boarí jaruvaiye báquede. Ũi nópe coyuiyede jápiayu, David pare chīorejaquemavu. Saúl bácu Israecavu ne pueno jabocu bácu barejaquemavu aru ũi mácu Jonatán mácu David ũi yóvaimu mácu barejaquemavu. Que baru pare chīorejaquemavu David. Nópe chīoñu, Saúl bácu aru Jonatán mácu yuriainore toivarejaquemavu.

No yóboi, Hebrón āmicuriīmaroita copaicōjenejaquemavu Jūmenijicu Davide. Diīmaro Judá āmicuriyajubocavu ne īmaro marejaquemavu. Noita nurejaquemavu David. Ũi eaiyede jáivu, nócavu Judá āmicuriyajubocavu, ũi jipoba pueno olivo āmicuricu jēidua córoque yuarī tuorī, ũre jabojacorejaquemavu. Que teni Judá āmicurijoborōcavu ne pueno jabocu bacuyá barejaquemavu David.

Aru Abner, Israecavu churarava ne jabocu, apurejaquemavu cāreja. Cūinácu Saúl bácu mácu curejaquemavu, Is-boset āmicucu. Que teni Abner Is-bosede apevu Israecavure, once paiyajuboacavure jabojacorīdurejaquemavu. Ũbenita joejīe máque yóboi, Joab, Judácavu churarava ne jabocu, Abner bácu boarí jaruvarejaquemavu. Aru no yóboi, cāchinocavu jabova Is-boset bácu máre boarí jaruvarejaquemavu. Que teni ina Israecavu jabocuvabevu mautedejaquemavu. Névu

Judá āmicuriyajubocavu matuiyeda jabocuvarejaquemavu Davide.

Que teni Israecavu ne jabocu Is-boset bácu ũi yayiede jáivu, Israecavu Hebrón āmicuriĩmaroi David yebai earejaquemavu. Noita eaivu, Davide Israecavu ne pueno jabocu bacuyú jabojacorejaquemavu. Siete paiujua baju apeuju corica baji Judá āmicuriyajubocavure jaboteni buojarejaquemavu David. Dinumu caivu Israecavure pueno jaboteyu treinta y tres paiujua baju jabotecuyu barejaqué mavu.

Nópe jaboteyu, Jerusalén āmicuriĩmaro jabocui curiĩmaro maquinóre epedejaquemavu ũ. Noi ũi cuede, uradāmi cūramine ũi cuquijiñamine daiyucu barejaqué mavu David. Que baru Hiram āmicucu, Tiro āmicuriĩmarocavu ne jabocu, ũre obedicia jocucuar jarorejaquemavu. Cūramine darājivure máre jarorejaquemavu. Que teni Davide uradāmine dacarejaquemavu. Meañami marejaqué mavu diñami. Diñamine ũi daiyede, Jāmenijicu Davide cadateyu barejaqué mavu. Diede majidejaquemavu ũ. Jerusalén āmicuriĩmaroi cucu, bediόva apenomi-vare nomicucu, jue docuvarejaquemavu.

Que teni Israecavure David ũi jaboteiyede jápiaivu, Filisteocavu náre boarānurejaquemavu. Puque náque boaréjaquemavu. Que teni ñai jabocu David ũi churaravaque Filisteocavure boarí vainí turejaquemavu. Jāmenijicu Israecavure cadateyu barejaqué mavu.

No yóboi, ditōcure Jāmenijicu Israecavuque “Yópe darājare” ne aye báquede āruritōcure Jerusaléi davaiyurīdurejaquemavu ñai jabocu David. Nópe davacuyu, ũi churarava treinta mil paivu bajuque Quiriat-jearim āmicuriĩmaroi earejaquemavu. Noi curejaquemavu ditōcu. Ne noita eaiyede, apevu ditōcure jāturuicū pueno tuorejaquemavu. Que teni oteivecua dicūre jabuborī nuvarejaquemavu. Jerusaléi ditōcure nuvaivu barīdurejaquemavu. Nópe nuvaivu, caivu torojurivu yuriaivu barejaqué mavu. Ne que daiyedeca, oteivecua dicūre jabuborī nuivu, turīdurejaquemavu. Nópe ne turīduiyede, ditōcu yebaita tājuroritōcu marīdurejaquemavu. Ditōcu nópe turī nuiyede jáñu, jāturuicūre jēni cujuipōecu, Uza āmicucu, ditōcure jēni mauyarejaquemavu. Ditōcure ũi nópe jēiyede jáñu, cūiná Jāmenijicu ũre boarí jaruvarejaquemavu. Cūiná yainí nurejaquemavu Uza bácu. Ũ mácuí nópe yayiede jáivu, caivu pare chīore-

jaquemavu. Aru David jidurejaquemavu. Que baru ditōcure ũi curiīmaroi, Jerusaléi, nuvaiyubedejaquemavu. Que teni ditōcure joabejīnoi, Gat āmicuriīmaroi, nuvari tuoicōjenejaquemavu apecu pōecui cūrami. Diñamicacure, Obed-edom āmicucure, mearo darejaquemavu Jūmenijicu ditōcu ũi cūrami cuede.

No yóboi, bedióva Jerusalén āmicuriīmaroi ditōcure ĩcunurejaquemavu ñai jabocu David. Jūmenijicu ũi ðaicōjeiyepedeca ditōcure ĩcōjenejaquemavu David. Levita āmicuriyajubocavure ditōcure turī nuvaicōjenejaquemavu. Nópe turī nuvaivu, na caivu torojurivu yuriarejaquemavu. Jerusaléita earī, ditōcure Jūmenijicui cūrami āimara cajeáque ne ðaiñami nuvari tuorejaquemavu. Tuorī buojarī, āimarare boarī, juarī, jāmuóri, Jūme-



nijicure jídejaquemavu. Que teni torojuve teijāravu darejaquemavu. Torojuve teni buojarī, ne cūramiai copaini nurejaquemavu. Que teni ñai jabocu David diñamine, ditōcure máre ina Levitas me jārī coreicōjenejaquemavu. Apevu návacari Gabaón āmicuriīmaroi epedejaquemavu. Apevu sacerdotevare noi epedejaquemavu. Noi Jūmenijicui cūrami āimara cajeáque ne daiñami Moisés bácu ũi daicōjeiñami curejaquemavu. Que teni diñami memenajivure epedejaquemavu David sacerdotevare Levita āmicuriyajubocavure.

Aru obedivure apevu pōevare Davijā boarī vainí turejaquemavu. Que teni Israecavure mearo cūnáturu cōjenejaquemavu David. Aru Saúl bácu ũi aye báquepedeca, mearo daiyurejaquemavu ũi mácuī pāramenare. Apevure jēniari jārejaquemavu:

—¿Saúl bácuī pāramena curi cāreja? arī jēniari jārejaquemavu.

Ũi que jēniari jáiyede, na Jonatán mácuī mácure, Saúl bácare pāramecure coyurejaquemavu. Ũi cuiye majibeca barejaquémavu. Mefi-boset āmicurejaquemavu. Que teni ñai jabocu David ũre cadatedejaquemavu. Ũi cūrami ũre cuicōjenejaquemavu. Que teni Mefi-boset ũi oteiye curōre jārī coreicōjenejaquemavu David apévure.

Jūmenijicu Davide “Mure yópe darī cadatequijivu” ũi arī epeino mácarō 2 Samuel 7, 1 Crónicas 17

(Mateo 1.1, 9.27, 12.23, 22.42, Marcos 10.47-48, 11.9-10, 12.35,
Lucas 1.26-33, 69, 2.4, 11, 3.23-31, 18.38-39, 20.41, Juan 7.42,
Hechos 2.30, 7.46, Romanos 1.3, 2 Timoteo 2.8)

David Israecavu ne pueno jabocu obebeaviava ũi jaboteni bárīburu yóboi, ũi cūramine ne darīburu yóboi, náre jārī coenínivure obedivure ne vainí turīburu yóboi, Natáre cuturī jarorejaquemavu. Natácapūravu Jūmenijicu jiede coyucaipōecu barejaquémavu. Cuturī jarorī buojarī, ũi yebai ũi edaiyede, yópe arejaquemavu David Natáre:

—Caride meadami cūrami cucubu yu. Ji nópe cuedeca, Jūmenijicu jitōcu āimara cajeáque ne daiñami cuvā. Jūmenijicu jiñami maquinóre daicōjeiyuvu, arejaquemavu David.

Ëi que aiyede jápiayu, Natán yópe arī ju arejaquemavu:

—Jūmenijicu mure cadatecuyume. Que baru mi daiyurōpedeca đajacu mu, arejaquemavu ũ Davide.

Ëi que arīburu yóboi, dijāravu ñami Jūmenijicu yópe arejaquemavu Natáre:

—Davide yópe arī coyucunujacu mu: “Mũ ovejavare jári capyu bácuvacari, ji pōeva ne pueno jabocure jacovu mure. Mujare jári coenínivure muje boaiyede cadatevu yu, náre muje vainí turājiyepe ayu. Caride mure aipe ji đaquinore coyūquijivu mure. Apevu pueno meacu jabocu bacuyúmu mu. Mure nópe ārojacure đaquiijivu yu. Que teni caivu pōeva mure majinajarama. Ijborōre muja Israecavure jíquiijivu. Muje joborō maquiyebu. Mipāramena curājivure Israecavu ne pueno jabova cure đaquiijivu. Que teni muje āmeno daiyede jáñu, yópe nébucva némarare ne ñájine daiyepedeca, mujare ñájine đacuyumu. Mi yaiquíyede jáñu, cūinácu mímacu bacuyúre Israecavu ne pueno jabocu jacocuyumu yu. Que baru ũ macuyúre mearo cadatecuyumu, meacu, parucu jabocu ũi cuquiyepe ayu. Êcapūravu ji cūrami maquinóre đacuyume”, arī coyucunujacu Davide, arejaquemavu Jūmenijicu Natáre.

Ëi que arīburu yóboi, apejāravui Jūmenijicu ũi aiye báquepedeca arī coyurī jebedejaquemavu Natán Davide. Ëi que aiyede jápiayu, Jūmenijicui cūramita āimara cajeáque ne daiñami Jūmenijicuque yávacunurejaquemavu David. Yópe arejaquemavu:

—Mu, Jūmenijicu, múque torojurī vaivu yu. Yu jívuque ubeni curivu barīducará ñuja. Ñuje nópe cuedeca, Israecavu ne pueno jabocu yure jacoávũ mu. Múcapūravu diede dávũ. Parucu bajubu mu. Apevu jūmenijina cubema. Mu cūinácurabu Jūmenijicu baju. Ñujacapūravu mína mariburu, ñujare mearo cadateivu mu. Egipto āmicurijoborōi ñuje ñecuva mácavu ne cue báquede na mácavure jaetovarejaquemavu mu. Que teni Canaán āmicurijoborōcavu bácavure jaetovarī, ñuje curājijoborōre jídejaquemavu. Que baru mu yure mi aiye báquepedeca đajacu mu. Que teni apevu pōeva mure parucu mi cuede majinajarama. Mũ ñuje mearore jímure mi cuede majinajarama pōeva, arī yávarejaquemavu David Jūmenijicuque.

**Ñai jabocu David ũi ãmeina teiye báquede
Jūmenijicu ũi ārumeteino mácarō**

2 Samuel 11-20

(Mateo 1.6)

Apenumu ñai jabocu David ũi churarava ne jabocure, Joab āmicucure, Amón āmicuriyajubocavure boaicōjeni jarorejaquemavu. Ubenita Davicapūravu numenejaquemavu. Ũi cūrami puenoi moaino curejaquemavu. Que teni ũ cūrami puenoi cuyu, apedāmia cūramiare jări jōdavarejaquemavu. Cūinádami cūináco nomió cuyadore järejaquemavu David. Ō Bet-sabé āmicuco meaco barejaquému. Nópe pádore jáñu, David óre urejaquemavu. Nópe ucu, jēniari järejaquemavu apecure:

—¿Ácui márepacoba noi cūco? arī jēniari järejaquemavu.

—Urías ũi márepacobe. Joajāque Amócavure boacúnucube, arī coyurejaquemavu apecu.

Ũi que aiyede jápiayu, David óre cuturī jarorejaquemavu. Nópe ũi cuturī jaroiyede, ũi yebaita edarejaquemavu ō. Ōi edaiyede, ũi óque āmeno darejaquemavu. Que teni no yóboi, ō micaco barejaquému. Diede majico, ũre boro jarorejaquemavu. Nópe ōi boro jaroiyede jápiayu, David óque ũi āmeno daiye báquede apevu ne majiède ubedejaquemavu. Que teni yópe darejaquemavu. Ũi churarava ne jabocure, Joare, yópe arī boro jarorejaquemavu:

—Uríare jarojacu ji yebai, arī jarorejaquemavu David.

Ũi nópe arī boro jaroiyede, Joab Uríare darorejaquemavu David yebai Jerusalén āmicuriīmaroita. Que teni Urías ũi edaiyede, David Amócavure ne boaiyede jēniari järejaquemavu. Nópe jēniari jări buojari, ũi cūramita nuicōjenidurejaquemavu. Jímarepacoque ũi cuede urejaquemavu David. Que teni ōi juedocuvaru, “Urías ũi mácube” arī dápiajebu caivu. Nópe ũi cūrami ũre nuicōjeiyedeca, Uríacapūravu ũi cūrami jedevacobe yebai cärejaquemavu. Ũi que daiyede jáñu, David jēniari järejaquemavu ũre:

—¿Aipe teyu mi cūrami cācunumetecurū mu? arī jēniari järejaquemavu Uríare.

—Jūmenijicu jitōcu āimara cajeáque ne daiñami cūvu. Aru Israecavu churarava apevure boaivu, nópe paiñamiai curivabu

caride. Ne āmeno vaicorica, meadamita cāmecubu yu, arī ju arejaquemavu Urías.

Ūi que aiyede jápiayu, apejāravu ñamine Jerusaléi cuicōje-nejaquemavu David Uriare. Que teni diñami ūque āicōjeñu cuturejaquemavu Uriare. Nópe “Ārevu” ayu, David ūre pacotede darejaquemavu. Nópe pacoteyuvacari, Urías ūi cūramita jímarepacoque cubedejaquemavu.

Mie tuiyede Davicapūravu aipe darī majibedejaquemavu. Que teni diede ūi jápiarīburu yóboi, yópe darejaquemavu. Ūi churarava ne jabocure, Joare, boro jarorejaquemavu. Yópe arī, toivarī jarorejaquemavu: “Muja pare boarājivu, Uriare boaicōje-jacu caivu ne jipocai. Noita ūre epeni nujara, majare jári coenínivu ūre ne boarī jaruvārājiyepe ayu”, toivarī jarorejaquemavu David.

Nópe ūi arī toivarī jaroiyepedeca, darejaquemavu Joab. Que teni Urías bácore boarī jaruvarejaquemavu Amócavu churavara. Ūi mácu yainīburu yóboi, jímarepaco, Betsabé, ūi mácore orejaquemavu. Ōi orī dajocarīburu yóboi, David ōre nomicurejaquemavu. Aru no yóboi, juedocuvarejaquemavu ō. Ūi nópe āmeno ðaiyede jáñu, Jūmenijicu jorojīnejaquemavu Davique.

No yóboi, Jūmenijicu jiede coyucaipōdecure, Natáre, Davide coyucōjeni jarorejaquemavu Jūmenijicu. Que teni Natán Davide iye borore coyurejaquemavu:

—Dinumure cūinácu cuve cuvacu cútequemavu. Apecu cuve cuvabecu máre cútequemavu. Ñai cuve cuvacucapūravu obedivu ūi oteiāimarare cuvatequemavu. Ūbenita ñai cuve cuvabecucapūravu cūinájico ovejajīcore cuvatequemavu. Nijicore jecurī vaiquémavu ōre upacu. Cūinájáravu ñai cuve cuvacu ūi cūramita cuyure āiyede tuoiyurīduquemavu. Ūi jina ovejava obedivu cuvacuvacari, āmecu ārojacu náre jecucu cuve cuvabecu jicore tatorī boaquémavu. Boarī buojarī, ūi cūramita cuyure tuorī āicōjequemavu, arī coyurejaquemavu Natán.

Ūi que aiyede jápiayu, David cuve cuvacuque jorojīñu, yópe arejaquemavu:

—Ñai cuve cuvacure boarī jaruvaiye javvu. Que teni ūre ne boarājiye jipocai ñai cuve cuvabecure yóvaicuvaiyu ovejajīnare jiye javvu ūre, arejaquemavu David.

Ūi que aiyede jápiayu, Natán yópe arejaquemavu ūre:

—Murecabu
ñai cuve cuvacu
ũi daiyepe
ãmeno dayu.

Jūmenijicu yare
yópe arī mure
coyūicōjemi. Ũ
mure Israecavu
ne pueno jaboja-
coame. Que baru
mure mearo
dáme. Que teni
obedinomiva
mure nomicure
dáme. Ũi nópe
daiyedeca, Urías
bácui márepa-



core tatorī, ũ mácure boarí jaruvaicōjevu mu. Jūmenijicu ũi
daicōjeiyede ju abetevu mu. Que baru caride mure ñájine
dacuyume. Mu jabocu mi cuede apevuque boarí, cainumua bo-
rânurajaramu muja Israecavu. Que teni mívu ne baju boarája-
rama. Que arī coyūicōjemi Jūmenijicu yare, arejaquemavu
Natán Davide.

Ũi que aiyede jápiayu, yópe arejaquemavu David:

—Quédecabu. ãmeno davu yu. Jūmenijicu ũi daicōjeiyede
ju abetevu yu, arejaquemavu ũ Natáre.

Ũi que aiyede jápiayu, Natán yópe arejaquemavu:

—Mi ãmeno daiyedeca, Jūmenijicu mure yaidé dabecube.
Nópe dabecuvacari, mi ãmeno daiye boje Betsabéde mi juedo-
daimu, mímajicu yaicúyume, arī coyurejaquemavu Natán
Davide.

Ũi nópe arī coyurīburu yóboi, ũi cūrami copaini nurejaque-
mavu. No yóboi, nijicu ijié tedejaquemavu. Ũi ijié teiyede jáñu,
David cūinásamana baju ãri dajocarejaquemavu, Jūmenijicure
mearore jícuyu. Que teni Jūmenijicure mearore jēniaridureja-
quemavu. Ũi jēniaiyedeca, ñai mamajicu yainí nurejaquemavu.

Ñai mamajicu mácui yainíburu yóboi, Israecavu jina chu-
rarava ne boainoita earejaquemavu David. Amócavure

boaivu barejaquemavu. Nópe boaivu, náre vainí turejaquemavu Davijã.

No yóboi, David ùi mácu, Absalón ámicucu, ù bojuyo Israecavu ne jári cojumu marejaquemavu. Que teni cūinácu bae úque apevu Israecavu cuiyurejaquemavu. Ë jípacure jaruvaiyucu, Israecavu ne pueno jabocu teiyurídurejaquemavu. Nópe teiyucu, jípacu jina churaravare boarí vainí turejaquemavu ùi churaravaque. Que teni Absalón jípacure ámeno dayu, Jūmenijicu úre ùi coyuiye báquepedeca que dayu barejaquemavu. David Betsabéque ùi ámeno daiye báque boje, Urías bácura ùi boarí jaruvaiye báque boje máre, ámeno vaidéjaquemavu ñai jabocu David.

Jūmenijicui cūramine ne darājinore David ùi meadarī coreino mácarō

2 Samuel 24, 1 Crónicas 21.1-26.28, 28.1-29.22a

Obediujua David Israecavu ne pueno jabocu ùi cuede, Jūmenijicure ju abedejaquemavu cojedeca. Nópe ùi ju abede jáñu, obedivu Israecavure ijié tede darejaquemavu. Nópe náre ñájine dayu, cūinácu ángele ùi daroimure Jerusalén ámicuriĩmaroi darorejaquemavu Jūmenijicu, diĩmarore ùi jaruvaquiyepe ayu. Ëbenita nópe daroyuvacari, diĩmarore jaruvaicōjemenejaquemavu. Que teni ñai ángele Jebuseo ámicuriyajubocacu, Arauna ámicucu, ùi oteiyede, trigo ámicuede, ùi cūoino yebai núrejaquemavu. Ëi noi núede, úre járejaquemavu David. Ëi jáiyede úre, Jūmenijicure mearore jicaivare Davide daicōjenejaquemavu. Que teni ñai jabocu David dijoborōre, Arauna ùi joborōre, boje daiyurejaquemavu. Ëi nópe bojedaiyuede jáñu, Arauna dijoborōre quéda jíyurídurejaquemavu Davide. Ëi quéda jíyuríduiye-deca, David yópe arejaquemavu úre:

—Nópe ámevu. Bojecubeno mi joborōre imecubu yu. Yore áimarare boarí, juarí, jāmúori, Jūmenijicure mearore jicuyumu. Que baru ye bojecubeno ji íyede Jūmenijicure jibecubu yu, arejaquemavu David úre.

Que arí buojarí, dijoborōre bojedarejaquemavu. Bojedarí buojarí, Jūmenijicure jicaivare darí, áimarare boarí, juarí, jāmúori, Jūmenijicure mearore jídejaquemavu. Ëi nópe mearore

jíyede, Jūmenijicu éne darejaquemavu ina boaimara mácavure toaboque. Nópe éne dayu, ñai ángele apevu Israecavure boarí jaruvaicōjemenejaquemavu. Jūmenijicui cūrami āimara cajeáque ne ñainami Gabaón āmicuriīmaroi curejaquemavu. Ūbenita diīmaro joai curejaquemavu. Que baru joai curīburu, Israecavu ijié teni búrejaquemavu. Diñamita Jūmenijicure jēnarianumenejaquemavu. Que teni nomiá Jerusaléi David diva Jūmenijicure jicaivare darejaquemavu. Divare ñarī buojarī, Jūmenijicure mearore jīni buojarī, yópe arejaquemavu David:

—Yui Jūmenijicure jicaivare ji ñainoi jímacu Jūmenijicui cūrami maquinóre ñacuyume, arejaquemavu David,

Ū que arī buojayu, Jūmenijicui cūramine Davide ūi ñaicōjemeneca, Davicapūravu mamacure cadateiyurejaquemavu. Que teni diñamique baquiyéde cójijovarī búrejaquemavu. Apeno joborōcavu máre Jerusaléi curivure cūraveare meadaicōjenejaquemavu. Diñami maquinóre biequiye barejaqué mavu diveá cūravea. Que teni tāure, hierro aru bronce āmicue tāure, jocucure máre cójijovaicōjenejaquemavu David.

Que teni caivu sacerdotevare aru Levita āmicuriyajubocavure máre cójijovarejaquemavu. Ina Levitacavure memeiya-juboa coapa náre ne memenajiyede epedajaquemavu. Cūináya-jubocavu diñamine oenajivu, diñamine meadarājivu barejaqué mavu. Nácapūravu pōeva Jūmenijicure ne jínajiyabea oteiyabeare corenajivu barejaqué mavu. Apeyajubocavu diñami jedevacobeare jári corenajivu barejaqué mavu. Apeyajubocavu biabenajivu barejaqué mavu, Jūmenijicure mearore jínajivu. Que teni ina sacerdotevare máre cadatedejaquemavu, Jūmenijicu ūi ñaicōjeiye báquepedeca. Aarón mácu obedivu ūi pāramena curipinidu teivu curejaquemavu. Que teni obedivu sacerdoteva barejaqué mavu. Nópe obedivu curivu na Jūmenijicui cūrami ne memeiyyede ñarājivu, oatavarejaquemavu ne baju. Diñamine memenajivure majinajivu ñavarī yajurejaquemavu.

Que teni ñai jabocu David ūi mácu Salomóre cuturī jarorī, yópe arī coyurejaquemavu ūre:

—Bucu, yúcapūravu Jūmenijicui cūrami maquinóre ñaiyurīducacu. Ūbenita obediya-jubocavure boayúre jáñu, Jūmenijicu yure diñamine ñaicōjemeteame. Nópe yure ñaicōjemeca, mure diñamine mi ñaquinore coyurī buojame Jūmenijicu

yure. Que baru múcapūravu Jūmenijicui cūrami maquinóre dacuyumu. Que baru ūi daicōjeiyede mearo dajacu. Caride diñamine mi daquiyede ure cójijovarī buojavu. Ūrure, platare, bronce, hierro, jocucure aru cūraveare cójijovarī buojavu, dieque Jūmenijicui cūrami maquinóre mi daquiyepu ayu, arī coyurejaquemavu David mamacure, Salomóre.

Que arī buojarī, ūi cāchinocavu curivu jabovare cuturī jarorī, náre cójijicōjenejaquemavu David. Náre ūi mácure cadateicōjenejaquemavu Jūmenijicui cūrami maquinóre ūi daquinore. Que teni yópe arejaquemavu náre:

—Jūmenijicui cūrami maquinóre dacuyu barīduvu. Ūbenita obediyaubocavure boayāre jáñu, Jūmenijicu yure diñamine daicōjemeteame. Ūcapūravu Israecavu ne pueno jabojacone yure. Ūbenita jímacure, Salomóre, yure oatavacuyure epecuyume. Nópe epeyu, ūcapūravure ūi cūrami maquinóre dacuyure epecuyume. Aru Salomón ūi pāramena mārājivu ūi daicōjeiyede ne darājiyede jáñu, na máre Israecavure pueno jabotenajarama. Que arī coyúame yure Jūmenijicu. Que baru mu, jímacu, Salomón, Jūmenijicure pare mearore jījacu mu. Ūre mi mearore jīdu, mi aipe daquinore mure majide dacuyume ū. Que teni caivu muja Israecavu Jūmenijicu ūi daicōjeiyede buejarā. Que teni diede ūi daicōjeiyede dajarā. Nópe daivu, ijoborōi Israel āmicurijoborōi cainumua curājaramu muja, arī coyurejaquemavu David náre.

Que arī buojarī, Israecavure cadateicōjenejaquemavu mamacure. Ū Salomón bojuyo barejaquému. Que teni jípacu apavure ūre cadateicōjenejaquemavu Jūmenijicui cūrami maquinóre ne darājiyede. Yópe arejaquemavu:

—Jímacu bojuyobe cāreja. Que baru cadatejarā ūre Jūmenijicui cūrami maquinóre ūi daquiyede. Ure ūrure, platare, bronce, hierro, jocucure aru cūraveare máre cójijovarī buojavu. Apede diñamique baquiyéde jívu yu. Muja máre diñamique baquiyéde jíjarā, arejaquemavu David náre.

Ūi que aiyede jápiaivu, obedivu na máre jídejaquemavu Jūmenijicu ūi cūrami maquinóre ne darājiyede. Nópe ne jíyede jáñu, torojurejaquemavu David. Nópe torojucu, caivu ne jipocai Jūmenijicue yópe arī yávarejaquemavu:

—Mu, ñuje jabocu, Jūmenijicu, mu paracu, meacu bajubu. Caiye ijoborōque míyebu. Que baru ñujare jídebu mu. Que teni

mure ape paiyede jívu, ñujare mi jíye báquedeca jívu mure. Ñuje dápiayede majívu mu. Que baru jáve aivure ñuje curu uvu mu. Caride mure torojueque mi cūrami maquinóquede jívubu ñuja. Salomóre, jímacure, cadatejacu mu, mi cūrami maquinóre ũi ñaquiyepe ayu yópe mi ñaicōjeiye báquepedeca, arī jēniarejaquemavu David Jūmenijicure.

Que arī buojarī, Jūmenijicure torojuicōjeni, ũre “Meavu” aicōjenejaquemavu Israecavure David. Ũi que aicōjeiyede, ñuatutarī, Jūmenijicure “Meavu” arejaquemavu. Que arī, apejāravui obedívu āimarare boarī, juarī, jāmúori, Jūmenijicure mearore jídejaquemavu. Nópe mearore jívu, torojuve teijāravure ñarejaquemavu.

David ũi toivaino mácarō ne yuríayede Jūmenijicure mearore jívu

2 Samuel 22-23, 1 Crónicas 16, Salmos 18, 96, 105.1-15

Ñai jabocu David arpa āmicurōre biabeni me majidejaquemavu. Que teni mearo yuríarī cojurejaquemavu. Ũre yuríayede ũ mearo ārari toivarejaquemavu. Jūmenijicure mearore jícuyu, ũre yuríayede toivarejaquemavu.

Ñai jabocu Saúl bácu ũre ũi boarī jaruvaiyurīduiye báquede, Jūmenijicu Davide cadatedejaquemavu. Que teni Jūmenijicuque torojucu, yópe arī toivarejaquemavu:

—Yure cadateame Jūmenijicu. Caivu ũre mearore jíyeque me yávajarāri. Ámeno vaiyú, ũre cainumua jēniaquijívu, yure cadateicōjeñu. Que baru ũ yure cadatecuyume cainumua. Yure jári coenínívu yure ne boarī jaruvaiyurīburu jáñu, Jūmenijicure jēniavu, yure ne boarī jaruvabenajíyepe ayu. Ji nópe jēniayede jápiayu, yure jári coenínívuque jorojīame Jūmenijicu. Nópe jorojīñu, yure jári coenínívu ne cuedeca, yure me cadateame ũ. Jūmenijicu ũi ñaicōjeiyede yópe ũi aiye báquepedeca ñayubu yu. Que baru yure ne ámeno ñaiyurīduiyede jáñu, diede ñaicōjemeteame Jūmenijicu. Que teni yure cadateame. Que ñayube Jūmenijicu. Mearo ñaivure mearo ñaibi. Ũbenita ámeno ñaivure ámeno ñaibi. Yúcapūravure me cadateame. Majare ũi ñaicōjeiye cūináturabu. Meavu. Ũre mearore jívure cadateibi ũ. Yure jári coenínívu vainí tare ñame yure. Que

baru éque torojurí, “Meavu” acuyumu. Que teni ére mearore jívu yuriaiye de cainumua toivacuyumu ya, arí toivarejaquemavu ñai jabocu David, yuriaiye de toivaya.

Ape yuriaiye de toivarejaquemavu David. Ditöcu Jūmenijicu Israecavuque “Yópe darājare” ne aye báquede ne āruritöcure Jerusaléi ne nuvaiye de, yópe arí yuriarí toivarejaquemavu;

—Jūmenijicu ūi daiye báquede coyurājarevu caivre. Que baru éque torojurivu “Meavu” arājarevu ére. Que baru pueno mearo ūi daicōjeiyede ārurivu Jūmenijicure yuriarājarevu maja. Abraham mácure, Isaac bácare, aru Jacob bácare “Ijboröre mujare jíquijivu” ūi aye báquepedeca majare jídejaquemavu ijoboröre. Jūmenijicu ijoboröre, caiye de cuedarejaquemavu. Diede caivre coyuiye jauvu majare. Apevu pōeva “Jūmenijinamu” ne arí coyumarare ne pēpeimarare mearore jívu, dápiaino cubevu, apubema. Diede máre coyurājarevu apegure. Ijboröre cuedayu bácu ūi cuede jáivu, maja caivu ijoborōcavu ére mearore jínajarevu. Majepacu Jūmenijicure, Jehová āmicucure, mearo yávajarāri caivu. Érecabe maja Israecavu maje mearore jímu, arí toivarejaquemavu David, Jūmenijicure yuriayu.

Ure yuriaiye de toivarejaquemavu. Ūi yaiquíye jipocai yópe arí, toivarí epedejaquemavu;

—Yúbu David. Israecavu ne pueno jabocu Jūmenijicu ūi jabojaocimumu ya. Jūmenijicu jiede yuriaipōecubu ya. Ū jiede yuriaiye de toivayu ūi Espirituque, ūi coyuiyeque die yuriaiye de toivayubu. Pōevare ne pueno jabocu Jūmenijicu ūi daicōjeiyede mearore jívu baru, ūi pōevare mearo dacuyume. Nópe mearo dayu, caivre torojure dacuyume. Ji cūramicavu Jūmenijicure cainumua ju arājarama. Ūbenita ére ju abevu ye baquiyé āmema, arí yuriarí toivarejaquemavu David.

Ñai jabocu David ūi mácu jípacure ūi oatuvarí jaboteino mácarō

1 Reyes 1.1-2.12, 1 Crónicas 29.22b-30

(Mateo 1.6)

Ñai jabocu David ūi bucucu nuiye de jujurí vaidéjaquemavu ére. Que teni ūi yebacavu ére yópe arejaquemavu:

—Nomióre voicōjejacu му. Ñ mure jári capucodome. Que teni múque parado mure toaijiede dacodome, arejaquemavu Davide.

Ûi que aiyede ju arejaquemavu. Ûi ju arĩburu yóboi, ñi yebacavu nomióre earejaquemavu. Abisag āmicuco barejaquémavu. Que teni ñ Davide jári capurejaquemavu.

Que teni ñai jabocu David ñi mácu némamicucapūravu mearo ārojacu barejaquémavu. Nópe ārojacu ñi cuedeca, ñ jue-docu baede jípacu ñre ye “Nópe ñabejacu” abedejaquemavu. Que teni ñi ñaiyurōpe ñarejaquemavu. Adonías āmicucu barejaquémavu. Que teni jípacu bucucu parubecu ñi nuiyede jáñu, ñcapūravu jípacure oatuvārĩ jaboteyurĩdurejaquemavu. Nópe jaboteiyurĩduyu, jípacu David jina churarava ne jabocu Joaque borotedejaquemavu. Aru sacerdote Abiatar āmicucuque borotedejaquemavu. Ne nópe boroteiyede, na máre ñre ne pueno jabo-jacoiyurejaquemavu. Ûbenita apecu sacerdote, Sadoc āmicucu, aru Jāmenijicu jiede coyucaipōecu Natán máre ñi jaboteiyuru ubedejaquemavu. Davide coreivu churarava ne jabocu Benaía āmicucu máre Adoníare ñi jaboteiyuru ubedejaquemavu. David jina churarava máre obedivu Adoníare ñi jaboteiyuru ubedejaquemavu. ñre ne ubedeca, Adonías torojuve teijāravu ñarejaquemavu, jaboteiyucu. Aru ĩmarare cuturejaquemavu. Ûbenita Salomón cūinácura cutubedejaquemavu. Obedivu jabovare máre cuturejaquemavu. Na Judá āmicuriyajubocavu ne jabova barejaquémavu. Jípacu ñi umara matuiyeda cutubedejaquemavu. Natáre máre cutubedejaquemavu.

Nópe ñi jaboteiyuede jápiayu, Natán Salomói paco Betsabé yebai coyucuearejaquemavu. Ñi yebai eayu, Adonías ñi jaboteiyuede coyurejaquemavu ñre. Nópe coyurĩ buojarĩ, yópe arejaquemavu ñre:

—Ñai jabocu Davide coyconujaco. Mímacu Salomón ñi jabo-tequiyede ārure ñajaco Davide. Que baru Adonías ñi jaboteiyuede coyujaco ñre, arĩ coyurejaquemavu Natán Betsabéde.

Ûi que aiyede jápiado, ñi arĩ coyuiye báquepedeca ñai jabocu Davide coyconurejaquemavu. Ñi nópe arĩ coyuiyede, Natán ne yebai earejaquemavu. Nópe eayu, ñre ñi coyuiye báquepedeca coyurejaquemavu Davide. Ne nópe arĩ coyurĩ buojaiyede jápiayu, David ñ jina churarava ne jabocure, Benaíare cuturĩ jarorejaquemavu. Ûi eaiyede jáñu, burrore, ñi tubamure

mamacure, Salomóre ĩni nuvaicōjenejaquemavu. Que teni Salomóre burro puenoi tubaicōjenejaquemavu. Nópe ũi tubaede, Benaíacapūravu ũre jabuborĩ nuvarejaquemavu David ũi daicōjeiye báquepedeca. Que teni ñai sacerdote Sadoc, Natáque olivo āmicuricu jēidua córore Salomójaque nuvarejaquemavu. Nópe nuvaivu, obedivu pōeva ne jārĩ jaroinoi, Salomói jipobu puenoi dicorore yuarĩ tuorejaquemavu Sadoc Natámaque. Nópe yuarĩ taoivu, Salomóre Israecavu ne pueno jabocu jabojaçoivu barejaquémaavu. Nópe ne jabojaçoiyede jáĩvu, caivu diede jáĩvu, yópe arĩ codoboborejaquemavu:

—Ñai jabocu Salomón joe cujacurĩ, arĩ codoboborejaquemavu.

Ne nópe codoboboiyede jápiaivu, Adoníaia ne torojave teiyede āri bubarādjarejaquemavu. Ne nópe jápiaiyede, Abiatar ũi mácu náre coyucuearejaquemavu:

—Maje jabocu bácu David Salomóre jabojaçoicōjemi, arĩ coyurejaquemavu Adoníajare.

Ũi nópe arĩ coyuiyede jápiaivu, na caivu jidurejaquemavu. Nópe jidarivu, ne cūramiai copaini nurejaquemavu. Adoníacapūravu Jūmenijicu cūrami āimara cajeáque ne daiñami cúyarĩ ecorĩ, Jūmenijicure āimarare jácaiva pinidui jēni núrejaquemavu. Apevu ne ñájine daiyuede jidarivu, náre cōmaje āroje jáicōjenajivu, diva jácaiva pinidui jēni núrejaquemavu Israecavu. Nopedeca djarejaquemavu na javede. Nópe jēni núcure jáñu, Salomón yópe arejaquemavu:

—Adonías yópe ũi daiyede jáñu, ye ñájine dabecubu yu ũre. Ũbenita no yóboi, āmeno ũi daiyede ji járu, ñájine dacuyumu ũre, arejaquemavu Salomón.

Que teni Adoníare ũi cūramita nuicōjenejaquemavu Salomón. Ũi que daiyede, ñai jabocu David ũi yaiquínore majicu, ũi mácure, Salomóre, coyurĩ dajocarejaquemavu. Yópe arĩ coyurejaquemavu:

—Quíjino jauvu ji yaiquíno maquinó. Que baru parucu cujacu mu. Jūmenijicu ũi daicōjeiyede djacu mu. Nópe dayu, mearo cuscuyumu mu. Ũi aiye báquepedeca mi daru, Jūmenijicu yure ũi aiye báquepedeca jipāramena mārājivure jabojaço-rājarama, arĩ coyurejaquemavu David Salomóre.

Ũi que arĩburu yóboi, ñai jabocu David bácu yaidéjaquemavu. Cuarenta paiujua baju Israecavu ne pueno jabocu bare-

jaqué mavu. Que teni ñ mácuí yainíburu yóboi, mamacu Salomón ñ mácuíre oatuvayu jabotedejaquemavu.

Salomón ñi jaboteni buino mácarō Israecavure
1 Reyes 3.3-4.34, 2 Crónicas 1

Ñai jabocu Salomóre ne jabojaacoríburu yóboi, caivu ñi cāchino curivu jabova Israecavu jabovare cuturí cójijovarejaquemavu ñ Gabaón āmicurímaroi. Aru noi earejaquemavu Salomón. Diímaroi Jūmenijicui cūrami āimara cajeáque ne ñaiñami curejaquemavu. Noita eayu ñ, mil paivu baju āimare rare boaicōjenejaquemavu, Jūmenijicare mearore jícuyu. Boarí, juarí, jāmuórí buojarí, mearore jídejaquemavu Jūmenijicare. Que ñarí buojarí, ñiñami Jūmenijicu jēniari járejaquemavu Salomóre:

—¿Yéde mure ji cadateiyede ucurū mu? arí jēniari járejaquemavu ũre.

Ũi que arí jēniari jáiyede jápiayu, Salomón yópe arí ju arejaquemavu:

—Obedivu pōeva ne pueno jabojaacoavū mu yure. Bojuyo, ārumecu ji cuede jabojaacoavū mu yure. Que teni yure mearo majide ñajacu. Méne aru āmene máre mearo majide ñajacu yure. Nópe mearo majicu, mi pōevare mearo cójecuyamu, arí ju arejaquemavu Salomón.

Ũi que arí jēniayede jápiayu, torojurejaquemavu Jūmenijicu. Mearo majiyacu ñi cuede jápiayu, torojurejaquemavu. Nópe torojucu, yópe arejaquemavu Salomóre:

—Joe mi apuquinore jēniajebu mu. Ũre cuve cuvaiyacu jēniajebu mu. Mure jári coenínivure yure boarí jaruvaicōjejebu mu. Apevu máre quédeca jēniajebu. Mearo majiyacu, yure ji ñaquinore jēniarebu mu. Mi nópe jēniayede, mi aye báquepedeca ñacuyamu mure caride. Mearo majicu bacuyámu mu. Mi mearo jēniayede jáñu, ape paiyede ũre jícuyamu mure. Apevu pōevare mearore jíde ñaquiivuvu mure. Que teni ji ñaicōjeiye báquepedeca mi ñaiyede jáñu, joe cure ñaquiivuvu mure, arí coyurejaquemavu Jūmenijicu ũre, vaorūmure coyuyu.

No yóboi, pucarōmiva ñai jabocu Salomón yebai coyurāearejaquemavu, ñi meadaquiyepe aivū ne jijateiyede. Ne ñarājiyede

coyuicōjenejaquemavu dinomiva ũre. Na ũre coyuicōjeivu maji-najivu barejaquemavu. Que teni cūináco yópe arī coyurejaquemavu ũre:

—Aru ñuje jabocu, yu icoque cūínádami cūrami cuvu. Que teni cūínájáravu jueđojĩcure eavu. Que teni yóbecurijáravua yóboi, ico máre jueđojĩcure eabico. Que teni ñujaque apevu cubeteima. Ñuja pucarōmivara cútevu diñamine. Que teni cūináñami ico ōi májicure chĩtori yaivácobe. Nópe ũ mácuí yaiede jáđo, ñami coricai ji cáiyede, jímajicure ĩni, ōi májicu bácuapūravure oatuvārĩ tuocobe. Que teni mie tuiyede coedado, yaijĩcu bácuere jáđo, jímajicu ũi ārojамene majitevu yu, arejaquemavu ō Salomóre.

Ōi que arī buojaiyede, apeco yópe arejaquemavu:

—Mu meyuyadobu. Jímajicupūravu apucube. Mímajicu bácuapūravu yaicúbe, arejaquemavu mamacoyurĩ búđo bácore.

Ōi que aiyede jápiado, ico coyurĩ búđo bácuapūravu yópe arejaquemavu:



—Nópe ámevu. Yaiyú bácu mímajicube. Jímajicucapūravu apurijícube, arejaquemavu ò.

Ne nópe arí coyuiyede jápiayu, yópe arejaquemavu ñai jabocu Salomón cūinácu ũi yebacacure:

—Ji boaicarovede davajacu yure, arejaquemavu úre.

Ũi que aiyede, boaicarovede davarejaquemavu. Divede ũi davaiyede jáñu, yópe arejaquemavu Salomón ũi yebacacure:

—Nijicure coriburajacu. Que teni coriburarí buojarí, jíjacu dinomivare. Cūinácore cūinátacarure jini, apecore apetacarure jíjacu, arejaquemavu Salomón.

Nópe ũi buraiyuede jápiado, nijicui pacocapūravu nijicure cōmaje ároje jádo, boarí jaruvaicōjemeco yópe arejaquemavu:

—Mu, ji jabocu, icore jíjacu apurijícure. Nijicure ye boabéjacu, arejaquemavu nijicui paco.

Ōi que aiyede, apecocapūravu yópe arídurejaquemavu:

—Meaquiyebe. Boajácu nijicure. Que teni ñuja pucarōmiva nijicure cuvabenamu, arídurejaquemavu ò.

Ōi que aiyede jápiayu, yópe arejaquemavu Salomón:

—Nijicure boabéjacu. Nijicure cōmaje ároje jádo jípaco cubico. Ócapūravure jíjacu nijicure, arejaquemavu ñai jabocu Salomón ũi yebacacure.

Ũi que aiyede jápiayu, nopedeca darejaquemavu. Ñai jabocu Salomón mearo majicure ũi daiyede caivu Israecavu majidejaquemavu. Nópe majidivu, Jāmenijicu úre mearo ũi majide daiyede majidejaquemavu.


Que teni Salomón Israecavu ne pueno jabocu ũi cuede náre jári coenínivunque boaino cubedejaquemavu. Que teni mearo curejaquemavu na. Apeno joborōcavu Salomóre bojedarejaquemavu ũi boje jēniaiyede. Aru cuve cuvacu, urarō cuvacu barejaquémacu ũ. Caballova obedivure cuvarejaquemavu. Urarō áiyede máre cuvarejaquemavu. Caivu Israecavu mearo curejaquemavu Salomón ne pueno jabocu ũi cuede. Que teni mearo majicu ũi cuede, ure ũi mearo majiéde toivarejaquemavu. Yuriayede máre toivarejaquemavu ũ. Joarōita curivu Salomóque yávarādarejaquemavu. Nópe daivu, ape paiyede davarí úre quéda jídejaquemavu.

Ñai jabocu Salomón Jūmenijicui cūrami maquinóre ũi daicōjeino mácarō

1 Reyes 5-7, 2 Crónicas 2.1-5.1

(Mateo 27.51, Marcos 15.38, Lucas 23.45, Hechos 7.47)

Ñai jabocu David bácu ũi yaiquiye jipocai, Tiro āmicuriĩ-marocacu jabocu Hiram āmicucu barejaquemavu. Que teni Salomócapūravu Israecavu ne pueno jabocu ũi cuede jápiayu, Hiram ũre boro jaroyu meaicōjenejaquemavu ũre. Ũi nópe meaicōjeiyede jápiayu, Salomócapūravu ũre toivarĩ jarorejaquemavu. Nópe toivarĩ jaroyu, Hirājare Israecavure cadateicōjenejaquemavu Jūmenijicui cūrami maquinóre ne darājiyede. Tiro āmicuriĩmaro yebai curicua jocucuaru, cedro āmicuricuaru, coenĩ cadateicōjenejaquemavu Salomón Hirājare. Nópe ũi cōjeiyede, ju arejaquemavu Hiram. Que teni Salomócapūravu memeivure āiyede jarorejaquemavu. Israecavu Tirocavuke memeni, Jūmenijicui cūramique baquiyéde ĩni, cójijovaivu barejaquemavu.



Que teni yóbecuriujua Salomóre ne jabojaacorĩburu yóboi, Jūmenijicui cūramine darĩ búrejaquemavu na. Nópe daivu, ñai jabocu David bácu ũi núvaicōjeiye báquepedeca núvarejaquemavu diñamine daivu. David bácu Jūmenijicure ne āimare jícavare ũi ñaino mácarōi diñamine darejaquemavu. Diñami jívui pucatucubua curejaquemavu. Diñami pinidui caritucubu pueno baju meatucubu sacerdotevare jaboteipōecui Jūmenijicure memecaitucubu curejaquemavu. Apetucubu.

mamaecoitucubui, mumijuede juaiva aru caipucapuruaape paiva ne tuoiva páuboque Jūmenijicure ne jíye curejaquemavu. Aru caipucapuruaape paiyoa pēoiyoa máre curejaquemavu ditucubui. Ūre diñamique úruque ne đarī jēoiye curejaquemavu. Diñami cūraveaque đaiñami marejaquemavu. Jocuveare jēorejaquemavu diñami jívui. Que teni caipucapuruaape paiujua baju Salomóre ne jabojaacorĩburu yóboi, Jūmenijicui cūramine đarī buojarejaquemavu. Que baru siete paiujua baju memenejaquemavu diñamine.

Jūmenijicure ũi cūramine “Míñami maquinómu” ñai jabocu Salomón ũi arī epeino mácarō

1 Reyes 8.1-9.9, 2 Crónicas 5.2-7.22

(Apocalipsis 15.8)

Jūmenijicui cūramine đarī buojarī, obedivu pōevare cójijicō-jenejaquemavu Salomón. Ne nópe cójijiyede, Levita āmicuriyajubocavu ditōcu Jūmenijicu Israecavuque “Yópe đarājare” ne aiye báquede ne āruritōcure diñamita ĩni ecovarejaquemavu. ĩni ecovarī buojarī, obedivu ovejavare, oteivecuvare máre boarī, juarī, jāmuóri, jídejaquemavu, Jūmenijicure mearore jívu. Que teni Jūmenijicuque torojuriva, sacerdoteva Jūmenijicure yuriarejaquemavu. Ne nópe yuriaicoricaí, oopenibo me cojidipenibo diñamita ecorejaquemavu. Jūmenijicu barejaquemavu ecoyu. Que teni pare cojié boje ina sacerdoteva diñami jívui mauteni majibedejaquemavu.

No yóboi, ñai jabocu Salomón yópe arejaquemavu:

—Jūmenijicu meacu bajube. Jerusaléne beorejaquemavu, ũi ĩmaro maquinóre. Aru jipacu David bácore Israecavu ne pueno jabocu jacorejaquemavu. Jipacu bácucaupūravu Jūmenijicui cūrami maquinóre ũi đaiyarĩduiyede, Jūmenijicucapūravu yure, ũi mácore, đaicōjeame. Que teni caride Jūmenijicu ũi aiye báquapedeca yure ũi cūramine buojare đabi. Aru yure jaboja-coame. Que teni diñamine đarī buojarī, ditōcure, “Yópe đarājare” maje aiye báquede āruritōcure diñami taoicōjevu yu, arī coyurejaquemavu Salomón Israecavure.

Que arī coyarī buojayu, yópe arejaquemavu Jūmenijicure:



—Му, Jehovah, Jūmenijicu, mi aye báquepedeca dayubu mu. Ye apevu “Jūmenijinamu” ne arī coyumara ne pēpeimara-capūravu mi teiyepe āmema. Jipacu bácu mi aye báquepedeca dacarejavū mu. Ū mácure yópe arejaquemavu mu: “Mipāramena márjivu ji daicōjeiyepedeca daivu baru, Israecavure pueno jabotenajarama na márjivu”, arī epedejaquemavu jipacu bácu. Que ayu bácu mu, mi aye báquepedeca dajacu ñujare. Míñamine dacavū ñuja. Ūbenita nópe ñuje daiyedeca, jāveneca pōeva ne ñaiñami cubevu mu. Caino cuvū mu. Nópe páyuvacari, “Muje ñaiñamine cacuyumu yu”, avū mu ñujare.

Que baru iñami cujacu mu. Ñuja mi pōeva ñuje āmeno daiyede jáñu, ñujare āmeno vaidé dajacu. Que teivu, yore ñuje jēniaino mure ñuje āmene coyurī dajocarū, ñujare jápiajacu mu. Ñuje āmeina teiyede ārumetejacu mu. Que teni apenoa joborōacavure, mi pōeva āmevure mi meacu cuede jápiaivu, mure jēniaradajebu yore. Ne jēniaiyede, náre jápiajacu mu. Ne jēniaiyepedeca dajacu mu. Que teni caivu ijāravucavu mure mearore jínajarama. Ñuja, mi pōeva, mure ñuje vainí turu, apeno joborōi nuicōjejebu mu ñujare. Ñuje nópe āmeno daiyedeca, die āmene mure ñuje coyurī vaidú, die āmene ārumetejacu mu, arī jēniarejaquemavu Salomón Jūmenijicure.

No yóboi, cūináñami vuorūmure Jūmenijicu ũi yávaiyede jápiarejaquemavu Salomón. Que teni Jūmenijicu yópe arī coyurejaquemavu úre:

—Ēnoata yure mi jēniavarede jápiavu yu. Muja, Israecavu, yure muje jēniaru, jápiacuyumu yu. Que teni muje āmeina teiyede yure muje coyurī dajocarū, mujare muje āmeina teiyede ārumetecuyumu. Múcapūravu jī daicōjeiyede mi mearo daiyede, mipāramena mārājivu Israecavu ne pueno jabova barājárama. Ubenita jī daicōjeiyede mi vainí turu, aru “Jūmenijinamu” arī ina pēpeimarare mearore jídu, apeno joborōi jarocuyumu mujare. Mi nópe vainí turu, iñamine muje daiñami mácarōre apevu pōevare jaruvaicōjecuyumu. Que baru iñamine ne jaravarīburu yóboi, járajarama apevu pōeva. Nópe jáivu, yure muje vainí tuiye báque boje, ne jaruvaiñami mácarōre majinajarama pōeva, arī coyurejaquemavu Jūmenijicu Salomóre.

Ñai jabocu Salomón cuve upacure obedivu pōeva ne majino mácarō

1 Reyes 9.10-10.29, 2 Crónicas 8.1-9.29

(Mateo 6.29, 12.42, Lucas 11.31, 12.27)

Jūmenijicui cūramine darī buojarī, ũi cūrami maquinóre daicōjenejaquemavu Salomón. Que teni Jerusalén āmicurīmarore jacotuibiaidore daicōjenejaquemavu, “Apevu pōeva ecorī boainomu” ayu. Que teni Israel āmicurijoborōi apenoa


ĩmaroaredaicōjenejaquemavu Salomón. Dĩmaroare darĩ buoja-
rejaquemavu. Que teni ñai jabocu Hirāmaque ure jiadocũare
uracũare apenoita jarorejaquemavu, úrure ĩni davaicōjeivu.
Dicũacavu nuri, úrure, cũrajiboa bojecurijĩboare, jocucua-
re, cuatávare aru apede máre davarejaquemavu.

Que teni Sabá āmicurijoborōcavu ne pueno jaboco ñai
jabocu Salomón ũi cuede jápiarejaquemavu. Me majicu ũi
cuede, ure cuve cuvacure jápiado, ũre jácodarejaquemavu.
Ure ape paiyede jēniari járejaquemavu ō ũre. Nópe ōi jēniari
jāiyede jápiayu, coyurĩ jebedejaquemavu Salomón. Que teni
Salomói cũramine meadamine jádo, ō yópe arejaquemavu ũre:

—Apevu pōeva mure coyuvu, mi cuvaede ne coyuyede
jápiado, “Jāve āmevu” arĩ dāpiarĩducaco. Caride iye caiyede
jádo, “Jāvenecabu” aivu. Ne coyuvu pueno cuvavu mu. Pare
mearo dacube mujecu Jūmenijicu Israecavu ne pueno jabocu
mure epevu, arejaquemavu ico jaboco Salomóre.

Que teni ō úrure, cũrajiboa bojecurijĩboare, aru mumijuede
máre jídejaquemavu ũre. Ape paiyede quéda jídejaquemavu ũ
máre ōre. Que teni ō ōi joborōi copaini nurejaquemavu.

Aru ure tāuturare jĩni bojedaicōjenejaquemavu Salomón
apeno joborōcavure. Que teni ure úrure cuvarejaquemavu ũ.
Yóvaicuvaimil paivu caballovare jāturuicũare jabuboivure cava-
rejaquemavu. Aru apevu doce mil paivu caballovare ũ jina



churarava ne tubarājimarare cuvarejaquemavu. Apevu jabova ũi pueno ure cuve ye cuvabedejaquemavu. Aru ũi pueno maji-divu cubedejaquemavu.

**Bucucu bajo nuñu Salomón Jūmenijicure ũi ju
abeno mácarō**

1 Reyes 11, 2 Crónicas 9.30-31

Ñai jabocu Salomón nomivare urī, vainí tuyu, obedinomivare, setecientos paivure, nomicurejaquemavu. Apevu nomiva máre, trescientos paivu ũi yurimaromiva cuvarejaquemavu. Nópe nomicucu, apenoa joborōacavu nomivare obedinomivare nomicurejaquemavu. Jūmenijicu ũre dinomivare ũi nomicuicō-jemeneca, nomicurejaquemavu ũ. Que teni Egiptocavu ne pueno jabocui mácore nomicurejaquemavu. Ō máre, apenomiva máre ne joborōi curivu, “Jūmenijinamu” ne arī coyumarare ne pēpeimarare mearore jídejaquemavu. Nópe mearore jínomivare ne cuede jáñu, dinomivare jári arurejaquemavu Salomón. Ũ bucucu bajo nuñu, ne pēpeimarare mearore jídejaquemavu. Nópe mearore jiyu, ne pēpeimarare ne mearore jicaivare daicō-jenejaquemavu. Jerusaléita divare daicōjenejaquemavu. Ne pēpeimarare ũi mearore jíyede jáñu, Jūmenijicu ũque jorojīnejaquemavu. Nópe jorojīñu, yópe arejaquemavu ũre:

—Ji daicōjeiyede ju abevu mu. Que baru Israecavu ne pueno jaboteicōjemecubu yu mipāramena mārājivure. Mipacu bácore, David bácore, yópe arīducacu yu: “Mi pāramena mārājivu Israecavu ne pueno jabova barājárama”, arīducacu yu ũre. Nópe ayuvacari, mipāramena mārājivure obebeyajuboacavure jabotenajarama. Ũbenita apeyajuboacavu Israecavure pueno apecure jabojaquijivu. Mi cāchinoi curivacacure jabojaquijivu, arejaquemavu Jūmenijicu Salomóre.

Ũi que arīburu yóboi, apeno joborōcavu Israecavure boarī búrejaquemavu cojedeca. Aru Salomón ũi cāchinoi jabocu Jeroboam āmicucu barejaquémavu. Efraín āmicuriyajubocacu barejaquémavu. Pare memeñu marejaquémavu. Que baru Salomón ũre memecaipōevare coreyu jacorejaquemavu Jeroboäre. Nópe jacoyu, Jeroboam jivare pare memecōjenejaquemavu Salomón. Nópe ũi memecōjeiyede, Jeroboam ũ jivure ne pare memeiyede

jáñu, jorojĩnejaquemavu Salomóque. Nópe jorojĩñu, ù jivure Salomójare boaicōjenejaquemavu. Nópe boaicōjeñu vacari, Salomójare vainí turĩ majibedejaquemavu. Vainí turĩ majibecu, Jeroboam Egipto āmicurijoborōi dupini nurejaquemavu.

Cuarenta paiujua baju Israecavu ne pueno jabocu barejaqué-mavu Salomón. Que teni yaidéjaquemavu. Ë mácuí yainíburu yóboi, mamacu Roboam āmicucu ù mácuí oatuvarejaquemavu. Ëcapūravu Israecavure pueno jabotedejaquemavu.

Israel āmicurijoborōre ne coavaiyede pucajaborōa mauteino mácarō

1 Reyes 12.1-24, 2 Crónicas 10.1-11.4

Ñai jabocu bácu Salomón mácuí yainíburu yóboi, ù mácuí mácu Roboam Siquem āmicurĩmaroi earejaquemavu. Diĩmaroi caivu Israecavu cójijidejaquemavu, ùre jabojaacorājivu. Ubenita aviá daino meapūravucavu Israecavu Jeroboāre Egiptoí cucure cuturĩ jarorejaquemavu. Salomón mácuí yainíburu yóboi, Jeroboam Israel āmicurijoborōi copaini majidejaquemavu. Nópe copaini dayu, ù apevu Israecavuque Roboāre borotecunurejaquemavu. Nópe boroteyu, yópe arejaquemavu:

—Mipacu bácu, Salomón mácu, maje jabocu cucu bácu, ñujare urarō boje ĩame. Múcapūravu mipacu bácuí cāchino boje uru, mure jabojaacorājaramu ñuja, arĩ borotedejaquemavu Jeroboam Roboāre.

Ëi que aiyede jápiayu, Roboam jabova bucuvare coyurĩ, jēniari járejaquemavu. Ëi que arĩ jēniari jáiyede, bucuvacapūravu yópe arĩ ju arejaquemavu na:

—Ina pōevare mi mearo daru, náre mi mearo yávaru, nácapūravu mure ju arājarama, arĩdurejaquemavu ina bucva ùre.

Ne nópe aiyedeca, ù bojuvure jēniari járejaquemavu. Ëi nópe arĩ jēniari jáiyede, yópe arĩ ju arejaquemavu na:

—Yópe arĩ ju ajacu Jeroboājare: “Jipacu bácu mujare urarō boje ĩame. Yúcapūravu ùi pueno boje ĩcuyumu”, arĩ ju ajacu náre, ina bojuvu arejaquemavu Roboāre.

Ne que aiyede jápiayu, ne aye báquepedeca coyurejaquemavu Jeroboājare. Ëi que arĩ coyuiyede jápiaivu, Jeroboam úcavuque jaraivu, Roboāre jabojaacoyubedejaquemavu. Que teni ne

joborōi, Israel āmicurijoborōi aviá daino meapūravui, copaini nurejaquemavu. Que teni Roboam pucayajuboare, Judá aru Benjamín āmicuriyajubocavure, jabotedejaquemavu. Aru Benjamín āmicuriyajubocavu obebejīna marejaqué mavu. Apeyaju-boacavu, caipucapuruaape paiyajubocavu Israecavu, ūre ne pueno jabojaicoiyubedejaquemavu.

No yóboi, Roboam ūre memeicaipōecure boje ícōjenidurejaquemavu Israel āmicurijoborō aviá daino meapūravucavure. Ūbenita ne yebai dayure jáivu, nócavu ūre boarí jaruvarejaquemavu. Que baru Jeroboāre na ne pueno jabojacorejaquemavu Israecavu aviá daino meapūravucavu. Ne que daiyede jápiayu, űai jabocu Roboam ū jina churaravaque cójijini buojarí, apevu Israecavure, ūre ubevu bācavure, boarānurejaquemavu. Cūiná-joborō Israel āmicurijoborō mauteiyuede urīdurejaquemavu ū. Nópe ne boarānuiyede jáñu, Jūmenijicu jiede coyucaipōecu Semaías āmicucu Roboāre yópe arí coyucunurejaquemavu:


—Apevu Israecavure boabéjacu. Israel āmicurijoborō pucajoborōa coateinomu. Jūmenijicui daicōjeinope nópe nuinomu, arí coyurejaquemavu Semaías, Jūmenijicu ūi coyucōjeiyede.

Ūi que arí coyuiyede jápiayu, Roboam ūi churaravaque ne cūramiata copaini nurejaquemavu. Boarānumenejaquemavu.

Jeroboam āmicucu Efraín āmicurijoborōcavure pueno ūi jaboteino mácarō

1 Reyes 12.25-14.20

Israel āmicurijoborō pucajoborōa coateniburu yóboi, Jeroboācapūravu aviá daino meapūravucavu ne pueno jabocu barejaqué mavu. Israel āmicurijoborō mácarō aviá daino meapūravucajoborō Efraín āmicurejaquemavu. Que teni Siquem āmicuriīmarore, jabocu ūi cuquijiīmarore epedejaquemavu Jeroboam. Israel āmicurijoborō mácarō aviá daino cācopūravucajoborō Judea āmicurejaquemavu. Nócavu ne pueno jabocu ūi cuquijiīmaro Jerusalén marejaqué mavu. Que teni āimarare boarí, juarí, jámuóri, Jūmenijicure ne mearore jínajiīmaro marejaqué mavu Jerusalén. Nópe ne cuede, Jeroboam ū jina pōevare Jerusaléne ne nuiyede ubedejaquemavu. Nópe ubecu, Efraín āmicurijoborōi ne mearore jínajiīmaroare



epedejaquemavu. Pucarā oteivecuvape paivu ne pēpeimarare, úruque ne daimara mārājivure, daicōjenejaquemavu. Ina oteivecuvare ne pēpeimarare pucaĩmaroai epedejaquemavu, ũi joborōcavu ne mearore jínajimarare. Dan aru Betel āmicurĩmaroai náre, ne pēpeimarare, epedejaquemavu. Nópe ũi epei-yede, Efraín āmicurijoborōcavu ne pēpeimarare mearore jídejaquemavu.

Que daivu, Jūmenijicu ũi daicōjeiyede ju abevu barejaqué-mavu. Que teni apevu ũmuvu, Aarón mácuĩ pāramena curipĩnidu teivu sacerdotevape téjurorivure epedejaquemavu ñai jabocu Jeroboam. Aru ne pēpeimarare ne mearore jījāravure, ne torojuve teijāravure máre epedejaquemavu ũ.

Que dayu, dijāravu ne torojuve teijāravu eaiyede, Jeroboam āimarare boarĩ, juarĩ, jāmuóri, oteivecuvu ne pēpeimarare mearore jíyu barejaqué-mavu. Ne āimarare jícavai yebai ũi mearore jícoricai, Jūmenijicu jiede coyucaipōecu Judea āmicurijoborōcavu ũre borore coyucudarejaquemavu.

—Jápiajacu mu. Caivu ina jícavai mearore jívure, sacerdotevare boacúdacuyume ñai jabocu David bácuĩ pāramecu bacuyú Josías āmicucu. Que darĩ, bedióva iva jícavai āimarare jibenama pōeva. Iye ji aiye jāvemu. Diede mi majiquiyepe ayu, carĩ jāravai iva jícavai tarĩ nuquiyebe, arĩ coyurejaquemavu Jūmenijicu jiede coyucaipōecu ũre.

Ëi que aiyede jápiayu, Jeroboam jorojĩni vaidéjaquemavu. Nópe jorojĩñu, ùi yebacavure ñai ùre coyucaipõecure jëicõjeni-durejaquemavu. Nópe jëicõjeñu, ùre jabióvaicacu, ùi ámuve cūacubeámuvepe nurejaquemavu. Que teni iva jícaiva máre tarĩ nurejaquemavu. Ëi ámuve nópe teiyede jáñu, Jeroboam yópe arejaquemavu Jūmenijicu jiede coyucaipõecure:

—Yure jēniacajacu Jūmenijicare. Ji ámuvede meaámuve tede dajacu, pare ùre arĩ jēniarejaquemavu Jeroboam.

Ëi que arĩ jēniaiyede jápiayu, Jūmenijicu jiede coyucaipõecu ùre jēniacarejaquemavu Jūmenijicare. Nópe ùi jēniacaiyede, ùi ámuve meaamuve nurejaquemavu.

No yóboi, ñai jabocu Jeroboam ùi májicu ùi ijíe teiyede jáñu, apecu Jūmenijicu jiede coyucaipõecu Ahías ámicucu yebai jaro-rejaquemavu jímarepacore. Ahíacapūravu bucucu, jári eabecu barejaquémavu. Aru Jeroboái márepaco ùi yebai òi eaiyede, ù yópe arejaquemavu óre:

—Áme borore mure coyquijivu. Jūmenijicu iyede mimare-pacure coyucõjeñume. Yópe abi ù mimarepacure: “Efraín ámicurijoborõcavure pueno jabojacorĩducacu mure. Ji nópe jacorĩ-duiyedeca, ji daicõjeiyede ju abeteavū mu. Yure jápiaiyube-teavū mu. Que teni pēpeimarare mearore jiavū mu. Que baru mure aru mi cūramicavure máre boarí jebecuyumu yu”, arĩ coyconujaco mimarepacure. Nujaco mu. Mi cūrami mi eai-yede, yaicúyume mímacu. Écapūravu yainí jipocatecuyume mije cūramicavure, Jūmenijicu ùi aye báquepedeca. No yóboi, Jūmenijicu apecure jabojacocuyume Efraín ámicurijoborõcavu ne pueno jabocu bacuyúre. Écapūravu, ùi jabojacuquijimu, apevu Jeroboam ùi cūramicavure boarí jebecuyume. No yóboi, Efraín ámicurijoborõcavu ne ámeina teiye boje, náre apeno jaborõi, joarõi curijoborõi, nuicõjecuyume Jūmenijicu, arĩ coy-rejaquemavu Ahías Jeroboái márepacore.

Ëi que arĩburu yóboi, nurejaquemavu òi cūramita. Noita òi eaiyede, òi májicu bácu yaidéjaquemavu. No yóboi, Jeroboam mácu máre yaidéjaquemavu. Veintidós paiujua bajo Efraín ámicurijoborõcavu ne pueno jabocu barejaquémavu. Ë mácu i yainĩburu yóboi, mamacu, Nadab ámicucu, ù mácure oatavarĩ jabotedejaquemavu.

**Nadab, Baasa, Ela, Zimri, aru Omri ámicurivu
Efraín ámicurijoborôcavure pueno ne
jaboteino mácarô
1 Reyes 15.25-16.28**

Ñai jabocu Nadacapûrava pucaujua baju Efraín ámicurijoborôcavu ne pueno jabocu barejaquémavu. Jūmenijicure ye ju abedejaquemavu. Jípacu bácuí ámeno daiyepedeca darejaquemavu ũ máre. Ũ jina churarava ne jabocu Baasa ámicucu ũre boarí jaruvarejaquemavu. Nópe boayú, ũcapûrava ũi pœvare pueno jabotedejaquemavu. Nópe jaboteyu, caivu Jeroboam mácuí cūramicavure boarí jebedejaquemavu.

Que teni veinticuatro paiujua baju Efraín ámicurijoborôcavure pueno jabotedejaquemavu Baasa. Ũ máre Jūmenijicu ũi daicôjeiyede ju abedejaquemavu. Nópe ju abecu ũi cuede jáñu, Jūmenijicu jiede coyucaipôecu, Jehú ámicucu, ũre yópe arí coyucôjenejaquemavu Jūmenijicu:

—Mure, Baasare, Efraícavu ne pueno jabojaacorîducacu. Ji nópe jacorîduiyedeca, Jeroboam mácu ũi ámeno daiye báquepedeca dávū mu máre. Que teyu, mi cūramicavure boarí jebeicôjequijivu, ũi cūramicavure mi boarí jaruvaiye báquepedeca, arí coyucôjenejaquemavu Jūmenijicu Jehúre Baasare.

Que teni Baasa bácu yaidéjaquemavu. Ũ mácuí yainíburu yóboi, mamacu, Ela ámicucu, ũ mácure oatavarí jabotedejaquemavu.

Que teni pucaujua baju Efraín ámicurijoborôcavure pueno jabotedejaquemavu Ela. No yóboi, ũ jina churarava ne jabocu, Zimri ámicucu, ũre boarí jaruvarejaquemavu. Boarí jaruvarí buojarí, ũcapûrava Efraícavure pueno jabotedejaquemavu. Nópe jaboteyu, caivu Baasa bácuí cūramicavure boarí jaruvarejaquemavu. Ubenita cūinásumana matuiyeda Zimri Efraícavure pueno jabotedejaquemavu. Ñai jabocu Ela bácuí Zimri ũi boarí jaruvaiyede jápiaivu ũi churarava, apecure, Omri ámicucure, ina churarava ne jabocure caivu Efraícavure pueno jaboja-corejaquemavu. Que teni Zimrire ne jēnadaiyede majicu, ũi cūrami jívui cucure diñamine juarejaquemavu. Que teni éni bíjarejaquemavu ũ mácu.

Que teni doce paiujua baju Efraín ámicurijoborôcavure pueno jabotedejaquemavu Omri. Aru ũi jipocacavu jabova

curivu bácvu pueno ámeno darejaquemavu. “Jūmenijinamu” ne arī coyumarare ne pēpeimarare mearore jícōjenejaquemavu ūi pōevare. Aru Samaria āmicuricū cūracū bojedarejaquemavu, daicōjecuyu nore ūi cuquijīmarore. Que teni Omri bácu yainíburu yóboi, mamacu, Acab āmicucu, jabotedejaquemavu.

**Roboam, Abías, aru Asa āmicurivu Judea
āmicurijoborōcavure pueno ne jaboteino mácarō
1 Reyes 14.21-15.24, 2 Crónicas 11.5-16.14**

(Mateo 1.7-8, Hechos 7.52)

Judea āmicurijoborōcavu, Israel āmicurijoborō mácarō aviá daino cācopūravucaborōcavu, ne pueno jaboteni búrejaquemavu Roboam. Ū Salomón mácu mácu barejaqué mavu. Nópe jaboteyu, ne ĩmaroare ne mearo jacoturājiyepu ayu urabiaidoare daicōjenejaquemavu. Aru āiyede, boaiyede máre meadai-cōjenejaquemavu dijoborōcavu. Apevu náre “Boainomu” aivu, nópe daicōjenejaquemavu náre. Que teni yóbecuriujua baju Roboam jabocu cucu, Jūmenijicu mearore jídejaquemavu. Que baru Jūmenijicu dijoborōcavure, Judea āmicurijoborōcavure, cadatedejaquemavu.

Ubenita no yóboi, ū Jūmenijicu ūi daicōjeiyede ju abedejaquemavu. Que teni Judea āmicurijoborōcavure, “Jūmenijinamu” ne arī coyumarare ne pēpeimarare mearore jídejaquemavu. Ne nópe ámeno daiyede jáñu, Jūmenijicu náre nájine darejaquemavu. Diecisiete paiujua baju Judea āmicurijoborōcavu ne pueno jabocu barejaqué mavu Roboam. Ū mácu yainíburu yóboi, mamacu Abías āmicucu nócavure pueno jabotedejaquemavu.

Que teni Judea āmicurijoborōcavu ne pueno jabocu cucu Abías, Jūmenijicu ūi daicōjeiyede ju abedejaquemavu. Aru ūi jaborōcavu Efraín āmicurijoborōcavure cainumua boaiyu barejaqué mavu. Nópe boaiyu, Judea āmicurijoborōcavure vainí turejaquemavu, Jūmenijicu ūi cadateiye boje náre. Ūre ne āruri parué boje, cadatedejaquemavu. Yóbecuriujua baju Abías bácu, ina pōeva ne pueno jabocu bácu, yaidéjaquemavu.

Ŭ mácuí yainíburu yóboi, mamacu Asa ámicucu Judea ámicurijoborôcavure pueno jabotedejaquemavu.

Aru Asa meacu jabocu barejaqué mavu. Jūmenijicu ũi daicôjeiye báquepedeca dayu barejaqué mavu. Que teni ne pēpeimarare ne mearore jímarare jaravarī jebeni, Jūmenijicu bajure mearore jícōjenejaquemavu, ũi daicōjeiyede cūináturu daicōjeñu. Mamaramure Asa ne jabocu ũi cuede apevuque boabédejaquemavu. Ŭbenita no yóboi, Cus ámicurijoborôcavu náque boarádarejaquemavu. Ne boarádaiyede, ñai jabocu Asa Jūmenijicure Judea ámicurijoborôcavure cadateicōjenejaquemavu. Ŭi nópe cōjeiyede, Jūmenijicu náre cadatedejaquemavu. Que teni apevu Judeacavu ne mearore jímarare, pēpeimarare, jaruvayu barejaqué mavu. Ŭi ñecore máre ñájine darejaquemavu, ôi pēpeimarare mearore jíye boje. Ôi mearore jímarare jaruvarejaquemavu ũ.

Que teni Asa ne pueno jabocu ũi cuede, obedivu Efraín ámicurijoborôcavu darejaquemavu ũi joborôi, Judea ámicurijoborôi. Jūmenijicu dijoborôcavure ũi cadateiyede majidejaquemavu Efraícavu. Que baru dijoborôi darejaquemavu. Obediujua yóboi, ñai jabocu Asa Jūmenijicure ũi áruari parube boje, ũi ámeno daiye boje, ijié teni yaidéjaquemavu. Asacapūravu ne pueno jabocu barejaqué mavu cuarenta y un paiujua bajo. Ŭ mácuí yainíburu yóboi, mamacu, Josafat ámicucu, Judeacavure pueno jabotedejaquemavu.

Acab ámicucu Efraín ámicurijoborôcavure pueno jabocu ámecure Elías ũi jaraino mácarô

1 Reyes 16.29-19.21

(Lucas 4.25-26, Romanos 11.2-4, Hebreos 11.32-38, Santiago 5.17-18, Apocalipsis 2.20, 11.6)

Obebeujua yóboi, Judea ámicurijoborôcavu ne pueno jabocu Asa ũi yaiquíye jipocai, Efraín ámicurijoborôcavu ne pueno jabocu Omri bácu yaidéjaquemavu. Ŭ mácuí yainíburu yóboi, mamacu Acab ámicucu ũre oatavarī jabotedejaquemavu. Ámecu bajo barejaqué mavu ũ. Ŭi jipocacavu curivu bácvu jabova pueno ámecu barejaqué mavu. Apeno joborôcacre nomicurejaquemavu. Ô Jezabel ámicuco, Sidón ámicuriimarocacu



jabocui máco barejaquémvu. Ōi ĩmarocavu Baal āmicucure “Jūmenijicube” ne arī coyui mu ne pēpeimure mearore jídejaquemavu. Que teni jímarepacure Baare mearore jícōjenejaquemavu. Nópe ũi mearore jíyu, Baal ũi cūrami maquinóre daicōjenejaquemavu jabocui curĩmaroi, Samaria āmicuriĩmaroi. Aru Jūmenijicu jiede coyucaipōevare boarí jaruvaicōjenejaquemavu Jezabel. Ōi que cōjeiyede, obedivure náre boarí jaruvarejaquemavu. Ne nópe boaiyedeca, Abdías āmicucu cien paivu Jūmenijicu jiede coyucaipōevare yavedejaquemavu cūracobea jívui, “Náre boainomu” ауа. Ёсапӯраву Acab jiede purucuvacu, Jūmenijicu jinare yaveyu, náre āiyede jídejaquemavu.

Dinumure cūinácu Jūmenijicu jiede coyucaipōecu Efraín āmicurijoborói curejaquemavu, Elías āmicucu. Ñai jabocu Acab yebai yópe arī coyucunurejaquemavu:

—Yu Jehová āmicucure memecaipōecubu. Ё Jūmenijicu bajube. Que baru caride mure jáve aqui jiva. Caride ye ocabe-

quiyebu. Ji ocare daicōjemenu, ye ocabequiyebu, arī coyurejaquemavu ũ Acare.

Ŭi que arīburu yóboi, Jūmenijicu Eliare jiajīya yebai dupicōjenejaquemavu. Nópe ũi cōjeiyede, Elías jiajīya yebai dupidejaquemavu. Ŭi noi dupiyede, mījina ũre āiyede davarejaquemavu. Ŭi nópe dupiyede, ñai jabocu Acab vorīduyuvacari, ũre eabedejaquemavu. Que teni ocabe boje, diya jiajīyacapūravu poporī nurejaquemavu. Nópe poporī nuiyede jáñu, Sidón āmicuriīmaro yebai curiīmajinoi nuicōjenejaquemavu Jūmenijicu ũre, ũi cuquiyepa aya nomiópécoi cūrami. Nópe ũi nuicōjeiyede, noita eayu, nomiópécore peca jevadore jáñu, āiyede jēniarejaquemavu ōre. Nópe ũi jēniaiyede, yópe arejaquemavu ũre:

—Quíjino trigo āmicue oteiyabeare, quíjino olivo āmicuricu jēidua córore, quéjīnora cuvavu. Jímajicumaque pucarā ñujare eaijīnopeda cuvavu ñuja, arejaquemavu ō Eliare.

Ŭi nópe aiyedeca, yópe arejaquemavu ũ ōre:

—Urarō dápiabejaco. Majióvarijīno páure daconujaco. Mi nópe daru, trigo aru dicoro máre cūiméquiyebu, arī coyurejaquemavu Elías ōre.

Ŭi que aiyede, ũi aye báquepedeca darejaquemavu. Ŭi que darīburu yóboi, ōi trigore aru dicorore máre joe cuvarejaquemavu. Que teni ōi cūrami curejaquemavu Elías. Yóbore, ico nomiópécoi mácu āmeno ijié teni ũme dapurī majibedejaquemavu. Ŭi nópe teiyede jáñu, Elías ōi mácu bácu Jūmenijicure jēniari tuorejaquemavu. Nópe jēniañu, ũ mácu jiejcāmure japurī adayu, ũmedare darejaquemavu. Nópe ũi japurī adaiyede, ũ mácu ũmedarī, ũme dapurejaquemavu cojedeca. Nópe ũi ũmedaiyede jádo, jāveneca Jūmenijicu jiede coyucaipōecu Elías ũi cuede majidejaquemavu ico nomiópéco.

Que teni yóbecuriujua bajo ye ocabedejaquemavu. Nore ocabe boje, Efraín āmicurijoborōre ye āiye cubedejaquemavu. Que teni ñai jabocu Acab Eliare vorīduyu barejaquémavu. Ubenita ye eabedejaquemavu ũre. Que teni yóbecuriujua vainīburu yóboi, Jūmenijicu Eliare yópe arejaquemavu:

—Acab yebai nujacu mu. Caride ijoborōre ocare daquijivu, arejaquemavu Eliare.

Ŭi que aiyede jápiayu, Elías ñai jabocu Acab yebai earejaquemavu. Noita ũi eaiyede, Acab yópe arejaquemavu ũre:

—Ijborōcavure āmeno baju vaidé daivu mu, arejaquemavu Acab Eliare.

Ũi que aiyede, Elías ũre yópe arejaquemavu:

—Yúcapūravu ijborōcavure āmeno vaidé dabetevu. Múcapūravu Jūmenijicu ũi daicōjeiyede mi ju abe boje, ijborōcavure āmeno vaidé daivu mu. Carmelo āmicuricū cūracūi caivu Baal jiede coyucaipōevare cōjijicōjejacu, arejaquemavu Elías Acare.

Ũi que aiyede jápiayu, ũi aiye báquepedeca darejaquemavu Acab. Que teni dicū cūracūita ne cōjijiyede jáñu, Elías yópe arejaquemavu Efraícavure:

—¿Ácu páyure mearore jíyurāru muja? ¿Aipe painoque muje mearore jíquijimure coyurī majibenaru muja? Jehová Jūmenijicu baju baru. ũcapūravure mearore jíjarā muja. Ũbenita Baal Jūmenijicu baju baru, ũcapūravure mearore jíjarā muja, arejaquemavu Elías.

Ũi que aiyede jápiaivu, ye ju abedejaquemavu. Quéda bi yávabevu núrejaquemavu. Ne nópe ju abede jáñu, ũ coyurejaquemavu Baal jiede coyucaipōevare:

—Jūmenijicu jiede coyucaipōevacacu cūinácu yu matuiyeda apuvu cāreja. Ũbenita mujacapūravu Baal jiede coyucaipōeva cuatrocientos cincuenta paivu ũmuvu bajubu. ¿Ácucapūravu Jūmenijicu bajuba? Jede, maja yópe darī járajare. Pucarā oteivecuva davarājarevu. Que teni pucava āimarare jácaivare darāja-revu. Aru muja cūinácu oteivecuve ĩni, boajárā. Aru yu apecure boaquíjivu. Que teni muje āimarare jácaiva puenoi pecare tuorī, oteivecu bácuve máre tuojarā. Yu máre quédeca daquijivu. Nópe tuoivuvacari, toabore dacuvabenamu maja. Yu Jehováre, Jūmenijicu bajure, oteivecu bácuve juaicōjequijivu. Aru mujacapūravu Baare muje oteivecu bácuve juaicōjejara. Maje juaicōjeiyede, oteivecu bácuve juayu Jūmenijicu bajube, arejaquemavu Elías Baal jiede coyucaipōevare.

Ũi que aiyede jápiaivu, na ju arī, ũi aiye báquepedeca darejaquemavu. Diva jácaivare meadarī buojarī, oteivecuve boarī, na Baare pare jēniarejaquemavu, oteivecu bácuve juaicōjeivu. Joe ne jēniaiyedeca, ye ju abedejaquemavu ne mearore jímu, Baal. Ne jēniaiyede, Elías náre yuridejaquemavu. Nópe yuriyu, yópe arejaquemavu náre:

—Codobobarā muja. Mujare jápiabecube Baal. “Cāñu-mebu”, arī yuridejaquemavu Elías Baare.

Nópe ũi yuriyede, na pare codoboboivu, ne bajuáre burareja-
quemavu, Baare daicōjeniduiyu. Ne nópe daiyedeca, dijāravu
baju ne codoboborī jēniaiyede, Baal náre ye ju abedejaquemavu.

No yóboi, Jehováre, Jūmenijicu bajure āimarare jícavare
meadarejaquemavu Eliacapūravu. Diva jícavare darī buojari,
diva ēcarui tarabure ũnejaquemavu, oco bejaquinore dayu. Ũri



buojarī, diva puenoi tubacure. oteivecu bácure ocoque yuarī tuo-
rejaquemavu. Ũi urarō ocore yuarī tuoiyede, ditarabu ũi ũita-
rabu bácarōre buiní nurejaquemavu. Nópe darī buojayu, nainú
baji diora, Jūmenijicure mearore jívu ne mearore jíora baji,
yópe arī jēniarejaquemavu:

—Jūmenijicure, caivu Efraín āmicurijoborōcavu mure maji-
jarāri. Jūmenijicu baju mi cuede majide dajacu náre. Que baru
mure memecayu, ji cuede máre, majide dajacu náre, arī jēniare-
jaquemavu Elías Jūmenijicure.

Ũi que aiyede jápiayu, Jūmenijicu cavarōre jocarī toabore
jarorejaquemavu. Nópe dayu, ñai oteivecu bácure éni cūiné
darejaquemavu. Diva jácaivare máre éni cūiné darejaquemavu.
Die ocore máre, ũitarabui cue báquede, éni cūiné darejaque-
mavu. Nópe éni cūiyede jáivu, ina pōevacapūravu yópe areja-
quemavu:

—Jehová jāveneca Jūmenijicu bajube, arejaquemavu na.

Ne que aiyede, Elías náre yópe arejaquemavu:

—Baal jiede coyucaipōevare jējara muja. Ye cūinácare dupi-
cōjemejara, arejaquemavu Elías ina pōevare.

Ũi que aiyede jápiaivu, Baal jinare jēnejaquemavu. Ne que
jēiyede, Elías náre boarí jebeicōjenejaquemavu. Que teni ñai
jabocu Acare yópe arejaquemavu:

—Mi cūrami copaini nujacu. Urarō ocaquiyebe caride, areja-
quemavu Elías ũre.

Ũi que arī coyuiyedeca, ye ocopenibo cubedejaquemavu.
Die nópe cubedeca, dijāravui urarō ocaquino marejaquemavu.
Que teni Acab ũi cūrami copaini eayu, jímarepacore, Jeza-
bede, coyurejaquemavu. Elías Baal jiede coyucaipōeva máca-
vure ũi boarí jebeiyé báquede coyurejaquemavu. Ũi que arī
coyuiyede jápiado, jorojīni vaidéjaquemavu. Nópe jorojīño,
Elíare yópe arī boro jarorejaquemavu:

—Caride mure boarí jaruvaicōjecojivu. Cūiná mure boarí
jaruvarājarama ji cōjeimara, arī boro jarorejaquemavu Elíare.

Nópe ōi boro jaroiyede jápiayu, Elías dupini cūyarejaque-
mavu. Avía daino cācopūravui, Judea āmicurijoborōita cūyare-
jaquemavu. Nuri, Sinaí āmicuricū cūracūita earī, dicūi curico-
beita cārejaquemavu. Noi ũi cuede, Jūmenijicu ũre jēniari járe-
jaquemavu:

—¿Aipe teyu yuita cucurū mu? arī jēniari járejaquemavu ũre.

Ëi que arĩ jēniari jǎiyede, Elías ju arejaquemavu:

—Yu matuiyeda mure mearore jýubu caride. Que teni caride yure máre boaiyurivubu, arejaquemavu Elías Jūmeni-jicare.

Ëi que aiyede jǎpiayu, Jūmenijicu yópe arejaquemavu ére:

—Efraín āmicurijoborōi carivu siete mil paivu baju jauma cǎreja yure mearore jívu. Nácapūravu Baare ye mearore jíbema, arĩ coyurejaquemavu Jūmenijicu Eliare.

Que arĩ buojarĩ, avia daino meapūravui Efraín āmicurijoborōi copaicōjenejaquemavu Eliare. Nópe copaicōjeñu, yópe arejaquemavu:

—Noita eayu, Eliseo āmicucure mure ñi oatavaquinore coyucunujacu, arejaquemavu Jūmenijicu Eliare.

Ëi que aiyede, Elías nuri, Eliseore earĩ, ñi puenocacaje cui-tótecajede ñi aruboa puenoi tuorejaquemavu, jǎdovacuyu ére oatavacuyure. Ëi que darĩburu yóboi, Eliseo Eliare yóvacunurejaquemavu. Eliare cadatecuyu barejaquémavu.

Ñai jabocu Acab ñi āmeno teiye boje Jūmenijicu ére ñi nǎjine ñaquinore Elías ñi coyuno mácarō

1 Reyes 20-21

Ñai jabocu Acab Efraín āmicurijoborōcavu ne pueno jabocu ñi cuede Ben-adad āmicucu, Siria āmicurijoborōcavu ne jabocu barejaquémavu. Aru Samaria āmicuriīmarocavuque boaráedarejaquemavu Ben-adajǎ. Samaria Efraín āmicurijoborōcaīmaro, Acab ñi curiīmaroi curejaquemavu. Ne nópe boaiyede, puque Efraícavu Siriacavure vainí turejaquemavu. Puque ne vainí turĩburu yóboi, Ben-adare boarĩ jaruvaiye jaurejaquemavu Acare. Ubenita ére boabédejaquemavu. Ëi boabéde jáñu, Jūmenijicu Acaque jorojīnejaquemavu. Nópe jorojīñu, Jūmenijicu jiede coyucaipōecure Acab ñi yaiquínore coyucōjenejaquemavu. Ëi que arĩ coyuiyede jǎpiayu, Acacapūravu jorojīnejaquemavu.

Dinumure Nabot āmicucu curejaquemavu. Majiówarijīno joborōre cuvarejaquemavu. Ëi joborō ñai jabocu Acab ñi cūrami yebaita curejaquemavu joabejīnoi. Dijoborōre Acab ñi oteiye cuquinore urejaquemavu. Nópe ucu, ũ Nabore dijoborōre ĩni

bojedaiyuridurejaquemavu. Ubenita ũi jini bojedaiyubede jáñu, apeno joborõre oatuvārī, jiyuridurejaquemavu Acab. Ubenita Nabot ũi joborõre jiyubedejaquemavu. Aru apeno joborõque ũi oatuvaiyede ubedejaquemavu. Joe ũ jivu b́acavu dijaborõre cuvarejaquemavu. Ũi joborõre jiyubede jáñu, jorojinejaquemavu Acab. Nópe jorojĩñu, ũi ćurami copaini eayu, áiyubedejaquemavu. Ũi chĩoiyede jádo, jímarepaco Jezabel yópe arĩ jēniari járejaquemavu ũre:

—¿Aipe painoque chĩoñuru mu? arĩ jēniari járejaquemavu ũre.

Ũi nópe arĩ jēniari jáiyede, yópe ju arejaquemavu ũre Acab:

—Nabot yure jiyubetebi ũi joborõre, arĩ coyurejaquemavu ũre.

Ũi nópe arĩ coyuiyede, ũ apevure Nabore boarĩ jaruvaicōjenejaquemavu. Que teni ũi cōjeiye báquepedeca, boarĩ jaruvarejaquemavu ũ ḿacure. Ne nópe boarĩ jaruvaiyede majico, ũ jímarepacure diede coyurĩ, ũ ḿacui joborõre ícōjenejaquemavu. Que teni Acab dijaborõre ícunurejaquemavu. Ne nópe daiyede jáñu, Jūmenijicu yópe arĩ coyurejaquemavu Eliare:

—Acare yópe arĩ coyucunujacu: “¿Aipe daivu apevure boaicōjēni, dijaborõre ĩnaru muja? Yópe abi Jūmenijicu mure: ‘Nabot b́acui yaiyede yavimiva ũi jivede joborõi taiyede neneima. Nope-deca mi jivede máre nenenajarama yavimiva’”, arĩ coyucunujacu Acare, arĩ coyurejaquemavu Jūmenijicu Eliare.

Ũi que aiyede jápiayu, ũi aie báquepedeca Elías Acare coyucunurejaquemavu. Arĩ coyurĩ buojarĩ, Jūmenijicu Acab ũi ćuramicavure ũi boarĩ jaruvaquinore coyurejaquemavu Elías Acare. Ũi nópe arĩ coyuiyede jápiayu, Acacapūravu ũi āmeina daiye báquede chĩorejaquemavu. Ũi nópe chĩoiyede jáñu, Jūmenijicu ũre cūiná boabédejaquemavu.

Josafat āmicucu Judea āmicurijaborōcavure pueno ũi jaboteino ḿacarō

1 Reyes 22.1-50; 2 Crónicas 17.1-21.1a

(Mateo 1.8, Santiago 2.23)

Dinumū paiyemica Elías ũi aie báquepedeca, Josafat āmicucu Judea āmicuriyajubocavu ne pueno jabocu barejaquémavu. Ũ Asa b́acui ḿacu barejaquémavu. Meacu jabocu barejaqué-

mavu, jaboteni búyu. Jūmenijicu ũi daicōjeiyede dayu bareja-quémavu. Que teni ũi aipe daquinore majiyucu, Jūmenijicure jēniari járejaquemavu. Que teni Jūmenijicu ũque torojurejaquemavu. Nópe torojucu, ure ape paiyede jídejaquemavu ũre. Que baru obedivu pōeva majidejaquemavu ũre. Pēpeimarare ne āimarare juarī jīcaivare jaruvaicōjenejaquemavu. Que teni ũi cāchinocavu jabovare, Levita āmicuriyajubocavure, aru sacerdotevare, Jūmenijicu ũi daicōjeiyede buenajivure jarorejaquemavu náre, Judea āmicurijoborō curīmarocavure. Nópe buenanuivu, Jūmenijicu ũi daicōjeiyede ne toivaiyoca cāriáiyocare nuvarejaquemavu.

Nópe cuve upacuvacari, āmeno darejaquemavu Josafat. Ũai jabocu Acab ũi mácore nomicuicōjenejaquemavu Josafat ũi mácore. Acab ũi máco Atalía āmicuco barejaquemavu. Nópe nomicuicōjeñu, Efraín āmicurijoborōcavu ne jabocuque mearo curājivu barejaquemavu na. Cūinájāravu ũai jabocu Samaria āmicurīmaroi cucunurejaquemavu. Ũai jabocu Acare jácunurejaquemavu. Noita ũi earīburu yóboi, Siria āmicurijoborōcavuque Acab boaiyucu, Josafare ũre yóvaicōjenejaquemavu. Ũi nópe yóvaicōjeiyede, Josafat yópe arejaquemavu:

—Nurajarevu. Maje nurajiye jipocare, Jūmenijicure maje aipe tequinore jēniari járajarevu, arejaquemavu ũ Acare.

Ũi que aiyede, na jēniari járejaquemavu Acab jinare. Nácapūravu Jūmenijicu jiede coyucaipōeva baju āmenejaquemavu. Que teni na meyuyaivu, yópe arīdurejaquemavu ne jabocure:

—Siriacavuque boarānujara. Muje nópe nuiyede, Jūmenijicu mujare cadatecuyume, arī coyurejaquemavu Acab jina.

Ne que aiyede jápiayu, Josafat yópe arī jēniari járejaquemavu:

—¿Jūmenijicu jiede coyucaipōecu baju yore cubedi? Ũi curīburu, ũre jēniari járajare, arejaquemavu ũ.

Ũi que aiyede, Acab ũre ju arejaquemavu:

—Cūinácu cubi Jūmenijicu jiede coyucaipōecu, Micaías āmicucu. Ũbenita ũre jári coenívu. Yure coyucu, āmeno nuquinore cainumua coyubi yure, arejaquemavu Acab.

Ũi que aiyedeca, Josafat Micaías ũi coyuiyede jápiaiyurejaquemavu. Que teni Acab Micaíare cuturī jarorejaquemavu. Ũi cuturī jaroiyede, Micaías ne yebai edarejaquemavu. Nópe edayu, ne jēniari járiburu yóboi, Siriacavu ne vainí tarājínore

coyurejaquemavu náre. Que arī coyurī buojarī, yópe arī coyurejaquemavu Micáías:

—Acab jina ne nópe meyuyarī coyuiyede ubi Jūmenijicu, Acacapūravu ūi boarī bíjaquiyeye ayu, arī coyurejaquemavu Micáías náre.

Ūi nópe arī coyuiyedeca, Acajā aru Josafajā Siriacavuque boarānuridurejaquemavu. Nópe nuñu Acab, ubeni cucu churara teiyeye cuitótecajeare dorejaquemavu. Josafacapūravu jabocu cuitótecajeare doyu barejaqué mavu. Siriacavu ne pueno jabocu Acare boaiyurejaquemavu. Que baru Josafare boarádaivu barīdurejaquemavu. “Acabe”, arīdurejaquemavu. Nópe boarádaivu, ūi yebaita eaiyu, “Apecube. Acab āmemi”, arī majidejaquemavu. Que teni Josafare boabédejaquemavu. Ūbenita cūinácu Siriacacu churara Acacapūravure tutorejaquemavu. Que teni nainú, aviá ūi doiye bajure, yaidéjaquemavu. Ū mácuí nópe yaiyede jáivu, Samaria āmicuriīmaroita ūi jāturuicūque ūi baju bácarōre nuvari, noita yuarī jaruvarejaquemavu. Que teni ū mácuí jāturuicū joaiyede, jive taiyede, yavimiva ūi jive báquede nenenejaquemavu, yópe Elías ūi coyuiye báquepedeca. Jūmenijicu ūi aiye báquepedeca vaidéjaquemavu Acab bácare.

**Acab bácuí mácu Efraín āmicurijoborōcavure pueno
ūi jaboteino mácarō aru Eliseo Eliare ūi
oatuvaino mácarō**

1 Reyes 22.51-53; 2 Reyes 1-3

(Lucas 9.54, Apocalipsis 11.2)

Acab bácuí yainíburu yóboi, ū mácuí mácu Ocozías āmicucu Efraín āmicurijoborōcavu ne pueno jabocu barejaqué mavu. Aru cūinájáravu jáicobei turī darī, ijíé tedejaquemavu. Nópe ijíé teyu, ūi vaiquínore majiyucu, ūi yebacavure Baal-zebul āmicucu pēpeimure jēniari jáicōjēni jarorīdurejaquemavu Filisteocavu yebaita. Nópe náre ūi jaroiyede jáñu, Jūmenijicu yópe arejaquemavu Eliare:

—Ūnai jabocu Ocozías ūi yebacavure coyucunujacu. “Jūmenijicu bajure jēniari jájara muja. Muje jabocu Ocozías yaicáyube.”

Diede coyurānujara úre, arī coyurejaquemavu ūi yebacavure Eliare.

Ūi que arī buojaiyede, ūi aye báquepedeca coyurejaquemavu Eliás Ocozías ūi yebacavure. Ūi que arī coyuiyede jápiaivu, nácapūravu ne jabocure coyurānurejaquemavu. Nópe coyuivu, “Eliás batebí ñujare coyuyu”, arī majibedejaquemavu. Nópe majibevu, “Yópe ārojacu batebí ñujare coyuyu”, arejaquemavu Ocoziare. Ne que aiyede jápiayu, “Eliás bateyúme mujare coyuyu”, arī majidejaquemavu. Nópe majicu, cūináyajubo churarava Eliare jéicōjeni jarorīdurejaquemavu. Que teni ina churarava Eliás yebai ne eaiyede, ū yópe arejaquemavu náre:

—Jūmenijicu jiede coyucaipōecu baru yu, toabo darī cavarōre jocarī mujare éni cūiné daquiyebu. Nópe nuivu, Jūmenijicu jiede coyucayu ji cuede majinajaramu muja, arejaquemavu Eliás ina churaravare.

Ūi que aiyede, ūi aye báquepedeca cavarōre jocarī toabo náre éni cūiné darejaquemavu. Na mácavure nópe teniburu yóboi, Ocozías apevu churaravare jarorīdurejaquemavu cojedeca. Que teni bedióva cojedeca náre máre éni cūiné darejaquemavu. Na mácavure nópe teniburu yóboi, Ocozías apevu churaravare jarorejaquemavu cojedeca. Nópe nuivu, Eliare eaivu, ina churarava ne jabocu Eliás ūi jipocai ñuatutarejaquemavu. Aru yópe arejaquemavu:

—Pare jēniaivu mure. Yure aru ji churaravare máre boarī jaruvaicōjemejacu mu, arī jēniarejaquemavu Eliare.

Ūi que arī jēniariburu yóboi, Jūmenijicu Eliare náque nuicōjenejaquemavu. Que teni Eliás nuri, eayu ñai jabocu Ocoziare, yópe arī coyurejaquemavu:

—Baal-zebure, Jūmenijicu āmecure, mi aipe vaiquínore jēniari jáicōjeniduvu mu. Nópe dayu, āmeno dayu bateyúmu mu. Mi nópe daiye boje, yaicáyumu mu, arī coyurejaquemavu Eliás úre.

Ūi aye báquepedeca, yaidéjaquemavu Ocozías bácu. Pucaujua baju jabocu barīdurejaquemavu. Ū mácu ūmu juedocu cuvabedejaquemavu. Que baru ūi yócu, Joram āmicucu, úre oatvarī jabotedejaquemavu.

No yójiboi, Jūmenijicu Eliare cavarōi ĩni, mure dacuyu barejaquému. Que teni Eliseo Eliare yóvacunurejaquemavu. Nópe nuivu, pucaĩmaroare vainí, Jordán āmicuriya jia yebai

ēcarui ēmenejaquemavu. Nópe ēmeni eaivu, Elías ūi puenocajecajecuitótēcajede durī, īni, meatucaru cāriāri, jiare jaraboarejaquemavu. Ūi nópe jaraboaiyede, jia coturī nurejaquemavu. Oco cubeno, ne jatarājino mautedejaquemavu. Nópe teiyede, jatarī nurejaquemavu ina pucarā. Elías Jūmenijicu ūre ūi nuvaquinnore majidejaquemavu. Nópe majicu, ūi nuquiye jipocai, Eliseore jēniari járejaquemavu:

—¿Jūmenijicu yure ūi nuvaquiye jipocai, aipe daiyede ucurū mu? arī jēniari járejaquemavu Elías Eliseore.

Ūi nópe arī jēniari jáiyede, yópe arī ju arejaquemavu:



—Jūmenijicu ũi Espírituque mure mearo cadateibi ũi paruéque, mi darī jádovaquiepe ayu. Mure ũi cadateiyepedeca pueno yure cadatejacu mu ũi Espírituque, arejaquemavu Eliseo Eliare.

Ũi que aiyede, yópe arī coyurejaquemavu Elías:

—Mi cuvae mi jēniaiye maiyójavu. Ũbenita cavarōi jī muiyede mi járu, Jūmenijicu mi jēniaiye báquepedeca mure cadatecuyume, arī ja arejaquemavu Elías.

Ũi que arīburu yóboi, ārumena cavarōi jāturuicū ēmeni darejaquemavu. Caballova dicūre jabuborī, jōdari daivu barejaquémavu. Dicū aru ina caballova máre toaque ēmenejaquemavu. Nópe jōdari daivu, Eliare īni, muri nurejaquemavu. Ũmevu urarō ũmecariainope teni, ũre īni, murejaquemavu. Ārumena que tedejaquemavu. Que teni Elías cubedejaquemavu. Ũi puenocacaje cuitótecaje matuiyeda curejaquemavu. Yebaita turī, pararejaquemavu dicaje. Que teni dicajede īni, ēmeni nurejaquemavu Eliseo. Nópe īni ēmeñu Jordán āmicuriya jiai, dicajede meatucaru cāriári, jiare jaraboarejaquemavu. Nópe jaraboayu, yópe arejaquemavu:

—Jehová, Jūmenijicu baju, ¿yure cadatecudayurū mu? ¿Eliare mi cadateiye báquepedeca, yure cadatecudayurū mu? arī jēniari járejaquemavu Eliseo.

Ũi que aiyede, bedióva jia coturī nurejaquemavu. Oco cubeno mautedejaquemavu. Nópe teiyede jáñu, jatarejaquemavu.

Jūmenijicu ũi paruéque Eliseo ũi darī jádovaino mácarō 2 Reyes 4-5

(Lucas 4.27, Hebreos 11.32-35)

Eliseo Jūmenijicu jiede coyucaipōecu ũi cuede, apecu ũi coyuiyepedeca coyuyu barejaquémavu. Ñai apecu Jūmenijicu jiede coyucaipōecu bácu, apecure bojecube dayu bácu, yaidéjaquemavu. Ũ mácu yainíburu yóboi, apecucapūravu no bojecube ñainore bojedabede jáñu, ũ mácu mára pucarāre yebacateicōjeni urejaquemavu, népacu bácu bojecube ñainore icuyu.

Ëi nópe yebacateicōjeiyede jádo yaiyú bácuí márepaco, pare chīodo, Eliseore cadateicōjenejaquemavu.

—Ye ape paiye cuvabevu ñuja. Cūinábu jorobucarō matuiyeda olivocu āmicuricu jēidua córore cuvavu ñuja. ¿Que baru aipe darī bojedarájidi ñuja no bojecube ðainore? arejaquemavu ò Eliseore.

Òi que aiyede, yópe arī coyurejaquemavu óre:

—Ëre jorobuare jēniajaco mi cadajēcavure. Yóbo dibuáre jacopaiyovacodomu mu. Nópe dibuáre davado, mi cūramita ñuojaco. Nópe dado, mi cūramine biejaço. Bieni buojarī, dicoro mi cavaede dibuáre yuarī adajaco, arejaquemavu Eliseo óre.

Ëi que aiyede jápiado, ùi aipe báquepedeca ðarejaquemavu ò. Òi que ðaiyede, dibuá buidējaquemavu. Nópe teiyede, dicoro boje tāuturare ñejaquemavu. Die tāuturaque ne bojecube ðainore bojedarejaquemavu. Que teni die tāutura mauteieque mearo curejaquemavu ò mamaraque.

Cūinájāravu Sunem āmicuriīmaroi Eliseo ùi cuede, cūináco nomió āiye jídejaquemavu ére. Jāmenijicu jiede coyucaipōecu



ũi cuede majico, ũre āiye jidejaquemavu. Que teni ō jímarepacure yópe arejaquemavu:

—Ñai Eliseo ũi tucuba baquinóre cutuárājare maje cūrami, arejaquemavu ō.

Que arī buojarī, ditucubure darī buojarī, Eliseore ditucubui epedejaquemavu. Ne que daiyede jáñu, Eliseo torojurejaquemavu. Nópe torojucu, náre cadateiyurejaquemavu. Na jue docu-vabevu barejaqué mavu. Que teni ne jue docuvarājinore jēniari tuorejaquemavu Eliseo Jūmenijicure. Ũi nópe jēniari tuorīburu yóboi, jue docuvarejaquemavu cūinájicure. Ubenita bucucu nuñure, jipobu ijidejaquemavu ũre. Nópe ũre ijiéde, yaidéjaquemavu. Nópe yaiyú bá cure jádo jípaco, ũ má cure Eliseo ũi parainoi tuorī, ũre voconurejaquemavu. Ũre earī, ōi cūrami cuturī darejaquemavu. Que teni Eliseo ne cūrami eayu, némacu bá cure jēniarejaquemavu Jūmenijicue. Némacu bá cure ũmedaicōjeñu, jēniarejaquemavu. Jēniari buojarī, némacu bá cui baju puenoi tuorī, ũre japurī adarejaquemavu. Ũi que daiyede, némacu ũmedarejaquemavu. Nópe ũi ũmedaiyede jáñu, jípacore jacopaiyovarejaquemavu.

Dinumure Siria āmicurijoborōcacu, Naamán āmicucu, churava ne jabocu barejaqué mavu. Churiá pojeyu barejaqué mavu ũ. Que teni jímarepacore ōi yebacaco, Efraín āmicurijoborōcaco, yópe arejaquemavu:

—Samariai cucube Jūmenijicu jiede coyucaipōecu. Mimarepacure meacu tede dajebu, arī coyurejaquemavu Naamá i máre-pacore.

Ōi que arīburu yóboi, ōi arī coyuiyepedeca Naamáre arī coyurejaquemavu jímarepaco. Ōi arī coyurīburu yóboi, ũ Samaria āmicurīmaroi Eliseore vocunurejaquemavu. Aru ũi nuiyede tāuturare, cuitótecajeare máre nuvarejaquemavu, jícuyu ũre. Eliseo ũi cūramita ũi eaiyede, Eliseocapūravu ũi yebacacure ũre coyucicōjeñu jarorejaquemavu. Yópe arejaquemavu ũi yebacacu Naamáre:

—Jordán āmicuriya jiai ēmejacu. Ēmeni eayu, siete paiye muijácu. Nópe mi muiyede, mi churiá pojeiye papaquiyebu, arejaquemavu Naamáre.

Ũi que aiyede jápiayu, jorojīni vaidéjaquemavu Naamán. Nópe jorojīñu, yópe arejaquemavu:

—Yópe arī dápíarīduvu: “Û yure jácudarī, Jūmenijicure jēniari tuocuyume yure”, arī dápíarīduvu. ¿Que teni aipe painoque Jordán āmicuriyai muicōjeni? Maje joborōi jiya pueno meada cuvu, arejaquemavu jorojīñu.

Nópe jorojīñu, ũi joborōi copaicudayu barīdurejaquemavu. Û nópe nuiyucure ũi yebacavu ũre jáivu, yópe arejaquemavu:

—Eliseo maiyójede mure ũi daicōjenu, dajebu mu. Que baru maiyójabejīnore ũi daicōjeinore dajacu cāreja. Nópe dayu, meacu nucuyumu mu, arejaquemavu ũi yebacavu ũre.

Ne que aiyede jápiayu, Jordán āmicuriyai cuyacunurejaquemavu Naamán. Eliseo ũi aye báquepedeca, siete paiye baju muinéjaquemavu. Ûi que darī buojaiyede, ũi churiá pojeiye me paparejaquemavu. Nópe papaiyede jáñu, Naamán Eliseo yebaita earī, iye tāuturare, cuitótecajeare máre, ũi dawaiye báquede, jíyurīdurejaquemavu, bojedacuyu ũre. Nópe ũi boje-daiyedeca, Eliseo boje ubedajaquemavu. Que teni Naamán ũi cūramita copainurejaquemavu.

Ûi nuriburu yóboi, Eliseo ũi yebacacu, Giezi āmicucu, ũre cujurī nuri, earejaquemavu. Naamán Eliseore ũi jíyurīduiye báquede íyucu barejaquemavu. Que baru Naamáre meyuyarī, yópe arīdurejaquemavu:

—Caride pucarā ũmuva Eliseo yebai edama. “Náre jícuyubu. Que baru mi jíyurīduiyede jíjacu”, arī boro darobi Eliseo mure, arī meyuyarejaquemavu Giezi Naamáre.

Ûi nópe meyuyaiyede, Naamán ũi cavaede, tāuturare aru cuitótecajeare, jídejaquemavu ũre. Diede jēni buojarī, ũi cūramita ũre jíye báquede yavecunurejaquemavu. Nópe yaveni buojarī, Eliseo yebaita earejaquemavu ũ. Û nópe eayure jáñu, yópe arejaquemavu Eliseo:

—¿Aipe dayu batecúrū mu? arejaquemavu.

—Ďabetevu, arī ju arejaquemavu Giezi.

Ûi que aiyede jápiayu, Eliseo ũi meyuyaiyede majidejaquemavu. Nópe majicu, yópe arejaquemavu Eliseo:

—“Jūmenijicu ũi yebacacubu” ayuvacari, tāuturare jēniaiye jaubevu mure. Que baru mi āmeno daiye boje, Jūmenijicu mure nājine dacuyume. Naamán ũi churiá pojeiypedeca churiá pojecuyumu mu, arī coyurejaquemavu Eliseo ũi yebacacure.

Aru ũi aye báquepedeca tedejaquemavu ũre.

Siria āmicurijoborōcavu churarava Efraín āmicurijoborōcavure ne boaino mácarō

2 Reyes 6.8-8.15

Ñai jabocu Joram, Efraín āmicurijoborōcavu ne jabocu ũi cuede, Siria āmicurijoborōcavu ne jabocu ũi churaravaque Efraícavure boarānurajivu barejaquémavu. Ne jabocu Ben-adad āmicucu barejaquémavu. Cūiná mae ne boarānui-yede, Efraícavucapūravu ne darājinore majidejaquemavu. Ne nópe majiéde majicu, Siriacavu ne jabocu, Ben-adad, ũi churaravare arī jēniari járejaquemavu:

—¿Ácu páyu bárica majare jári coenínivure maje yóbore coyurī coreyu? ¿Ácu páyu bárica Efraícavure maje boarājinore coyuyu, muje majidu? arī jēniari járejaquemavu Ben-adad ũi churaravare.

Ŭi nópe arī jēniari jáiyede, cūinácu yópe arī coyurejaquemavu ũre:

—Ñujacacu diede borodayu cubebi. Jūmenijicu jiede coyucai-pōecu Eliseobe ũi joborōcavu maje boarānurajinore coyupōecu. Ŭcapūravu mi cāitucubui mi ávarede majibi. Nópe majicu, diede coyucube ũi jabocure, arī coyurejaquemavu cūinácu ũi jina churaravacacu.

Ŭi que aiyede jápiayu, jorojīni vaidéjaquemavu Ben-adad. Nópe jorojīnu, Eliseore jēicōjenejaquemavu ũi churaravare. Nópe ũi jēicōjeiyede, Dotán āmicurīmaroita, Eliseo ũi curīmaroita, ũre earejaquemavu ina churarava. Noita eaivu, diīmarore tarabutedejaquemavu. Que teni mie tuiyede, Eliseo ũi yebacacu ina churaravare jánu, yópe arejaquemavu:

—Aiyá, ¿aipe darājidi maja? arī jēniari járejaquemavu Eliseore.

—Jidubejacu. Majacavu churarava obedivu bajubu. Majare jári coenínivu pueno majacavu churarava cuma, arī coyurejaquemavu Eliseo ũi yebacacure.

Que arī buojari, Jūmenijicui churaravare ñai yebacacu ũi jáiyede ucu, Jūmenijicure jēniarejaquemavu Eliseo. Ŭi nópe jēniaiyede, Jūmenijicu ñai yebacacure ũi churaravare jádovarejaquemavu. Dotán āmicurīmaro yebai curicūa cūrācūai ure jāturuicūa cojidicūa aru caballova cojidivu toaque járorejaquemavu. Ángeleva máre churaravape járorejaquemavu. Na

Eliseore jári coreivu barejaquemavu. Que teni ũi yebacacu náre járejaquemavu. Aru Eliseo Jūmenijicure yópe arejaquemavu:

—Yacorua jári eabede dajacu ñujare jári coenínivare, arejaquemavu ũ.

Ũi que aiyede, yacorua jári eabede darejaquemavu Jūmenijicu ina churaravare, Siriacavure. Ũi que daiyede jáñu, Eliseo ina churaravare apemaita nuicōjenejaquemavu. Nópe ñayu, Samariaita nuvarejaquemavu náre. Ne noita eaiyede, Eliseo Jūmenijicure yópe arejaquemavu cojedeca:

—Bedióva cojedeca járe dajacu náre, arejaquemavu ũ Jūmenijicure.

Ũi que aiyede, Jūmenijicu ina churaravare járe darejaquemavu bedióva cojedeca. Náre jári coenínivu ne ĩmaroi curejaquemavu. Ũbenita aipe darĩ majibedejaquemavu. Que teni diĩmarocacu jabocu, Joram, náre, Siriacavu churaravare, boarĩ jaruvaicōjenidurejaquemavu. Ũbenita ũi boarĩ jaruvaicōjeiyedeca, Eliseo náre boarĩ jaruvaicōjemenejaquemavu. Náre āiyede jícōjeñu, ne joborōita copaicōjenejaquemavu. Nópe ũi cōjeiyede, ñai jabocu Joram nopedeca darejaquemavu. Aru ina Siriacavu Efraicavure boarĩ dajocarĩdurejaquemavu.

No yóboi, Siria āmicurijoborōcacu jabocu, Ben-adad, ũi churaravaque bedióva cojedeca Efraĩn āmicurijoborōcavaque boarānurejaquemavu. Que teni Samariare tarabutedejaquemavu. Aru nore joe curejaquemavu, “Ne āiye cūijádeni” aivu. Que teni obedivu Samariacavure āvué yaidé darejaquemavu. Āiye cubeno pare bojecurejaquemavu āiye. Dinumure cūináco āvué yaiyó mamajicure boarĩ, ũre ārejaquemavu. Ne nópe āmeno vaiyede jáñu, ne jabocu Joram Eliseore yópe arĩ dápiarejaquemavu: “Eliseo boje āmeno vaivubu ñuja caride. Caride ũre boarĩ jaruvaicōjecuyumu”, arĩ dápiarejaquemavu Joram. Que arĩ dápiayu, Eliseore ũi jipobure buraicōjenidurejaquemavu. Nópe cōjeñu, cūinácu churarare Eliseore jēcōjени jarorĩdurejaquemavu. Nópe jarorĩduyu, ũi jaroimure cujurejaquemavu. Que teni ñai churara Eliseo yebai ũi edaiyede jáñu, Eliseocapūravu ũi cūramine biedejaquemavu, “Ũre ecorĩ dainomu” ayu. Ñai jabocu Joram ũi cūramita edayu, yópe arejaquemavu Eliseore:

—Jūmenijicucapūravu majare āmeno vaidé dayube. ¿Aipe daivu ũi daquinore corenajidi maja? arejaquemavu Joram Eliseore.

Ũi que aiyede jápiayu, Eliseo yópe arī ju arejaquemavu ũre:

—Yópe abi Jūmenijicu: “Javena dinumu paiyemica iīmaro jedevacobei trigo āmicue oteiye bojecubeno bojedarājarama yócavu”, abi Jūmenijicu, arejaquemavu Eliseo.

Ũi que aiyede jápiayu, jabocure cadateipōecu yópe arejaquemavu:

—Mi aiyepe dabename. ¿Jūmenijicu cavarōita majare āiyede daroquijidi? Nópe ye dabecube, arejaquemavu Eliseore.

Ũi que aiyede jápiayu, Eliseo yópe arī ju arejaquemavu ũre:

—Javenare ji aiyé báquepedeca āiye cuquiyebu. Die āiye cuedeca, múcapūravu ye āmecubu, arī coyurejaquemavu Eliseo ũre.

Diīmarore tarabuteivu bácavu, churarava, Siriacavu, noi curejaquemavu. Ne nópe cuede, Jūmenijicu pare bujide darī, jápurare darejaquemavu, diede náre jápiaicōjeñu. Ũre caballoya jāturuiçūa bujinopedeca bujide darejaquemavu Jūmenijicu. Ũi que daiyede jápiaivu, ina Siriacavu cucumari, yópe arī dāpiarīdurejaquemavu: “Obedivu churarava majare boarādai-vubu”, arī dāpiarīdurejaquemavu. Nópe arī dāpiarīduivu, nuri cūinējaquemavu. Nópe nuivu, ne cūvae caiyede dajocarī nurejaquemavu. Ne nópe nuriburu yóboi, diīmaro biaido jedevacobe yebai yóvaicūvaivu ũmūva curejaquemavu. Na churiá pojeivu barejaquémavu. Siriacavu ne dupini cūyaiyede majibedejaquemavu. Nópe majibevu, yópe arejaquemavu ne baju:

—Yore dobarivu baru, yainájaramu maja. Iīmarore coivu baru, āvuéque yainájaramu. Járica, nurajarevu. Siriacavu churarava yebai nurajarevu. Majare ne boarī jaruvarīburu, meaquiyebu, arejaquemavu ne baju.

Que arī buojarī, Siriacavu churarava ne cāitavai earejaquemavu. Pōeva ye cubedejaquemavu. Jūmenijicu náre ũi cuavaiyede nuri cūinējaquemavu. Ne cubede jári, ina churiá pojeivu āiye ũre ne jaruvarī nuiyede eaivu, ārejaquemavu. Que teni ũre cuitótecajea ne jaruvaiyede iñejaquemavu. Que darī, yópe arejaquemavu ne baju:

—Majacapūravu iye āiyede urarō āivu, mearo torojavu maja. Maje javateicorica, majevucapūravu āmeno vaivubebu.



Que baru náre coyurānurajarevu, arī dāpiarejaquemꝯ vu ne baju.

Nópe aivu, diīmaro jedevacobei earī, noi cucure, jedevacobede coreyure coyurejaquemavu:

—Siriacavu churarava ye cubema. Ne cubedeca, ne cuvae caiye cátevu, arī coyurejaquemavu jedevacobede coreipōecure.

Ne nópe arī coyuiyede, ūcapūravu ñai jabocu Jorāre coyucunurejaquemavu. Nópe ūi coyuiyede jápiayu, ñai jabocu caballova tubarivare, churaravare, diede jáicōjeñu jarorejaquemavu. Que teni ūi churarava “Jāveneca batevú. Nuri cūináma” ne nópe aiyede, caivu diīmarocavu cūyarī nuri, Siriavavu ne

curitava bácarõita ne cuvae báquede inanurejaquemavu. Ne nópe cúyaiyede, jabocure cadateipõecu tuyure, curarĩ cobarĩ yaivárejaquemavu. Que teni dijāravui ne jaruvarĩ nuiye báquede, trigo āmicue oteiyede, edavarĩ bojecubeno bojedarejaquemavu. Dīmaro biaido jedevacobe yebai diede bojedarejaquemavu. Eliseo ũi aiyē báquepedeca darejaquemavu. Que teni “Mu iye āiyede ye āmecubu”, ũi aiyē báquepedeca āmenejaquemavu.

**Joram āmicucu Judea āmicurijoborõcavure pueno
ũi jaboteino mácarõ**

2 Reyes 8.16-24; 2 Crónicas 21.1b-22.1

(Mateo 1.8)

Efraín āmicurijoborõcavu ne pueno jabocu Joram ũi cuede, Judea āmicurijoborõcavu ne pueno jabocu Josafat bácu yaidéjaquemavu. Ũi mácuí nópe yaiyede, Josafat bácuí mácu, Joram āmicucu, jabotedejaquemavu. Nópe jaboteyu, ĩmara ũmuvare boarĩ jaruvaicõjenejaquemavu. Ye cūinácu ũre oatuvacuyure mauteicõjemenejaquemavu. Jímarepaco Atalía āmicuco barejaquémavu. Ñai jabocu Acab bácu ũi máco barejaquémavu. Aru ũi mácupedeca āmeco barejaquémavu õ máre. Nópe õi cuede, jímarepaco máre, Jorāre āmeno darejaquemavu. Ũi nópe āmeno ñaiye boje, Jūmenijicu ũre ñājine darejaquemavu. Ijié tede darejaquemavu ũre. Nópe ijié teyu yaidéjaquemavu. Nópe ũi mácuí yaiyede, ũi mácu piniducacu, Ocozías āmicucu, Judea āmicurijoborõcavure pueno jabotedejaquemavu.

**Jehú āmicucu jabocu Acab bácu ũi cūramicavure ũi
boarĩ jebeino mácarõ**

2 Reyes 8.25-10.36; 2 Crónicas 22.2-9

(Apocalipsis 16.16)

Judea āmicurijoborõcavu ne pueno jabocu Ocozías āmicucu āmecu barejaquémavu. Jípaco āmeco õi cuede jáñu, āmeno darejaquemavu.

Dinumure cūinácu Jūmenijicu jiede coyucaipōecu Jehú āmicucu yebai earejaquemavu. Jehúcapūravu Efraín āmicurijoborōcavu churarava ne jabocu barejaqué-mavu. Ũi nópe eaiyede, ñai Jūmenijicu jiede coyucaipōecu Jehú ũi jipobui olivocu āmicuricu jēidua córoque yuarī tuorī, yópe arejaquemavu ũre:

—Mure yuarī tuovu yu Efraícavu ne pueno jabocure, mi tequinore jádovañu. Que baru mūcapūravu ñai jabocu Acab bácu ũi cūramicavure boarí jebecuyumu. Jūmenijicure memecaivure ũi boarí jaruvaiye báque boje, jímarepaco Jezabede máre, ōi āmeno ðaiye boje, népāramenare boarí jebejacu mu. Mi nópe ðaru, névu cūinácu ye mautebenama, arī coyurejaquemavu ñai Jūmenijicu jiede coyucaipōecu Jehúre.

Ũi nópe arī coyurī buojaiyede, Jehú ũ jina churaravaque nari, Efraícavu ne jabocure, Jorāre, boarí jaruvarejaquemavu. Judeacavu ne jabocure, Ocozíare máre, boarí jaruvarejaquemavu. Na pucarā mácavu Acab bácu jivu bácvu barejaqué-mavu.

Que ðarī buojarī, Jezabel yebai earī, uradāmi cūrami ũmucatucubui ōi cuede járejaquemavu Jehú. Nópe jáñu ōre, ōi yebacavure órejarejaquemavu ũ. Ōre ũmucatucubui jáicobei japuporī, najuáicōjenejaquemavu náre. Ũi nópe cōjeiyede, ũi aiye báquepedeca ðarejaquemavu na. Ne nópe japuporī najuáiyede, yaidéjaquemavu ō máco. Que teni caivu Acab bácu jivure boarí jaruvaicōjenejaquemavu Jehú. Que teni Jūmenijicu Elías ũi coyuiye báquepedeca Acab bácu jivure yainí cūiné ðarejaquemavu. Dinumure Jehú Efraícavu ne pueno jabocu barejaqué-mavu. Veintiocho paiujua baju ũi jaboteniburu yóboi yaidéjaquemavu. Ũi mácuí nópe yainíburu yóboi, mamacu Joacaz āmicucu nócvure pueno jabotedejaquemavu.

Joás āmicucu Judea āmicurijoborōcavure pueno ũi jaboteino mácarō

2 Reyes 11-12; 2 Crónicas 22.10-24.27

(Mateo 23.35, Lucas 11.51, Hechos 7.52, Hebreos 11.32-38)

Atalía āmicuco ñai jabocu Joram mácu jímarepaco barejaqué-mavu. Jehú ōi mácu Ocozías bácvure ũi boarí jaruvaiyede

jádo, ócapūravu Judea āmicurijoborōcavu ne jaboco teiyurejaquemavu. Nópe teiyuco, apevu David bácu ũi pāramena curipinidu teivure boarí jebeicōjenidurejaquemavu.

Que teni ócapūravu Judea āmicurijoborōcavu ne jaboco baridurejaquemavu. Ūbenita Joram mácu máco, Josaba, cūináji-cure, Ocozías bácu mára néyojīcu bajure, yavedejaquemavu, “Nijicure boainomu” ado. Nópe yavedo, ō jímarepacuque niji-cure jári capurejaquemavu. Jímarepacu, Joiada āmicucu, Jūmenijicure memecayu sacerdote barejaquémavu. Na Jūmenijicui cūramicatucubui ũre yaveni, jári capurejaquemavu. Nijicu Joás



amicucu barejaquemavu. Que teni seis paiujua baju nijicure jári capurejaquemavu.

Siete paiujua ũi cavaede jáñu, Joiada Joáre Judea amicurijoborôcavure pueno jabojaicoiyurejaquemavu. Aru obedivu Judeacavu ũre jabojaicoiyuriva ne cuede jáñu, ũre jabojacorejaquemavu. Obedivu pôeva ne jáinoi nópe ũi jabojaicoiyede, ina pôevacapŭravu torojurĩ, yuriarejaquemavu. Ne nópe yuriiyede jápiado, ico jaboco Atalía Jŭmenijicui cŭrami jácoearejaquemavu. Nópe eado, náre jádo, codoboborejaquemavu:

—Yure ne jabocore jaruvaivubebu, arĩ codoboborejaquemavu.

Nópe codobobodore jápiayu, Joiada churaravare ôre boarĩ jaruvaicôjenejaquemavu. Que teni ôre boarĩ jaruvarejaquemavu na.

Que baru dinumu Judeacavu ne jabocu barejaquemavu Joás. Ũi jueodojicu baede, ñai sacerdote Joiada ũre cadatedejaquemavu. Jŭmenijicure ũi mearore jíquiyepe ayu, ũre cadatedejaquemavu. Que baru mearo ðarĩdurejaquemavu Joás. Ũbenita ñai sacerdote Joiada bácu yainĩburu yóboi, Jŭmenijicu baju ámevure mearore jĩni búrejaquemavu Joás. Que teni Jŭmenijicu ũ jiede coyucaipôevare jarorejaquemavu, Judeacavure “Jŭmenijicu bajure mearore jĩjarãri” ayu. Náre ũi nópe cõjeiyedeca, ñai jabocu Joás jápiaiyubedejaquemavu. Cũinácu Jŭmenijicu ũi jaroimu, Zacarías amicucu barejaquemavu. Ũ Joiada bácu mácu barejaquemavu. Yópe arĩdurejaquemavu ũ náre:

—Jŭmenijicu ũi ðaicõjeiyede vainĩ tuivubebu muja. Que baru ámeno vainájaramu muja. Ũcapŭravure muje jaruvaiyede jáñu, mujacapŭravure jaruvacuyume ũ, arĩ coyurejaquemavu pôevare Zacarías.

Ũi nópe arĩ coyuiyede ubedejaquemavu ñai jabocu Joás. Nópe ubeacu, Zacariare cŭraboaque duvarĩ, boarĩ jaruvaicôjenejaquemavu ina pôevare. Ũi nópe cõjeiyede, Jŭmenijicui cŭrami yebai cŭraboaque duvarĩ, boarĩ jaruvarejaquemavu ũ mácu. Nópe ámeno ðayu, Joás Zacarías bácu pacu bácu ũi cadateiye báquede ũre árumenejaquemavu. Jĩpacu bácu, Joiada bácu, jipocamia Joáre me jári capurejaquemavu, apecu ũre ũi boarĩ jaruvaiyuede. Ũi nópe mearo cadateiye báquede ye árumecu Joás, Joiada bácu mácu nópe boarĩ jaruvaicõjeñu. Ũi nópe ámeno ðaiye boje, apecu ũ mácu boarĩ jaruvarejaquemavu. Ũ

mácuí yainíburu yóboi, mamacu Amasías ámicucu Judea ámicurijoborôcavu ne pueno jabocu barejaquémavu.

Judea ámicurijoborôcavure Jūmenijicu jiede Joel ámicucu ũi coyucaino mácarô

Joel 1-3

*(Hechos 2.16-21, Romanos 10.13, Apocalipsis 6 12, 17, 8.12,
9.7-9, 14.15, 20, 19.15)*

Dinumure Judea ámicurijoborôre obedivu mujuñuvare aru apevu júvare máre jarorejaquemavu Jūmenijicu. Nócavu ne oteiyede ári jebedejaquemavu ina júva. Que teni obedivu pôeva ávué yaidéjaquemavu. Aru ocabede darejaquemavu Jūmenijicu. Nópe dayu, ũ jiede coyucaipôecure, Joel ámicucure jarorejaquemavu, Judea ámicurijoborôcavure coyucôjeñu. Que teni yópe arí coyurejaquemavu:

—Yure jápiajarā muja. Caride maja ámeno baju vaivubu. Maje oteiyede ári jebedama. Que baru maja chīori vaivubu. Que baru Jūmenijicure jēnارانujara muja. Caride trigo ámicue Jūmenijicure maje jíjuroe cubevu. Ijāravu cūinope teinomu caride. Nopedeca teiyede, bedióva Jūmenijicure muje mearore jidu, muje ámeina teiyede jáveneca muje chīoru, ũ muje ámeina teiyede árumetecuyume. Nópe árumeteyu, apenumu mearo cure dajebu mujare cojedeca. Jūmenijicu majaque cūiná jorojímemi. Majiépeda darí buibi. Que baru majare ámeno vaidé daiyubi. Ubenita muje ámeno daiyede meyuyaino cubeno, chīoiye jauvu mujare. Que baru muja, bucuvare, mujevare cuturí cójijovajarā. Nópe cójijivu, áiyede ámevava, maje ámeno teiyede maje chīoiyede jádovarajaramu. Que teni sacerdoteva Jūmenijicure jēniari tuorājarama pôeva ne mearo vainájiyepe aivu, arí coyurejaquemavu Joel Judeacavure.

Ũi que aríburu yóboi, ũi aye báquapedeca darejaquemavu na. Ne nópe daiyede, Jūmenijicu ne jēniaiyede jápiayu, cadate-dejaquemavu náre. Que teni mujuñuvare aru júvare máre ne joborôí puque jarobedejaquemavu. Que teni yópe Jūmenijicu ũi yáyaiyede arejaquemavu Joel náre:

—Bedióva cojedeca mearo curājaramu muja. Bedióva áiyede cavarājaramu muja. Nópe cuvarivu, yúque torojurivu, yure



mearo yávarājaramu muja. Aru yópe dacuyumu yu ānijāravua buojaquijijāravua baquiyéna. Darocuyumu ji Espiriture caivu pōevare. Mujemara, aru mujeromiva máre, Jūmenijicui yávaiyede coyucarājarama. Mujacavu ūmava bojvu aparivure yópe decoboainope majide dacuyumu

yu. Aru mujacavu ūmava bucuvare majide dacuyumu yu deco-boainoque. Jāve ānijāravua baquiyéna darocuyumu ji Espiriture yure memecaipōevare, ūmuvare aru nomivare máre, ne coyucarājiyepe ayu ji yávaiyede. Dacuyumu yu pōeva ne jāmene cavarōi aru ne darī majibede joborōi. Aru pōeva jārajarama jivede, toare, aru bicore máre, caino jidojarō, ji jádovaquiye jipocare náre. Jūmenijicui nājiovaquijijāravu baquinó jipocare pōevare, ne āmeina teiye boje, nāi aviá pēomecuyume. Quédata nēmitēcuyume ū. Aru aviá nāmicacu máre jūatecuyume yópe jivepe. Yópe vaiquíyebu maje jabocu ūi daquijijāravu baquinó jipocare. Pōeva jārajarama urarō ne darī majibede. Aru ne jāiyyede diede pare cūecumarajarama na. Dijāravua baquiyéna meadacuyumu caivu ina órejaivure yure ji cadatequiyepa aivure náre. Ícuyumu náre abujuvai jabocui paruéde jocarī, arī coyurejaquemavu Joel Jāmenijicu ūi yávaiyede náre.

Die caiye ūi aiyē báquepedeca nuquiyebu ijaborō cūiquíye jipocare.

**Joacaz, Joás, apacu Jeroboam máre Efraín
āmicurijaborōcavure pueno ne jaboteino mácarō
aru Amasías Judea āmicurijaborōcavure pueno ūi
jaboteino mácarō**

2 Reyes 13.1-14.24; 2 Crónicas 25

No yóboi, nāi jabocu Jehú bácu, Efraín āmicurijaborōcacu, ū mácu yainíburu yóboi, mamacu Joacaz āmicacu jabotedejaquemavu. Diecisiete paiujua baju jabotedejaquemavu. Ina pucarā oteivecuvare úruque ne pēpeimarare mearore jidejaquemavu ū,

apecu Efraícavu jabova bácvu ne daiye báquepedeca. Ñi nópe daiye boje, Siria ámicurijoborôcavu náre boarí, vainí ture darejaquemavu Jūmenijicu. Ne nópe vainí tuiyede, Efraícavu Siriacavure ne boje íyede bojedarejaquemavu. Ne que daiyede, ñai jabocu Joacaz Jūmenijicure jēniarejaquemavu, Efraícavure ñi cadatequiyepa ayu. Ñi nópe jēniayede, Jūmenijicu Efraícavure Siriacavure vainí ture darejaquemavu. Ñai jabocu Joacaz bácu yainíburu yóboi, mamacu Joás ámicucu jabotedejaquemavu. Ñi máre pucarā ina otevecuva úruque ne pēpeimarare mearore jídejaquemavu.

Que darí, Efraícavu ne pueno jabocu Joás ñi jaboteni búriburu yójiboi, Amasías ámicucu Judeacavure pueno jabotedejaquemavu. Ñi apecu Joás bácu mácu barejaquemavu. Ñcapūravu meacu barídurejaquemavu jabocu cucu. Nópe jaboteyu, jípacu bácu boarí jaruvaivure boarí jaruvaicōjenejaquemavu. Ñbenita nēmarare boarí jaruvaicōjemenejaquemavu. Jūmenijicu ñi aye báquepedeca, ne bucuva ne ámeno daiye boje ñájíñama. Ne bucuva ne ámeno daiye boje, ñájimema nēmara. Que baru nēmarare ñájine daicōjemenejaquemavu ñai jabocu Amasías.

No yóboi, ñi churaravare cójijicōjeni, Edom ámicurijoborôcavuque boarānurejaquemavu. Nópe boarānuivu, Edōcavure vainí turejaquemavu. Ne nópe vainí taríburu yóboi, ñai jabocu Amasías mearo dabedejaquemavu. Ina Edōcavu ne mearore jímarare “Jūmenijinamu” arí, ne pēpeimarare ñi, copaini darejaquemavu. Nácapūravu parué cuvabedejaquemavu. Paruéde cavarivu baru, Edōcavure cadatejebu ne boarú. Nópe ne parué cuvabedeca, ñai jabocu Amasías náre ñi, copaini darejaquemavu. ñi, edavarí, áimarare boarí, mearore jídejaquemavu ina pēpeimarare. Ñi que daiyede jáñu, jorójinejaquemavu Jūmenijicu. Nópe jorójíñu, ina pēpeimarare ñi mearore jíye boje, Efraícavure Amasías ñi ímarore, Jerusaléne, jaruvaicōjenejaquemavu. Que teni Efraícavu Judeacavu Jerusaléita curivuque boarí vainí turejaquemavu. Nópe vainí tuivu, dímarocabaidore, cūraboaque ne daibiaido bácarōre, cūinápūravu totarí najuárejaquemavu. Que teni Jūmenijicu ñi cūramique bojecuede aru ñai jabocu cūramique bojecuede máre ñi nuvarajaquemavu.

No yójĩboi, Eliseo ijié teyu barejaquémavu. Ûi yaiquíye jipocai, ñai jabocu Joáre yópe arejaquemavu:

—Siriacavuque boaivu, náre vainí turājaramu muja. Jūmenijicu mujare cadatecuyume, arĩ coyurejaquemavu Eliseo ũre.

Que teni Eliseo bácuí yainíburu yóboi, ũi aiyé báquepedeca Joás ũi churaravaque Siriavure boarí vainí turejaquemavu. No yóboi, Joás bácuí yainíburu yóboi, mamacu Jeroboam āmicucu Efraíavure pueno jabotedejaquemavu. Û máre apevu Efraíavure ne jabova bácvu ne ðaiye báquepedeca, úruque ne pēpeimarare mearore jidejaquemavu.

Que teni Joás bácuí yainíburu yóboi, Judeavure ne pueno jabocu Amasías obediuvu curejaquemavu. No yóboi, apevu pōeva ũre boarí jaruvarejaquemavu. Û mácuí yainíburu yóboi, mamacu Uzías āmicucu Judeavure pueno jabotedejaquemavu.

**Jūmenijicu jier e coyucaipōecu Jonás āmicucu
Efraín āmicurijoborōcavure aru Nínive
āmicuriīmarocavure ũi coyuiño mácarō**

2 Reyes 14.25; Jonás 1-4

(Mateo 12.39-41, 16.4, Lucas 11.29-32)

Jeroboam Efraín āmicurijoborōcavu ne pueno jabocu ũi cuede, Jonás āmicucu curejaquemavu. Û Jūmenijicu jiede coyucaipōecu barejaquémavu. Jūmenijicu ũre ũi coyucōjeiyepedeca coyurejaquemavu Jonás Jeroboāre. Apeno joborōcavuque Efraíavure ne boarí vainí turājínore coyurejaquemavu Jonás ũi jabocure. Ûi nópe arĩ coyuiye báquepedeca, vainí turejaquemavu na apeno joborōcavure. Que teni Jūmenijicu ũi cadateinoque Efraíavure mearo curejaquemavu.

Cūinájāravu Nínive āmicuriīmarocavure coyucōjeñu jarorejaquemavu Jūmenijicu Jonáre. Nínive Asiria āmicurijoborōcāmaro, jabocu ũi īmaro marejaquémavu. Nócavu ne āmeno ðaiyede coyucōjeñu jarorejaquemavu Jūmenijicu Jonáre. Ûi nópe nuicōjeiyedeca, nuiyubedejaquemavu Jonás. Ina Nínivecavure Jūmenijicu ũi cadateiyuede jáñu, ubedejaquemavu ũi. “Isrācavu matuiyeda cadateiye javu Jūmenijicure”, arĩ

dápiarĩdurejaquemavu. Nópe nuiyubecu, uracũ jiadocũĩ jaturĩ, apeno ĩmaroi dupini nuridurejaquemavu. “Jũmenijicu yure majibecube”, arĩ dápiarĩdurejaquemavu. Ubenita nópe ũi dupini nuiyede majicu, parurõ ũmevu nure darejaquemavu Jũmenijicu. Que teni urarõ oco darejaquemavu. Diya jia urada uraboa pâcaiboa darejaquemavu. Aru dicũ jiadocũre jacoie jidojarejaquemavu. Nópe nuiyede jáivu, dicũĩ curivu jidurivu vaidéjaquemavu. Nópe jidurivu, “¿Ácu boje nópe teidi?”, arĩ majiyurivu duvarĩ yajurejaquemavu. Nópe duvarĩ yajuivu, Jonás ũi cue boje majidejaquemavu na. Nópe maji-divu, ũre jēniari járejaquemavu:

—¿Aipe painoque maja caride āmeno vaivuba? ¿Aipe dacurũ mu? arĩ jēniari járejaquemavu na.

Ne nópe arĩ jēniari jápiaiyede ju arejaquemavu:

—Jũmenijicu dupiyu barĩduvu. Nópe ji dupiye boje, que nuivu. Yure cututurĩ jaboájarā. Muje yure nópe jaruvavu, oco aru ũmevu máre vaiquíyebu, arĩ ju arejaquemavu Jonás.

Ũi que aiyede jápiaivu, na ũre jaruvaiyubevuvacari, ũre cututurĩ jaboárejaquemavu. Ũmevu, ocoque parurõ daiyede jáivu, ũre que darejaquemavu. Ne nópe daiyede, cūiná oco, ũmevu vaidéjaquemavu. Nópe vaiyede jáivu, dicũĩ curivu Jũmenijicu ũi paruéde majidejaquemavu.

Que teni diya jiaita ne jaruvaimure uracu moacu ũre járú-rejaquemavu. Jũmenijicu ũi jaroimu moacu barejaquémavu. Que teni moacu yapibu jívuita apucu ĩmarejaquemavu Jonás. Yóbecurijāravua baju ĩmarejaquemavu ũ ũi yapibu jívui. Noi ĩmacu, Jũmenijicu jēniarejaquemavu. Que teni Jũmenijicu moacunque ũre meadarejaquemavu, ũi yaibéquiyepe ayu jiai. Jũmenijicuque torojucu, ũre “Meavu” arejaquemavu. Que teni yóbecurijāravua yóboi moacure bijore darejaquemavu Jũmenijicu. Nópe bijoyu, Jonáre ēpacũita bijorĩ jūarejaquemavu. Ēpacũita ũi cuede, bedióva Nínivecavure coyucōjenejaquemavu Jũmenijicu ũre. Ũi que arĩburu yóboita, Jonás ju arejaquemavu. Que teni Nínivecavure yópe arĩ coyucunurejaquemavu:

—Caride Jũmenijicu iĩmarore jaruvarĩ jebecuyume, arĩ coyurejaquemavu nócavure.

Ũi que aiyede jápiaivu, nócavu pare chĩorejaquemavu. Que teni ne jabocu caivu diĩmarocavure yópe daicōjenejaquemavu:



—Carid āiyede ye āmenajarevu. Que baru maje āmeina teiyede chīri dajocarājarevu. Maje nópe daiyede jáñu Jūmenijicu majare ñájine dabequijichubi. Que baru iīmarocavure jaruvabequijichubi, arejaquemavu ñai jabocu ũi pōevare.

Ũi que aiyede, ũi aiye báquepedeca darejaquemavu ina pōeva. Ne āmeina teivede ne chīoiyede jáñu, diīmarocavure jaruvabedejaquemavu Jūmenijicu.

Nópe náre ũi jaruvaiyubede majicu, chīorejaquemavu Jonás. Ina Nínivecavure Jūmenijicu ũi mearo daiyede jáñu, jorojīnejaquemavu ũ. “Israecavu matuiyeda mearo daiye javvu Jūmenijicure”, arī dāpiarīdurejaquemavu. Que baru yópe arejaquemavu Jūmenijicure:

—“Nínivecavure ne āmeina teiyede ārumetecayumu mu”, arī dāpiarīduvu. Nópe arī dāpiarīduyu, jiadocūita jaturī, apeno iīmaroita dupini nuriduvu. Pōevare mearo dayu mi

cuede majituvu yu. Ubenita ina Israecavu ámevu ne ámeno daiye boje, mi ñájine daru uríduvu yu. Mi nópe dabede jáñu, chñori vaivu yu. Caride ji apuru, ye baquiyé ámevu. Que baru yure yaidé ñajacu, arejaquemavu Jonás Jūmenijicure.

Ũi que aiyede, yópe arejaquemavu Jē nenijicu:

—Īmarocavure ji mearo daiyede meavu. Que baru ne ámeina teiyede ji ārumeteiyede meavu, arī ju arejaquemavu Jūmenijicu Jonáre.

**Jūmenijicu jiede coyucaipōecu Amós āmicucu
Efraín āmicurijoborōcavure ũi ccyuino mácarō
Amós 1-9**

(Hechos 7.42-43, 15.16-18, Apocalipsis 6.17, 8.3, 10.5-7)

Efraín āmicurijoborōcavu ne pueno jabocu Jeroboam ũi cuede, Jūmenijicu ũ jiede coyucōjenejaquemavu Amós āmicucure. Nócavure yópe arī coyuyu barejaquémavu:

—Yópe abi Jūmenijicu mujare: “Mujeñecuva javecavu bácvu Egiptoi ne cuede na mácvure jaetovarejacacu yu. Ijoborōi curivure apevure beobedejacacu. Mujacapūravure jina mārājivure beorīdurejacacu. Nópe ji beoīyedeca, ji ñaicōjeiyede vainí turejavū muja. Cainumua no cuarenta pñajua mujeñecuva mácvu ne cuede pōecubenoī, yure āimarare boarí juarí, jāmúori, jibedejaquemavu. Aru ape jiyede máre jibedejaquemavu yure. Ñai jūmenijicu, ũi āmiá Moloc, ũi cūramine, āimacajeaque ñaiñamine, nuvarejaquemavu. Aru ñai jūmenijicu, ũi āmiá Refán, ũi pēpeimure yópe abiácorupe páyure máre nuvarejaquemavu. Dinumure iye ne pēpeimarare daiye báque boje, aru mearore jíye boje náre, muje mauvare nuvaicōjecuyumu yu mujare muje joborōre jocarí pu Babilonia āmicurō ānipūravuita. Que baru mujare ñájine ñacudayubu. Mujare jári coenínivure muje yebai jarocuyumu. Nópe ñaiva mujaque boarí, vainí tarājarama. Javede obedivu júvare muja, Efraícavu, muje joborōita jarocacu. Que baru āiye cubeno nure ñacacu muje joborōi. Mujare ji nópe ñájine ñaiyedeca, ji ñaicōjeiyepe ñabeteavū muja. Que baru mujare ji ñájine ñaquinore coyuyubu mujare. Mujare jári coenínivu obedivu mujare boarí

jaruvarājarama. Que teni muje joborōre cūiné dacuyumu yu. Mearo cuiyurivu baru, pēpeimarare mearore jibejarā. Ina pēpeimara ye baquiyé āmema. Yure mearore jivu apevure mearo dajarā muja. Mujacapūravu mearo dabetevu apevure. Pēpeimarare muje mearore jíye boje, apeno joborōita cuicōjeñu jaroquijivu mujare. ‘Apevure majini, vainí taivu’, arí dápíarīduivu muja. Muje nópe cuede jáñu, mujare jári coenívu yu. Que baru mujare ñájine dacuyumu. Nai jabocu Jeroboam ũi cūramicavure máre boarí jaruvarí jebecuyumu. Que baru yure na mearore jíbevure, apevure paivure, ne mearore jícaivare jaruvarí jebecuyumu”, arí coyubi Jāmenijicu mujare, arí coyurejaquemavu Amós Efraícavure.

Ũi que aiyede jápiayu, úruque ne daimure, oteivecure, mearore jícōjeñu sacerdote, jorojīñu yópe arejaquemavu Amóre:

—Judeacavure coyucunujacu. Yore coyucudabejacu, arejaquemavu ũ Amóre.

Ũi que aiyede, Amós yópe arejaquemavu ũre:

—Ovejavare coreipōecu barīduvu yu. Ji nópe cuedeca, Jāmenijicu Efraícavure ũ jiede coyucōjemí yure. Yure mi coyucōje-



meneca, yópe arī coyūquijivu mure: Apevu mímárame boarí jaruvārājarama. Aru mimarepacore ĩnajarama. Nópe ĩvu óre, apevu ũmuvaque āmeno daicōjenajarama. Que teni apevu pōeva mi joborōre ĩnajarama. Que baru múcapūravu apeno joborōi cucu yaicúyumu. Caivu muja Efraícavure ñájine dacuyu, mujare apeno joborōita nuri coatede dacuyume Jūmeni-jicu, arī coyurejaquemavu Amós ñai sacerdotede, nécu oteive-cure mearore jícōjeñure.

Que teni yópe arejaquemavu Jūmenijicu Amóre:

—Yóboreta Efraícavure coyubecubu yu. Ji coyuiyede jápiai-yurivuvacari, jápiabenama na. Yure mearore jíbevu, apevure paivure mearore jíyama na. Ne nópe daiye boje, ñájine dacuyumu náre. Āmeno vainájarama. Que teni ji ñájine daquinore dupibenama na. Ne joborō Efraín āmicurijoborōre cūiné dacuyumu yu. Ũbenita ina pōevacapūravure boarí jaruvārī jebebecubu yu. Ina ji daicōjeiyede dabevu yainájarama. Yu Jūmenijicutamu. No yóboi copaidacuyumu yu. Pōevare yure mearore jíde dacuyumu yu, yópe ne mearore jíye báquepe yure David bácu jaboteinumu mácarōre. David bácu pāramena curipinidu teivu bácvu ne jaboteino cūinotamu, nopedeca cūiná-dami cūrami tuiñamipe. Ũbenita parure dacuyumu yu cojedeca cūinácure népāramenacacu curipinidu teyu bacuyáre, ũi jabotequiyepe ayu bedióva yópe pōeva mamađami cūramine ne daiyepe tuiñami mácarōquede. Yópe dacuyumu yu judíova ānevure, ne vorājiyepe ayu yure, ne jabocure. Que teni caivu ji beoimara mácvu jina mārājivutamu. Dinumu maquinóre Efraícavure ne joborōita copaide dacuyumu yu. Que teni dijoborōi mearo curājarama. Que teni bedióva jaruvabecubu yu náre, arī coyurejaquemavu Jūmenijicu Amóre.

Uzías āmicucu Judea āmicurijoborōcavure pueno ũi jaboteino mácarō

2 Reyes 15.1-7; 2 Crónicas 26

(Mateo 1.8-9)

Efraín āmicurijoborōcavu ne pueno jabocu Jeroboam ũi cuede Amasías bácu mácu Judea āmicurijoborōcavu ne pueno

jabocu barejaquémavu. Ñ Uzías āmicucu barejaquémavu. Ñ bojuyo cāreja, Jūmenijicu ũi ðaicōjeiyede vainí tubedejaquemavu. Que teni apevu pōevaue ũi churarava ne boaiyede, Jūmenijicu náre cadatedejaquemavu.

Jerusalén āmicuriīmaro, apenoa īmaroare máre, cūramia náre, járī coenínivure jacotuquijiñamia jājariñamia ðarejaquemavu. Que teni apevu náre ne boarādaiyede, ne joborō Judea āmicurijoborōre jacoturī majidejaquemavu. Mamarumu mearo ðarīdurejaquemavu ñai jabocu Uzías. Ñbenita no yóbore, “Cūve upacubu yu, apevure majini vainí tuyubu yu”, arī dápiayu barejaquémavu. Que teni ārumecupe āmeno ðarejaquemavu. Jūmenijicui cūrami mumijuede juacunurejaquemavu. Cūinācu bae sacerdoteva ũre jidariva, diede juaicōjemenidurejaquemavu. Sacerdoteva matuiyeda mumijuede juaicōjenejaquemavu Jūmenijicu ũi cūrami. Ñi nópe ðaicōjemeneca, ðiñami mumijuede juarejaquemavu Uzías.

Ñi nópe ðaiye boje, churiá pojede ðarejaquemavu Jūmenijicu ũre. Que teni cūinā Jūmenijicui cūrami cucure, ũre etaicōjenejaquemavu. Churiá pojeivu ðiñamine curī majibema. Que baru ũi apurōpe Jūmenijicui cūramine ye ecobedejaquemavu cojedeca. Nópe ijié teyu, ñai jabocu Uzías ũi mácure ũi memei-yede epedejaquemavu. Ñi mácu Jotam āmicucu barejaquémavu. Aru ñai jabocu Uzías bácu yainiburu yóboi, Jotam Judeacavure pueno jabotedejaquemavu.

**Jūmenijicu jiede coyucaipōecu Oseas āmicucu
Efraícavure aru Judeacavure máre ũi coyuiño
mácarō**

Oseas 1-14

(Mateo 9.13, 12.7, Romanos 9.25-26, 1 Corintios 15.55, 1 Pedro 2.10, Apocalipsis 6.16)

Jeroboam ũi jaboteiyede Efraícavure aru Uzías ũi jaboteiyede Judeacavure, Jūmenijicu Oseas āmicucure coyuiñeñu jarorejaquemavu Efraícavure aru Judeacavure máre. Obediujua náre coyuyu barejaquémavu. Pu Ezequías āmicucu ũi jaboteiyeta coyuyu barejaquémavu.

Jūmenijicu
 Oseare nomicuicō-
 jenejaquemavu
 cūináco nomióque,
 obedivu ũmuvaque
 cūco bácore. Nópe
 ũre daicōjeñu, Jūme-
 nijicu Israecavure
 jádovacuyu bareja-
 quémavu náre ico
 nomiópe, ũre ne ju
 abe boje. Óre ũi nomi-
 curíburu yóboi, mica-
 tedejaquemavu. Aru
 ũmu jueđojícure
 cuvarejaquemavu.



Jūmenijicu Oseare
 āmidoicōjenejaquemavu nijicure Jezreel. Jeroboam mácu boarí
 jaruvarejaquemavu obedivu pōeva Jezreel āmicuríīmarocavu
 bácvure. Aru ñai Oseas ũi mácu Jezreel Efraín āmicurijoborōre
 bíjare dacuyu barejaquémavu. Ñai Jezreel bucucu nuñu Jero-
 boam mácu ũi pāramecu curipinidu teyu Jehú bácu jinacavure
 yaidé dacuyu barejaquémavu. Jezreel ũi pōeteniburu yóboi,
 Oseas jímarepaco nomi jueđojícure cuvarejaquemavu. Jūmeni-
 jicu Oseare āmidoicōjenejaquemavu nijicore Ji Ũbemo. Nópe
 āmidoicōjeñu, Jūmenijicu Efraícavure ubecuyu barejaquémavu.
 No yóboi, Oseas jímarepaco ũmu jueđojícure cuvarejaquemavu.
 Jūmenijicu Oseare āmidoicōjenejaquemavu nijicure Ji Pōeva
 Āmema. Nópe āmidoicōjeñu, Efraícavu Jūmenijicu ũi beoimara
 āmenajivu barejaquémavu. Aru yópe arejaquemavu Jūmenijicu:

—Efraícavu pēpeimarare mearore jivu yure āmeno daivubu,
 yópe nomió āmecope ōi dajocaiyede jímarepacure, cucodo apevu
 ũmuvaque. Jímarepacu óre mearo dayureca, ũre āmeno ãadobe
 ō. Que baru ñájine dacuyamu ina Efraícavure. Ũbenita cūiná-
 ravu maquinóre obedivu Israecavure “Jímaramu muja”, acu-
 yamu yu. Dinumu maquinóre Judeacavu aru Efraícavu cūiná-
 yajubope cójijinajarama. Cūinájoborōcavupe curājarama. Aru
 parurivu barājarama na, arejaquemavu Jūmenijicu.

Que arī buojarī, Jūmenijicu Oseare davaicōjenezajquemavu jímarepacore ũi cūrami cojedeca, “Ārumetejacu ōi āmeina teiyede” ayu. Nópe cōjeñu, jádovarejaquemavu ārumetecuyure Israecavure ne āmeina teiyede ũque.

Bedióva cojedeca yópe arejaquemavu Oseas Efraícavure:

—Yópe abi Jūmenijicu mujare: “Ūrarō āmeno dávaivabu muja. ‘Yópe darājaramu’ aivuvacari, muje aiyepe dabevu. Pōevare boarī jaruvaivabu. Nāvaivabu cuvede. Āmeno daivabu apevuque, mujemarebucava āmevuque. Que baru muje joborōre jocucubeno dacuyubu. Apevu mujacavu ‘Sacerdotebu yu’ aivuvacari, aru apevu ‘Jūmenijicu jiede coyucaipōecubu yu’ aivuvacari, ye ju abeni, vainí taivabu muja ji daicōjeiyede. Pēpeimarare mearore jívabu. Aru muje āmeno vaiyede yure ji cadateiyede jēniamavu, quénora Asiria āmicurijoborōcacu jabo-cure ũi cadateiyede jēniaivabu muja. Obedivu āimarare boarī, juarī, jámuóri, jívabu yure, ‘Majare ñájine dabecube Jūmenijicu’ arīduivu. Ūbenita muje juaimarare ye ubevu yu, muje ju abe boje yure. Que baru mujare ñájine dacuyubu yu. Ūbenita ji daicōjeiyede muje ju aru, yure muje mearore jídu, aru yure muje jēniaru, ocare dacuyubu muje joborōre, jocucua pīaquí-yepe ayu”, abi Jūmenijicu.

‘Aru jímacure cutucacu yu, ũi etaquiyepe ayu Egipto āmicurijoborōre jocarī, abi Jūmenijicu, arejaquemavu Oseas.

Judea āmicurijoborōcavure Jūmenijicu jiede coyucaipōecu Isaías āmicucu ũi coyuno mácarō *Isaías 1-6*

(Mateo 13.14-15, 21.33, Marcos 4.12, 12.1, Lucas 8.10, 20.9, Juan 12.39-40, Hechos 28.25-27, Romanos 9.29, Apocalipsis 4.8, 6.15, 11.8, 15.8)

Ñai jabocu Uzías ũi yaiquíye jipocai, joe ũi jaboteiyede, Isaías curejaquemavu. Jūmenijicu jiede coyucaipōecu bareja-quémavu. Que teni Judea āmicurijoborōcavure dijoborō yebai curivure Jūmenijicu ũ jiede coyucōjeñu epedejaquemavu ũre. Judeacavure coyayu, yópe arejaquemavu Isaías:

—Ñai Jūmenijicu caivu ne jabocu, ũi epebedu apevu majacavure, ne juedocvarājiyepe ayu, majare máre vaijébu yópe āniī-marocavure, Sodoma aru Gomorracavure vaiye báquepe,


caivu ina bíjaivu b́acavupe. Aru yópe abi J́ūmenijicu mujare: “Muja ‘J́ūmenijicare majivu’ aŕiduivuvacari, yure ye coreóva-bevu muja. Que baru āmenamu muja. Yópe népacu meacu ūi mearo daiyepedeca ūi ḿarare, yu mearo daivu mujare. Ūbenita muja mamara āmenape yure ju abevu. Caride mujare āmeno vaidé daivu. Que baru ćūináīmaro, Jerusalén matuiyeda, cuvavu muja. Mujare ji ńájine daiyedeca, yure jápiaiyubevu. ¿Aipe daquijidi yu mujare ju aicójeñu? Āimarare boarí, juarí, j́āmuóri muje jídu, j́arí yayuyarí ubevu yu. Yure muje jíye ye baquiyé āmevu. Yure muje mearore j́jāravua, torojuve teijāravua, máre j́arí yayuyarí ubevu. Yure muje j́ēniaru, jápiabecubu yu. Muje āmeno daiye boje, mujare jápiabecubu yu. Āmene dabejarā. Meara ćujarā. Nópe teivu, ćōmaje ārojarivure mearo dajarā. Āmeno daivuvacari, yure ju aivu baru, mearo curájaramu muja. Yure ju abevu baru, āmeno vainájaramu muja. Muja Jerusalécavu yure ju aŕiduavū muja. Pōeva meara mariduavū muja. Caride pōevare boarí jaruvaivubu muja. Que baru apevu mujare ne meyuyaicójeiyede, meyuyaivubu muja. Mujare ne bojedaríburu yóboi, meyuyaivubu muja. Que baru mujare āmeno vaidé dacuyumu bedióva yure muje ju aŕājiyepe ayu”, abi J́ūmenijicu mujare, arí coyurejaquemavu Isaías Judeacavure.

Apenumu yópe arí coyurejaquemavu Isaías:

—Yópe arí coyubi J́ūmenijicu mujare: “Yóbore caijoborócavu ji ćūrami yure mearore j́inajarama. Que teni bedióva boabé-nama. Ne nópe tequiye jipocai, muja Judeacavu āmeno vainájarama. ‘J́ūmenijinamu’ ṕēpeimarare muje arí, náre muje mearore jíye boje, āmeno vainájaramu muja. Nópe āmeno daivu, muje mearore j́imarare jaruvarájaramu muja. Muja, Judeacavu aru Jerusalécavu máre, āmena bajubu muja. Sodomacavu b́acavupedeca āmenamu muja. Muje jabova apevu pueno āmena bajubu na. Ćōmaje ārojarivure āmena dadama na. Que baru pōevare āmeno daicójedama. Mujare, Judeacavure, ji ńájine daríburu yóboi, ćūinácu bae muje āmeno daiyede ārumetecuyumu yu. Que teni Jerusalén ji īmaro maquiyébu”, abi J́ūmenijicu mujare, arí coyurejaquemavu Isaías.

Apenumu J́ūmenijicu ūi oteiuyaimua jio baquinóre yópe arí coyurejaquemavu Isaías:

—Muja, Judeacavu, oteiye curō teiyepebu. No upacu mearo jări capuyube ũi oteiye curōre. Nópe ũi jări capuiyedeca, mearua jēidua cubevu. Que teni ñai upacu jaruvacuyube ũi oteiye curōre. Ñai upacu ũi mearo jări meadaiyepedeca, Jūmenijicu mujare mearo jări meadarīdubi. Ũi que daiyedeca, meara āmetevu muja. Apevure mearo đabevu muja. Apevu ne joborōre tatoivubu muja. Muje nópe daiye boje, joarōcavure



mujaque boarí jaruvaicōjecuyume Jūmenijicu, arī coyurejaquemavu Isaías Judeacavure.

Que teni ñai jabocu Uzías bácu ũi yaiujui, Isaías Jūmenijicu paracu ũi cuede majidejaquemavu. Que teni decoboainope apucu járejaquemavu Isaías. Jūmenijicui cūrami cacu, diede járejaquemavu. Ũi nópe jáiyede, ángelevape paivu, serafín āmicurivu, codoboboivu barejaquémavu:

—Meacu, meacu bajube Jūmenijicu, arī codoboboivu barejaquémavu.

Diede jáñu, ũi baju ũi āmene chñoñu codoboborejaquemavu Isaías:

—Aiyá, āmecu bajubu yu. Que baru Jūmenijicu yure ñájine dacuyume. Apevu Judeacavu máre āmenamu, arī codoboborejaquemavu Isaías.

Ũi que arī codoboboiyede, cūinácu cavarōcacure jarorejaquemavu ũi yebai Jūmenijicu. Nópe jōdari dayu, toabuque Isaías ũi jijecāmure tuorejaquemavu. Ũ dibuque tuorī buojarí, yópe arejaquemavu Isaíare:

—Mi āmena ðaiye báquede ārumetebi Jūmenijicu, arejaquemavu ñai cavarōcacu ũre.

No yóboi, Jūmenijicu yópe arejaquemavu:

—¿Ácure jaroquijidi yu? ¿Ñamecapūravu jiede coyquijidi? arejaquemavu.

—Yu coyucunquijivu. Yure jarojacu, arī ju arejaquemavu Isaías.

Ũi que aiyede jápiayu, yópe arī coyucōjenejaquemavu Jūmenijicu ũre:

—Judeacavure yópe arī coyujacu: “Jāve jápiarīdurājaramu muja. Ũbenita ye jápiarī eabenajaramu. Jāve járidurājaramu muja. Ũbenita ye jári eabenajaramu. Muja coreóvayubevu, muje yávaiyede jāvene jápiarī eaiyube boje. Muja jápiabevu, muje yávaiyede jāvene jápiaiyube boje. Muja bieivu muje yacoruaire, muje jāvene jáiyube boje. Yure jári coreóvaivu baru muje yacoruaque, ju ajebu muja. Yure jápiaivu baru muje cámuco-beaque, ju ajebu muja. Yure jápiarī adaivu baru muje ũmeque, ju ajebu muja. Que ðaivure meadajebu yu mujare. arī coyucunjacu náre”, arejaquemavu Jūmenijicu Isaíare.

**Jotam aru Acaz āmicurivu Judea
āmicurijoborōcavure pueno ne jaboteino mácarō
2 Reyes 15.32-16.20; 2 Crónicas 27-29; Isaías 7.1-9.7**

(Mateo 1.9, 23, 4.15-16, Lucas 1.79, Hebreos 2.13, 1 Pedro 2.8, 3.14-15)

Ñai jabocu Uzías bácu i yainíburu yóboi, ũ mácu mácu Judea āmicurijoborōcavure pueno jabotedejaquemavu. Ũ Jotam āmicucu barejaqué mavu. Meacu barejaqué mavu. Jūmenijicu ũi daicōjeiyede vainí tubedejaquemavu. Que teni Jūmenijicu ũre cadatedejaquemavu. Amón āmicuriyajubocavuque boarí, vainí turejaquemavu náre. Aru Jerusalén āmicuriĩmaro biaidore meadarejaquemavu, náre jári coenínivare jacotarājivu. Dieciseis paiujua baju jabotedejaquemavu. Que teni yaidéjaquemavu. Ũ mácu i yainíburu yóboi, mamacu Acaz āmicucu jabotedejaquemavu.

Jaboteyu, pōecu āmecu barejaqué mavu ñai Acaz. Jūmenijicure vainí turejaquemavu. Apevu jabova, Efraín āmicurijoborōcavu ne jabova bácvu ne āmeno daiye báquepedeca āre no darejaquemavu ũ máre. Nópe āmecu, ũi mārare boarí, juarí, jāmuóri, jūmenijicu āmecure náque mearore jíyu barejaqué mavu. Ũi nópe daiye boje, ñájine darejaquemavu Jūmenijicu ũre. Siria āmicurijoborōcavure aru Efraícavure máre ñai jabocu Acaz ũi joborōcavuque, Judeacavuque, boaré darejaquemavu. Que teni Acare ñájine dayu barejaqué mavu.

No yóboi, Siriacavu aru Efraícavu máre bediōva Judeacavuque boarādaiyurivu barejaqué mavu. Nópe ne daiyede jáñu, Jūmenijicu Isaíare coyucōjeñu jarorejaquemavu Acaz yebai. Noi eayu, yópe arejaquemavu:

—Yópe abi Jūmenijicu: “Jerusalécavu, mearo curājaramu muja. Sesenta y cinco paiujua vaiquíye jipocai, Efraícavu ne joborō cūiquíyebu. Cūináco nomió jue dojícure cavacodome. Ārucu ũi nuiyede, bucucu ũi teiye bajure, Asiria āmicurijoborōcavure aru Efraícavure máre boarí jaruvarí jebenajarama. Que teni muje jabocu bacuyú apecure jarocuyume Jūmenijicu. Ũi jaroimu ñai jabocu David bácu ũi pāramecu curipinidu teyu bacuyúme. Ũ jabocu ũi cuede Judeacavu mearo curājarama. Que teni jabocu meacu, parucu bacuyúme”, abi Jūmenijicu, arí coyurejaquemavu Isaías Acare.

Ëi nópe arĩ coyuiyedeca, ñai jabocu Acaz jápiaiyubedeja-
quemavu. Que teni Jūmenijicure āruri parubedejaquemavu.
Nópe āruri parubecu, pēpeimarare mearore jídejaquemavu.
Nópe mearore jíyu, Jerusaléita apegare daicōjenejaquemavu,
pēpeimarare mearore jácaivare. Dieciseis paiujua jabotedeja-
quemavu. Aru no yóboi yaidéjaquemavu. Ë mácuí yainíburu
yóboi, mamacu Judeacavure pueno jabotedejaquemavu. Ë
Ezequías āmicurejaquemavu.

Aru apede máre arĩ coyurejaquemavu Isaías, yópe arĩ:

—Nomió ũmucubecova juedoearĩ juedocuvacodome ō.
Emanuel āmicucuyume ũ macuyú. Ë macuyú cucuyume yópe
cūravape. Iva cūrava boje, pōeva torĩ turīdurājarama. Aru iva
cūrava boje, pōeva turājarama máre. Ë macuyú yópe acuyume:
“Yúvacari ju acuyumu jipacu Jūmenijicure jáve, yópe ina jívu
ne ju aiyepe ũre”, acuyume ũ macuyú. Ëi daquiye jipocai,
Zabulón aru Neftalí āmicurijoborōai, Jordán āmicuriya ape-
duve, jia uradacapūravui, Galilea āmicurō, judíova āmevu ne
cūrōtamu. Ina pōeva ñeminoi dobarivu bácvu urarō mearo
miadárore jádama. Ina pōeva bótainope painoi dobarivu báca-
vure, ne ũmei yaijuroede, miadáe tuivu náre, arĩ coyurejaque-
mavu Isaías.

Efraín aru Judea āmicurijoborōacavure Isaías ũi coyuino mácarō

Isaías 9.8-12.6

(Romanos 9.27, 15.12, 1 Pedro 2.9, Apocalipsis 5.5, 22.16)

Jūmenijicu ũ jiede coyucaipōecu Isaíare yópe arĩ coyucōjene-
jaquemavu Efraín āmicurijoborōcavure:

—Muja, Efraícavu, “Apegare majini vainí tuivubu”, arĩ
dápiaivubu muja. Muje nópe paivu cuede, Jūmenijicu mujare
cuyede dacuyume. Mujare jári coenínivure mujare boarí, vainí
tare dáme ũ. Ëi nópe daiyedeca, ũre mearore jíbevu muja.
Que baru Asiria āmicurijoborōcavu boarí, vainí turājarama na
mujare. Náque mujare ñájine dacuyume Jūmenijicu, arĩ coyure-
jaquemavu Isaías Efraícavure.

Aru yópe arī coyurejaquemavu Isaías Judea āmicurijoborōcavure:

—Mujā, Judeacavu, Asiria āmicurijoborōcavure jidubejarā. Yóbore na mujare cārijovamenama. Yóbore muje jabocu bacuyáre jarocuyume Jūmenijicu. Nāi jabocu David bācu ūi pāramecu curipinidu teyu bacuyúme. Jūmenijicu ūi Espiritu ūre me majicu, meacu baju tede dacuyume. Que teni caivure cūinátura mearo dacuyume. Dinumu maquinóre ūi jaboteni buiyede, ijoborōcavu mearo curājarama. Caivu Jūmenijicure majinajarama. Que baru caivu, cainoa jaborōacavu, ne pueno jabocu ūi epequijimure mearore jínajarama. Que teni caivu Israecavu coateivu bācavu, mujā muje jaborōita copaini darājaramu. Mujare copaide dacuyume Jūmenijicu. Que teni Judeacavu Efraícavunque cūinájoborōi mearo curājaramu. Aru Jūmenijicunque torojurī ūre “Meavu” arājarama, arī coyurejaquemavu Isaías.

**Judea aru Efraín āmicurijoborōcavure Jūmenijicu
jiede coyucaipōecu Miqueas āmicucu
ūi coyuíno mácarō
*Miqueas 1-7***

(Mateo 2.5-6, Juan 7.42)

Judea āmicurijoborōcavu ne pueno jabocu Jotam ūi cuede, Jūmenijicu jiede coyucaipōecu Miqueas āmicucu barejaquemavu. Jūmenijicu ūre Judeacavure aru Efraícavure máre ū jiede coyucōjenejaquemavu. Yópe arī coyurejaquemavu Miqueas:

—Yure jápiajarā mujā. Muje āmeno daiye boje, mujare nājine dacuyume Jūmenijicu. “Jūmenijinamu” muje arī coyuímarare muje pēpeimarare mearore jívubu mujā. Que baru Samariare, muje jabocu ūi curiīmarore, jaravarī jebecuyume Jūmenijicu. Que teni diīmarocavu ne pēpeimarare juarī, jebeni jaruvacuyume. Jerusalécavu Samariacavure jári arurī, na máre ne pēpeimarare mearore jívubu. Que teni apevu Efraícavure, ina Samariacavure máre, nājine dacuyume Jūmenijicu.

'Apeno joborōcavu churarava muja Efraícavuque boarí, vainí tuivu, ne boarí pupuimarare dijoborōre jocarí nuvarajarama. Muja, Judeacavu, muje joborōre máre apevu churaravare jarocuyume Jūmenijicu. Que teni apenumure Jerusaléne jaruvarí jebenajarama. Muje āmeno daiye boje, ñájine dacuyume. Apevu ne cūramiare tatorí, ne joborōre máre tatoivubu muja. Muja, jabova, mujacapūravu méne majijurorivu, diede majiyubevu muja. Āmene pare daiyurivubu muja. Que baru Jūmenijicu muje jēniaiyedeca, muje aiye báquepedeca dabcube ũ, arí coyurejaquemavu Miqueas.

“Jūmenijicu jiede coyucaipōevamu” arí meyuyaivure yópe arí jararejaquemavu Miqueas:

—Jūmenijicu mujare cadatebecube. Que baru ũ jiede coyurí majibevu muja, arí, náre jarayu, Jūmenijicu ũi ñájine daquinnore coyurejaquemavu.

Náre, Israecavure, ũi ñájine darīburu yóboi, ne mearo curājinore coyuyu, yópe arejaquemavu náre Miqueas:

—Yóbore cūracū, Jūmenijicu ũi cūrami maquinó curicū cūracū, ubeni curicū āmequiyebu. Dicū cūracūre ne mearore jíyeque járajarama pōeva caivu. Dicū yebaita nurajarama caivu, Jūmenijicu baju ũi daicōjeiyede majinajivu. Dinumu maquinóre pōeva meara curājarama. Ne baju boabénama. Muja, Israecavu, apeno joborōita nuri coateivu barājáramu muja. Nópe nuivure, mujare muje joborōita copaide dacuyume Jūmenijicu. Que baru muja, Israecavu, muje joborōita copaini darājaramu muja. Caride apenoa joborōacavu churarava mujaque boarádaivubu. Que teni Caldea āmicurijoborōi nuri curājaramu muja. Noi muje cuede, ubeni curivupe āmenajaramu muja. Judea āmicurijoborōcaīmaro Belén āmicurīīmaro pōetecuyume ñai Israecavu ne jabocu bacuyá, náre jipocatecuyu. Que baru diīmaro quījinovacari parurō maquiyébu, arí coyurejaquemavu Miqueas.

Que arí buojarí, Jūmenijicure jēniañu, yópe arejaquemavu:

—Jūmenijicu, mi pōevare jári corejacu. Ovejavare jári coreyu ũ jina ovejavare mearo ũi jári coreiyepe jári corejacu mínare. Nūje joborōre ñujare mearo cure dajacu. Mearo cadatejacu ñujare. Mi nópe daru, apenoa joborōacavu mure mearore jínajarama. Apevu meyuyaivu “Jūmenijinamu” ne pēpeimarare

ne arī coyumarape āmevu mu. Jūmenijicu bajubu mu. Ńuje āmeno daiyede ārumeteivu mu. Que baru űujeñecuva máca-vure, Abraham mácure aru Jacob bácare, “Mearo darājaramu muja mujepāramena curipinidu teivu bárājivure”, mi aiye báquepedeca dajacu mu űujare. Diede majivu yu, arejaque-mavu Miqueas Jūmenijicare.

**Asiria āmicurijoborōcavu Efraín
āmicurijoborōcavure boarí, vainí
turí, ne boarí pupuimarare
ne buorí nuvaino mácarō
2 Reyes 14.26-29; 15.8-31; 17**

Efraín āmicurijoborōcavu ne pueno jabocu Jeroboam obedivu churaravare cuvarejaquemavu. Jūmenijicu űi cadateinoque náre jári coenínivure boarí, vainí turejaquemavu. Que teni ű jabocu űi cuede, mearo curejaquemavu Efraícavu. Cuarenta y un paiujua jabotedejaquemavu ű. Aru no yóboi yaidējaquemavu Jeroboam mácu. Ŭ mácuí yainíburu yóboi, mamacu Zacarías āmicucu jabotedejaquemavu.

Nópe jaboteyu, pōecu āmecu barejaqué mavu. Apevu Efraícavu ne pueno jabova bácvu ne daiye báque pueno āmeno darejaquemavu. Seis paiaviava űi jaboteni búríburu yóboi, apecu, Salum āmicucu, ű mácure boarí jaruvarejaquemavu. Nópe boarí jaruvaríburu Zacarías bácare, Efraícavure jabotedejaquemavu Salum. Cūinácu aviá űi jaboteni búríburu yóboi, apecucapūravu, Manahem āmicucu, ű mácure boarí jaruvarejaquemavu. Aru ű máre jabotedejaquemavu. Ŭ máre pōecu āmecu barejaqué mavu. Caipucapuruafe paiujua űi jaboteni búríburu yóboi, yaidējaquemavu. Ŭ mácuí yainíburu yóboi, mamacu Pekaía āmicucu jabotedejaquemavu. Ŭ máre pōecu āmecu barejaqué mavu. Pucavua űi jaboteni búríburu yóboi, cūinácu churara boarí jaruvarejaquemavu ű mácure. űai churara Peka āmicucu Efraícavure jabotedejaquemavu ű máre. Que teni Zacarías, Salum, Manahem, Pekaía, aru Peka máre Efraícavu ne pueno jabova ne cuede, Uzías Judeacavure pueno jabotedejaquemavu. Peka máre pōecu āmecu barejaqué mavu.

Peka Efraícavu ne jabova ũi cuede, Asiria āmicurijoborō-cavu churarava náque boarádarejaquemavu. Nópe boarádaivu, Efraícavure boarí, vainí turejaquemavu. Náre vainí tuivu, ĩmaroa coapacavure nuwarejaquemavu Asiria āmicurijoborōi. Ñai jabocu Peka Efraícavure jabotedejaquemavu veinte paiujua. Dinumure apecu ũ mácure boarí jaruvarejaquemavu. Ũcapūravu Oseas āmicucu Efraícavure pueno jabotedejaquemavu.

Oseas máre pōecu āmecu barejaquémavu. Ũ jabocu ũi cuede, Asiriacavu churarava Efraícavuque boarádaivu barejaquémavu. Nópe boarádaivu, Efraícavure vainí turejaquemavu Asiriacavu. Nópe vainí tuivu, Samaria āmicurĩmarocavure Asiriacavu ne joborōi nuvari jebedejaquemavu. Samaria Efraícavu ne jabocu ũi curĩmaro maridurejaquemavu. Diĩmarocavure Asiria ne curĩmaroai epedejaquemavu náre. Nueve paiujua Oseas Efraícavure ũi jaboteni búrĩburu yóboi, ũi joborōre bíjarejaquemavu. Que teni Efraícavure jaboteni bubarejaquemavu Oseas. Que baru ũi jaboteniburu yóbore apecu jabocu Efraícacu ye cubedejaquemavu. Aru dijoborō, Efraín āmicurijoborō, cūinējaquemavu, yópe Isaías bácu ũi coyuiye báquepedeca.

Nópe tedejaquemavu, Efraícavu Jūmenijicu ũi daicōjei-yede ne vainí tuiye boje. Jūmenijicu jiede coyucaipōevare náre coyucōjeñu jarorĩdurejaquemavu. Ũ jiede coyucōjeiye-deca, ye jápiaiyubedejaquemavu nócavu. Que teni pucarā oteivecava ne úruque daimara ne pēpeimarare mearore jídejaquemavu. Ne nópe daiye boje, Jūmenijicu ñájine dayu barejaquémavu náre. Apeno joborōita nure darejaquemavu náre. Judeacavu máre ju abedejaquemavu Jūmenijicure. Ũbenita ne nópe ju abedeca, náre jaruvabedejaquemavu Jūmenijicu.

No yóboi, Asiriacacu jabocu apeno joborōcavure Efraín āmicurijoborōita nuvari epedejaquemavu. Aru apecu pōeva dijoborōi curejaquemavu. Nácapūravu “Jūmenijinamu” ne arĩ coyuiamarare ne pēpeimarare, ne mearore jímarare, Efraín āmicurijoborōi eavarejaquemavu. Nópe eavaivuvacari, Jūmenijicu bajure máre mearore jíyurĩdurejaquemavu. Mearore jíyurĩduivu, cūinácu sacerdotede daicōjenejaquemavu. Ũ dayu, Jūmenijicure ne āimarare boarí, juarí, jāmuóri jíyede

buecuyu barejaquémavu. Nópe bueyuvacari, Jūmenijicu bajure mearore jíbedejaquemavu. “Jūmenijinamu” ne arī coyumarare ne pēpeimarare mearore jídejaquemavu. Que baru jāveneca Jūmenijicu bajure ju abedejaquemavu.

**Ezequías āmicucu jabocu meacu Judea
āmicurijoborōcavure pueno ūi jaboteino mácarō**
2 Reyes 18-20; 2 Crónicas 29-32; Isaías 28-29, 36-39

*(Mateo 1.9-10, 15.8-9, Romanos 9.33, 1 Corintios 1.19, 1 Pedro 2.6,
Apocalipsis 5.1)*

Ezequías āmicucu Judea āmicurijoborōcavu ne pueno jabocu meacu barejaquémavu. Ñai jabocu Acáz bácuí mácu barejaquémavu. Jūmenijicu ūi daicōjeiyede dayu barejaquémavu. Que teni jūmenijina āmevure, ūmedu cubevure, jocucu teiyepe curivure, nócavu ne mearore jíyede jáñu, ure ne mearore jícaivare jaruvarejaquemavu. Buojarī, ñai jabocu ūi jaboteiyede, Jūmenijicu bajure mearore jícōjenejaquemavu Judeacavure.

Que teni Jūmenijicu ūi cūrami jedevacobea bieiveare mea-daicōjenejaquemavu. Nópe dayu, caivu sacerdotevare aru Levita āmicuriyajubocavure máre cójijicōjeni, Jūmenijicu jiede ūi daicōjeiyepedeca cūnáturu daicōjenejaquemavu náre. No jipocare diede ne cūnáturu dabe boje, āmeno vaivu barejaquémavu na. Diede coyurejaquemavu náre. Que teni ina Levitas Jūmenijicu ūi daicōjeiyepedeca daivu, ñájino cubevu mautedejaquemavu. Que baru Jūmenijicu jie matuiyeda ūi cūrami epeicōjenejaquemavu. Que teni die matuiyeda diñamita cuede urejaquemavu. Apede ĩni jaetovarejaquemavu diñami cue báquede, diñamique Jūmenijicu jie āmene. Que darī buojarī, diñami cuede cūnáturu ñórejaquemavu, Jūmenijicu ūi ñoicōjeiyepedeca. Nópe meadarī buojarī, āimarare boarí, juarí, jāmuóri, Jūmenijicure mearore jícōjenejaquemavu ñai jabocu Ezequías ina sacerdotevare. Que darī buojarī, ñai jabocu David bácu ūi epeiye báquepedeca ina Levitas Jūmenijicui cūrami ne memeiyede epedejaquemavu Ezequías. Que baru Jūmenijicu ūi epeiye báquepedeca ūi cūramine daivu barejaquémavu.

No yóboi, Pascua ámicurijāravu ne torojuve teijāravure dai-
cōjeñu, caivure Judeacavure aru Efraícavure máre cuturī jaro-
rejaquemavu Ezequías. Obedivu Judeacavu dijāravu ne toro-
juve teijāravu járadarejaquemavu. Ūbenita obebejina Efraí-
cavu darejaquemavu. Obedivu nácapūravu ne torojuve teijāra-
vure daiyede jáivu, náre yuridejaquemavu. Judeacavu ne
torojuve teijāravure daiyede, jūmenijina ámevure ne áimarare
jícavure, Jūmenijicu ūi cūrami cue ámene, jícua ne mea-
rore jíyede jaruvarī jebedejaquemavu. Jūmenijicure cūináturu
mearore jínajivu, ina pēpeimarare máre jaruvarī jebedejaque-
mavu. Jūmenijicu ūi daicōjeiyepedeca, ūi cūrami ūre mea-
rore jínajivu barejaqué-mavu. No torojuve teijāravure darī buo-
jarī, ina torojuve teivu bácvu apenoa ímaroaita earī, pēpei-
mara ne jícavure jaruvarejaquemavu. Que darī buojarī, ne
cūramiaita copaini nurejaquemavu.

Yópe arejaquemavu Jūmenijicu Isaíare:

—Beoivu yu cūináva cūrava bojecuriva bajure. Divare
epeivu yu ji ímaroi Jerusalén ámicuríímaroi, yópe cūramitōbui
cūravape ji daquijiñami. Ácu pōecu ju ayu baru mje jabocure,
ñai divape páyure, cainumua chīomecube ūi ju aiye boje ñai
jabocure. Quénora cainumua torojucuyume ūi ju aiyeque ūre,
arejaquemavu Jūmenijicu.

Aru apede máre arejaquemavu Jūmenijicu Isaíare:

—Ina pōeva yure ju adama ne jijecāmuque. Ūbenita
dabema yópe ji urōpe. Bojecubenoque mearore jíniduyama
yure. Bueniduyama pōeva ne bueinore Jūmenijicui yávaiyepe.
Ina majidivu ne majiéde jaruvacuyumu yu. Aru ina coreó-
vaivu ne coreóvayede bojecubede tede dacuyumu yu, areja-
quemavu Jūmenijicu.

Judeacavu Ezequías ne jabocu ūi cuede, Asiria ámicurijo-
borōcavu churarava Samaria ámicuríímarocavuque boarí,
vainí turī, ne joborōita nvarejaquemavu náre. Dinumure
Asiriacavu ne pueno jabocu Salmanasar ámicucu barejaqué-
mavu. Aru caipucapuruvape paiujua yóboi, ū mácuí yai-
níburu yóboi, Senaquerib ámicucu Asiriacavu ne pueno
jabocu barejaqué-mavu. Nópe ū jaboteyu, ūi churaravaque
Judeacavure boarádarejaquemavu. Nópe boarádaivu, Judea
ámicurijoborōcaímaroacavure vainí turejaquemavu.
Ūbenita Jerusalécavure vainí tubedejaquemavu. Que teni

Asiriacavu ne jabocu Ezequíare boro jaroyu, yópe arejaquemavu: “Ji churaravaque boarádaivu baru, ñujare ye vainí tubenamu muja. Que teni Egiptocavure muje cadateicō-jeiyedeca, ye cadatebenama. Mujecu Jūmenijicu máre cadatebecube”, arī boro jarorejaquemavu Senaquerib Ezequíare.

Nópe ũi boro jaroiyede jápiayu, Ezequías Jūmenijicui cūramita ecorī nuri, Jūmenijicu jiede coyucaipōecure, Isaíare, Jūmenijicure jēniaicōjeñu, boro jarorejaquemavu. Nópe ũi boro jaroiyede, yópe arī, ju arī jarorejaquemavu ũre:

—Jidubejacu ina Asiriacavure. Ne jabocu Senaquerib ũi joborōcavure boro jarorājarama ũre. Iye borore jápiayu, ũi joborōi copainucuyume. Que teni noita yainí nucuyume, arī coyurejaquemavu Isaías ñai jabocu Ezequíare.

No yóboi, ñai jabocu Ezequías cocoroinoque ijié tedejaquemavu. Nópe ijié teni, ũi yaiquínore coyucōjenejaquemavu Jūmenijicu Isaíare. Ũi nópe coyucōjeiyede, yópe arī coyurejaquemavu Isaías Ezequíare:

—Caride yaicúdayubu mu, arī coyurejaquemavu Isaías ñai jabocu Ezequíare.

Ũi que aiyede jápiayu, Ezequías Jūmenijicure pare jēniarejaquemavu:

—Mu, Jūmenijicu, mure pare jēniaivu yu, yure vaiquíyepe ayu. Cainumua mi daicōjeiye báquepedeca daivu yu. Diede ārujacu mu, arī jēniarejaquemavu Ezequías Jūmenijicure.

Que arī buojayu, pare orejaquemavu. Nópe ũi arī jēniariburu yóboi, Jūmenijicu Isaíare Ezequías yebai jarorejaquemavu, ũre yópe arī coyucōjeñu:

—Mi jēniaiyede jápiavu yu. Aru mi oiyede jávu yu. Mi ávarepedeca dacuyumu. Quince paiujua cucuyumu mu cāreja, arī coyucōjenejaquemavu Jūmenijicu Isaíare.

Nópe ũi coyucōjeiyepedeca, coyurejaquemavu Ezequíare.

Que baru quince paiujua yóboi, ñai jabocu Ezequías bácu yainíburu yóboi, mamacu Manasés āmicucu Judeacavure pueno jabotedejaquemavu. Jípacu bácupūravu veintinueve paiujua bajo jabotedejaquemavu.

Jūmenijicu jiede coyucaipōecu Isaías āmicucu Israecavure Judea āmicurijoborōi copainajivure ũi coyurĩ toivaino mácarō

Isaías 40-66

(Mateo 3.3, 12.17-21, 21.13, Marcos 1.3, 11.17 Lucas 2.32, 3.4-6, 4.17-19, 7.22, 19.46, 22.37, Juan 1.23, Hechos 7.49-50, 8.28-33, 13.47, Romanos 11.26-27, 34-35, 14.11, 15.21, 1 Corintios 2.9, 2 Corintios 6.2, 17-18, Gálatas 4.27, Filipenses 2.10-11, Hebreos 4.12, 1 Pedro 1.24-25, 2.9, 22-25, 2 Pedro 3.13, Apocalipsis 1.8, 17, 2.8, 17, 3.9, 12, 5.6, 9, 12.5, 14.10, 20, 16.19, 18.7-8, 19.15, 21.1-2, 6, 18-21, 23-27, 22.5, 13, 17)

Jūmenijicu jiede coyucaipōecu Isaías āmicucu Israecavure Judea āmicurijoborōi copainajivure coyurĩ toivarejaquemavu. Caldea āmicurijoborōcaīmaro Babilonia āmicuriīmaroi curivu, Israecavu ne copaini nurajinore coyurejaquemavu. Yópe arĩ toivarejaquemavu:

—Yópe abi Jūmenijicu: “Israecavu chōivure torojure daibi. Quénora ne āmeno daiye boje, ñájine daiyuvu náre. Yure coyucaipōecu codoboboyure jápiarājarama pōecubeno: ‘Meadajarā muje ũmene, copu etarājivu maje jabocure, nopedeca muje meadaiyede daimare ñai ũmu, muje puedaimu, ũi daquiye jipocai’, arĩ codobobocuyame. Caivu ijoborōcavu meacu baju ũi cuede majinajarama. Ji aye báquepedeca dacuyumu ya. Me buei yede coyūivu Jerusalécavure cūracū puenoi nari, noita muje buei yede pōevare codoboborĩ coyujarā. Judeacavure coyujarā: ‘Ñai jabocu Jūmenijicu yui cubi.’ Ne jabocu bacuyá cucuyame. Nópe dayu, mearo daivure ne mearo daiye boje jícuyume náre. Aru āmeno daivure ne āmeno daiye boje ñájine dacuyume. Que teni ovejavare ũi jári coreiyepedeca, ũ jina pōevare jári corecuyume”, abi Jūmenijicu, arĩ coyurejaquemavu Isaías.

Aru yópe arĩ coyurejaquemavu Isaías bediōva:

—Jūmenijicu parucu mearo majicube. Jūmenijicu ne pēpeimupe āmemi ũ. Na pēpeimarare jocucuque dadama. Dicu coricacatucaruque dadama. Apetucaru coricacatucaru pecacu baquiyébu. Que baru ina pēpeimara ye baquiyé āmema. Nópe daivuvacari, ārumevu ne cuede ye majibema. Pēpeimara ye cújibema. Que baru majare cadatebema. Ubenita Jūmenijicu baju parucu bajube. Apevu ũi teiyepe curivu ye cubema. “Jūmenijicu majare jámemi”, arĩ majibevu maja. Ye uetubebi

ũ. Que baru majini jebeibi. Êre maje āruri paruru, maje uetuiyedeca, ũ majare me dare daibi cojedeca. Yópe abi maje jabocu: “Ji cainumua cue boje, coyuyubu mujare yópe vaiquíyede jāve. Caivu ijāravucavu ñuatutarĩ mearore jínajarama yure. Caivu ijāravucavu coyurājarama yure, ‘Jūmenijicutamu mu. Ñuje jabocubu mu’, arājarama caivu. Que baru pēpeimarare mearore jímarare dajocarĩ, etajarā muja náre jocarĩ. Que teni náque yóvabeni, coatejarā muja náre jaruvarĩ. Ye tuobejarā muja caiye ne cuvaede, ne āmeina daiyeque cuvaede. Que daru mujare me copu etacuyumu yu. Yu bacuyúmu mujepacu. Aru muja jímara marajáramu”, arĩ coyurejaquemavu Isaías.

Bedióva cojedeca yópe arĩ coyurejaquemavu Isaías:

—Yópe abi Jūmenijicu: “Ijoborōre aru ijoborōcavure cōjeñumu. Que baru pōeva caivu yure mearore jíye jauvu. Ubenita muja, Israecavu, ji beoimaramu. Cainoa joborōai coateivu bācavu mujare copaide dacacu. Muja, Israecavu, ji pōevamu. Mijaque cuvũ. Que baru mujare cadateyubu. Que baru jidubejarā. Aru caivu pōevare ména daivure āmeno vaidé dacuyumu náre. Obebejĩna muje cuedeca, cadateyubu”, abi Jūmenijicu.

“Ina pōeva judíoiva āmevu āmeina yávadama yure, muje āmeina darĩ jādovaiye boje. Muje órejaiyede yure, ji cadatequiyepe aivu mujare, jápiarĩ cadatecuyumu mujare. Yo jāravu baquinó, ji meadaquijijāravure, meadacuyumu mujare”, abi Jūmenijicu mujare, Israecavure.

‘Que teni yópe arejaquemavu Jūmenijicu: “Jāve mearo dacuyumu yu mujareca, yópe ji aiye báquepedeca David bācure. Jápiajarā. David bācui pāramecu curipinidu teyu bacuyú dacuyume. Ñaime yure memecayu, ji beoimu mácu. Êrecabe ji umu. Êque torojavu yu ji ũmei. Êre darocuyumu ji Espíriture, ũi cōjequiyepe ayu yure memecayu ũi dápiaiyeede, ũi coyuiyede, aru ũi daiyede máre. Que baru coyucuyume yure memecayu judíoiva āmevure aipe darĩ buojaivure, boropatebenajivava ji jáinore. Êrecabe ādamatebecu, codobobobecu mái, aru órejabecu ĩmaroacarō tãibui. Napiñu, cadatecuyume ina parubevure. Aru cōmaje āroje jáñu meadacuyume ina ĩjimara yaijurorivure. Nópe dacuyume pu ũi vainí turĩburu yóboita āmenore jaruvarĩ, ũi jaboteiyeta. Êrecabe pōevare meadarĩ buojayu. Que baru êre napini corenajarama ina judíoiva āmevu, ũi meadaquiyepe aivu

náre. Ñ macuyáme pëoinope páyu caivu ina pōeva judíova ámevure, ne majinajiyeye ayu yure. Aru davacuyume mearore mi pōevare, Israecavure. Pōeva úre darājarama yópe ne daiyepe ámeina teivure. Nuvarajarama úre boarí jaruvavainoi. Aru bi acuyume ñ, yópe ovejajicu obepe ñi podare buraiyedeca. Abecuyume ñ. Cuyoje tede darājarama úre. Aru yávarí cadateipōecu cubecuyume. Que baru ámeno darājarama úre. Cūiquíyebu ijāravure ñi curō. Que baru ñi pāramena curipinidu teivu bájurorivu cubenajarama. Aru na májurorivure coyubenajarama ne borore”, abi Jūmenijicu. Ubenita obebejina baju ju adama ñuje borore. Jūmenijicu ñi paruéde jádovaimi obebejina bajure, arí coyurejaquemavu Isaías.

Bedióva yópe arí coyurejaquemavu Isaías:

—Jehová Jūmenijicu bajube. Ye apecu Jūmenijicu baju cubebi. Que baru “Jūmenijinamu” arí ne pēpeimarare pōeva ne mearore jíyede ubebe ñ. Ñ matuiyeda mearore jíyede ubi majare. Yópe abi ñ: “Maja, Israecavu, yure maje vainí tuiyedeca, mje ámeina teiyede árumetecuyumu. Mje joborōre ocare dacuyumu yu. Que baru ji Espíriture jaro-cuyumu mjaque cucuyure. Bedióva cojedeca Jerusaléne uraimaro cure dacuyumu. Ñai jabocu Ciro ámicucu, Caldea ámicurijoborōcavure pueno jabocu bacuyá, yure ñi coreóvabedeca, úre ji daicōjeiypedeca daicōjequijivu. Ji nópe daicōjeiyede, yópe daquijibi. Apevu mja Israecavure Judeaita copaicōjequijibi. Que baru ñ jabocu ñi cuede, ji cūramine darājivubu cojedeca. Ina Caldeacavu ‘¿Meara márica apevu pueno?’ arí dápiaivubu. Que baru mjure ámeno dama. Ne nópe arí dápiaiye boje, náre ñájine daquijivu yu. Ji cūrami caivu pōeva ne yure, Jūmenijicure, coyuiñamimu”, arí coyubi Jūmenijicu, arejaquemavu Isaías.

“Yópe abi Jūmenijicu: “Que baru cārijināma boarí jaruvaiyurivu pōevare. Ari ne nuinoi ñájine dadama pōevare, aru mamatete dadama, aru chíore dadama náre. Torojure dabeni, cārijine dadama pōevare. Iyede árujara mja, Israecavu. Mjure ji ñájine daquinore coyucacu yu. Que baru mjure ñájine dacacu yu. Ubenita mjure ji ñájine daiyedeca, mjure ji boarí jebeiyede ubetecacu. Quénora yure mje ju aiyede útecacu. Yure mearo ju aivu baru, ye ámeno vaibéjebu mja. Dinumu apa

Babiloniai curivu Judeai copaijarā. Muje nuiyede, mujare cada-tequijivu. Mujare cadateyuvacari, āmeno daivure járī yayuyarī ubequijivu. Que baru nópe daivure āmeno vaidé daquijivu. Mu, jue docuvabeco, torojujaco mi ūmei. Mu ñájimeco cāreja jue docuvaede, codobobojaco mu mi torojue boje. Que baru ico nomió jímarepacui jaruvaimo máco ūmucucodome cojedeca. Que baru mamara cuvacadome ico ūmucuco pueno”, abi Jūmenijicu Israecavure.

Yópe abi Jūmenijicu: “Ñai meadaipōecu dacuyume Jerusalén āmicurīīmarore jocarī. Jaruvacuyume caiye ina Jacob bácuī pāramena curipinidu teivu ne āmeina teiyede. Aru ārumetecuyume diede. Yure memecaipōecu bacuyú ubeni cucu āmecube. Obedijoborōacavu ūre járī cuecumaivu, ūre pue darājarama. Apevu ūre āmeno ne dariburū, ūi baju āmeno járocuyume, pōecupe járobecube ū. Pōeva ūre járī coenínajarama. ‘Ye baquiyé āmemi’, arī dāpiarājarama na ūra. Que baru āmeno vaicáyume ū”, arī coyubi Jūmenijicu. Ū maje ñájine dájuroede ñájicuyume. Que teni ūre pōeva ne churiá daiyede jáñu, maje āmeno daiyede ārumetecuyume Jūmenijicu. Maja caivu ovejavape paivubu. Ovejave ne mamateni daiyepedeca, maje urōpe āmeno daivubu maja. Maje nópe daiyedeca, majare boje ūre āmeno vaicōjecuyume Jūmenijicu. Majacapūravure ñájine dabecube. Nópe āmeno vaiyú, ū máre cūináturu tecuyume. Cūináturu teyu, ye cūinácāmu yáva tecucuyume. Ūi āmeno daino cubedeca, ūre boarī jaravarā, a-rama. Que baru pōeva ne āmeina daiyede ārumetecuyume Jūmenijicu. Aru pōeva caivure buecuyume Jūmenijicu, arī coyurejaquemavu Isaías.

‘Que teni yópe abi Jūmenijicu: “Caivu ape paiye le urivu, yure jēniaradajarā. Mujare cadatequijivu. Maja apūravu memeivuvacari, ye boje jēmevu. Que baru yure me ju aivu baru, mearo curājaramu. Mujare jecucuyumu yu. Que baru apeno joborōacavure jiede buenajaramu muja”, abi Jūmenijicu.

‘Iyede máre abi Jūmenijicu: “Caivu jauédeca, yure ne jēniaru, jícuyumu náre jauéde. Maja pare memeivuvacari, ye eabevu muja. Ubenita yure ju aivu baru, mearo curājaramu muja. Nópe curivu, yurecabu muje jabocu bacuyú aru mujarecabu ji jaboteimara mārājivu cainumua. Que teni cai-

numua mujare jecucuyumu. Aru mujacapūravu apenoa joborōacavure yure ne mearore jínajiyede jádovarajaramu”, abi Jūmenijicu.

“Jūmenijicure yópe daiye jauvu”, maja pōeva maje arī dápia-rīduiyepedeca, dabecube ũ. Maje dápia-rīduiyepedeca pueno majicu, mearo baju daibi Jūmenijicu. Que baru cainumua vaivu yópe ũi arī dápiaiye báquepedeca. Pōecu cubebi Jūmenijicui dápiaiye de majicu. Caivu pōeva cōriápe paivabu. Que baru ne majié cōvuape paiyebu. Iye cōriá popoiyavū. Aru iye cōvua taiyavū. Ubenita Jūmenijicui yávaiye cuquiye bu cainumua. Pōecu cubebi majicarī buojayu Jūmenijicure. Aru pōecu cubebi jícayu Jūmenijicure apejēne, Jūmenijicui bojecubenore cuvaquiyepe ayu.

“Yópe abi Jūmenijicu, ũre memecaipōecu bacuyáre coyui-cōjeñu: “Ji jabocu Jūmenijicu ũi Espíritu cubi yáque. Que baru ũi epeimumu yu, coyucuyu ũi yávaiye méne ina cōmaje ārojariure. Daroibi yure, ji meadaquiyepe ayu ina chōi-vure ne ũmei. Aru coyui-cōjeimi yure, ji jodequiyepe ayu ina buoimarape paivure ne āmeina teiye boje. Járe dacuyumu ina jári eabevure. Jodede dacuyumu ina āmeina daimarare máre. Coyucuyumu ne coreóvaino eainore ne jabocui meadaquinore náre”, arī coyui-cōjeñumu yure memecaipōecu bacuyáre. Ubenita ina pōeva ye vobevu bācavu yure, nárecabu eaivu yure. Aru yu jádovarejacacu ji baju ina pōeva ye jēniari jámevu bācavure yure. Caijārvuare cārijimine daiyurīduivu yu ina pōeva ju abevure aru maucvarivure yure”, abi Jūmenijicu.

‘Aru bedióva abi Jūmenijicu: “Cavarō mearomu yópe ji dobarō mearo. Caiyede daicōjeivu yu nore dobacu. Aru ijārvabu yópe ji cuboba epeinope. Que baru ji cūramiva darī majibevu muja. Jūmenijicui curōre ji jabuóvaimine darī majibevu muja. Yure memecaipōecu bacuyáre mearo dacuyumu yu. Que baru āmena pōevacapūravure ‘Jūmenijicubé’, ne arī pēpeimure mearore jívure yaidé dacuyumu. Que darī-buru yóboi, joe mearo curājarama pōeva. Dinumu maqui-nóre macarōcavu yavimiva ovejavaque cūinároi ārajarama. Que baru ādamateino cubeno, mearo curājarama caivu”, abi Jūmenijicu. Nopedeca arī toivarejaquemavu Isaías javede.

**Manasés, Amón, aru Josías ámicurivu Judea
ámicurijoborôcavure ne jaboteino mácarô
2 Reyes 21.1-23.30; 2 Crónicas 33-35; Jeremías 1-15**

(Mateo 1.10-11, Apocalipsis 8.11, 9.6, 13.10, 15.4, 16.16, 18.22-23)

Ezequías bácu mácu Manasés jaboteyu, ámecu baju bareja-quémavu. Que teni jūmenijina ámevure ne pēpeimarare áimarare ne boarí, juarí, jāmuóri jícaivare bedióva daicōjenejaquemavu. Nópe dayu jūmenijina ámevure mearore jícōjenejaquemavu Judeacavure. Aru cūináva jícaivare Jūmenijicui cūrami jívui daicōjenejaquemavu. Que teni jūmenijina ámevure ne pēpeimarare mearore jíyu, mamacure boarí, juarí, jāmuórejaquemavu. Aru yavié daivure máre jēniari jācunurejaquemavu. Ũi nópe daiyede jáñu, jorojīni vaidējaquemavu Jūmenijicu áque.


Ũi nópe ámeno daiyede jáñu Jūmenijicu, ũ jiede coyucaipōevare Judeacavure coyucōjenejaquemavu.

—Apevu pueno ámeno dáme Manasés. Judeacavure ne pēpeimarare mearore jícōjeame ũ. Que teni yópe abi Jūmenijicu: “Muje joborôcavure ámeno vaidé dacuyumu yu. Jerusaléacavure máre nopedeca dacuyumu. Muja, Judeacavu, nópe matuiye ámeno daivu bajubu muja. Mujevu javecavu bácu náre nopedeca darejaima. Ubenita ñai Manasés caivu pueno ámeno daibi. Que baru mujare ñájine dacuyumu”, abi Jūmenijicu, arí coyurejaquemavu ũ jiede coyucaipōeva.

Ne nópe arí coyuiyedeca, Judeacavu náre jápiayubedejaquemavu. Dinumu Asiriacavu churarava ne jabocu Manaséde ũeni, apeno ímaroita úre buorí nuwarejaquemavu. Jūmenijicu náre que daicōjenejaquemavu. Que teni ne buoimu cucu, ámeno vaidējaquemavu Manasés. Nópe ámeno vaiyú, Jūmenijicure jēniarejaquemavu, ũi cadatequiyepe ayu. Nópe jēniañu, ũi ámeina teiyede chíoñu marejaquému. Ũi nópe jēniaiyede jápiayu, úre Jūmenijicu cadatedejaquemavu. Nópe úre cadateyu, Jerusaléita copaide darejaquemavu. Que teyu, bedióva ne jabocu barejaquému ũ. Nópe teyu “Jāvenecabu Jehová Jūmenijicu bajube”, arí majidejaquemavu ũ. Nópe majicu, Jerusaléita copaini eayu, ne mearore jícaivare jaravarejaquemavu. Que teni Jūmenijicui cūrami ne pēpeimara curivure,

ne mearore jimarare jaruvarejaquemavu. Nópe jaruvayu, Judeacavure Jūmenijicu bajure mearore jícōjenejaquemavu. Nópe dayu, Jerusaléi biaidoa diīmarocabiaidoare meadaicōjenejaquemavu, “Apevu boaráecoinomu” ayu. Cincuenta y cinco paiujua bajo jabotedejaquemavu. No yóboi, yaidéjaquemavu Manasés bácu. Ū mácu yainíburu yóboi, mamacu Amón āmicu Judeacavure pueno jabotedejaquemavu.

Pucaujua bajo Judeacavure jabotedejaquemavu Amón. Āmecu barejaquénavu ū máre. Que teni ina pēpeimarare



mearore jídejaquemavu. Que baru ũi cāchinocavu jabova ũre boarí jaruvarejaquemavu. ũre ne nópe boarí jaruvaiyede maji-divu, Judeacavu ũ mácure boarí jaruvaivu bácvure nájine darí, boarí jaruvarejaquemavu. Náre boarí jaruvarí, Amón mácuí mácure jabojacorejaquemavu. ũ Josías ámicucu bareja-quémavu.

Aru Josías jaboteni báyu bojujīyo, ocho paiujua cuvacu, barejaquémavu. Nópe páyuvacari, Jūmenijicu ũi daicōjeiyede mearo buedejaquemavu, diede majicuyu. Que baru meacu barejaquémavu. “Jūmenijinamu” arí ne pēpeimarare, ne mearore jīmarare, caivure jaruvaicōjenejaquemavu. Que teni áimarare boarí, juarí, jámuóri, ne pēpeimarare jícavure jaruvarí, ne sacerdotevare boarí jaruvaicōjenejaquemavu.

Diede darí buojarí, Jūmenijicui cūramine meadaiyurejaquemavu. Nópe meadaiyucu, sacerdoteva ne jabocure táuturare jarorejaquemavu, diñamine ũi meadaquiyepe ayu. Sacerdotevare jaboteipōecu Hilcías ámicucu barejaquémavu. Aru apevu diñamine ne meadaiye coricai, Jūmenijicu ũi daicōjeiyede Moisés bácu ũi toivaiyoca cāriáiyocare earejaquemavu. Nópe eavvu, nái jabocu Josiáre jarorejaquemavu diyocare. ũi nópe jaroiyede, Josías diyocare jári borotedejaquemavu. Nópe jári boroteyu, cucumarejaquemavu. ũre die daicōjeiyede vainí turejaquemavu na, Judeacavu. Ne nópe vainí tuiye boje, ámeno vaivu barejaquémavu na, Judeacavu. Efraícavu máre ne vainí tuiye boje, ámeno vaidéjaquemavu. Diede majicu, cucumarejaquemavu, cūinácu apecure jēniari jáicōjeñu jarorejaquemavu. Que baru na nuri, Jūmenijicu jiede coyucaipōecore jēniari járejaquemavu. Ō Hulda ámicuco barejaquémavu. Ne nópe arí jēniari jáiyede, ō yópe arí coyurejaquemavu:

—Yópe abi Jūmenijicu: “Ji daicōjeiyede ne vainí tuiye boje, ijaborōcavure ámeno vaidé dacuyumu yu. Muja muje daimara pēpeimarare ‘Jūmenijinamu’ arí, mearore jīni, voavū muja. Muja nópe daiyuvacari, muje daiyedeca, mujare cūiná nájine dabetevu yu. Nái jabocu Josías ji daicōjeiyede vainí tubebi. Que teni jiede jápiaibi. Aru ijaborōcavu, Judeacavu, ne ámeina teiyede chōimi ũcapūravu. Nópe chōñu ũi cuede jáñu, ũi apurōpe cāreja ijaborōcavure nájine dabecubu yu”, abi Jūmenijicu, arí coyurejaquemavu ũ jiede coyucaipōeco.



Õi que aiyede jápiaivu, òre jēniari jáivu bácavu ne jabocu Josiáre diede coyurã-nurejaquemavu.

No yóboi, caivu pōevare Jūmenijicui cūrami yebai cójijicōjenejaquemavu Josías. Ne nópe cójijiyede, Jūmenijicu ũi daicōjeiyede bueni jebedejaquemavu diyocai cue daicōjeiyede. Bueni buojarī, Jūmenijicure yópe arejaquemavu:

—Mu, Jūmenijicu, mi daicōjeiyede darājaramu ñuja, arejaquemavu ũ Jūmenijicure.

Õi que aiyede jápiaivu, ina pōeva nopedeca arejaquemavu. Que arī buojarī, ne mearore jíye báquede jaruvarī jebeicōjenejaquemavu Josías. Que baru ũi apurōpe Jūmenijicu bajure mearore jídejaquemavu, āimarare boarī, juarī, jāmuóri, ũre jēniarejaquemavu nócavu.

Ubenita ñai jabocu Manasés bácu ũi āmeno daiye boje, dinumu mácarōre Judeacavu máre ne āmeno daiye boje, jorojī-nejaquemavu Jūmenijicu náque. Que teni ũ jiede coyucaipōecu, Jeremías āmicucu, Jūmenijicu náre ũi ñájine daquinore coyurejaquemavu Judeacavure. Yópe arejaquemavu Jeremías:

—Ñai pōecu “¿Meacu bárica?” arī coyuyu baru, ũi bajuma nópe arī coyubejacurī. Quénora “Meacu bajube maje jabocu cavarō mearocacu”, arī coyujacurī ũ. Mu, ñuje jabocu, caivu pōeva pue darājaramu ñuja mure jáve. Caivu pōeva mearore jínajaramu ñuja mure jáve. Ubenita ina buoimara mārājivu, jáve buoimara marajárama na. Aru ina boarī jaruvaimara mārājivu, jáve boarī jaruvaimara marajárama na, arejaquemavu Jeremías.

Josías treinta y un paiujua bajo Judeacavure pueno jabote-dejaquemavu. No yóboi, Egipto āmicurijoborōcavaque boarānu-rejaquemavu ũi churaravaque. Nópe ne boarānu iyede, Egiptocavu Josías bácu boarī jaruvarejaquemavu. Ũ mácu yainí-

buru yóboi, mamacu Joacaz āmicucu, jípacu bácure oatuvārī jabotedejaquemavu.

**Nahúm āmicucu Jūmenijicu jiede Nínive
āmicuriīmarocavure ũi coyuno mácarō**

Nahúm 1-3

Asiriacavu churarava ne vainí turīburu yóboi Efraín āmicu-rijoborōcavure, Nahúm āmicucure Jūmenijicu ũ jiede coyucōje-nejaquemavu ina Nínive āmicuriīmarocavure, Asiria āmicurijo-borōcaīmaro urarōcavure. Yópe arī coyurejaquemavu Nahúm:

—Jehová Jūmenijicu baju parucube. Aru pōeva ne ju abede ũre, jorojĩñume. Nópe jorojĩñu, pōecu cubebi ũi baju meadayu. Jári coreyube ũre ju aivure. Ubenita ũre jári coenínivure vainí tuyube. Que baru caride muje ðaiyube boje ũi ðaicōjeiyede, mujare vainí tucuyume. Ubenita ñujare, Israecavure, ũi pōe-vare meadacuyume. Mujare jári coenínivure jarocuyume Jūme-nijicu. Mujare vainí turājarama. Que teni mujare yebacateni, ĩni, apeno joborōita nuvarajarama. Muje pare āmeno ðaiye boje obedivu pōevare, mujare ne yebacateiyede borore ne jápiaiyede, torojurājarama, arī coyurejaquemavu Nahúm Nínivecavure.

**Jūmenijicu jiede coyucaipōecu Sofonías āmicucu
Judea āmicurijoborōcavure ũi coyuno mácarō**

Sofonías 1-3

(Apocalipsis 6.17, 14.5)

Judea āmicurijoborōcavu ne pueno jabocu Josías ũi cuede, Jūmenijicu Sofonías āmicucure ũ jiede nócavure coyucōjeñu jarorejaquemavu. Yópe arī coyurejaquemavu Sofonías:

—Caivu pēpeimarare mearore jívure boarí jaruvacudayube Jūmenijicu. Quénora pēpeimarare mearore jíni dajocajarā muja. Caride pēpeimarare mearore jíni dajocaicōjeimi ũ. Caivu muja, Judeacavu jabova, muje cuvede jíni bojedaivu, jecurivu apevu pōevare, āmeno ðaivu Jūmenijicure vainí tuivubu muja. Que baru āmeno vainájaramu muja. Jūmenijicu mujare ñájine

đacudayube. Muje jabova Jūmenijicu jiede coyurī jipocateivu bācavu, sacerdoteva máre, caivu muja āmeno đaivubu. Que baru Jūmenijicu jiede jápiaiyubevu muja. Que teni mujaque jorojīmi ũ. Aru apeno joborōcavure mujare boarí, vainí ture đacuyume Jūmenijicu. Aru dijoborōita mujare nuvarajarama. Noita curājaramu muja. No yóboi, mujare vainí tuivu báca-vure, mujare jári coenínivure jaruvacuyume Jūmenijicu. Que teni mujacavu nore curivure Judeai copaidare đacuyume ũ. Nópe ũi copaide đarīburu yóboi, mujare jári coenínivu ne joborōa máquede jícuyume mujare Jūmenijicu. Ũ jina pōeva muje cuede, cūinácu bae mearo đacuyume mujare. Dinumure na mujaque curivu mearo curājarama. Que baru āmeno đaiyu-benama na. Jūmenijicure āruri parurājarama. Aru ũ mearo đacuyume náre. Que baru torojurājarama na, arī coyurejaque-mavu Sofonías.

**Jūmenijicu jiede coyucaipōecu Habacuc āmicucu
Judea āmicurijoborōcavure ũi coyuiño mácarō
*Habacuc 1-3***

(Hechos 13.41, Romanos 1.17, Gálatas 3.11, Hebreos 10.37-38)

No yóboi, Judea āmicurijoborōcavure náre jári coenínivu ne buorí nuvarajiye jipocai, Jūmenijicu jiede coyucaipōecu Habacuc āmicucu ũ jiede coyucudarejaquemavu. Yópe arī coyurejaquemavu Judeacavure:

—Yópe abi Jūmenijicu mujare: Jájara muja, ju abeni yurivu ji yáviyede. Yure jári coenínajaramu muja. Ji đaquiyede jidujarā muja. Yainí bíjarājaramu muja. Muje curijāra-vuare pōeva ne đarí majibede đacuyumu yu. Ũbenita ju abejebu muja, apecu ũi coyuru mujare ji đaiyede. Apecu ũi coyui-yedeca aipe aiyurōre ji đaiyede, ju abejebu muja cāreja. Ũnai đacuyu maumejiena đacuyume. Joe corebecube ũ. Aru ina ji boropatebede đaimara mácavu ne ju aye boje yure, apurājivubu cainumua. Que baru coatete đabemara mārājivubu na yure jaruvarí. Ũbenita apecu nácacu ũi đajocarū ũi ju aye báquede yure, ye torojubecubu yu ũque, abi Jūmenijicu.

Nópe arī, bedióva cojedeca yópe arī coyurejaquemavu Habacuc:

—Jūmenijicuque boroteyu, úre jēniari jávu. “¿Aipe painoque Judeacavure nájine dacuyurū mu? Mi daicōjeiyede vainí tudama na. Ne jabova apevure cūnáturu coyubema. Que baru āmeno daivucapūravu urarō cucumadama. Meara pōeva ne cucumaino pueno urarō cucumadama pōeva āmena. ¿Que teni aipe painoque náre nájine dayurū mu?” arī jēniari jávu Jūmenijicure.

’Nópe ji jēniari jáiyede jápiayu, yópe āri ju abi ũ: “Caldeacavure Judeaita jaroquijivu. Āmena parurivubu na. Que teni na muje joborōre jaruvarī nure darajārama. Náre jaroyu, Judeacavure nájine dacuyumu”, arī ju abi Jūmenijicu. Ũi que aiyede jápiayu, jēniari jávu úre cojedeca: “Mu āmecu āmevu. ¿Nópe páyuvacari aipe painoque Caldeacavure űuje joborōcavure nájine daicōjeñuru mu? Na űuja Judeacavu pueno āmena bajubu”, avu Jūmenijicure. Ji nópe aiyede, ũ ju abi yure: “Mi joborōcavure ji nájine darīburu yóboi, Caldeacavure máre nájine dacuyumu. Que baru apevure ne āmeno vaiye báquepedeca, na máre āmeno vainájarama. Apeno joborōcavu náre āmeno darājarama.

’Dinumu maquinóre caivu āmena pōeva ye aipe darī majibenama. Yure āruri parurivucapūravu mearo vainájarama. Que teni cainoa joborōcavu meacu parucu ji cuede majinajarama”, arī ju abi Jūmenijicu yure. “Jūmenijinamu” arī, ne pēpeimarare mearore jíyama. Nópe mearore jívu, ārumevubu. “űuje pēpeimaracapūravu cadatenajarama”, arī dāpiarīduyama na. Ne pēpeimara náre cadateiye majibema. Ŭme cubevubu ina pēpeimara. Jehovácapūravu Jūmenijicu baju apucube ũ. Ŭi cūrami cubi. Que baru caivu ũi cūrami curivu bídeca mearoque cue jauvu náre. Jūmenijicuque boroteyu, yópe aivu úre: “Parucubu mu. Que baru pōeva nájine darī majivu mu. Nópe majicuvacari, pōeva ne āmeno daiyede ārumeteiyavu mu”, avu úre.

Caride urarō cucumamecuvacari, Jūmenijicure mearo boro-tequijivu. Ŭque torojucuyumu. Ŭ yure āruri parure daibi. Que teni yure mearo vaidé daibi, arī coyurejaquemavu Habacuc.

**Joacaz aru Joacim āmicurivu Judea
āmicurijoborōcavure pueno ne jaboteino mácarō**
*2 Reyes 23.31-24.7; 2 Crónicas 36.1-8; Jeremías 22.11-12,
25-26, 31, 36*

*(Mateo 1.11, 2.18, 2 Corintios 6.18, Hebreos 8.8-12, 10.15-17,
Apocalipsis 14.10)*

Ñai jabocu Josías bácuí yainíburu yóboi, mamacu Joacaz āmicucu jabotedejaquemavu. Yóbecurāaviava ũi jaboteni búrīburu yóboi, Egiptocavu ne jabocu, Necao āmicucu, Judeacavure boarí vainí turejaquemavu. Nópe vainí tuyu, boje inejaquemavu náre. Que teni ñai jabocu Necao ñai jabocu Joacare Egiptoita nuvarejaquemavu. Nópe nuvañu, Joacaz ũi yócu Judeacavure pueno jabotedejaquemavu. Īmacu Joacim āmicucu barejaquemavu. Jíbucure Egiptoita ne nuvaiyede, Jeremías, Jūmenijicu jiede coyucaipōecu, yópe arī coyurejaquemavu:

—Ñai jabocu Joacaz Judeare ye copaidabecube. Egiptoi yaicúyume, arī coyurejaquemavu Jeremías.

Ñai jabocu Joacim Jūmenijicure ye ja abedejaquemavu. Que baru ñai jabocu ũi jaboteni buiyede, Jeremías yópe arī coyurejaquemavu:

—Muja, Judeacavu, āmene muje darī dajocabedu, Jūmenijicu mujare jári coenínivure muje yebaita jarocuyume. Que teni Jerusalécacūramiare, biaidoare máre, jaruvarājarama na, arī coyurejaquemavu Jeremías Judeacavure.

Ūi que aiyede jápiaivu, obedivu ũre jápiaivu, ũre boarí jaruvaiyurīdurejaquemavu. Nópe ne boarí jaruvaiyuede jáivu, cūinácu bae nócavu bucava yópe arejaquemavu:

—Jūmenijicu jiede coyucaipōecu Miqueas bácu Jeremías ũi coyuiyepedeca javede coyurejaquemavu. Ūi que arī coyuiye báquede, pōeva ũcapūravure boarí jaruvabedejaquemavu, arī coyurejaquemavu ina bucava.

Ne que aiyede jápiaivu, Jeremiare boabédejaquemavu na.

No yóboi, Joacim yóbecuriujua baju ũi jaboteni búrīburu yóboi, Jeremías Jūmenijicu jiede coyuyu, yópe arejaquemavu:

—Veintitrés paiujua baju Jūmenijicu jiede coyuyu batecácu. Ji coyuiyedeca, ũ jiede jápiaiyubevu muja. Muje āmene darī dajocaiyede jáñu maru, ijoborōita mujare cuicōjejebu Jūmenijicu. Mujepāramena curipinidu teivu bárājivu máre yui curāji-

chuma. Ubenita “Jūmenijinamu” arī, muje pēpeimarare mearore jīvubu muja. Muje nópe daiye boje, mujare jári coenínivure yore jarocuyume Jūmenijicu. Caldeacavu ne pueno jabocu, Nabucodonosor āmicucu, ũi churaravaque mujare boarí vainí tarārajama. Nópe vainí tuivu, ne joborōita nuvarajarama mujare. Que teni setenta paiujua baju ne joborōi curājaramu muja. Ijoborōcavure máre boarí vainí tarājarama Nabucodono-sojā. Que teni setenta paiujua baju yóboi, Caldeacavure ñájine dacuyume Jūmenijicu. Nópe ũi ñájine darīburu yóboi, Caldeacavu cubenajarama, arī coyurejaquemavu Jeremías.

No yóboi, bedióva Jeremías yópe arī coyurejaquemavu:

—Ramá āmicuriimarore jápurateavūya urarō ne chīori oiye. Ico Raquedecabe odo mamara mácavure boje. Nárecabu yaivu bácvu. Que baru orī dajocabebico ō, arī coyurejaquemavu.

No yóboi, bedióva cojedeca Jeremías coyurejaquemavu Israecavure:

—Muja, Israecavu, yópe abi maje jabocu Jūmenijicu: “Jápiarā. Apejāravu edaquijijāravu baquinóre bedióva ‘Que darā-jare’ acuyumu ape coyuiye mamae coyuiyede caivu ji pōevare, Judá āmicuriyajubocavure aru apevu Israel bácvu pāramena curipinidu teivu ne yajuboacavure. Néñecuva mácavure ‘Que darājare’ arī coyurejacacu yu no jāravu bácarōre ji nuvaiye báquede na mácavure Egipto āmicurijoborōre jocarī. Yópe népacui nuvaiyepe mamarare duibajīe, ne puruáre jēni, nope-deca na mácavure nuwarejacacu yu no ocopenibo bácarōque. Ubenita ye dabedejaima na mácvu yópe ‘Que darājare’ arī, ji aiye báquepe. Que baru na mácavure āmeina jári dajocarejacacu yu. Iye ji yóboque coyuiye ‘Que darājare’ arī, ānié ji mamarumuque coyuiye báquepe cūinátaru āmequiyebu. Nópe ayubu yu, Jūmenijicu. Que baru yópe ‘Que darājare’ arī coyucuyumu yu caivu Israel bácvu pāramena curipinidu teivu bárājivure ne yajuboacavure”, abi Jūmenijicu.

‘Aru yópe are numi maje jabocu Jūmenijicu: “Apejāravu edaquijijāravu baquinóre na mārājivure dápiare dacuyumu ji dai-cōjeiyeda yópe ji epejuroepedeca diede ne ũmei. Aru me coreó-vare dacuyumu diede máre yópe ji toivajuroepedeca diede ne ũmedurā, torojueque ne darājiyepe ayu diede. Yurecabu ne jabocu bacuyú. Aru nárecabu ji jaboteimara mārājivu. Dinumu maquinóre caivu pōeva me majinajarama yure ne jabocava.

Ina parubevu aru ina parurivu máre majinajarama yure ne jabocuva. Que baru ñamene bueiye ye jaubequiyebu ũi ĩmarocavure aru ũ jinare máre, ne coreóvarãjiyepe ayu yure ne jabocuva. Põecu cubecube yure coreóvabecuyu câreja. Náre cõmaje ãroje jári, jaruvacuyumu yu ne âmeno ðaiyede. Aru ye dápiabecubu diede cojedeca. Aru ârumetecuyumu yu caiye ne âmeina teiyede máre”, abi Jūmenijicu, arĩ coyurejaquemavu Jeremías.

Joacim Judeacavure ne pueno jabocu ũi jabotenĩ buiyede, urarõ tãuturare bojedarejaquemavu Egiptocavu ne jabocure, ũi boje ĩyede. Que baru Joacim Judeacavure urarõ boje ĩnejaquemavu, Egiptocacure bojedacuyu. No yóboi, Caldeacavu Egiptocavure ne vainĩ tuiyede, Joacim Caldeacavu ne jabocucapūravure, Nabucodonosor âmicucure, bojedarejaquemavu. Nõpe bojedayu, yóbecuriujua yóboi, ũre bojedarĩ dajocarejaquemavu. Ũi nõpe bojedarĩ dajocaiyede jáñu, Nabucodonosor ũ jina churavaque Judeacavure boarĩ, vainĩ turejaquemavu.

Nõpe vainĩ tuiyu, ñai jabocu Joacine apevu Judeacavure máre ne joborõita nuvarejaquemavu. Caldeacavu ne jabocu ũi curiĩmaro Babilonia âmicuriĩmaro marejaquémavu. Dĩĩmaroita



náre, Israecavure, epedejaquemavu. Jūmenijicui cūrami cuvaede máre nuvarejaquemavu. Que teni diñamique ũcuidoare nuvarejaquemavu. Nuvarĩ, ñai jabocu ũi cūrami, Babiloniacacūrami epedejaquemavu. No yóboi, ñai jabocu Joacim mácu yainíburu yóboi, mamacu Joaquín āmicucu Judeacavure pueno jabotedejaquemavu.

Caldea āmicurijoborōcavu Judeacavure Babiloniaita ne nuvaino mácarō

Daniel 1-3

(Hebreos 11.32-38, Apocalipsis 11.15)

Ñai jabocu Nabucodonosor, Caldea āmicurijoborōcavu ne pueno jabocu, Judea āmicurijoborōcavure ũi ĩmaroita, Babiloniaita, nuvarejaquemavu. Ũi nuvaimaracavu yóvaicuvaivu bojuvu curejaquemavu. Daniel, Sadrac, Mesac, aru Abed-nego āmicurivu barejaquénavu.

Na ne mearo majiède jáñu, Nabucodonosor náre mearo buei-cōjenejaquemavu, yóbore pōevare cōjeni, ne cadatenajiyepe ayu. Apevure máre ne teiyepe nopedeca bueicōjenejaquemavu. Ina yóvaicuvaivure mearo majidivure cure ðarejaquemavu Jūmenijicu. Que teni cūinácure, Daniene, apevu ne decoboaiyede mearo majini, aipe aiyuede coyuyu cure ðarejaquemavu Jūmenijicu ũre. Ina bojuvu ne me majiède jáñu, Nabucodonosor náre jári cojurejaquemavu.

No yóboi, ñai jabocu Nabucodonosor vuorūmui decoboarejaquemavu. Nópe decoboayu bácu, apevure, ũre majicaipōevare cuturĩ, yópe arĩ jēniari járejaquemavu:

—¿Ji decoboaiye báquede majinaru muja? Diede coyujarā yure. ¿Aipe tequiye jipocai decoboareba yu? arĩ jēniari járejaquemavu náre.

Ũi nópe jēniari jáiyede, yópe arĩ ju arejaquemavu ũre:

—Mi decoboaiye báquede mi coyubedu, mure mearo cūináturu coyurĩ majibevu ñuja, arĩ ju arejaquemavu na.

Ne que aiyede jápiayu, jorojīne vaidéjaquemavu ñai jabocu Nabucodonosor. Nópe jorojīñu, ũre majicaipōeva caivure boarĩ jaravaicōjenidurejaquemavu ũi churaravare. Que teni churarava

Daniejāre nuvarejaquemavu, náre boarí jaruvarājivu. Ne nópe nuvaiyede, Daniel jēniari járejaquemavu náre:

—¿Aipe painoque muje jabocu ñujare boarí jaruvaicōjeni? arī jēniari járejaquemavu Daniel.

Ūi que arī jēniari jáiyede jápiayu, Nabucodonosor ūi deco-boaiye báquede majiyurīduyu ūi jorojīyede coyurejaquemavu churaravai jabocu Daniene. Ūi que arī coyuiyede jápiayu, Daniel Nabucodonosor yebai earī, yópe arejaquemavu ūre:

—Majióvarō corejacu. Mi decoboaiye báquede coyucuyubu, arejaquemavu ū ñai jabocure.

Que teni ñai jabocu ūi ju aiyede, ūi cūramita copaini nuñu, yóbecurā ūi yóvaimarare yópe arejaquemavu:

—Jūmenijicure jēniajara. ñai jabocui decoboaiye báquede ji majiquiyepe aivu, arejaquemavu náre.

Ūi que arī buojaiyede, Jūmenijicu ne jēniaiyede jápiayu, Daniene ñai jabocui decoboaiye báquede majide darejaquemavu Jūmenijicu. Nópe majicu, churarava ne jabocu yebai earī, yópe arejaquemavu ūre:

—Muje pueno jabocure majicaipōevare ye boarí jaruvabegarā. Ñai jabocu yebai nuvajacu yure. Aipe aiyuede ūi decoboaiye báquede ūre coyucuyubu yu, arejaquemavu Daniel churaravai jabocure.

Que arī buojarī, Nabucodonosor yebaita eayu, yópe arī ūi decoboaiye báquede coyurejaquemavu ūre Daniel:

—Mi decoboaiye báquede ye coyurī majibema pōeva me majidivu. Jūmenijicu baju mure decoboare dayume. Yóbore muje aipe tequiyede majicōjeñu mure, decoboare dayume. Yópe jávuya mu, decoboayu: Uracu pēpeimure jávuya mu. Ūi jipobu úruque daibu batevúya. Ūi ñareba plataque daiba aru ūi āmuvea máre plataque daivea batevúya. Aru ūi yapibu bronce āmicue tāuque daibu batevúya. Ūi āradoa hierro āmicue tāuque daiyoa batevúya. Aru ūi cuboba quíjino tāuque majiówarō joboque jīvari ne daiba batevúya. Que teni cūinábo cūrabo urabo cūracūcabo turī darī ñai pēpeimu ūi cuboba turī cobodovare dāvúya. Que teni die cobodoiye báquede ūmevu japurī jaruvavuya. Que teni dibo tuibo cūrabo bucuibo uracū cūracū nuvuya. Yópe painore decoboavuya mu.

Yópe muje tenaiyede decoboayu batevúya mu: Múcapūravu paracu, obedivu pōeva ne pueno jabocu cucu, jipobu

úruque daibupe páyubuya mu. Yóbore mi cāchinocacu jabocu parucu bacuyú cucuyubeda. Apeno joborōcavu ne pueno jabocu ñareba plataque daiba aru āmuvea máre plataque daiveape páyu bacuyúbeda. Yóbore apeno joborōcavu ne pueno jabocu bacuyú cāchinocacu parucu cucuyubeda. Ñai jabocu bacuyú yapibu bronceque daibupe páyu bacuyúbeda. Yóboreta cūinájaborō coatequiyebya. Que teni cūinácu jabocu bacuyú, apevu cāchinocacu parucu cucuyubeda. Ë macuyú parubecu cuboba joboque daibape páyu bacuyúbeda. Apecu jabocu bacuyú majié parucu pueno máque parucu cucuyubeda. Ë macuyú cuboba hierroque daibape páyu bacuyúbeda, arī coyurejaquemavu Daniel Nabucodonosore.

No yóboi, uracu pēpeimure úruque daicōjenejaquemavu ñai jabocu Nabucodonosor. Ëre ne que darī buojaiyede jáñu, pōevare ũi pēpeimure ñuatutarī mearore jícōjenejaquemavu.

—Ñai pēpeimure muje mearore jíbede jáñu maru, urabo toaboi jaruvaicōjequijivu mujare, arejaquemavu ñai jabocu.


Nópe mearore ũi jícōjeiyedeca, Sadrac, Mesac, aru Abed-nego ñai pēpeimure mearore jiyubedejaquemayu. Jūmenijicu baju matuiyeda mearore jiyurejaquemavu. Ëre, ñai pēpeimure, ne mearore jiyubede jáñu, ñai jabocu náre yópe arī coyurejaquemavu:

—¿Ji daimure ñuatutarī, mearore jiyubenaru muja? Caride muje mearore jídu, mujare ñájine dabecubu yu. Ëbenita Ëre muje mearore jíbodu, urabo toaboi jaruvaicōjequijivu. Aru mujecu Jūmenijicu mujare vaidé dabecube, arī coyurejaquemavu ũ, náre, Jūmenijicure mearore jívure.

Ëi que aiyede jápiaivu, yópe arī ju arejaquemavu na:

—Urabo toaboi ñujare mi jaruvaiedeca, Jūmenijicu baju ñujare vaidé daiye majibi. Aru ñujare ũi vaidé daru, meaquiyebu. Ëbenita ñujare ũi vaidé dabedu, ñai pēpeimu mi úruque daimure ñuatutarī mearore jíbenamu ñuja, arī ju arejaquemavu ñai jabocure.

Ne que aiyede jápiayu, jorojīni vaidéjaquemavu ũ. Nópe jorojīñu, ũi yebacavure urabo toabore daicōjenejaquemavu. Nópe ũi cōjeniburu yóboi, ina yóbecurā urabo toaboi jaruvarejaquemavu náre, Jūmenijicui daicōjeiyede daivare. Dibo toabore pueno baju toaijiede darejaquemavu. Que teni ina yebacavucapūravu, ina yóbecurāre jaruvaivu bácvu, éni yaidéjaquemavu.



Aru toaboi coricaita curejaquemavu Sadrac, Mesac, aru Abed-nego. Dibo toabo jívui ne cuede, náre jári jarorejaquemavu ñai jabocu Nabucodonosor. Ubenita yóbecurāre toaboita ne jaruvaiyedeca, yóvaicuvaivu ne cuede járejaquemavu. Cūinācu ina yóbecurāque núcu, Jūmenijicupe ārojacu barejaqué-mavu ne dápiayede. Nópe náre noi ne cuede jáñu, toabo yebai earī, etarī daicōjenejaquemavu náre. Que teni ina yóbecurā toaboita curivu bácvu etarī darejaquemavu. Ye majióvarō náre émenejaquemavu ne bajuáre. Aru bicope corajubedejaquemavu. Ne nópe vaiyede jáñu, cucumari, Jūmenijicure jidojarōque jáñu, yópe arī toivarī epedejaquemavu ñai jabocu Nabucodonosor:

—Sadrac, Mesac, aru Abed-nego nécu Jūmenijicure āmeno arī yávabejarā. Ácu pōecu úre āmeno ũi yávaru, ñájine daicōjecuyumu, arī toivarī epedejaquemavu Nabucodonosor.

Joaquín āmicucu Judea āmicurijoborōcavure pueno ũi jaboteino mácarō

2 Reyes 24.8-17; 2 Crónicas 36.9-10; Jeremías 22.24-30, 29.1-14

(Mateo 1.11)

Joaquín, ñai jabocu bácu Joacim mácuí mácu, Judeacavure pueno jabotedejaquemavu yóbecurāaviava baju. Ũi jaboteiyede, Jūmenijicui daicōjeiyede vainí turejaquemavu. Nópe ũi daiyede

jáñu, Jūmenijicu Jeremiare ñai jabocure yópe arī coyuicōjenejaquemavu:

—Caldeacavu ne joborōita nuvarajarama mure. Que baru noita yaicúyumu mu, arī coyuicōjenejaquemavu Jeremiare ñai jabocu Joaquíne.

Ûi que arī coyurīburu yóboi, Nabucodonosor ù jina churara-vaque copaini, Jerusaléne tarabutedejaquemavu. Nópe tarabuteivu, nócavure etarī maiyójarō darejaquemavu, “Ne āiye cūiní āvué yaijārāri” aivu. Que teni Jerusalécavu náre aipe darī maji-bedejaquemavu. Ne aipe dabede jáivu, nócacu jabocure Joaquiné jēni nuvari, Babiloniaita buoimu curejaquemavu. Ûcavure máre buorī, jēni nuwarejaquemavu. Joaquín ùi cāchinoi curivu jabovare ape paiye darī majidivure máre, ùi churara-vare máre, jēni nuwarejaquemavu Nabucodonosojā. Náre ne jēnajiye jipocai, Joacim mácu pacumacu Judeacavure pueno jabotedejaquemavu ù. Sedequías āmicucu barejaquému ù.

**Jūmenijicu jiede coyucaipōecu Ezequiel āmicucu
Judea āmicurijoborōcavure Babiloniai curivure ùi
coyuino mácarō**

Ezequiel 1-24

(2 Pedro 3.9, Apocalipsis 1.15, 2.7,22-23, 4.2-3,5-8, 5.1, 6.8, 7.3, 8.5,7, 9.4, 10.8-10, 14.1, 19.6,11)

Obedivu pōevare, Judea āmicurijoborōcavure, jēni, buorī nuwarejaquemavu ñai jabocu Nabucodonosor Babiloniaita. Que teni cūinácu nácacu Ezequiel āmicucu barejaquému. Noita ùi cuede, vuorūmuita Jūmenijicu majide darejaquemavu ùre. Nópe majide dayu, Judeacavure, Babiloniaita curivure, ù jiede coyuicōjenejaquemavu Ezequiede. Yópe arejaquemavu Jūmenijicu:

—Mi joborōcavu Judeacavure jiede coyuicōjeñu epeyubu mure. Na yure vainí tuivubu. Que baru mure jápiaiyubenama. Ne jápiaiyubedeca, coyujacu náre. “Yure jápiaiyubema”, arī dāpiayu coyubejebu mu. Ûbenita náre mi coyubedu, āmeno vaijēbu na. Mi coyubedu náre, ji ñájine daru, ne boje baquiyēbu. Aru mu máre ñájcuyumu, náre mi coyube boje. Ûbenita náre mi coyuru, mi coyurīburu yóboi, na matuiyeda ñájinajarama.

Ûbenita múcapûravu ñájimecubu. Que baru pœcu meacure “Ămeno ðabejacu” mi arĭ coyubedu, aru ũ ģmeno ðayu baru, ñájicuyame ũ, ũi ģmeno ðaiye boje. Aru mu máre ñájicuyamu, ji coyucôjeiyede mi coyube boje. Ûbenita ũre mi coyuru apa, aru Jŭmenijicure ũi ju aru, ũre ģmeno ðabecubu yu. Aru ģmeno vaibécube. Que baru ũre coyuyu baru, ji ũropedeca ðayu bacuyámu mu, arĭ coyurejaquemavu Jŭmenijicu Ezequiede.

Que arĭ buojarĭ, Jŭmenijicu coyucôjenejaquemavu ũre Judeacavure. Ŭi nópe coyucôjeiyede, yópe arĭ coyurejaquemavu ũ:

—Caldeacavu maje joborôcavure boarĭ jaruvarĭ, Jerusaléne jaruvare ðarājarama. Nópe ðare ðacuyume Jŭmenijicu. Cŭi-nácu bae majevu ģvuéque yainájarama na. Apevu ijié teni yai-nájarama. Apevucapûravu apeno joborôita nuri coatenajarama. Jŭmenijicure ne vainí tuiye boje, nópe ñájine ðacuyume náre. “Jŭmenijinamu” arĭ, ne pœpeimarare mearore jĭnajarama na. Pŭ Jŭmenijicui cŭrami jĭvuita máre ina pœpeimarare mearore jĭnajarama. Que teni náre ñájine ðacuyume Jŭmenijicu. Caldeacavu apevu majevure cŭinácu bae yuita, Babiloniaita, ðavarājarama. Ñai jabocu Sedequías ũi dupini etaiyede jáivu, ũre jĕnajarama. Nópe ũre jĕivu, yuita ðavarājarama ũre máre. Obebejĭna mautenajarama maje joborôre. Que teni nácapûravu apevure noi curivure Jŭmenijicu ũi ñájine ðaiye báquede mearo coyurĭ jebenajarama. Aru Jehová Jŭmenijicu bajure ũi cuede majinajarama na, arĭ coyurejaquemavu Ezequiel.

**Caldea ģmicurijoborôcavu ñai jabocu
Nabucodonosor ũi churaravaque Jerusalén
ģmicuriĭmarore ne jaruvare ðaino mácarô
2 Reyes 24.18-25.21; 2 Crónicas 36.11-20a; Jeremías 21, 24,
27.12-28.17, 32-35, 37-39; Ezequiel 17.11-18**

(Hechos 7.52, Hebreos 11.32-38)

Ñai Joaquĭn mácuĭ pacumacu Sedequías Judea ģmicurijoborôcavu ne pueno jabocu barejaquemavu once paiujua bajo. Aru ũi jaboteiyede, Jŭmenijicu ũi ðaicôjeiyede ju abedejaquemavu.

Que teni Jūmenijicu jiede coyucaipōecu Jeremíacapūravu ñai Sedequíare yópe arejaquemavu:

—Ñai jabocu Nabucodonosore, Caldeacacure, ju ajacu mu, ñi joborōi mujare ñi nuvaiyede. Caivu mujare Caldeacavu ne joborōita nuivare ape paiyede ye jaurō cubeno cuvare dacu-yame Jūmenijicu. Ubenita Judeacavu dupini mauteivure Judeai aru apevu dupini nuivare Egiptoi máre ñájine dacu-yame ñi, arī coyurejaquemavu Jeremías.

Que arī buojari, ñai jabocu Sedequíare Caldeacavu ne joborōi ũre ne nuvarajinore, ñi noita yaiquínore coyurejaquemavu Jeremías. Ũi que aiyedeca, ñai jabocu Sedequías ũre jápiayubedejaquemavu. Que teni apevu “Jūmenijicu jiede coyucaipōevamu” arī meyuyaivu noi curejaquemavu. Aru na yópe arī coyurīdurejaquemavu Sedequíare:

—Ñai jabocu Nabucodonosor Jerusalécavure ye nuvamecube, arī meyuyarejaquemavu na ñai jabocu Sedequíare.

Ne que aiyede jápiayu, nácapūravure me jápiarejaquemavu ñi. Que teni Egiptocavure yóvarīdurejaquemavu, Caldeacavure boacúnucyu.

Ne que daiyede jápiayu, ñai jabocu Nabucodonosor ñi churavaque Jerusaléne earī, diīmarore tarabutedejaquemavu. Cūináju apeujui coricai Jerusalécavure etarī maiyójare darejaquemavu. Que teni ne nópe daiyedeca, diīmarocavu ne jabocu, Sedequías Jeremiare jēni buorejaquemavu. Caldeacavu Jerusalécavure ne vainí turājinore ñi coyuiye boje, ũre buorī, āmeina teivure jēni jacoñami jacorejaquemavu. Ũi nópe daiyedeca, Jeremías Jūmenijicu jiede coyurejaquemavu. Ñai jabocu Sedequíare, ñi pōevare máre, coyurejaquemavu. Que teni yóbore Sedequías Jeremiare cuturī, jarorī, ũre jēniari járejaquemavu:

—¿Aipe darājidi maja? arī jēniari járejaquemavu.

Ũi nópe arī jēniari jáiyede, yópe arī ju arejaquemavu:

—Ñai jabocu Nabucodonosor ñi cōjeiyepedeca ñajacu, arī coyurejaquemavu Jeremías.

Ũi que arī coyuiyedeca, ñai jabocu Sedequías jiducu, Jeremías ñi coyuiyepede jayubedejaquemavu. Que teni Jerusalécavu pare ne āvué yaiyede jáñu, cūináñami ñai pueno jabocu Sedequías ñi cāchinocavu jabovaque dupini etarīdurejaquemavu diīmarore jocarī. Ne nópe dupini etaiyede jáivu, Caldeacavu churavara náre jēnejaquemavu. Nópe jēivu, ñai jabocu

Sedequíás ũi yacoruaare doarĩ jıvarĩ, ũre jǎri eabecure Babiloniaita nuvarejaquemavu. Que teni Jeremías, Ezequiejǎ ne coyıno mácarõpedeca, Babiloniaita nuvarejaquemavu ũre. Que baru Jerusaléita curıvu Caldeacavu churaravacapūravu Jūmenijicu cūramine, pueno jabocu ũi cūramine, meada-miare máre jarıvarĩ jebedejaquemavu. Dīmarocabiadore, jacotuıbiadore, totarĩ najuárejaquemavu. Que baru obedıvu pōevare, Jerusalécavure, boarĩ jarıvarejaquemavu. Aru ne boarĩ pupuımarare Babiloniaita nuvarejaquemavu.

**Jūmenijicu jiede coyucaipõecu Ezequiel āmicucu
bedıóva Judeacavure Babiloniaita curıvure ũi
coyıno mácarõ**

Ezequiel 33-34, 36-48

*(2 Corintios 6.16, Judas 12, Apocalipsis 11.1,11, 14.10, 19.17-18, 20.8,
21.3,10,12-13,15,27, 22.1)*

Judea āmicurıjıborõcavure Babiloniai curıvure coyıcõjenejaquemavu Jūmenijicu Ezequiede. Jerusaléne ne jarıvarĩburu yóbore, ũ jiede coyıcõjenejaquemavu. Ne ĩmaro mácarõre, Jerusaléne jarıvayede jǎıvu, Israecavu noi curıvu bǎcavu Babiloniaita nurejaquemavu. Nópe nuıvu, noita eaıvu, ne āmeno vaiye báquede coyurejaquemavu ına Babiloniai curıvure. Que baru Jūmenijicu náre ũi coyıcõjeıyede, yópe arĩ coyurejaquemavu Ezequiel:

—Muja, Israecavu, āmeno đaıvu bateávũ muja. Nópe āmeno đaıvıvacari, Judea āmicurıjıborõı curǎjaramu muja. “Jūmenijicu Abrahǎre ũre jıjıborõ mácarõmu. Que teni ñıjepāramena curıpinıdu teıvu bǎrǎjıvu ne jıborõ maquinómu, dijıborõ Judea āmicurıjıborõ”, arĩ dǎpiarĩduıvıbu muja. Muje que arĩ dǎpiaıyede, Judea āmicurıjıborõre pōecubejıborõ đacıyame Jūmenijicu. Muje āmeno đaiye boje, nópe đacıyame. Ũi nópe đaiyede jǎıvu, dınumuta Jūmenijicu baju ũi cuede majınajaramu muja, arĩ coyurejaquemavu Ezequiel.

Judeacavu ne jıbovare yópe arĩ coyıcõjenejaquemavu Jūmenijicu Ezequiede:

—Mujare, jıbovacapūrıvure, jǎri coenımı Jūmenijicu, pōevare muje mearo đabe boje. Muja matıyıda ape paıyede ĩyuri-

vubu. Que teni muja pōevare cadateiyubevu. Āmena coreipōeva ovejavare jári corebema. Ne teiyepedeca mearo jári meadabevu muja pōevare. Nópe paivure mujare jaboteicōjememi Jūmenijicu. No yóboi, ũ jina pōevare caino nuri coateivu bācavure bedióva Israel āmicurijoborōi copaide dacuyume cojedeca. Que teni nore ũ jina pōeva bedióva curājarama. Aru Jūmenijicu náre mearo vaidé dacuyume. Ne pueno jabocu bacuyúre jaboja-cocuyume. Ũi jabojaquijimu David bācui pāramecu curipinidu teyu bacuyúme. Que baru dinumu maquinóre ape paiye jaubeno, mearo cuvarājarama. Jūmenijicu náre ũi cadateiyede, mearo curājarama, arī coyucōjenejaquemavu Ezequiede.

Ũi nópe arī coyucōjeiyede, ũi aye báquepedeca coyurejaquemavu. Que teni Judeacavucapūravure yópe arī coyucōjenejaquemavu Jūmenijicu Ezequiede:

—Apeno joborōcavure mujare ne āmeno daiyede jáñu, náre ñájine dacuyume Jūmenijicu. Que teni muje joborōita mujare copaide dacuyume yóbore, arī coyurejaquemavu Ezequiel Judeacavure.

No yóboi, Jūmenijicu Ezequiede, apucure, yópe decoboai-nope járe darejaquemavu obedivu pōeva mácavu ne cūadoa peneniyoare joborōi paraiyede. Nópe jádovañu, Ezequiede “Yópe ajacu mu”, arejaquemavu. Jūmenijicu ũi aye báquepedeca arejaquemavu Ezequiel. Ũi que aiyede, dicūádoa peneniyoa me cójijini, cuturī, cūiní, pōetedejaquemavu die cūa. Nópe teiyevacari, ne bajuá apuribajua āmenejaquemavu. Que baru bedióva “Yópe ajacu mu”, arejaquemavu Jūmenijicu Ezequiede. Que teni ũi aicōjeiyepedeca, ũi aiyede dibajua ũmedarī nacajarejaquemavu. Ne ũmedarīburu yóboi, ũi jádovaiyede yópe arī coyurejaquemavu Jūmenijicu:

—Iyoá cūadoaque mure yópe arī jádovañumu aipe vaiquínore Israecavure. Iye cūa Israecavupebu. Israecavu ne coateiyede apenoa joborōai, iyoá cūadoa peneniyoa paraiyoape paivubu. Aru ne copaini daiyede ne joborōi, dibajua apuribajuape paivu barājarama. Que teni yu, Jūmenijicu, ji Espírituque náre cadatecuyumu. Que baru Judeacavure, Efraícavure máre, bedióva cūináyajubo cure dacuyumu náre. Que teni na cūináyajubo curivu, Israecavu barājarama. Aru ñai jabocu David bācui pāramecu curipinidu teyu bacuyú ne jabocu bacuyúme. Ji pōeva-que cucuyumu yu. Yópe ji cuiyepe ne jēneboi yóvacuyumu

náque. Ne mearore jímu macuyúmu ya. Aru nácapūravu ji pōeva marajárama, arī coyurejaquemavu Jūmenijicu.

Bedióva yópe arī coyurejaquemavu Jūmenijicu Ezequiede:

—Náre jári coenínivure Israecavure vainí tare daçuyumu. Que teni no yóboi, cūinácu Gog āmicucu cucuyume. Ūcapūravu ũ jina churaravaque Israecavure boacúdacuyume. Ne nópe boarāдайede, noma Israecavu ne joborōi Gojāre ñájine dacuyumu ya, arī coyurejaquemavu Jūmenijicu Ezequiede.

Catorce paiujua Jerusaléne ne jaruvarīburu yóboi, yópe decoboainope járe darejaquemavu Jūmenijicu Ezequiede, apucure. Mamaĩmaro yóbore cuquijiĩmarore jádovarejaquemavu Jūmenijicu Ezequiede. Diĩmaroi mamadami Jūmenijicui cūrami maquinóre járejaquemavu. Aru aipino uradāmi maquinó diñami maquinóre járejaquemavu. Aru diñami maquinó curājivure, sacerdotevare, cūnáturu Jūmenijicu ũi daicōjeiye báquepedeca darājivure járejaquemavu ũ. Aru caivu diyajuboacavu Israecavu dijoborōi ne curājiyede járejaquemavu. Aru cūinácu ne jabocu bacuyá caivu náre jabotecuyume.

Ñai pueno jabocu Nabucodonosor ārumecu ũi teino mácarō

2 Reyes 25.27-30; Daniel 4

(Mateo 1.11)

Cūináñami Caldea āmicurijoborōcavu ne pueno jabocu Nabucodonosor vuorūmuita decoboarejaquemavu. Ūi deco-boaiyede, ũre majicaipōevacacu Daniene arī coyurejaquemavu. Ūi nópe arī coyuiyede jápiaya, yópe arī coyurejaquemavu Daniel ũre:

—Mi yópe tequiye jipocai, decoboayu bateyúmu mu. Ārumecu tecuyumu mu. Siete paiujua baju nópe tecuyumu mu. Que teyu, vecuva ne āiyepedeca, cōriáre ācuyumu mu. Jūmenijicabe pōeva pueno jabotede dayu. Ūrecabe majare cōjeñu. Diede ji aiyede mi majiniburu yóboi, bedióva meacu nucuyumu mu, arī coyurejaquemavu Daniel ñai jabocu Nabucodonosore.

No yóboi, ũi aiyé báquepedeca nópe tedejaquemavu. Ñai jabocu Nabucodonosor ũi cūramita cucu, yópe arī dāpiarīdureja-



quemavu: “Yácapūravu mearo majicu, parucu cucu, iīmarore, Babiloniare, dacacu yu. Iīmarore darī, yui mearo cucuyu”, arī dāpiarīdurejaquemavu. Ũi nópe arī dāpiayede, “Apevure majini vainí tuivu yu”, ũi arī dāpiaye boje, ũre āramecu tede darejaquemavu Jūmenijicu. Que teni siete paiujua yóboi, ne pueno jabocu tedejaquemavu cojedeca, ũi meacu teniburu yóboi. Aru Jūmenijicu ũi parucu cuede majidejaquemavu Nabucodonosor.

No yóboi, ũ mácu yaidéjaquemavu. Dinumu ũ mácu mácu Evil-merodac āmicucu Caldeacavure pueno jabotedejaquemavu ũ.

Media aru Persia āmicurijoborōacavu Caldeacavure boarí, vainí turí, obedijoborōacavure pueno ne jaboteino mácarō

Daniel 5, 7-8

(Mateo 26.64, Marcos 13.26, 14.62, Lucas 21.27, Apocalipsis 1.7, 5.11, 7.1, 9.20, 11.2, 7.15, 12.3-4, 14, 13.1-2, 5-7, 14.14, 17.8, 12, 20.4, 11-12, 22.5)

No yóboi, Nabucodonosor bácu mácu Caldea āmicurijoborōcavure pueno jabotedejaquemavu. Ũ Belsasar āmicucu barejaquému. Que teni ũ pueno jabocu ũi cuede, Daniene, apucure, yópe decoboainope jádovarejaquemavu Jūmenijicu. Dijoborōcavu yóbore ne aipe tenajinore jádovañu marejaquému.

Media aru Persia āmicurijoborōacava obedijoborōacavure ne boarí vainí turājinore majide darejaquemavu Daniene.

No yóboi, cūináñami ñai jabocu Belsasar torojuve tedejaquemavu. Que teni Jāmenijicui cūramique ūcuidoare ūi yebacavure davaicōjenejaquemavu, ne ūcuido baquiyéde. Didoá ūcuido jípacu bácu Jerusaléne jocarí ūi davaiye báque barejaquémavu. Que baru ūi yebacavu didoáre edavaiyede jáivu, ne torojuve teiñamine járadaivu bácvu didoáque vino úyaicorore ūcurejaquemavu. Ne nópe ūcuiyede, “Jāmenijinamu” arí, ne pēpeimaraque torojurí mearore jíni, diede boroteivu barejaquémavu. Ne nópe daiyede, puru matuiyeda ne jári jaroinoi járorejaquemavu. Nópe járorō, bieibai toivarejaquemavu. Nópe teiyede jáñu, ñai jabocu Belsasar jidarí vaidéjaquemavu. Nópe jiducu, Caldeacavu me majidivure dipuru toivaiye báquede coyucōjenidurejaquemavu, ūi majiquiyepe aya aipe aiyurōre. Nópe ūi coyucōjeiyedeca, nácapūravu diede coyurí majibedejaquemavu. Que teni Caldeacavu ne jaboco Daniene āruco, “Ūcapūravu apa coyurí majicube”, arí dápiado ñai jabocure diede coyurejaquemavu ō.



Que teni òi coyuiyede jápiayu, ñai jabocucapūravu Daniene cuturī jarorejaquemavu. Aru Daniel ũi edaiyede jáñu, yópe arejaquemavu ũre:

—Apevu me majidivuvacari, bieibare puru toivaiye báquede ye coyurī majibema. Que baru múčapūravu iye toivaiyede mi coyuru, urarō bojedaquijivu mure. Que teni yure cadatecyure epequijivu mure ji cāchino mi jabotequiyepé, arī coyurejaquemavu ñai pueno jabocu Belsasar Daniene.

Ũi que aiyede jápiayu, yópe arejaquemavu Daniel ũre:

—Mure boje ubevu. Nópe boje ubecuvacari, iye toivaiye báquede coyquijivu mure. Mipacu bácu parucu jabocu bateáme. Nópe páyu bácura, árumecu tede ðaquemavu Jūmenijicu ũre. Que teni siete paiujua baju cōriáre áme. Aru Jūmenijicu parucu ũi cuede ũ mácu majiniburu yóboi, meacu nuquemavu cojedeca. Ũi nópe teiye báquede majivu mu, Nópe majicuvacari, “Jūmenijicu pueno parucubu yu”, arī dápíarīduivu mu. Jūmenijicu cūramique ũcuidoaque yui ũcuvuya muja. Nópe majibecu mi cuede jáñu, dipurare toivaicōjecube. Yópe ainomu yo toivaino: Majióvarō jauvu mi joborōcavu apevu pueno muje jaboteni dajocarājino. Mu máre yóbore jabocu ámecubu mu. Jūmenijicu ũi ðaicōjeiyepedeca ðabecu mi cuede, mure yayuyarī ubebi. Que baru mi joborōre, Caldeacavu ne joborōre, coavacuyame Jūmenijicu. Mediacavu Persiacavueque mi joborōre cavarājarama, arī coyurejaquemavu Daniel Belsasare.

Que teni ðínamimiareca apevu Belsasare boarī jaruvarejaquemavu. Ne nópe boarī jaruvarīburu yóboi, Mediacavu churava Babiloniai edarejaquemavu. Nópe edaivu, nócavure boarī vainí turī, Darío ámicucu Mediacavure pueno jabocu Caldeacavure máre pueno jabotedejaquemavu.

Áimara jijecurivu leones ámicurivu Daniene Jūmenijicu ne áicōjemenó mácarō

Daniel 6

(Hebreos 11.32-38)

Darío obedijoborōcavure pueno jabotedejaquemavu. Nópe jaboteyu, ũi joborōcavure cōjeni cadatenajivure beorejaque-

mavu ũ. Cūinácu ũi beoimaracacu Daniel barejaquémavu. Que teni mearo cadateyu barejaquémavu ñai jabocure. Ũi jabocu Darío ũre járri cojurejaquemavu. Nópe járri cojucu ũre, apevu cōjeni cadateivu pueno epecuyu barejaquémavu. Ũi nópe epequiyede majidivu, apevu cōjeni cadateivuque curivu ũre joro-jínejaquemavu. Nópe jorojivu, na ũre āmecororī coyurī adaiyurīdurejaquemavu ñai jabocu Daríore. Ũbenita nópe daiyurīduivavacari, ũre āmeno arī coyurī adarī majibedejaquemavu. Mearo dayu barejaquémavu Daniecapūravu. Que teni Jūmenijicure ũi mearore jíyede jáivu, na dieque borodarī āmedaiyurīdurejaquemavu ũre. Que baru ñai jabocu Darío yebai earī, yópe arejaquemavu na ũre:

—Mu, ñuje jabocu, Darío, ñuja caivu mi cāchino curivu jabova cūináture yópe arī dápiaivu: Cūináro mi cōjeinore mi epeiyede uvu. Yóbu cōjeino: Cūinácu aviá baju jūmenijinare aru pōevare máre jēniaiye jaubevu ñujare; quénora mu matuiyeda jēniaiye jauvu ñujare. Mure ne jēniamenu, āimara jījecurivu yebai náre jaruvaicōjecuyumu mu. No cōjeinore mi epeiyede uvu ñuja, arejaquemavu na ne jabocu Daríore.

No cōjeinore ne epeicōjeiyede jápiayu, Darío caivure cūináture ũi cōjeiyede vainí tuicōjemenejaquemavu. Daniene ne borodaiyede majibedejaquemavu ñai jabocu. Jāravua coapa yóbecue Jūmenijicure jēniañu marejaquémavu. Que teni iye cōjeiyede apevu ũre ne coyuiyede jápiayu, Jūmenijicure jēniarejaquemavu, yópe ũi darī cōmajiyepé. Nópe Jūmenijicure ũi jēniaiyede jáivu, Darío yebai earī, yópe coyurejaquemavu:

—Daniel mi cōjeiyede vainí tuyube. Jāravua coapa yóbecue Jūmenijicure jēniaimi ũ, múcapūravure jēniamecuvacari, arī coyurī adarejaquemavu na.

Ne que aiyede jápiayu, ñai jabocu Darío pare chiōrejaquemavu. Daniene ñájine daiyubedejaquemavu. Nópe ñájine daiyubecuvacari, ne cōjeiyede epeni buojarejaquemavu ũ. Aru “Iye cōjeiyede vainí tuyure ñájine daiye jauvu”, arī coyurī adarejaquemavu na. Dinumu ũi yebacavure jēicōjenejaquemavu Daniene. Ne nópe jēniburu yóboi, ũre cobe uracobei, āimara jījecurivu, leones āmicurivu, ne curicobei, jaruvaicōjenejaquemavu ñai jabocu. Que teni ũi aiyé báquepedeca dicobei jaruvarejaquemavu Daniene. Ñai jabocu Darío Daniene jecucu, yópe arejaquemavu ũre:

—Jūmenijicu mi mearore jímū, mure vaidé dajacurī, areja-
quemavu ũ Daniene.

Ũi que arīburu yóboi, Daniene ne jaruvarīburu yóboi, urabo
cūraboque biedejaquemavu dicobede. Bieni buojari, dibo cūra-
bore jājaro chītorejaquemavu, apevu ũre ne jaetovabenajiyepe



aivu. Aru diñamine ñai jabocu Darío, úre ārucu, ye cāiye maji-bedejaquemavu.

Mie taiyede, dicobe yebai jácunurejaquemavu ñai jabocu. Dicobe yebai earī, Daniene yópe arī órejarejaquemavu:

—Mu, Daniel, ¿Jūmenijicu, mi mearore jímú, mure cada-tedi? arī jēniari járejaquemavu Daniene.

Ũi nópe arī jēniari jáiyede jápiayu, Daniel ju arejaquemavu:

—Júju, yure ũi cadateiyede ina āimara āmema yure. Cūi-nácu ángelede, ũi daroimure, darocube Jūmenijicu. Que baru ñai ángele āimarare yure āre dabebi. Ámeno dabecu ji cuede jáñu, yure cadatebi ji jabocu Jūmenijicu, arī ju arejaquemavu Daniel.

Ũi nópe arī ju aiyede jápiayu, ñai jabocu torojurejaquemavu. Que teni ũi yebacavure Daniene dicobei cucure ĩni jaetovaicōjenejaquemavu. Ne nópe ĩni jaetovaiyede jáñu, ñai jabocu Darío Daniene borodaivu bácvure dicobeita jaruvaicōjenejaquemavu. Ne nópe jaruvaixedata, cūiná ina leones náre āri, jaruvārī jebedejaquemavu. No yóboi, apeno cōjeino epedejaquemavu ñai jabocu Darío. No cōjeino yópe arejaquemavu:

—Caivu Jūmenijicu bajure, Daniel ũi mearore jímure, mearore jíye jauvu pōevare, arī epedejaquemavu ñai jabocu Darío.

**Darío aru Ciro obedivu pōevare pueno jabova ne
cuede Daniel apucure decoboainope ũi jáiyede
Jūmenijicu ũi majide daino mácarō**

Daniel 9-12

(Mateo 24.15, Marcos 13.14, Apocalipsis 7.14, 10.5-7, 12.7, 19.12, 22.11)

Ñai Darío pōevare pueno jaboteni buiujui, Daniel Jūmenijicu jiede toivaitucuboa báquede bueyu barejaquémavu. Nópe bueyu, Jeremías bácu yópe arī, ũi toivārī epeiye báquede bueyu barejaquémavu:

—“Setenta paiujua yóboi, Jerusaléne bedióva meadarājivu barejaquémavu Israecavu”, arī ũi toivaiye báquede buedejaquemavu. Nópe bueyu, diede dápiarejaquemavu. Que teni Jūmenijicure mearore jícuyu, āiyede āmecuva úre yópe arī jēniarejaquemavu:

—Mu, Jūmenijicu, ñujare, Israecavure, ñuje āmeina teiyede ārumetejacu. Que teni bedióva ñuje joborōi cure ñajacu cojedeca. Ñuje āmeina teiye boje āmeno vaivubu caride, arī jēniarejaquemavu Jūmenijicure.

No yóboi, Ciro āmicucu, Persia āmicurijoborōcavu ne pueno jabocu barejaquémavu. Ñai jabocu ũi cuede, Daniene apucure decoboainope jáðovarejaquemavu Jūmenijicu. Diede apucu decoboaiyede jáñuvacari, majibedejaquemavu Daniel. Nópe diede majibecu, yópe arī jēniarejaquemavu Jūmenijicure:

—Yure ji decoboaiye báquede me majide ñajacu, arī jēniarejaquemavu Daniel.

Ũi nópe arī jēniayede, ũi daroimure, ángelede, ũre coyucōjeñu jarorejaquemavu Jūmenijicu. Daniel yebai eayu, yópe arī coyurejaquemavu ñai ángele:

—Jūmenijicu mure pare jecubi. Caride mure ji coyucuinore me jápiajacu. Ñai jabocu Ciro ũi jaboteniburu yóbore, curājiva jabova, Persiacavu ne pueno jabova bárājiva, yóvaicuvaivu barājárama. Piniducacucapūravu urarō cuve upacu bacuyáme. Obedivu churaravare máre cuvacyume. Nópe ũi cúaedeca, Grecia āmicurijoborōcacu jabocu ũi churaravaque boarí vainí tucuyume. Nópe vainí tuyu, jabotecuyume. Ũbenita no yóboi, ũ juedocuvabecurata yaicúyume. Que teni juedocuvabecu bácu ũi yayiede, apevu dijoborōcavu pueno jabova barājárama. Dijoborōre coavarājarama. Yóvaicuvaivu yajuboa-cavu barājárama. Aru diyajuboa coapa ne jabova cuvarājarama. Siria āmicurijoborō, aviá daino meapūravucajoborōcacu jabocu Egipto āmicurijoborō, aviá doinocajoborōcacu jabocure jári coenícuyume. Que teni ina Siriacavu ne pueno jabocu ũ jina churaravaque Egiptocavure boacúnucuyume. Que teni ina Egiptocavu vainí tarājarama Siriacavure. Nópe ne vainí tuiyede jáñu, Siriacavu ne jabocu jorojícuyume. Nópe jorojĩñu, ne copaini nuiyede ne joborōi, Israecavaque jorojícuyume. Nópe jorojĩñu, ũi churaravare epecuyume ne cōjenaiyiyepe ayu Israel āmicurijoborōcavure. Dinumu maquinóre āimarare boarí, juarí, jámuóri, Jūmenijicure mearore jícōjemenajarama. Cūinácu bae Israecavu náre ju arājarama. Ũbenita apevu Jūmenijicure mearore jini ñajocaiyubevu, ina churaravaque boarājarama. No yóboi, ñai jabocucapūravu yaicúyume. Dinumu maquinóre cūinácu ángele, Miguel āmicucu, Israeca-

vure jári corecuyu dacuyume. Boarájarama pœva dinumu maquinóre. Ubenita Israecavure mearo vaidé dacuyume Jūmenijicu. No yóboi, yaivu bácvu, bedióva apurivu tenajarama. Cūinácu bae nácvu caivu járavua coapa Jūmenijicuque curájarama. Apevacapūravure caijáravua ñájine dacuyume Jūmenijicu, arī coyurejaquemavu Daniene ñai ángele.

**Ñai jabocu Ciro Israecavure Jerusaléita ũi
nuicōjeino mácarō**

2 Crónicas 36.20b-23; Esdras 1-2

(Mateo 1.12, Lucas 3.27)

Judea āmicurijoborōcavu ne jabocu Nabucodonosor bácu Caldea āmicurijoborōita ũi davaimara mácvu dijoborōita yebacavu curejaquemavu. Setenta paiujua bajo dijoborōcavu jabocu ũi yebacavu barejaquémvu. Jūmenijicu jiede coyucai-pōecu Jeremías ũi coyuiye báquepedeca vaidéjaquemavu ina Israecavu.

Que teni setenta paiujua bajo noi ne earīburu yóboi, Caldeacavu jabotebedejaquemavu. Media aru Persia āmicurijoborōcavu ne jabova oatuvaimara marejaquémvu. Que teni Persiacavu, Ciro āmicucu, ne jabocu barejaquémvu. Ũ Israecavure cōmaje āroje járejaquemavu. Jūmenijicupūravu ũre náre cōmaje āroje járe darejaquemavu. Nópe náre cōmaje āroje jáñu, yópe arī toivarejaquemavu ñai jabocu Ciro:

—Jūmenijicu bajo cainoa joborōcavure yure jacoboci. Que teni ũi cūramine Jerusaléita meadaicōjemi yure. Que baru Israecavure ji joborōi curivure Jūmenijicui cūramine meadaicōjeñu, Jerusaléita jaroyubu. Que baru caride ji joborōcavure yópe aivu: “Israecavure cadatejarā. Muje cuvaede jíjarā náre. Ne urōpe jíjarā náre”, aivu yu ji pœvare. Que teni muje jíyeque, Jūmenijicui cūramine meadarājarama na. Āimarare boarí, juarí, jámuóri, Jūmenijicure mearore jínajarama diñami, arī toivarí epedejaquemavu ñai jabocu Ciro.

Que teni ina Judá aru Benjamín āmicuriyajuboacavu jabova “Ñaja Jūmenijicui cūramine Jerusaléita meadarānurajaramu”, arejaquemavu na. Sacerdoteva aru Levita āmicuriyajubocavu

máre nopedeca arejaquemavu. Que teni dijaborōcavu urarō jíde-
jaquemavu náre, Jūmenijicui cūramine ne meadarājiyepe aivu.
Aru Jūmenijicui cūramicaūcuidoare, Nabucodonosor bácu ūi
tatoiye báquede, jacopaiyovarejaquemavu űai jabocu Ciro náre.
Judá āmicuriyajubocavu ne jabocu, Zorobabel āmicucu, didoáre
jacopaiyovarejaquemavu ū. Aru cuarenta y dos mil paivu pōeva
Israecavu Judea āmicurijoborōi nurejaquemavu. Noita eaiṽ,
apevu Jerusalēi curejaquemavu. Aru apevu apenoa ĩmaroai,
Jerusalén joabejīno curiĩmaroai curejaquemavu.

**Jerusalēi Israecavu Jūmenijicu ūi cūramine ne
meadaino mácarō**
Esdras 3-6; Hageo 1-2

Diujui Judea āmicurijoborōi ne eaiujui, siete paiaviava
yóboi Israecavu earejaquemavu Jerusalēi. Caivu na torojave
teijāravure darāearejaquemavu, Jūmenijicure mearore jīvu.
Que teni Josué āmicucu, Zorobabel āmicucu máre Jūmenijicure
ne mearore jīcaivare darejaquemavu. Josué sacerdotevare jabo-
teipōecu barejaquémaṽ. Aru Zorobabecapūravu Judá āmicuri-
yajubocavu ne jabocu barejaquémaṽ. Jipocai ne ḁaino mácarō
divare, bediōva darejaquemavu na. Nópe ḁaivu, na āimarare
boarī, juarī, jāmuōri, Jūmenijicure mearore jīnajivu barejaqué-
maṽ. Moisés bácu ūi ḁaicōjeino mácarōpe divare ḁaiyuriva
barejaquémaṽ.

Que teni apeujui pucarā aviáva yóboi, Josué Zorobabe-
maque Israecavure “Yópe ḁarājareṽ” aicōjenejaquemavu,
Jūmenijicui cūramine meadarājivu. Nópe ne ḁarīburu yóboi,
torojurī vainí, Jūmenijicure yuriarejaquemavu.

Aru Hageo āmicucu, Jūmenijicu jiede coyucaipōecu, yópe arī
coyurejaquemavu Jūmenijicu ūi yávaiye báquede ūre: “Jídube-
jarā. Cūináro bediōva cojedeca caino joborōre cújiovacuyumu
yu urarō baju. Aru caino cavarōre máre cújiovacuyumu yu
urarō baju. Jāve ḁacuyumu”, arī coyurejaquemavu.

Dinumu cūinácu bae pōeva Judeai curivu Israecavu āmene-
jaquemavu. Apenoa joborōcavu barejaquémaṽ. Jipocai Asiria-
cacu jabocu náre Judeai ḁavarī, epedejaquemavu. Aru Israeca-
vure jārī coenínivu barejaquémaṽ na. Nópe paivuvacari,

“Mujare cadatenajivu”, arĩdurejaquemavu Israecavure. Ubenita jãve baju náre cadateiyurivu âmenejaquemavu. Náre âmédaiyurivu barĩdurejaquemavu. Que baru Zorobabel Josuémaque náre ubeni, yópe arejaquemavu:

—Ñujare muje cadateiyede ubevu. Ñai jabocu Ciro ñujacapūravure Jūmenijicui cūramine ũi meadaicōjeiyepedeca đarāja-ramu ñuja, arĩ coyurejaquemavu náre jãri coenínivure.

Ne que aiyede jápiaivu, ubedejaquemavu na. Que teni jícua arĩ, ina Israecavure âmédarejaquemavu na. Persia âmicurijoborōcavu jabovare bojedarejaquemavu, ne meyuyarãjiyepe aivu ina Israecavure. Que teni ina jabovacapūravu Israecavure ámeno borodarĩ meyuyarejaquemavu ne pueno jabocu Cirore. Que baru ina Israecavure ámeno borodarĩ, toivarĩ jarorejaquemavu ne jabocure. Yópe arĩ toivarĩ jarorejaquemavu: “Israecavu mi jabocu cuede ubema. Que baru mure jaruvaiyurivubu”, arĩ meyuyarĩ, toivarĩ jarorejaquemavu. Ne nópe borodarĩ âmédaiyede, Israecavure Jūmenijicui cūramine meadarĩ dajocaiye jaurejaquemavu. Ubenita apecu jabocu, Darío âmícucu, ũi cuede, diñamine meadarĩ búrejaquemavu bedióva cojedeca.

Que đarĩ Darío ne pueno jabocu ũi cuede, Jūmenijicu Hageo âmícucure aru Zacarías âmícucure máre epedajaquemavu, Israecavure ũi jiede ne coyurãjiyepe ayu. Que teni Hageo yópe arĩ coyurejaquemavu Zorobabejãre aru Josuéjãre:

—“Jūmenijicui cūramine meadarãjino jaurĩ vaivu cãreja”, ubeni que aivubevu muja. Nópe arĩ jipocatebejarã. Meadamia cūramia cuvũ muja. Ubenita Jūmenijicui cūramine meadabevu muja cãreja. Muje nópe đabede jãñũ, oco dare đabetebe Jūmenijicu. Que baru urarō cuvabevu muja. Muje oteye me jẽmevu. Que baru muje ãiye, muje ũcuiye, aru muje doiye máre yaurijẽe eabevu mujare. Que baru caride Jūmenijicui cūramique baquiyéde jocucuaire ñnanujara. Diñamine meadarĩ búrãnujara, arĩ coyurejaquemavu Hageo Israecavure.

Ũi que aiyede jápiaivu, Zorobabel aru Josué yópe ũi aiyebáquepedeca đarejaquemavu. Jūmenijicui cūramine meadarĩ búrejaquemavu. Que đarĩ cūinácu aviá yóboi, náre torojure đacuyu, bedióva Hageore náre coyuicōjenejaquemavu Jūmenijicu, yópe arĩ:

—Jĩnami jipocai curiñami cūrami mácarō meadami marejaquémavu. Caride muje meadaĩnami jaurĩ vaivu. Nópe jauédeca,

urarō dápíabejarā muja. Yure āruri paru jarā muja. Mujaque cucuyumu. Que baru meadamine darājaramu muja. Jipocai curiñami mácarō pueno meadami maquiýebu. Nopedeca arī coyubi Jūmenijicu, arī coyurejaquemavu Hageo náre.

Aru pucarā aviáva yóboi, bedióva Hageore náre coyuicōjenejaquemavu cojedeca:

—Jūmenijicui cūramine caride muje meadaru, Jūmenijicu mujare mearo cadatecudayube. Que baru urarō cuvarājaramu muja, arī coyurejaquemavu ũ náre.

Que darī diñamine ne meadaiyede jáivu, Persiacavu jabova Israecavure jári coenínivu ne yebaita eaivu, náre yópe arī jēniari járejaquemavu:

—¿Acu páyu iñamine meadaicōjeni mujare? arī jēniari járejaquemavu na.

Ne nópe arī jēniari jáiyede, Israecavu náre yópe arī ju arejaquemavu:

—Ñai jabocu Ciro bácu iñamine meadaicōjeame ñujare, arī ju arejaquemavu Israecavu.

Ne que ai yede jápiaivu, náre jári coenínivu ne jabocure, Daríore, yópe arī toivarī jarorejaquemavu: “¿Jāveneca ñai jabocu Ciro bácu Israecavure Jūmenijicui cūramine, ne jaruvaiñami mácarōre, bedióva meadaicōjeari?” arī jēniari jáivu toivarī jarorejaquemavu.

Nópe ne toivarī jaroiyede, ñai jabocu Darío ũi ju arī toi arī daroquijiyocare coredejaquemavu. Ne nópe coreiyede, Israecavu memeivu barejaquemavu. Aru Jūmenijicu náre cadateyu barejaquemavu. Dinumu ñai jabocu Daríore earejaquemavu diyoca ne toivarī jaroiyoca. Diyocare jári boroteniburu yóboi, Ciro bácu ũi cōjeni toivaiyoca bácarōre ũi yebacavure voicōjenejaquemavu ñai Darío. “¿Jāveneca ñai jabocu Ciro bácu Jūmenijicui cūramine meadaicōjeari?” arī majiyucu, no cōjeinore ũ mácu toivaiyoca bácarōre voicōjenejaquemavu. Diyocare vorī earī, buení buojarī, Israecavure jári coenínivure yópe arī toivarī jarorejaquemavu ñai jabocu Darío:

—Israecavu Jūmenijicui cūramine meadajarāri. Que baru pōevare muje boje íyede náre jíjarā, diñamine ne meadarājiyepe aivu, arī toivarī jarorejaquemavu Darío Israecavure jári coenínivure.

Ëi nópe toivarĩ jaroiyede, náre jári coenínivucapūravu Israecavure cadatedejaquemavu. Que teni seis paiujua Darío ùi jaboteiye bajure, Jūmenijicui cūramine meadarĩ buojarejaquemavu na.

Que darĩ buojarĩ, āimarare boarĩ, juarĩ, jāmuóri, Jūmenijicure mearore jidejaquemavu. “Iñami míñami maquinómu” aivu, nópe darejaquemavu. Que teni torojarĩ vaidējaquemavu na. Aru sacerdotevare aru Levita āmicuriyajubocavure “Yópe dajarā”, arĩ epedajaquemavu, diñamine ne meadarājiyepe aivu. Moisés bácu javede náre ùi daicōjeiye báquepedeca daivu barejaquému na. Que teni apeujui Pascua āmicurijāravu ne torojuve teijāravure darejaquemavu. Jūmenijicui cūramine meadarĩ jebeivu bácu torojuve teivu barejaquému.

Jūmenijicu jiede coyucaipōecu Zacarías āmicucu Jerusaléita nuivure ùi coyuno mácarō

Zacarías 1-14

(Mateo 21.4-5, 27.9-10, Juan 12.15, 19.37, Judas 9, Apocalipsis 1.7, 4.5, 5.1,6, 6.2-5, 7.1, 11.1,4, 12.10, 16.16, 22.1)

Israecavure Hageo ùi coyuiujumica Zacarías āmicucu máre náre coyurejaquemavu. Yópe arĩ coyurejaquemavu náre:

—Jūmenijicure bedióva cojedeca maje ju aiyede jáñu, majare cadatecuyume. Majevu javecavu bácu ne teiye báquepe tebenajarevu caride. Jūmenijicu jiede coyucaipōeva náre ne coyuru, na mácu ye ju abedajaquemavu. Ne nópe ju abe boje, náre ñájine darejaquemavu Jūmenijicu. Ëi ñájine darĩburu yóboi, joejē máque iye ñájiye báquede ne āmeno darĩ, vainí tuiye báque boje coreóvarejaquemavu na mácu, arĩ coyurejaquemavu Zacarías.

No yóbore, ne aipe tenajinore coyucu, Zacarías apucure decoboainope járe darejaquemavu Jūmenijicu. Yópe arĩ coyurejaquemavu Jūmenijicu Zacariare:

—Yóbore Jerusaléi mearo ĩmaro nuquiyebu, arĩ coyurejaquemavu Jūmenijicu ũre.

Que teni yópe arĩ coyurejaquemavu cojedeca Jūmenijicu:

—Muja, Jerusalécavu, jájara muja. Muje jabocu bacuyú mujare dacuyume. “¿Meacu bárica yu?” abecube. Burróre

tubarī dacuyume. Burro bojuyovacari bacuyúme ũi tubamu macuyú. Que teni caivu úre ju aivure, nújurorivure toabo cūiméboi, vaidé dacuyume. Que teni cainocavu ne pueno jabocu bacuyúme. Nopedeca abi Jūmenijicu, arī coyurejaquemavu Zacarías Israecavure.

Aru yópe arī coyucōjenejaquemavu Jūmenijicu Zacariare:

—Ĩnama iye tāuturaturava treinta paiturava plataque daituravare. Apevu Israecavu bojedaicōjenejaquemavu nópe paiye bojede úre boje. Iye tāuturaque jíni bojedađama no joborō, jorodaipōecui joborō mácarōre. Que teni yópe Jūmenijicui đaicōjeino mácarōpedeca yure đadama na, abi Jūmenijicu, arī coyurejaquemavu Zacarías.

Aru bedióva yópe arī coyucōjenejaquemavu Jūmenijicu úre:

—Ovejavare coreipōecure boarí jaruvacuyumu yu. Aru coa-teni nurajarama na, ovejava. Obedivu yainájarama. Aru ina yaibévure ñájine dacuyumu yu, pu ne jēniaiyeta yure. Dinumu maquinó “Ji pōevamu” acuyumu náre. Aru “Mu, Jūmenijicu, maje mearore jímumu”, yure arājarama, abi Jūmenijicu, arī coyurejaquemavu Zacarías.

Bedióva cojedeca yópe arī coyurejaquemavu ũ:

—Yóbore Jūmenijicure ārurivu, úre ne totaimu mácure járajarama pōeva. Nópe jáivu, chīorajarama. Que baru ne āmeina teiyede ārumetecuyume Jūmenijicu. Aru ne mearore jímara ne pēpeimarare, Judeai curivure, jaruvacuyume ũ. Que teni cainocavu ne pueno jabocu bacuyúme Jūmenijicu. Dinumu maquinóre Israecavure jári coenínivure ñájine dacuyume ũ, arī coyurejaquemavu Zacarías.

Ester āmicuco jaboco Israecavure cadatedo ōi āmenore vaidé đaino mácarō

Ester 1-10

Cūinájāravu Persia āmicurijoborōcavu ne pueno jabocu, Asuero āmicucu, torojuve teijāravu meajāravu darejaquemavu ũi curiīmaroi Susa āmicuriīmaroi. Ũbenita ũi cutuiyedeca jímarepacore, Vasti āmicucore, úre ju abeco, torojuve teiyede numenejaquemavu ō. Que baru ñai jabocu óque jorojīnejaquemavu. Aru ũi cāchinocavu jabova, yópe arī majicarejaquemavu úre:

—Apevu ñuje nomiva Vasti mure òi ja abede majidivu baru, na máre ja abejebu némarebucuvare. Que baru óre jaruvarí, apeco mímarepaco bacoóre vojacu mu, arí majicarejaquemavu ùi cāchinocavu jabova.

Ne que aiyede jápiayu, Asuero ne aiye báquepedeca darejaquemavu. Òi yebacavure obedivu nomiva mearōmivare davaicō-jenejaquemavu ùi cūrami. Cūináco ina nomivacaco, Ester āmicuco, meaco baju barejaquémavu. Israecaco barejaquémavu ò. Juedoco cāreja òi bucva bācavu yaidéjaquemavu. Que baru jípacumacu óre bucuóvarejaquemavu. Ò marejaquémavu Mardoqueo āmicucu.

Cūináco, cūináco ñai jabocuque curejaquemavu dinomiva. Que teni Ester òi cuede úque, pare urejaquemavu óre. Que baru Vasti òi jaboteino mácarōre oatuvarejaquemavu Estede.

Cūinájaravu pucarā ūmuva, Bigtán aru Teres āmicurivu, Asuerore coreipōevacavu ne baju yópe arí borotedejaquemavu:

—Ñai maje jabocure boarí jaruvarājarevu, arí borotedejaquemavu.

Aru ne nópe arí boroteiyede jápiarejaquemavu Mardoqueo. Nópe jápiayu, coyucunurejaquemavu Estede. Óre Mardoqueo ùi coyurīburu yóboi, ócapūravu yópe arí coyurejaquemavu jíma-repacure:

—Jipacumacu pucarā mure coreipōeva mure ne boarí jaruvarājiyede jápiabiya, arí coyurejaquemavu Ester.

Òi coyuiyede jápiayu, ñai jabocu ùi cāchinocavu jabovare yópe arejaquemavu:

—Yure coreipōeva jēneboi vojarā pucarā “Asuerore boarí jaruvarājarevu” arí yávaivu bācavure. Náre eaivu baru, ne ñamemuare buorí, jocucujaravei buorí, yuyarí, boarí jaruvarā náre, arejaquemavu Asuero ùi cāchinocavu jabovare.

Òi aiyede jápiaivu, vorānurejaquemavu pucarā ñai jabocure boarí jaruvaiyurīduivare. Bigtāre aru Terede eaivu, nópe ñai jabocu ùi daicōjeiye báquepedeca darí, ne ñamemuare buorí, jocucujaravei buorí, yuyarí, boarí jaruvarejaquemavu na māvure.

Na māvure ne boarí jaruvarīburu yóboi, yópe arejaquemavu ñai jabocu úre toivacaipōecure:

—Itucubo paperatucubo, caiye vaiye báquede ji jaboteiyede coyuitucubo jívui ina pucarã ne borore toivarĩ epejacu, arejaquemavu Asuero.

Ëi aiyede jápiayu, ùi aiyे báquepedeca toivarĩ epedejaquemavu ùre toivacaipõecu.

No yóboi, Asuero cūinácu ùi cāchinocacu jabocuque torojacu barejaquemavu. Ë Amán āmicucu barejaquemavu. Nópe úque torojacu, apevu pueno jaboteicōjenejaquemavu. Nópe jaboteicōjeñu, ùi pōevare yópe arĩ daicōjenejaquemavu:

—Amáre jáivu muja, ñuatutajarã ùi jipocai, ùre pueðarãjivu, arejaquemavu Asuero.

Ñai jabocu ùi daicōjeiyede jápiaivu, ùi aiyे báquepedeca ðarejaquemavu ùi pōeva. Ubenita Mardoqueocapūravu nópe ðabedejaquemavu. Amán ùi jipocai ñuatutabedejaquemavu. Que baru Amán jorojĩñu, boarĩ jaruvaiyurejaquemavu ùre aru caivu ina Israecavure máre. Náre ùi boarĩ jaruvaquijijāravure beorejaquemavu, ðuvarĩ yajurĩ, cainijidua etaiyede jáñu.

Ëi boarĩ jaruvaquijijāravure beorĩburu yóboi, Asuero yebai nurejaquemavu Amán. Yópe arĩ coyurejaquemavu Amán Asuerore:

—Mi pōeva jēneboi cuma cūináyajubo pōeyajubo, mi cōjeiyede vainí tuivu. Que baru náre boarĩ jaruvaicōjecacu mu, arĩ coyurejaquemavu Amán Asuerore.

Ëi que aiyede jápiayu, Asuero boarĩ jaruvaicōjenejaquemavu diyajubore. Aru ùi āmuyo adaitarabure ùi āmiáque jídejaquemavu Amáre. Ditarabuque jāñuvañu maru ùi cōjeiyede toivaino mácarõre, apecu oatubarĩ majibedejaquemavu. Ñai pueno jabocu máre oatubarĩ majibedejaquemavu.

No cōjeino cuede majicu Mardoqueo, Estede boro jarorejaquemavu, yópe arĩ:

—Maja Israecavu caivure Amáre boarĩ jaruvaicōjecube mímarepacu. Que baru cadatejaco ñujare, arĩ boro jarorejaquemavu Estede.

Ëi boro jaroiyede jápiado, yópe arĩ, ju arĩ boro jarorejaquemavu ùre:

—Ji earu ñai jabocu yebai, yure ùi cutubedu, yure boarĩ jaruvaicōjecuyube ù. Yure boarĩ jaruvabecu baru, jabióvacuyume ùi jaboteiyore, úruque daiyore. Que baru jidavu yu ecocodo ùi yebai. Que baru mu aru caivu apevu majevu, Israecavu,

curivu yore, Susare, āiyede āmejara yóbecurijāravua baju ũi yebai ji ecocojiye jipocai, arī boro jarorejaquemavu Ester jípacumacure.

Yóbecurijāravua yóboi, Ester Asuero yebai earejaquemavu. Ũi jāiyede óre, jabióvarejaquemavu ũi jaboteiyore. Aru óre arī jēniari járejaquemavu:



—Mu, Ester, ¿yéde ucorū? arī jēniari járejaquemavu.

Yópe arī ju arejaquemavu úre:

—Mu, ji jabocu, mu Amámaque āradajarā ji yebai javena, arejaquemavu.

Cōmiáijāravu, yópe ōi cutuiyepedeca, āranurejaquemavu na. Ne āicoricaí, ō náre cuturejaquemavu, ne āradarājiyepe ado bedióva cojedeca apejāravui. Āri buojarī, Amán copaini eayu ũi cūrami, yópe arejaquemavu jímarepacore aru ũi yóvaimarare:

—Caride yu cūinácu āvu ñai jabocu Asueroque aru ico jaboco Esteque. Aru javena máre náque āquijivu. Ũbenita ñai Israecacu Mardoqueo ũi ñuatutabe boje, chñoivu yu, arejaquemavu.

Ũi nópe aiyede jápiado jímarepaco, yópe arejaquemavu:

—Ñai Israecacure mure cārijovaicōjemejacu mu. Boarí jaruvaicōjeyacu úre, ũi ñamemure buorí, jocucujaravei buorí, yuyarí, arejaquemavu Amáre jímarepaco.

Ōi que aiyede jápiayu, nópe ōi aye báquepedeca dacuyu barejaqué mavu Amán.

Aru diñamine cāiye majibedejaquemavu Asuero. Que baru úre memecaipōevacacu davaicōjenejaquemavu ditucubo papera-tucubo, caiye vaiye báquede ũi jaboteiyede coyuitucubore, jári borotecuyu ditucubore. Ũi jári boroteiyede ditucubore, Mardo-queo ũi coyuiye báquede ina pucarā mácavu úre boarí jaruvai-yuríduivu bácavu ne borore jári borotedejaquemavu. Ũi jári boroteniburu yóboi, úre memecaipōeva cuturí jarorí ũi yebai, yópe arí náre jēniari járejaquemavu:

—¿Aipe darí bojedari maja Mardoqueore, yure ũi mearo daiye báquede? arí jēniari járejaquemavu náre.

Nópe ũi jēniari jáiyede, yópe arí ju arejaquemavu na:

—Ye mearo dabeteavū maja, arí ju arejaquemavu.

Ne nópe aiyede, Asuero yebai ecorejaquemavu Amán. Ũre jáñu, Asuero yópe arí jēniari járejaquemavu úre:

—¿Aipe ñajabarica yu, pōecure puedacuyu? arí jēniari járeja-quemavu Amáre.

Ũi jēniari jáiyede jápiayu, Amán “Yure puedaiyubi ji jabocu”, arí dápiarí durejaquemavu. Nópe arí dápiayu, yópe arí ju areja-quemavu ñai jabocure:

—Ñai pōecu mi pueaquiimure doicōjeyacu mi cuitóteca-jede. Aru tuoicōjeyacu úre mi jipobu adaitarabure máre. Nópe cucu, tubaicōjeyacu úre mi caballo puenoi. Que teni mi cāchino-cacu jabocu, caivu ne pueaaimu, náre jipocatejacurí Susa āmi-curímaro coricai. Aru yópe arí, bujino codobobojacurí: “Yópe ñaibi maje pueno jabocu ñai pōecure ũi pueaaimure”, ajacurí ũ. Nópe ñajacu, ji jabocu, ñai pōecu mi pueaquiimure, arí ju arejaquemavu Amán.

Ũi que aiyede jápiayu, Asuero ñaicōjenejaquemavu Mardo-queore yópe Amán ũi aye báquepedeca. Aru Amáre jipocatei-cōjenejaquemavu caballore, Mardoqueo ũi tubamure. Que teni Mardoqueore pueno jorojīnejaquemavu Amán.

Ne āiora eaiyede, Asuero Amámaque Ester yebai āranureja-quemavu. Āri buojarí, Estede jēniari járejaquemavu Asuero, yópe arí:



—Mu, Ester, ¿yéde ucorũ? arĩ jēniari járejaquemavu.

Õ yópe arĩ ju arejaquemavu:

—Jēniaivu mure, cadatejacu yure aru ji pōevare. Caivu ñujare boarĩ jaruvarājarama. Que baru cōmaje āroje jájacu ñujare, arĩ ju arejaquemavu Ester ñai jabocure.

Nópe õi aiyede jápiayu, ñai jabocu jorojĩñu, yópe arĩ jēniari járejaquemavu ôre:

—¿Ñamema mure mi pōevaqué boarĩ jaruvaiyucu? arĩ jēniari járejaquemavu Estede.

Õ yópe arĩ ju arejaquemavu:

—Amáme ñujare boarĩ jaruvaiyucu, arĩ ju arejaquemavu Ester.

Ñai jabocu Asuero õi coyuiyede jápiayu, pueno jorojĩñu, Amáre ùi ñamemure buorĩ, jocucujaravei buorĩ, yuyarĩ, boarĩ jaruvaicōjenejaquemavu. No yóboi, Asuero Amán mácre oatuvaicōjenejaquemavu Mardoqueore. Ubenita oatubarĩ majibedejaquemavu ùi cōjeiyede, churaravare ùi boarĩ jaruvaicōjeiyede Israecavure. Que baru ape cōjeiyeque boaicōjenejaquemavu Israecavu ne mauvare, churarava ne boarājjiyede dijāravu ne beoijāravu baquinóre. Que teni ñai jabocu Asuero cadatedejaquemavu Israecavure. Aru Israecavu ujuá coapa dijāravu ne

beoijāravure ārurivu, trece paijāravua Adar āmicuriavia ūi búrīburu yóboi, torojuve teivubu. Dijāravu ne torojuve teijāravu Purim āmicurijāravubu.

Ñai sacerdote Esdras āmicucu Jerusalén āmicuriīmaroita ūi nuino mácarō

Esdras 7-10

Jūmenijicui cūramine cuarenta paiujua ne memeni buojārīburu yóboi, Esdras āmicucu Jerusalén āmicuriīmaroita nuñu marejaquémvu. Ũ sacerdote cucu Jūmenijicu ūi daicōjeiyede me bueyu barejaquémvu. Que teni iye daicōjeiyede me majicu, diede pōevare me bueyu barejaquémvu. Aru Jerusaléita Esdras aru ũque nuiyurivure Persia āmicurijoborōcavu ne pueno jabocu, Artajerjes āmicucu, nuicōjenejaquemavu náre. Que teni obedivu Israecavu, sacerdoteva aru Levita āmicuriyajibocavu máre Esdraque nurejaquemavu. Ne nurajiye jipocai, ñai jabocucapūravu náre tāuturare jídejaquemavu, āimarare ne boarí, juarí, jāmuóri jínajimarare bojedarājiyepe ayu. Que teni ina Israecavure Jūmenijicure mearore jícōjenejaquemavu ñai jabocu. Aru ape paiye náre jauéde ne bojedarājiyepe ayu, náre tāuturare jídejaquemavu ñai jabocu. Buojarí, ūi cāchinocavu jabovare, Judea āmicurijoborōi curivare, yópe arí toivarí jarorejaquemavu Artajerjes:

—Ñai Esdrare, ũcavure máre, boje ícōjemejara. Náre cadatejarā muja, arí toivarí jarorejaquemavu Artajerjes.

Que darí Babilonia āmicuriīmaroi curivu Judea āmicurijoborōi ne nurajiye jipocai, āiyede āmevava Jūmenijicure jēniarejaquemavu. Ne nópe jēniaiyede, Jūmenijicu náre jári meadarejaquemavu. Que baru na ne cuveque me earejaquemavu Jerusaléita.

Israecavu ne jipoca eaivu bācavu apeno joborōcavu nomicurejaquemavu. Sacerdoteva aru Levita āmicuriyajibocavu máre nopedeca daivu barejaquémvu. Que teni dinomiva “Jūmenijinamu” arí, ne pēpeimarare mearore jívu barejaquémvu. Que baru Jerusaléita eayu Esdras, ina Israecavu āmeno daivure jáñu, chīorejaquemavu. Nópe chīoñu, Jūmenijicure jēniari, yópe arejaquemavu:

—Ñujeñecuva mácavu, javecavu bácvu, mi daicōjeiyede ju abedejaquemavu. Ne nópe ju abe boje, náre jári coenínivure ne joborōita náre Israecavure nuvaicōjenejaquemavu mu. Nópe nuvaicōjeñu, ñájine dayu barejaquémvu mu. Nópe ñájine dayuvacari, caride ñujare Jerusaléita daicōjeivu mu. Míñami cūramine meadare davu mu ñujacavure. Que baru Persiacavu jabovare mearo daicōjeivu mu ñujare. Ñujare mi mearo daiyede-deca, caride bedióva āmeno daivubu ñujacavu, arejaquemavu Esdras Jūmenijicure.

Ëi que aiyede, obedivu Israecavu ùi yebai cójijini, ne āmeno daiyede chōioivu, yópe arejaquemavu:

—Jūmenijicure ju abevu ñuja. Apenoa joborōacavu nomicurī, āmeno dacarā ñuja. Que baru yópe darājaramu ñuja: Ñujemarebucavure, némarare máre, ne joborōaita névure jacopaiyovarājaramu ñuja, arī coyurejaquemavu Esdrare.

Nópe aivu, ne aiye báquepedeca darejaquemavu. Jūmenijicu ùi daicōjeiyepe apenoa joborōacavure nomicuicōjemenejaquemavu. Nomivare máre apenoa joborōacavure ūmucucicōjemenejaquemavu. Que baru nópe darejaquemavu na.

Jerusalén āmicuriīmarore ne biaidore ne jaruvaibiaido bácarōre Nehemías Israecavure ùi meadaicōjeino mácarō

Nehemías 1-7

Dinumure Israecacu Nehemías āmicucu barejaquémvu. Persia āmicurijoborōcavu ne pueno jabocu Artajerjes āmicucu ùi yebacacu barejaquémvu ũ. Cūinájāravu imacu Hanani āmicucu apevu Israecavunque Judea āmicurijoborōi eavvu bácvu Persiai copaini edarejaquemavu. Ne nópe edaiyede jáñu, yópe arī jēniari járejaquemavu:

—¿Jerusaléi curivu, majevu, meatedi na? arī jēniari járejaquemavu Nehemías imacure.

Ëi que aiyede, yópe arī ju arejaquemavu:

—Jerusaléi curivu majevure āmeno daivu batemá majare jári coenínivu. Que baru āmeno vaivu batemá majevu. Diīmarocabiaido Nabucodonosor bácvjā ne jaruvaibiaido bácarō cuvū.

Que baru dibiáido jedevacobea bieiveare juarĩ jaruvarejaquemavu, arĩ coyurejaquemavu Nehemíare.

Ëi que aiyede jápiayu, pare chĩorejaquemavu. Nópe chĩoñu, Jūmenijicure jēniañu, yópe arejaquemavu:

—Mu, Jūmenijicu, paracu bajubu. Mure jecurivure, mure me ju aivure mi arĩ epeiye báquepedeca daivu mu. Ñujevu, Israecavu, mi daicōjeiyede ju abedejaquemavu. Ne nópe daiye boje, apevu náre ñuje joborōi curivure ne joborōita ñuvare-jaima. Náre nópe daicōjequemavu mu, ñujevure, Israecavure. Nópe dayuvacari, bediόva mure ñuje me ju aiyede jáñu, ñuje joborōita nuicōjeivu mu. Caride ji jabocu Artajerjede jēniaquijivu, Jerusalēita ji nuquiyepe ayu. Nópe ji jēniaiyede, úre ju are dajacu mu, arĩ jēniari járejaquemavu Jūmenijicure Nehemías.

Que teni yóbecuriaviava yóboi, ũcuidore vino úyaicoro curidore ũi jabocure jíyu barejaqué mavu Nehemías. Ë nópe jíyu, chĩoñu ũi cuede jáñu, ũi jabocu úre jēniari járejaquemavu:

—¿Aipe teni chĩoñuru mu? arĩ jēniari járejaquemavu.

Ëi que aiyede jápiayu, jiducuvacari, úre ju arejaquemavu:

—Jerusalén, ji ĩmaro, ne jaruvaiĩmaro cuede jáñu, āmeno ũmecuvu yu. Yure mearo daiyucu baru, ji jabocu, Judeaita yure nuicōjejacu, Jerusaléne ji meadaquiyepe ayu, arĩ jēniarejaquemavu ũi jabocure.

Ëi que aiyede jápiayu, ju arĩ Nehemíare, Judeacavure memaicōjecuyu epedejaquemavu ũi jabocu. Nópe epeyu, apevu ũ jina Judeai curivure yópe arĩ toivarĩ jarorejaquemavu ñai jabocu Artajerjes:

—Nehemíare me cadatejarā muja, arĩ toivarĩ jarorejaquemavu.

Jūmenijicupūravu Nehemíare jabocure dare dacuyume. Nehemíare ne aije báquepedeca dayu barejaqué mavu Jūmenijicu. Que teni trece paiujua Esdras Judeaita ũi earĩburu yóboi, Nehemías máre noita earejaquemavu. Yóbecurijāravua ũi earĩburu yóboi, ñami obebejĩna ũmuvaque yóvarĩ nuri, diĩmarocabiadore jácuearejaquemavu. Dibiáidore ne meadarā-jinore majiyucu, jácunurejaquemavu. Que teni dibiáidore jári buojarĩ, ũcavure yópe arĩ coyurejaquemavu:

—Caride maje ĩmaro ne jaruvaiĩmaro matevú. Que baru iĩmarocabiadore meadarājarevu maja. Maje jabocu Artajerjes majare cadateiyubi, arĩ coyurejaquemavu náre.

Ûi que aiyede ja arejaquemavu. Que arĩ buojarĩ, dibiáidore meadarĩ búrejaquemavu. Ne meadarĩ buiyede, jápiarĩ jarorejaquemavu náre jári coenínivu. Sanbalat, Tobías, aru Gesem ámicurivu barejaqué mavu Israecavure jári coenínivu. Nópe jápiarĩ jaroivu, ne yebaita eaivu, náre yuridejaquemavu. Ne yurini-buru yóboi, yópe arĩ yávarĩ vorejaquemavu Israecavure:



—Maje jabocu Persiacacu pueno jabocure jaravarājivubu ina Israecavu, arī yávarī vorejaquemavu náre jári coenínivu.

Ne nópe arī yávarīburu yóboi, Nehemías yópe arejaquemavu náre:

—Jūmenijicu ñujare cadatecuyume, arī ju arejaquemavu.

Que teni ina Israecavu memene nurejaquemavu. Diīmaro-cabaiadore, bieiveare máre, meadaivu barejaqué mavu. Ne nópe memeyede jáivu, Sanbalat Tobíamaque náre yurini núrejaquemavu, yópe arī:

—Ye paruribiaido āmebu ibiáido. Cūiná jātari nuquiyebu. Quévu baju buojabenamu muja, arī yuridejaquemavu na Israecavure.

Nópe ne yuriyede jápiayu, Nehemíacapūravu yópe arī Jūmenijicure jēniarejaquemavu:

—Mu, Jūmenijicu, inare ñujare jári coenínivure ñájine dajacu mu. Ñujare āmeno vaidé daiye báquepedeca, náre máre āmeno vaidé dajacu, arī jēniarejaquemavu Jūmenijicure.

Que teni dibiáidore cūraque meadaivu barejaqué mavu. Ne nópe meadaiyede jáivu, dibiáido coricai ne eaiyede jáivu, jor-jīnejaquemavu náre jári coenínivu. Nópe jorojīvu náque, boai-yurīdurejaquemavu. “Dibiáidore meadarī dajocajarāri” aivu, náque boaiyurīdurejaquemavu. Ne nópe daiyuede jápiarejaquemavu ina Israecavu. Que teni diede majidivu, Jūmenijicure jēniari járejaquemavu, ne aipe darājinore majiyurivu. Nópe jēniari jári buojarī, cūinácu bae nácavure ne boaiyeque náre coreicōjenejaquemavu, “Apevu corī darī boai-nomu” aivu. Que teni dibiáidore meadaivu, jidurivu, chīori búrejaquemavu. Ne nópe chōiyede jáñu, Nehemías náre yópe arejaquemavu:

—Ye chīomejara. Que baru jidubejarā. Ne boarādaiyede jáivu, me boajārā muja, ye jidubevava. Jūmenijicu majare cadatecuyume, arejaquemavu Nehemías ina memeipōevare.

Que teni náre jári coenínivu boaiyurīduivavacari, boabédejaquemavu. “Maje boaiyurīduiyede majini buojadama” apevu ne aiyede jápiaivu, náre boarānumenejaquemavu. Aru ina Israecavu dibiáidore cūraque meadaivu barejaqué mavu. Ne nópe memeyede, pucayajuboa coavarejaquemavu Nehemías memeipōevare. Cūináyajubore memenajivure epeni, apeyajubore boarādaiyure járajivure epedejaquemavu. Aru na caivu memei-

pōeva boaicaroveare cuvarejaquemavu. Ne nópe cūvaede, náre ne jári coenínivu ne edaiyede jáñu, cūinácu japuiyo trompeta āmicuriyore bujide dacuyu barejaqué mavu. Nópe bujide dayu, náre coyucuyu barejaqué mavu. Nāmine diīmaroi cārejaquemavu ina memeipōeva. Nópe cāivu, ne cuitótecajeare ye dubedejaquemavu. Ārumena náre boaiyurivu “Edarājichuma” aivu, ne cuitótecajeare dubedejaquemavu.

Dinumure dibiáidore ne memeicoricai, Israecavu cuve cuvarivu apevu Israecavu cuve cuvabevu némarare ĩni, nuvari, yebacatedejaquemavu. Apenumu cuve cuvabevu ne joborōajiene, ne cūramiajiene máre, tatorejaquemavu, ne bojecube dainore bojedabede jáivu. Ne nópe daiyede jáñu, Nehemías náre, cuve cuvarivure, yópe arī jararejaquemavu:

—Jūmenijicu muje nópe daiyede cuve cuvabevure daicōjememi. Que baru ne joborōajiene, ne cūramiajiene máre, jacopaiyovajarā náre, arī jararejaquemavu ũ.

Nópe náre ũi jacopaiyovaicōjeiyede, ũi aiye báquepedeca darejaquemavu na.

Que teni dibiáidore buojarejaquemavu. Jedevacobeare bieívea matuiyeda jaurejaquemavu. Diveá matuiyeda jauéde jápiaivu, Sanbalat, Tobías, aru Gesem Nehemiare boarí jaruvaiyurĩdurejaquemavu. Nópe boarí jaruvaiyurivu ũre meyuyarejaquemavu. Yópe arī boro jarorejaquemavu ũre:

—Ñūjaque borotecudajacu, ubeni arī meyuyaivu barejaqué mavu, ne nópe boro jaroiyede.

Nópe aivuvacari, ũque borotenajivu bajo āmenejaquemavu. Quénora ũre boarí jaruvaiyurĩduivu barejaqué mavu. Que teni ũre ne nópe cutuiyede jápiayu, Nehemías yópe arī ju arejaquemavu:

—Ji memeíye cūvu yure. Que baru mujaque borotecunuri majibevu. Maiyójavu yure, arī ju arejaquemavu Nehemías.

Bedióva cojedeca yóbecue bajo ũre cuturĩ jarorĩdurejaquemavu. Ne cuturĩ jaroiyede jápiayu, Nehemías ũi aiye báquepedeca arejaquemavu náre cojedeca. Yóbecue bajo ũi arĩburu yóboi, na ũre yópe arī toivarĩ jarorejaquemavu:

—Yópe adama pōeva mujare: “Maje pueno jabocure jaruvarājivubu na. Que baru Nehemías Israecavure pueno jabotecuyume. Caride diede maje pueno jabocure coyurājarama. Que

baru ñujaque borotecudajacu”, arī cuturī jarorīdurejaquemavu ũre cojedeca.

Nópe ũi arī toivarī jaroiyede jári boroteyu, yópe ju arī toivarī jarorejaquemavu Nehemías:

—Muja yure meyuyaivubebu, arī ju arī, toivarī jarorejaquemavu Nehemías.

Israecavure ne jidure daiyede majicu, que arī ju arejaquemavu Nehemías. Ne memeyede ne dajocaiyuede máre majidejaquemavu ũ. Que teni ina Israecavu pare memenejaquemavu, dibiáidoque jedevacobeá bieiveare darī buojarājivu. Que baru no yójiḃoi, diveáre ne jēori buojaiyede, buojarī jebedejaquemavu dibiáidore. Pucarā aviáva nújurorō bajī jebedejaquemavu dibiáidore. Nópe ne jebeiyeḃe jáivu, caivu Judeai curivu aru náre jári coenínivu máre Jūmenijicu náre ũi cadateiyede majidejaquemavu.

Esdras Nehemíamaque Jūmenijicu ũi ḃaicōjeiyede ne vainí tuicōjemeno mácarō Israecavure

Nehemías 8-13

Diḃju siete paiaviava nújurorōi, Israecavu Jerusalén āmicurīmarocabiadore meadarī buojarejaquemavu. Que teni Judea āmicurijoborōi curivu Israecavu torojuve teijāravure darejaquemavu. Dijāravu, úcūa daijāravu torojuve teijāravu barejaquemavu. Ne cójijiyede, ñai sacerdote Esdras diyoca cāriáiyocare, Jūmenijicu ũi ḃaicōjeiyeque toivaiyocare davarī, jári borotedejaquemavu ina pōeva ne jápiaiyede. Nópe jári boroteyu, me coyurejaquemavu die ḃaicōjeiyede, ne vainí tubenajiyepe ayu. Que teni ina Levita āmicuriyajubocavu ũre coyurī cadatedejaquemavu. Nópe ne bueiyeḃe jápiaivu, Israecavu chīorejaquemavu. Die ḃaicōjeiyede vainí tuivu ne cuede majidivu, chīorejaquemavu. Ne nópe chīoiyede jáivu, Esdras aru Nehemías ina Levitacavunque náre chīoicōjemenejaquemavu.

Dijāravu Jūmenijicure ne mearore jījāravure ina Israecavure torojuicōjenejaquemavu. Na caivu jocucua cavabuare īnarejaquemavu, úcūare darājivu. Jūmenijicu ũi ḃaicōjeiye báquepedeca, diucūai curājivu barejaquemavu no torojuve teijā-

ravure. Nópe ne torojuve teiyede, Israecavu bácvu darejaquemavu nópe ne cue báquepedeca Canaán ámicurijoborói ne jabocu Josué bácuque. Ëbenita no yóboi iyede dajocarejaquemavu. Ye dabedejaquemavu bedióva cojedeca pu dijárvu, ne torojuve teijárvu ita Esdrajáque.

Dinumu ina Israecavu Jūmenijicure ne ámeina teiyede ne chíoiyede coyurájivu cójijidejaquemavu. Mamaramure Jūmenijicu ũi daicōjeiyede ne toivaiye báquede buedejaquemavu. Aru no yóboi, ne ámeina daiyede coyurí vaidéjaquemavu Jūmenijicure. Nópe coyuiyu, Jūmenijicure mearore jídejaquemavu. Que teni névu bácvu, Abrahāja mácvu, javecavu bácvu ne daiye báquede yávarí buojarí, Jūmenijicure náre ũi cadatequiyepe aivu arí jēniarejaquemavu. Jēniari buojarí, “Jūmenijicu ũi daicōjeiyede vainí tubenamu ñuja” aivu, yópe arejaquemavu na:

—Israecavu ámevu nomivare nomicubenamu bedióva. Aru Israecavu ámevu ũmuvare ũmucubenamu ñuja. Apenoa joborōacavu ne cuvaede ne bojedaru jabuóvaujārvuare, ye ímenamu ñuja. Aru ñuje bojecubedaimarare ne bojecubedaiyede ñujaque árumetenajaramu. Aru ñuje yebacavure jacopaiyovarājaramu ñuja. Que baru Jūmenijicui cūrami jiede bojedarájaramu ñuja, arí coyurejaquemavu ina Israecavu.

Doce paiujua yóboi, Nehemías ñai Persiacacu jabocu Artajerjede jácunurejaquemavu. Noita ũi cuede, cūinácu sacerdote, Eliasib ámicucu, mearo dabedejaquemavu Jerusaléi. Tobíare, Israecavure yuriyu bácvu, Jūmenijicui cūramicaticubui caicōjenejaquemavu ũ. Tobías Amón ámicuriyajubocacu barejaqué-mavu. Diyajubocavu Israecavure jári coenínejaquemavu. Aru Jūmenijicu Amócvu ũi cūramine ecoicōjemenejaquemavu. Joejīe máque Jerusaléita copaini edarejaquemavu Nehemías. Tobías ũi cuede Jūmenijicui cūrami jáñu, jorojīnejaquemavu. Nópe jorojīñu, Tobías jiede ditucubui cuede jaetovarejaquemavu. Nópe jaetovayu, Jūmenijicu ũi daicōjeiye báquepedeca daicōjenejaquemavu, ditucubure docucubequiyepe ayu. Que teni apevu máre ámeno daivu ne cuede jáñu, náre jararejaquemavu ũ. Jūmenijicu ũi daicōjeiyede vainí tuivu ne cuede jáñu, náre coyurejaquemavu ũ, ne mearore darājiyepe ayu.

Jūmenijicu jiede coyucaipōecu Malaquíás āmicucu Israecavure ũi coyuno mácarō

Malaquíás 1-4

(Mateo 11.10, 17.10, Marcos 1.2, 9.11, Lucas 1.17,76, 7.27, Apocalipsis 6.17)

Nehemíajā Jerusalén āmicuriīmarocabiaidore ne meadarī buojarīburu yóboi, Israecavure ũ jiede coyucōjenejaquemavu Jūmenijicu Malaquíás āmicucure. Yópe arī coyurejaquemavu Malaquíás:

—Yópe abi Jūmenijicu mujare: “Muja, Israecavu, mujare jecuvu yu. Yópe ji jecué báquepe Jacob bācucapūravure, nope-deca jecuvu mujare. Ũ mácu imacucapūravu jībucu pueno parurō nurejaquemavu. Jībucu memecarejaquemavu imacucapūravure. Muja, sacerdoteva, ji daicōjeiye báquepedeca yure ye mearore jíbevu muja. Āimarare boarī, juarī, jāmuóri, yure jívu, āmenare jívu muja. ‘Āmenare ñuje jídu, quéda dāpiacuyume Jūmenijicu’, arī dāpiarīduivu muja. Muje āimara muje davaimarare máre yure mearore jíbevu. Yure, muje jabocure, boje-daivu āimara āmenaue, ye bojedabejebu muja. Apenoa joborōacavucapūravu āimarare yure jívu, muje pueno mearare jíyama nácapūravu. Que baru muja, sacerdoteva, pōevare bueivu, meyuyaiyede bueivabu muja. Muje nópe bueiyede, āmeno daivubu muje bueimarare. Javede mujeñecuva mácavu ji daicōjeiypedeca daivu bācavureca, ji daicōjeiypedeca vainí tuavū muja. Cūináturu dabeteavū muja. Muje nópe daivu cuede jáivu, apevu pōeva mujare puedabema. Yu náre mujare puedabede daivu. Israecavu nomiva āmevure nomicuvu muja. Aru Israecavu ũmuva āmevure ũmucuvu muja. Nópe muje cuede, apevu mujacavu mujemarebucuvare jaruvadama. Ure muje bueiyede jápiayu, ũetuivu yu. Āmena pōevare ‘Mearamu’, arīduivubu muja. Que teni yure jaraivubu muja cūináturu daicōjeivu. Nópe muje daiyede jáñu, ũetuivu yu”, abi Jūmenijicu mujare, arī coyurejaquemavu Israecavure Malaquíás.

Ũi que coyurīburu yóboi, yópe arī coyucōjenejaquemavu Jūmenijicu Malaquíare:

—Yóbore, ji jaroquijimu ũi daquinore coyucuyure jarocuyumu yu. Ji cūramita eacuyume ji jaroquijimu. Ũi nópe eaiyede, diñami curivu cūináturu tebenama ũ macuyúre. Diñamita

eayu, caiye diñami cuede āmene jaruvarī jebecuyume. Ũi que darīburu yóboi, meara āimarare boarī, juarī, jāmuóri, yure mearore jīni majinajarama sacerdoteva mārājivu. Dinumu maquinóre caiye muje āmeno daiyede coyucuyume mujare. Yavié daipōeva, ũmuva curīvu apevu nomivaque nēmarebucva āmevuque, pōeva borocurīvu, aru meyuyaivu cuve cuvabevure aru apenoa joborōacavure märe ne āmeno daiyede arī coyurī adacuyume. Nópe daivu yure ye mearore jībema, abi Jūmenijicu mujare, arī coyurejaquemavu Israecavure Malaquías.

Nópe ayu, yópe arī coyurejaquemavu Israecavure Malaquías:

—Jūmenijicu ũi aiye báquepedeca dayube. Que baru muja, Jacob bácuī pāramena curipinidu teīvu, muje nópe cuede Jūmenijicu ũi daicōjeiyepedeca muje daru, ũ dacuyume mujare yópe ũi aiye báquepedeca. Cūináturu caiye muje oteiye curōaque cuvaede, caipucapuruaape paiyede cuvarīvu, cūinánore jījarā Jūmenijicure. Muje nópe daru, urarō jīcuyume ũ mujare. Yópe arī dāpiarīduivubu muja: “Āmena pōeva Jūmenijicu ũi daicōjeiyede vainí tuivuvacari, ñuje cuvarō pueno urarō cuvavu. Que teni Jūmenijicu ũi daicōjeiyede ñuje vainí tubedu, ye baquiyé āmevu”, arī dāpiarīduivubu muja. Nópe āmevu. Jūmenijicure vainí tuīvu, āmeno vaibéjebu cāreja. Ne āmeno vaibédeca, yóbore ũre vainí tuivure jaruvarī jebecuyume Jūmenijicu. Que baru ũre vainí tubevu urarō cuvarājarama. Jūmenijicu ũi daicōjeiyede Moisés bácuire ũi toivarī epeicōjeiye báquede me ārujara muja, arī coyurejaquemavu Malaquías Israecavure.

Que teni yópe arejaquemavu cojedeca ũ:

—Yópe abi Jūmenijicu: “Jaroivu yure coyucaipōecure mi jipocai, ũi meadaquiyepe ayu pōevare, ne copu etarājiyepe ayu mure, nopedeca pōeva ne meadaiyepe cuimara ñai ũmu, ne puedaimu, ũi daquiye jipocai”, abi Jūmenijicu. Ijoborō cūiquiye jipocai ũre darocuyume Jūmenijicu. Nébucavare aru nēmarare märe cūinároi cuicōjeñu darocuyume. Ũbenita mamarumu Elías dacuyume, ñai Jūmenijicui daroimu ũi daquiye jipocai, arī coyurejaquemavu Malaquías Israecavure.

**Jūmenijicure mearo jíyure “Āmeno vaijácūrī”,
Satanás ũi aiyede jápiayu, Jūmenijicu
ũi ju aino mácarō
Job 1.1-2.10**

(Santiago 5.11, Apocalipsis 12.9-10)

Javede Job āmicucu curejaquemavu. Ũ Jūmenijicure me mearore jíyu, méne dayu barejaqué mavu. Cuve cuvacu barejaqué mavu ũ. Ũbenita apevu jiede ye meyuyarī ĩñu āmenejaquemavu.

Cūinájāravu caivu Jūmenijicu jina, ángeleva, cójijidejaquemavu Jūmenijicu yebai. Que teni ũre jári coenícu máre, abujuvai jabocu, ũi yebai earejaquemavu. Ũ Satanás āmicucu barejaqué mavu. Ũi yebai eayure, Jūmenijicu ũre jēniari járejaquemavu:

—¿Aru, yure memecaipōecure Job āmicucure majicurū mu? Ũ caivu apenoa joborōacavu pueno meacube. Ũ yure me mearore jíbi. Que baru āmene jári yayuyarī ubebi, arejaquemavu Jūmenijicu Satanáre.

Ũi que aiyede jápiayu, Satanás yópe arī ju arejaquemavu ũre:

—Jūju, cuve upacu ũre mi daiyede jáñu, ũ mure mearore jíbi. Ũbenita ũi cuvede mi tatorī jaruvaiyede jáñu, mure āmeno yávarī jaracuyume, arejaquemavu Jūmenijicure.

Ũi que aiyede jápiayu, Jūmenijicu yópe arī ju arejaquemavu:

—Mi nópe aye jáve maru, majinajaramu maja. Caiyede ũi cuvede jaruvacunujacu. Nópe dayuvacari, Job ũi bajure āmeno ijié tede dabejacu, arejaquemavu Satanáre.

Ũi nópe aiyede jápiayu, Satanácapūravu nuri, Job jiede jaravarī jebedejaquemavu. Ũi oteivecuvare aru apevu ũi oteiāimarare, ũi burrovare, aru ũi camellovare máre ñavari jebede darejaquemavu ñai abujuvai jabocu. Ũi ovejavare, mamarare máre boarī jaruvarī, jebede darejaquemavu. Cūiná mae ne boarī jaruvaiyede jáivu, ũi yebacavucapūravu āme borore coyurāedarejaquemavu. Ne nópe coyuiyede jápiayu, Job pare chñorejaquemavu. Nópe chñonuvacari, yópe arejaquemavu ũ:

—Pōeteyu cuitótecaje cubecu, ape paiye cuvabecu barejaqué mavu yu. Ji yainiburu yóbore máre, ape paiye cuvabecuyumu

yu. Jūmenijicu ape paiyede jibi majare. Yóbo diede cūiné daibi. Caijāravua Jūmenijicure “Meavu” arī, aiye jauvu majare, arejaquemavu Job.

Nópe ayu, ũ ye āmeno yāvabedejaquemavu. Que teni Jūmenijicure ye jarabedejaquemavu. Pare chīoñuvarī, ye āmeno yāvabedejaquemavu Jūmenijicure.

Apejāravui, bedióva cojedeca caivu ángeleva Jūmenijicu yebai cójijidejaquemavu. Satanás máre ũi yebai earejaquemavu. Ũi eaiyede jáñu, yópe arejaquemavu Jūmenijicu ũre:

—¿Aru, aipe dápiayurū mu Jore? Āmeno vaiyúvacari, cainumua mearore jibi yure, arejaquemavu Satanáre.

—Job ũi bajure āmeno ijié tede dare dabetevu mu yure. Ũre mi āmeno ijié tede dare daru, ũ mure āmeno jaracuyame, arejaquemavu Satanás.

—Caride ũre mi ijié tede daru meaquiyebu. Nópe dayuvarī, ũre yaidé dabejacu, arejaquemavu Jūmenijicu Satanáre.

Ũi que aiyede jápiayu, Satanácapūravu nuri, Job ũi bajure āmeno churiá curibaju nure darejaquemavu ũ. Ũi nópe daiyede, Job pare āmeno vaidéjaquemavu. Ũbenita Jūmenijicure ye mearore jini dajocabecure jádo, Joi márepaco ũre yópe arejaquemavu:

—¿Jūmenijicure mearore jiyurū mu cāreja? Ũre “Āmecubu” arī, yaijácu mu, arejaquemavu ō.

Ōi que aiyede jápiayu, yópe arejaquemavu jímarepacore:

—Dápiaino cubeno yávaivu mu. Mearo vaivu Jūmenijicuque torojavu maja. Que baru āmeno vaivu máre ũque torojurī cue jauvu majare, arejaquemavu Job jímarepacore.

Nópe ayu, Jūmenijicure mearore jiyu, ũre ye āmeno arī yāvabedejaquemavu.

Job yóbecurā ũcavuque ũi boroteino mácarō

Job 2.11-14.21

(Hebreos 12.5-6, Apocalipsis 9.6)

Job ũcavu yóbecurā marejaquému. Elifaz, Bildad, aru Zofar āmicurivu barejaquému. Que teni Job ũi āmeno vaiyede jápiaivu, ũi yebaita eaivu, ũre āruri parure darājivu



barejaquémavu. Ëi yebai eaivu, éque dobarejaquemavu. Cūinásumana baju borotebevava dobarejaquemavu éque. Ëre pare ijimure jáivu, cucumarejaquemavu na.

—Ji pōtebedu, meajebu yure. Āmeno vaiyábu yu. Yure ji yaidú meajebu, arejaquemavu Job.

Ëi que arīburu yóboi, écavaque boroteni búrejaquemavu. Elifaz boroteni búya yópe arejaquemavu:

—Apevu ne āmeno vaiyede jáñu, náre torojure dávavu mu. Caride mi baju āmeno vaiyú cūinátura tebevu mu. Iye ji aquiye de ārujacu mu. Ina “¿Majidivu bárica ñu?” ubenina arī majinidivure jaruvaibi Jūmenijicu, ne baju majiniduiye boje. Meara pōevare mearo dáme Jūmenijicu. Āmenare ñájine dáme. Mi āmeno daiye boje, āmeno vaivu mu. Que baru mi āmeno daiyede jēniari jájacu mu Jūmenijicure. Aru diede majicu, meadajacu. Mi nópe daiyede jáñu, bedióva mearo dacuyume Jūmenijicu mure, arejaquemavu Elifaz Ëre.

Ëi que aiyede jápiayu, Job yópe arī ju arejaquemavu:

—Āmeno baju vaiyábu yu. Yure cōmaje āroje jáiye jauvu mure. Nópe baju abejacu mu yure. Jarayabebu mu yure, nópe

ayu. “Āmeno đavu mu” yure ayu, ji daiyede coyujacu mu. ¿Ye paiyede āmeno dari yu mi jáiyede? Yaiyucubu yu caride. ¿Aipe teyu Jūmenijicu yure yaicōjemeni? ¿Aipe teyu Jūmenijicu majare đaquemari? Āmeno vaivu bārājivure đacube ũ majare. ¿Yu āmeno đayu ji cuede jáñu, aipe teyu ji āmeno daiyede āru-metebedi ũ? arejaquemavu Job.

Ŭi que aiyede jápiayu, Bildad yópe arejaquemavu:

—Jūmenijicu méne đayube. Diede majivu maja. Que teni cūinácu āmeno vaiyú baru, ũi āmeno daiye boje āmeno vai-yúbe, arejaquemavu.

Ŭi que aiyede, Job yópe arejaquemavu:

—Āmeno đabetevu yu. Ŭbenita Jūmenijicuque boroteni majibevu yu. Ŭcapūravu ji jēniari járu, ye yure ja abebi ũ. Que teni ji me daiyede jámejebu Jūmenijicu, ji dápíaru. Ji āmeno daiyede jáñu, Jūmenijicucapūravu diede coyujacurí. Iyede pare majiyuvu. ¿Aipe teyu āmeno vaiyúba yu? arejaquemavu Job.

Ŭi que aiyede, Zofar yópe arí coyurejaquemavu:

—Pare yávaiva mu, Job. “Āmeno đabetevu”, aivu mu. Mi nópe aiyedeca, Jūmenijicu múque yávayu baru, urarō mure coyujebu. Āmenare, mearare máre, majibi ũ. Que baru āmeno đayubu mu, ji dápíaru. Mi āmeno daiyede chīojacu. Nópe chīoñu, diede Jūmenijicure coyujacu. Ŭque jēniajacu. Nópe đayu baru, āmeno vaibécubu mu, arejaquemavu Zofar Jore.

Ŭi que aiyede jápiayu, Job náque ueturí yópe arejaquemavu:

—“Me majini jebeivu”, arí dápíaríduivubu muja. Yu máre majibecu bajo āmevu. Ji āmeno đabedeca, caivu yure yurivubu. Ne nópe daiyede, me majivu. Apevu pōeva āmeno đaivuvacari, āmeno vaibéma. Diede máre majivu. Ji āmeno teiyepe vaibévu-vacari, yure diede coyuvubu muja. Jūmenijicucapūravu majare cōjeñu, caiyede cōjeñume. Nópe ũ cōjeñu ũi cuede, me majivu. Caiye muje majiéde majivu yu máre. Muje nópe arí coyuru, maje bajo mamateni yávarí voivubu maja. Nópe arí coyubevu baru iyede, me majidivu bájebu muja. Caride yure jápiajarā. “Āmeno đavu mu”, yure muja arí meyuyaivu Jūmenijicu ũi cuede majide đaivu āmevu muja. ¿Jūmenijicure jidubenarū muja? ¿Ŭre puedabenaru muja? “Iye āmene đavu mu”, yure ũi arí coyuiyede uyuvu yu. Ji āmeno daiyede majiyuvu. Diede ye majibevu yu. Ŭque pare boroteiyuvu yu, yure “Āmeno đabetevu mu” ũi arí coyuquiepe ayu yure. Caride āmeno

vaiyúbu yu. Nópe ámeno vaiyávacari, ji ámeno daiyede majibe-
bevu. Que teni aipe arí majibevu yu, arejaquemavu Job.

Bedióva Job úcavuque ũi boroteino mácarõ *Job 15-21*

Bedióva Job úcavuque borotedejaquemavu. Aru Elifaz yópe arejaquemavu úre:

—Mu, Job, me majicubu, ji dápiaru. Nópe páyuvacari, caride majibecu teyupe yávayubu mu. Põecu cubebi Jūmeni-
jicui dápiayede majicu. Aru pōecu cubebi majicarí buojayu Jūmenijicare. Ũre puedaiye jauvu. Ũbenita múcapūravu, nópe yávayu, úre puedabecubu. Que baru boropateivu mu, ji dápiaru. Iyede árujacu mu. Apevu mi pueno majidivu cuma. Ye cūinácu pōecu meacu cubebi Jūmenijicu ũi jáinore. ¿Diede maji-
becurū mu? Bedióva iyede mure coyuiquijivu cojedeca: Áme-
namu ámeno vaivu, arejaquemavu Elifaz.

Ũi que aiyede, Job yópe arejaquemavu:

—Mi teiyepe ámeno vaibécu baru, cari mi yávaiyepedeca yávajebu yu máre. Yu máre majini jebeyu bájebu. Múcapūravu mi ámeno vaiyede jáñu, yúcapūravu mure áruri parure dajebu. Múcapūravu yure nópe dabeteavū. Yure cōmaje ároje jáiyucu-
vacari, yure jaraivu mu. Yu pare ámeno vaiyúbu. Que teni yure jári coenínivu ne pueno yure ámeno dápiare daivubu. Meara máre ji ámeno vaiyede jáivu yure, “¿Aipe painoque ámeno vaiyúba majecu?” arí majibema. ¿Muja máre me majibenaru? arejaquemavu Job.

Ũi que aiyede, Bildad yópe arejaquemavu:

—Mu, Job, ¿aipe painoque me dápiarí yávabecurū mu? Dápiaino cubeno yávarí mamateivu mu. Iyede árujacu. Ámena pōevamu ámeno vaivu, arejaquemavu ũ Jore.

Job yópe arí ju arejaquemavu úre:

—Pare yávaivu mu. “Ámecubu mu”, que aivu mu yure. Ámevu. Jūmenijicu yure ámeno vaidé dayube. Ũi que daiyede, pare chōoivu, ámeno vaiyúbu. Ji yebacavu, jívu, aru yúcavu máre yúque ji yebai cuiyubema. Que aivuvacari, yure cōmaje ároje jájara. Yure cārijovamejara. Iyede majivu. Jūmenijicu

apubi. Que baru apenumu yure cadatecuyume, arejaquemavu Job Bildare.

Ëi que aiyede, Zofar yópe arejaquemavu:

—Jorojivu yu. Que teni yópe aquiivu: Obebejāravua āmena pōeva mearo vaivu. Nópe paivuvacari, no yóboi ne āmeno daiye boje, āmeno vainājarama. Diede ārujacu, arejaquemavu Zofar Jore.

Ëi que aiyede, Job yópe arī ju arejaquemavu ũre:

—Yure jápiajarā muja. Mi jápiaru, torojuebu yu. Cūinácu bae pōeva āmena ye āmeno vaibéma. Ijoborōi ne curōpe āmeno vaibéma. Ne nópe mearo vaiyede jávu yu. Na cave cuvarivu joe mearo cuma. Que teni bucuteivu torojurivu yaiyáma. “Jūmenijicubebu” abevuvacari, mearo cuma na. Mujacapūravu yópe ajebu nópe páyure: “Ëi máracapūravu ũi āmeno daiye boje, āmeno vainājarama”, ajebu mu. No āmevu. Cūinácu pōecu torojucu yaijébu. Apecu pōecu āmeno vainí yaijébu. Na cūináture yaiyubu. Āmena yainājarama. Meara máre yainājarama. Cūináture caivu pōeva yainājarama. Muje yávaiye ure cuedeca, diede “Jāvenecabu”, arī dápiabevu. Ji baju yu majiéque iyede majivu. Muje yávaiye jáve āmenu, majivu yu, arejaquemavu Job náre.

Bedióva cojedeca Job ũcavuque ũi boroteino mácarō *Job 22-31*

No yóboi, Elifaz puque ũi yávarīburu yóboi, bedióva cojedeca yópe arejaquemavu:

—Mu, Job, āmecu bajubu. Āmena pōevacapūravu āmeno vaivubu. Mi āmeno daiyede mi dajocarū, Jūmenijicure mi ju aiyede jáñu, ũ mure mearo dacuyume cojedeca, arejaquemavu Elifaz.

Ëi que aiyede jápiayu, yópe arejaquemavu Job:

—Jūmenijicure ji jēniari jáiyedeca, yure ju abebi. Āmeno dabetecacu yu. Cūinácu bae pōeva āmeno vaiyáma. Nópe páyuvacari, yúcapūravu nácacu āmeniducacu, arejaquemavu Job.

No yóboi, Bildad puque ũi yávarīburu yóboi, yópe arejaquemavu bedióva cojedeca:

—Jūmenijicu parucube. Ye cūinácu pōecu meacu cubebi ũi jáinore, arejaquemavu Bildad.

Ũi que aiyede, yópe arejaquemavu Job:

—Nópe ayu, yure ye cadatebevu maja. Jūmenijicu parucube. Die jāvenecabu. Nópe parucuvacari, āmeno ji dabedeca, ũ yure āmeno vaidé dáme. “Ji āmeno daiye boje, āmeno vaiyúbu yu”, abevu yu. “Jāveneca aivu mu”, abevu yu. Ijoborōre ji apurōpe yópe ye abecubu yu. Cūinácu bae āmena pōeva ne āme boje, āmeno vaiyáma. Die jāvenecabu. Nópe páyuvacari, yúcapūravu “Ji āmeno daiye boje, āmeno vaiyúbu yu”, abevu yu.

’Úrure, platare máre voivu maja, caivu eaiye majivu maja. Ape úru teiyepe bojecue curājiboare máre eaiye majivu maja. Nópe earī majidivuvacari, mearo majiécapūravure eaiye majibevu maja. Que baru mearo majiéde járu, majibevu maja. Jūmenijicu matuiyeda jāveneca mearo majicube. Die jāvemu. Que teni ũre maje mearore jíyede jáñu, āmeno dabede jáñu, majare “Mearo majidivabu maja”, aibi ũ.

’Javede ji curō mácarōpedeca, bedióva yure ji cuede uvu. Dinumu mácarōre pōeva yure puedaima. Caivu cōmaje ārojari-vure mearo darīducacu. Nópe dayu ji cuedeca, caride caivu yure yuriyama. Meara pōeva aru āmena máre yure yuriyama. Ne nópe yuriyede jápiayu, pare chōoivu. Jūmenijicu yure caride jaruvame, ji dápiaru. Yure āmeno vaidé dayube. Que teni ũre pare ji jēniaiyedeca, yure ju abebi ũ. Caivu cuve cuvabevure, yure jēniaivure, cadateniducacu. Ye cūinácu pōecure meyuyabete-cacu. Aru nomivare āujimetecacu. Ji meacu cuede majibi Jūmenijicu. Meacu āmenu, Jūmenijicu yure nājine dajacurī. Nópe páyuvacari, “Jūmenijicu ũi jorojīnomu” ayu, āmeno dabete-cacu. Que teni urarō tāutura cuvacuvacari, “Apevure vainí tuiyu”, arī dápiabetecacu. Que teni aviá járavucacure, nāmica-cure máre mearore jibetecacu yu. Apevu jūmenijina apubevure, náre máre mearore jibetecacu. Aru yure jári coenínivu ne āmeno vaiyede jáñu, torojubetecacu yu. Iye matuiyeda majiyuvu caride: ¿Aipe painoque āmeno vaiyúba yu caride? Diede Jūmenijicu yure ũi coyuiyede uvu yu. Ámeno dabete-cacu. ¿Que teni ye boje āmeno vaidi yu? Diede majiyuvu. Quénora aquíjiva caride, arejaquemavu Job.

Ëi que aiyede jápiaivu, ina yóbecurā úcavu úque boroteni-
duivu bácvu bi arejaquemavu. “Ji ámeno daiye boje, ámeno
vaiyúbu yu” Ëi arī dápíabede jáívu, bi arejaquemavu.

Apecu Joque Ëi boroteino mácarō

Job 32-37

No yóboi, apecu Joque borotecudayu edarejaquemavu. Ë
Eliú ámicucu, bojuyo barejaquémavu. Apevu Ëi pueno bucva
barejaquémavu. Ne nópe cuede jáñu, ne boroteiyede coredeja-
quemavu. Ëbenita Ë máre Joque jorojīnejacquemavu. “Ji
ámeno daiye boje, ámeno vaidé dayube Jūmenijicu yure” Ëi arī
dápíabe boje, úque jorojīnejacquemavu. Ina yóbecurā Job
úcavúque máre jorojīnejacquemavu Ë. Job Ëi ámeno daiyede ye
majibedejaquemavu na. Ne nópe majibede jáñu, jorojīnejaque-
mavu Eliú náque. Nópe jorojīñu, yópe arejaquemavu Ë:

—Maja ji pueno bucva muje cuede jáñu, mamarumure
yávabetevu yu. Ëbenita bucva matuiyeda mearo majidivu
ámema. Que baru yu máre coyuijivu mujare. Mujare caivure
jápiarīduvu yu. Muje nópe coyuiyedeca, ye cūinácu mujacacu
Jore mearo cūináturu coyubetevu.

‘Job, mi coyuvarede jápiavu. Que baru yópe arī ju aquiživu
mure. Jūmenijicu parucu bajube. Ëi nópe cuede, úre “Cūiná-
turu dabetevu mu”, arī majibeve maja. Cūiná mae Jūmenijicu
pōevare jidure daibi, náre mearore jícōjeñu. Yópe aivu mu, Job:
“Jūmenijicure maje mearore jídu, ye baquiyé ámevu”, aivu mu.
Mi nópe aiyedeca, yópe majivu yu: Caivu ne ámeno daiye boje,
ñájine daibi Jūmenijicu. Que teni ne mearo daiye boje, boje jíbi
Ë pōevare. ¿Jūmenijicu cūináturu dabedi, mi dápíaru? Jūmeni-
jicure mi jaraiyede meamevu. Mi ámeno daiye matuiyeda coyui-
yucu Jūmenijicure mi jēniaru, Ë mure jápiaiyubebi. Jūmeniji-
cure mearore jíye jauvu mure. Úre “Ámecubu” aye jauvu mure.
Dápiaino cubeno mi yávaiyede jápiayu, ñájine dacuyume Jūme-
nijicu. Iye ji ávare jáve die cuede majivu yu. Ámeno daivu ne
ámeno daiyede dajocaicōjeñu, úre ju aicōjeñu, náre ámeno
vaidé daibi Jūmenijicu. Ë parucu bajube. Ëi nópe cuede, úre
mearo majié maiyójavu majare, arejaquemavu Eliú Jore.

Jūmenijicu ũi ju aino mácarō Jore

Job 38-42

(Santiago 5.11)

No yóboi, ũmevu aru oco dare darejaquemavu Jūmenijicu. No daiye coricai, Jūmenijicu ũi yávaiye jápurarejaquemavu. Nópe jápuraede, jápiarejaquemavu Job. Yópe arejaquemavu Jūmenijicu:

—Ina ārumevubu. Que teni yure ne yávaiye jāve āmevu. Mu, Job, majini jebeyu āmevu. Yore cubedejaquemavu mu caiyede ji cuedaiye báquede. Que teni ijoborōre, jia uradare, abiá-covare, āimarare máre majini jebebevu mu. Ji teiyepe parucu āmevu mu. Que baru caride mi yávaiyepedeca, yure yávaiye jaubevu mure, arejaquemavu Jūmenijicu Jore.

Ũi que aiyede, Job yópe arejaquemavu Jūmenijicure:

—Jāveneca avu mu. Quénora aquíjivu yu, arejaquemavu ũ.

Ũi que arīburu yóboi, oco daiye coricai, bedióva cojedeca yávaino jápurarejaquemavu Jūmenijicu:

—Jāveneca cūináturu me dayubu yu. Ji daiyede, ji daqui-yede, me majivu yu. Caiye ijāravauquede aipe tequiyede puru-cuvacubu yu, ayu jápurarejaquemavu Jūmenijicu.

Ũi que aiyede, Job yópe arī ju arejaquemavu:

—Caiyede darī majicu mi cuede majivu yu. Mamaramure yávayu, ji majibe báquede yávarīducacu. Nópe yávayuvacari, cūináturu yávabeteccacu. Dinumu mácarōre mure quíjino maji-teccacu. Múcapūravu mi cuede me majivu yu caride. Que baru mure arī dápiayu “Ye baquiyé āmevu yu”, arī dápiaivu yu. Que baru ji jipoca yávaiye báquede ārumetejacu mu. Yáque jorojīmejacu, arejaquemavu Job.

No yóboi, Jūmenijicu Elifajāre yópe arejaquemavu:

—Múque, Bildaque, Zofaque jorojīvu yu. Múja yure cūináturu yávabetevu. Que baru mújaque jorojīvu. Jocupūravu me yávabi yure. Mújaque ji jorojīyede jáivu, āimarare boarī, juarī, jámuóri, mearore jíjarā yure. Nópe daivu Jore muje borodaiye báquede jēniajara, arejaquemavu Jūmenijicu náre.

Ũi que aiyede jápiaivu, ũi aye báquepedeca darejaquemavu na. Ina yóbecurā ne que daiyede jáñu, Jūmenijicucapūravu náque jorojīni dajocarejaquemavu.



No yóboi, Jūmenijicu Jore cuve cuvacu tede darejaquemavu cojedeca. Que teni ũi jipoca cuvae báque pueno cuvarejaquemavu. Caivu ũ jivu, úcavu máre bedióva cojedeca úre me pueda-rejaquemavu. Aru caipucapuruape paivu jueducuvarejaquemavu cojedeca. Que teni joe torojueque curejaquemavu ũ.

**Israecavu Jūmenijicure mearore jini ne
yuriaiye báque
*Salmos 1-150***

Ciento cincuenta paiye yuriaiye de cuvarejaquemavu Israecavu ne yuraitucuboi. *Salmos* āmicurejaquemavu die yuriaiye. Ũai jabocu David bácu ure yuriaiye de toivarejaquemavu. Aru ape yuriaiye de máre toivarejaquemavu apevu. Cūiná mae yuriaiye que Jūmenijicure mearore jidejaquemavu na. Que teni Jūmenijicue torojurivu, úre “Meavu” arejaquemavu ape yuriaiye que. Ape yuriaiye que Jūmenijicu Israecavare ũi cada-

teiye báquede árrurejaquemavu na. Obediyariainoa *Majepacu Jūmenijicu* yávaeiye *mamaene coyuitucubo* āmicuritucuboi cūva. Que baru yópe arī yuriarejaquemavu:

Salmo 1

Ñai ūmure āmeno dabecure coreibi Jūmenijicu. Ūi daicōjeiyede joe dápiaibi ñai ūmu jāravure aru ñamine máre. Amenare jári cūcumamecu torojucu bacuyáme. Que teni Jūmenijicu ūi daicōjeiyede cainumua ārucuyume. Jocusu jia ēcarui curicupe dicu pāiayepedeca cūcuyume Jūmenijicu jiede urī, ju arī, vainí tubecu. Ūbenita āmena jícuamu. Nácapūravubu jaruvaiyepe ūmevu japurī bijare daiye. Que teni ye baquiyé āmema na. Mearare jári meadacuyume Jūmenijicu. Amenacapūravure ñájine dacuyume ū.



Salmo 2

(Hechos 4.25-26, 13.33, Hebreos 1.5, 5.5, Apocalipsis 2.26-28, 11.18, 19.15)

Judíova ámevu jorojínajarama. Dápiarājarama ubenina. Ijāravucavu jabova ne baju urōpe daiyurīdurājarama. Aru ina ĩmaroare cōjeipōeva cōjijínajarama, maucavarājivu Jūmenijicure aru ũi epeimure máre.

Ne que aiyede jápiayu, Jūmenijicu náre ne ubenina dápiaye boje yuribi. Parucu bajube ũ. Que teni náre jarayu yópe aibi: “Ji jabojaçoimure, ji beoimure, Jerusaléi epeivu. Ũre yópe avu: ‘Jímacurecabu mu. Caride caivu ne jápiainoi yáva-cari jaboteicōjeivu mure.’ Que teni cainoa joborōacavu pueno jabotecuyumu mu. Nópe jaboteyu, pare nájine ðacuyumu mu Israecavu amevure”, ũre arī epedejaquemavu Jūmenijicu mamacure.

Ũi nópe arī epeiyede, Israecavu ámevu jabova Jūmenijicure mearore jįjarāri. Ne mearore jįbedu, náque jorojįcuyume ũ.

Salmo 5

Ũjēpacu, jápiajacu yure. Jápiajacu ji jēniainore. Jápia-jacu ji boroteinore. Ji jabocu, yure cadateyu, ji jēniaye boje mure, yure me jápiacuyumu. Aru javejįnare, corecuyumu yu. Cuvu yui mi jivateinoi. Ubenita ji mauva ne jįjecāmu yópe pōetōcu voaitōcupebu. Que baru ne yávaiyeque jorojįne ðadama mure, Jūmenijicure. Borocurivu yávadama apevure, jįjovarājivu.

Salmo 8

(Mateo 21.16, 1 Corintios 15.27, Efesios 1.22, Hebreos 2.6-8)

Mu, Jūmenijicu, ũjare cōjeñumu mu. Cainocavu pōeva mure mearore jįyama. Mu, ũje jabocu, juedovare aru juedojį-nare máre mearore jįcōjeivu mure. Pōeva pueno jabova ne jaraiyede múque cūiné ðayubu mu. Que baru nijina jabovare majicarājarama, ne jįri coenímenajįyepe aivu. Cavarō, aviá

ñamicacu, aru abiácova mi cuedaiye báquebu. Que baru diede jáñu, yópe aquíjivu mure: “Aiyá, pōeva parubevureca mi jáinoi aru árué jaubenovacari mure náre, mu náre áruri dápiayubu. Pōeva parubevureca mi jáinoi aru coreiye jaubenovacari mure náre, mu náre coreyubu. Obenumua epeivu mu pōevare quíjino parurivu ángeleva cāchijinomia. Ubenita que dayuvacari, epeivu mu ina pōevare meara baju caivu ne jáiyede. Aru caivu pueadama náre. Que teni jabotede daivu mu ina pōevare caiye mi cuedaiye báquede”, arí coyurí pueharejaquemavu Jūmenijicure.

Salmo 14

(Romanos 3.10-12)

Pōecu cubebi meacu Jūmenijicui jáinore. Ye cūinácu páyu cubebi. Caivu pōeva coreóvabenama mearore. Aru caivu pōeva Jūmenijicu jina máre teiyubenama. Caivu pōeva dajocadama Jūmenijicure, árumetedama úre. Mamatedama caivu cūináturu. Ye cōmaje ároje jámeni ajevure cadatebenama náre. ¿Ñame dabename mearore? Ye cūinácu páyu cubebi.

Salmo 16

(Hechos 2.25-28)

Cainumua jácacu yu ji jabocure ji jipocai. Ũ cubi ji yebai. Que baru apevu cārijovari buojabenama yure. Mu, Jūmenijicu, dajocabecubu mu ji ũmene ina yaivu bācavu ne curōi. Pojeicōjemecubu mu ji bajure, ji meacu baju boje, aru ji memecaiye boje mure. Que baru torojuvu yu ji ũmei. Aru torojurí yávaivu yu. Caivu pōevape páyu, yu máre yaicáyumu. Ubenita apucu jabuóvaivu yu, ji coreiye boje mi mearo dacaquyede yure. Mu jádovaivu yure ye daiye jaurōre cucuyure máque. Aru mi cue boje yúque cainumua, urarō torojuvu yu mure.

Salmo 19

(Romanos 10.18)

Cavarōre, aviá jāravucacure, ñamicacure, abiácovare máre jáivu, Jūmenijicu meacu, parucu ũi cuede majivu maja. Jáicōjeñu pōevare cavarōre aru ne járu, majide ñajebu náre pueno baju meacu Jūmenijicure. Aru ne járu caiye Jūmenijicui cuedaiye báquede jāravua coapa aru ñamiá coapa máre, majide ñajebu náre Jūmenijicu yávaiye jaubeda.

Jūmenijicu jiede coyucaipōecu cubedeca, parucu ũi cuede majini buojaivu maja. Nópe majidivuvacari, Jūmenijicure majiyurivu ũi ñaicōjeiyede bueiye jauvu majare. Ũi ñaicōjeiye meari vaivu. Iye ñaicōjeiyede me majidivu nuivu maja. Mumicorore maje urō pueno ũi ñaicōjeiyede ue jauvu majare. Aru ũi ñaicōjeiyede maje vainí turĩburu yóboi, majare ũi ñájine ñaquiyede coyubi majare iye ñaicōjeiyeque. Ũi ñaicōjeiyepedeca maje ñaru, maje nópe ñaiye boje, majare mearo ñacuyume. Maja āmeno ñaivu apenumu ārumena diede ñajebu.

Ārumena ji āmeno ñaiyede ārumeteibi Jūmenijicu. Que baru mu, Jūmenijicu, ji āmeno ñaiyuede jáñu, āujiñure jáñu, yure ñadatejacu, iye āmene ji ñabequiyepe ayu. Mi nópe ñaru, meacu baju ñacuyumu. Que teni mi urōpedeca yávare ñajacu yure. Aru mi urōpedeca ñapiare ñajacu yure.

Salmo 22

(Mateo 27.35,46, Marcos 15.24,34, Lucas 23.34, Juan 19.24, Hebreos 2.12)

Mu, ji mearore jĩmu, mu, Jūmenijicu, ¿aipe teni yure ñajocarĩ nuñuru mu? Mure ji jēñaiyede ju abetevu mu. Ñajeñecuva javecavu bácvu mure “Jāve ayube”, arĩ āruri paru-rejaquemavu. Ne nópe āruri paruède, náre mearo vaidé ñarejaquemavu mu. Yácapūravu āmeno vaiyábu. Mure ji āruri paruède jáivu, yure yuridejaima pōeva. Ina vainánu-raivu jári, ne jipobuare cújiovarĩ, āmeina yávarejaima yure. “Ėrecabe ju ayu Jūmenijicure aru Jūmenijicu yure ñadate-

cuyume', arĩ dápiayu. Que baru Jūmenijicu, úre ucu baru, cadatejacurĩ caride", arejaima na. Mure áruri parurivu ya. Que baru yure cadatejacu mu. Ye parué cubevu yure. Buojarĩ, cūñóivuvu yure. Ji puruáre, ji cubobare máre churiá tede darejaima yure. Que teni ji āmeno vaiyede jáiyurivu, járĩ cujurejaima yure. Que teni ne yajuiyede dūvarejaima cainijidua etaiyede járĩ, ji doiyede náre coapa ĩnejaima na. Yure cadatejacu mu.

Coyucuyumu mi borore jívure. Ne cójjiyede mearore jínajivuvu mure, yuriacuyumu ya, mearore jícuyu mure. Jūmenijicure ji jēñaiyepedeca cadateame ũ yure. Que baru torojurĩ mearo yávacuyumu úre.

Salmo 23

(Apocalipsis 7.17)

Ovejavare járĩ coreyu náre ũi me járĩ coreiyepedeca, Jūmenijicu yure me járĩ coreibi. Que baru yure ye jaubevu. Ári ji nuinoi yure járĩ corecuyume. Aru ji urō pueno jĩbi yure. Mu, ji jabocu, ji yaiquino majiówarō jauédeca, ĩi yúque curu, jidabecubu ya. Yure járĩ coenínivuvu yure ne āmeno daiyede jáñu, mu, Jūmenijicu, me vaidé daivuvu. Ji apurōpe mearo dacuyumu mu. Aru máque cainumua cūcuyumu.

Salmo 32

(Romanos 4.7-8)

Ina jāve torojurivure, náreca Jūmenijicu ārumeteibi caiyede ne ju abe báquede ũi daicōjeiyepe, aru jámemi ne āmeina teiyede máre. Aru ñai jāve torojucure, úreca Jūmenijicu ũi āmeina teiyede coyurĩ ñájine dabecube. Ubenita pōeva āmena pare ñájinajarama. Jūmenijicu úre mearore jívure pare jecubi. Que baru úre mearore jíjarā aru torojugarā.

Salmo 34

(1 Pedro 2.3, 3.10-12)

Cainumua Majepacure dápiarī, ũi daiyede coyucuyumu yu. Ji ũmei torojuvu yu ũque, pōeva máre ũre jápiaivubu. Ũre mearore jįjarā yúque. Ũi āmiáre maja yuriarājare. Majepacure vorī, me jápiayu, ji jidurōre ji ũmei caiváyube. Jūmenijicuque cainumua torojucu, ũre “Meavu” acuyumu yu. Que teni ũre járavua coapa me yávacuyumu. Ji nópe yávaiyede, jápiaivu apévure vaini tuiyubevu torojurājarama. Caride Jūmenijicure mearo yávarājarevu.

“Yure cadatejacu”, avu ũre. Ji nópe aiyede, ji jēniaiyepedeca yure cadatebi. Ũre ji jiduédeca, quénoreca yure mearo vaidé dabi ũ. Jūmenijicu ũre mearore jívure jári coreicōjeñu, ũi daroimu ángelede daroibi ũ. Aru pōeva ne āmeno vaiyede jáñu, me vaidé daibi ũre mearore jívure.

Jūmenijicure āruri parujarā muja. Mũje nópe daiyede jáñu, ũ mujare mearo dacuyume. Ũre pare urivu muje cuede, mujare ye jaubecube. Ũbenita ũre āruri parubevu āmeno vainājarama na.

Ũbenita ácu pōecu torojuiyucu baru aru cuiyucu baru me ijāravui, āmeina yávabejacurī, aru dajocajacurī ũi borocuede máre. Dajocajacurī ũi āmeno daiyede. Aru dajacurī mearo. Ũetabecava pueno baju vorī eajacurī ũi ũmeque cārijimene dacuyu apévure.

Maje jabocu jári coreyube ina mearo daivure. Mũjacapūravu apévure āmeno dabejarā. Ādamateino cubeno cujarā. Mearacapūravu Jūmenijicure ne jēniaiyede jápiaibi ũ. Ũbenita āmenacapūravure jári coeními ũ. Meacu āmeno vajjébu apenumu. Nópe āmeno vaiyedeca, yóbo ũre mearo vaidé dacuyume Jūmenijicu. Ũi cūadoare ye cūinádo puyobenajarama na. Ũbenita āmenacapūravu ne āmeno daiyeque āmeno vainājarama.

Salmo 37

(Mateo 5.5)

Āmeno daivure ye jári āujimejara. Cōriá cūiná poporī nuiyepedeca, na āmena cūiñáma. Que baru Jūmenijicure āruri

parujarā. Nópe daivu, méne dajarā. Muje nópe daru, mujare urarō muje uede jícuyume Jūmenijicu. Ũi urōpedeca dajarā. Nópe daivu baru, ũre āruri parujarā. Muje nópe daiyede jáivu baru meara pōeva, cūináturu daivu muje cuede majinajarama caivu. Nópe majide dacuyume Jūmenijicu náre. Ũi nópe daquino, cārijino cubeno corejarā muja.

Tororājarama ina “¿Meara mática ñuja?” abevu, ne coreiye boje Jūmenijicu jýure caiye náre jauéde, cuvarājivu méne aru darājivu mearore. Āmena pōeva āmeno daivu baru, ne uede tatorī, náre iyede cuvajebu. Ne nópe cuvaede jáivu, náre tebutebearā. Náre jári āujimejara. Iye ji coyuiyede ārujara. No yóboi, āmenare jaruvacuyume Jūmenijicu. Ũbenita ũre coreivure mearo dacuyume. No yójīboi, āmenacapūravu cūinájarama. Apevure vainí taiyubevu, “Ũbeni curivabu” arī dápiaivucapūravu joborōre aru ape paiyede máre cuvarī, mearo curājarama. Āmenare ñájine dacuyume Jūmenijicu. Ũbenita mearacapūravure, méne ne daiye boje, náre mearo dacuyume. Meara, néne jecubevu, apevure jínajarama. Āmenacapūravu tātuturare ne jacopaiyovajurorōre ívuvacari, ne bojecube ñainore bojedabevu ye jacopaiyovabema.

Pōeva meara mearo majini yávadama. Jūmenijicu ũi ñaicōjeiyede majidivu, iye ñaicōjeiyede vainí tubema. Āmenacapūravu pōeva mearare boarí jaruvaiyuma. Yóbore, āmenare ñájine dacuyume Jūmenijicu. Ũbenita mearacapūravu, ne méne daiye boje, náre mearo dacuyume.

Salmo 40

(Hebreos 10.5-7)

Jūmenijicu yure ũi cadatequiyepe ayu corecacu. Que teni yure cadateame. Yure torojure ñayu mamaene yuriaiyede majide ñame yure. Que baru die yuriaiyede yuriarī, ũre mearore jívu. Ji yuriaiyede jápiayu, Jūmenijicu ũi cuede obedivu majinajarama. Nópe majidivu, ũre āruri parurājarama. Caivu ũre āruri parurivu mearo curājarama.

Mu, Jūmenijicu, mi paruéque urarō daivu mu. Ñujare cainumua cadatecuyamu mu. Apevure mi daiyede coyuiyavu. Ji

nópe coyuiyuedeca, coyurí jebeiye maiyójavu. Põeva ãimara ne boaimara mácvure ne jícaiyede mure aru ape ne jícaiyede mure ubevu mu. Òbenita yure põecu bajuque põetede ðaquiýv mu, jí jícaquiyepe ayu jí bajure mure.

Caride põeva mure torojure ðabema mure ãimara ne boaimara mácvu juarí jaruvaimara mácvure, pueðarãýv mure, aru ape ne jícaiyede máre, ne ãmeina teiye boje. Aru que aríburu yóboi, arejacacu yu: “Mu, jipacu, Jūmenijicu, jájacu. Yui cuv u yu, ðacacuyu yópe mi urópe. Javede nópe arí toivaicõjenezavū mu jí borore ãniyoca paperayoca ũmujuriyoca cãriáiyoca mi yávaiyeque toivacaiyoca bácarõque”, arejacacu yu.

Yure jári coenínivure ñájine ðajacu mu. Apevu máre mearore jíyuma. Que baru náre mi cadatequiyepe aivu jēniadama mure. Nácapūravure cadatejacu mu. Que teni na mure “Meacu, parucube”, arãjarama. Yure mi cadateiyede pare uvu. Que baru yure cadatejacu. Cūinácuva cadateni majivu mu.

Salmo 41

(Mateo 26.23, Marcos 14.20, Lucas 22.21, Juan 13.18)

Torojucuyume ñai põecu cõmaje ãrojarivure ãrucu. Ére ãmeno vaiyúre cadatecuyume Jūmenijicu. Mu, Jūmenijicu, yu ãmeno ðayureca, meaðajacu yure. Yure jári coenínivu “Ámeno vaijácurí”, adama yure. Aru ñai ãñu mácu yúque, yure boaiyubi. Yure me yóvayu bácvacari, caride maucuvaibi yure. Òbenita yúcapūravu mearo ðaiyuvu cainumua. Que baru cure ðajacu yure mi jivateinoi. Mearore jínajarevu Jūmenijicure cainumua. Quénoramu.

Salmo 44

(Romanos 8.36)

Mu, Jūmenijicu, ñujeñecuva mácvure me cadatedejaquemavu mu. Na mácvure ne curãjijoboróre jíðejaquemavu mu. Na mácvure jári coenínivure jaruvarejaquemavu mu ðijoboróre jocarí. Òbenita ñujacapūravure cuyoje tede ðaivu. Ñujare

jári coenínivu ñujare jáiyubema. Caijāravua boarí jaruvadama ñujacavure, ñuje mure ue boje. Dápiadama ñujare curivure ne boarí jaruvarājimarape, yópe ne dápiaiyepe ovejavare ne nuvai-marare boainoi.

Salmo 45

(Hebreos 1.8-9)

Mu, Jūmenijicu baju, cainumua pōevare jabotecuyumu mu. Mútamú meacu baju. Que baru cainumua pōevare jabotecuyumu mu ména. Aru náre mearore dare dacuyumu yópe mi urópe. Mearo daiyede daiyuvu mu. Cainumua daivu mu yópe ji daicōjeiyepe. Aru āmeno daiyede daiyubevu mu. Cainumua dabevu mu yópe ji daicōjemepe. Que baru yu, Jūmenijicu, mi mearore jímu, beoivu mure, jímacure, caivu ne puedaimu macuyáre, mi jaboteiyede náre. Yu epeivu mure paracure caivu mi yóvaimara ina ángeleva pueno. Aru mure ne puedarājimu mae boje, pare torojure daivu yu mure aru ina ángeleva mi yóvaimarare máre.

Salmo 51

(Romanos 3.4, 2 Corintios 5.17, Hebreos 9.13-14, 19)

Mu, Jūmenijicu, ji āmeno daiyede ārumetejacu mu. Āmeno baju dacacu yu. Ji nópe daiyede jáñu, yúque torojubevu mu. Mi ñájine daiyede yure ji ju abe boje mure, apevu jáivu aipe darí ñájine dayure yure, puedarí mure arājarama na mi borore: “Đaibi yópe ũi aiye báquepedeca majare. Borocucu āmemi ũ”, arājarama.

Ji pōetequiye jipocai aru cainumua āmecubu yu. Ji nópe cuede jáñu, ji āmeno daiyede ārumetejacu mu. Que teni bedióva torojucu cuiyuvu yu. Que baru yure torojure đajacu mu. Meacu cure đajacu yure. Mure vainí tubecu cure đajacu yure. Máque cuiyuvu. Que baru mure jocarí jaruvabejacu yure. Ñai Espíritu Santo yúque cubi. Ũre yure jocarí ímejacu mu. Yure mearo vaidé đajacu mu. Espíritu Santore cadateicōjejacu yure.

Mi nópe daiyede, bedióva torojucuyumu yu. Dinumu maquinó
āmeno daivure majicacuyumu, ne vainí tubenajiyepe ayu.

Ji āmeno daiyede ārumetejacu mu. Mi nópe ārumeteiyede
majicu, “Meacu, paracu bajube”, acuyumu mure. Āimarare
boarí, juarí, jāmuóri, mure ji jēniaiyede ubevu mu. Ji āmeno
daiyede ji chōiyede uvu mu. Aru apevure ji vainí tubede uvu
mu. Ņujare Jerusalécavure mearo cure dajacu mu. Nópe dayu,
mure ju are dajacu űujare. Ņuje nópe ju aiyede jáñu, āimarare
boarí, juarí, jāmuóri, mure űuje jēniaiyede jápiayu torojucu-
yumu mu.

Salmo 68

(Efesios 4.8)

Jāmenijicu űi urōpe darí búyu, űre jári coenínivu dupini
nuivubu. Aru āmeno daivu bíjaivubu. Ūbenita pōeva meara
torojurivubu. Ūre mearore jini yurijarā muja. Ūrecabe tēu-
marare népacupe teyu aru nomiópevare máre cadateyu.
Vaidéjaquemavu űi mauva mácavure. No yóboi, copaini muri
nurejaquemavu cavarō mearoi. Que baru na obedivure, űi
bueimarare, nuvarejaquemavu űi yóboi. Que teni ēmuriburu
yóboi, darorejaquemavu pōevare űi majide daiyeque náre.

Salmo 69

*(Mateo 27.34, Marcos 15.23,36, Lucas 23.36, Juan 2.17, 15.25, Hechos 1.20,
Romanos 11.9-10, 15.3, Apocalipsis 3.5, 13.8, 17.8, 20.12)*

Jāmenijicu cadatejacurí yure. Yópe ocore űcuri bíjacuyupe
teyubu yu. Yópe corí bejayupe teyubu yu. Ji mauva jaurabeda
yure ubema. Caiye iye meadaiye űuoibope baquiyébu. Náre
jēni tare daquiyebu. Aru űájine daquiyebu náre. Jāmenijicu
jámene dajacurí náre, ne coreóvebeni űájinajiyepe ayu cai-
numua. Yure cūiñóiyede upiáricocore jíma. Jári eabede daja-
curí náre. Ne āradoare cújide dajacurí. Ne curō mácārō pōecu-
beno majaróri. űame cubejarári nore.

Salmo 73

Āmeno dabevure mearo baju daibi Jūmenijicu. Mamarumure “Āmeno daivure mearo daibi ū”, arī dāpiarīducacu. Āmeno daivu ne mearo cuede jáñu, nópe arī dāpiarīducacu. Apevure āmeno darī meyuyadama na, cave cuvarivu teiyurivu. Jūmenijicure mearore jívure máre yariyama na. Ubenita nópe āmeno daivuvacari, mearo cuma na, pōeva ne jáiyede.

Cūinácu bae apevu Jūmenijicu jina máre ji aiyepedeca arī járiduima náre. Nópe aivure jáivu, “Jūmenijicure maje mearore jíye ubeni cue bajubu”, arī dāpiarīduyama na. Āmeno daivu ne mearo cuede jáivu, nópe arī dāpiarīduyama na. Yu máre nópe arī dāpiajurocu barīducacu. Nópe arī dāpiayu baru, Jūmenijicure mearore jíyu āmejebu yu. “¿Aipe painoque āmeno daivuvacari mearo curi cūinácu baede?” arī dāpiarīducacu cojedeca. Iyede ye majibetecacu yu.

Nópe majibecu cucu, Jūmenijicui cūramita ecocacu. Nópe ecoyu, majitecacu. Āmeno daivure jāveneca ñájine dacuyame Jūmenijicu. Diede majide dáme yure. Que teni ū yure cadateyu bateáme. “Yúcapūravure cadateyu āmemi Jūmenijicu” ji arī dāpiaiyedeca, ū yure cadateyu bateáme. Ũ matuiyeda cadateibi yure. Ũ matuiyeda uvu yu. Ũre vainí taivure ñájine dacuyame. Que baru yúcapūravu ũre āruri parucuyumu.

Salmo 78

(Mateo 13.35, Juan 6.31, Hechos 8.21, Apocalipsis 16.4)

Muja, ji pōeva, jápiajarā ji bueyede mujare. Jári dāpiarī ne darājiyepe ainoque coyucuyumu yu pōevare. Iye yávaiye jádovame máquede Jūmenijicui járavure cuedaquiye jipocamata coyucuyumu yu náre.

Jūmenijicu ñujeñecuva mácavure buedejaquemavu ũi daicōjeiyede. Aru na mácavure bueicōjenejaquemavu némarare aru népāramena curipinidu teivu bárājivure máre. Cavarō mearo Jūmenijicui curōre jocarī āiyede jádovari darorī jídejaquemavu

na mácvure. Dinumu mácarõre aru cainumua ùi pōevare jári coreibi Jāmenijicu.

Salmo 89

(Hechos 2.30, 13.22, Hebreos 12.5-11, Apocalipsis 1.5, 21.7)

Mure, Majepacure, mearore jini yuriacuyumu yu. Ñujare urarõ uvu mu. Ñujare cadateyubu mu cainumua. Ñujare ye dajocabecubu mu cainumua. Apecu múpe páyu cubebi joborõre aru cavarõre máre. Múmu parucu baju aru caiyede purucuvacu. Pōevare urī, mearo dayubu mu, āmeno đabecuva. Mure ju aivure torojure dayubu. “Yópe jáve đacuyumu” arī, yure yópe ayubu mu: “Mu, David, yópe mearo đacacuyumu yu mure. Cūinácu mipāramenacacu curipinidu teyu bacuyáre jaboteicōjecuyumu yu, yópe ji jaboteicōjeiye báquepedeca mure”, arī coyuyubu mu yure. Ubenita caride ñujare jári coenínivure ñujare vainí tuicōjeñumu mu, ñuje ju abe boje mure. ¡Maumena cadatejacu ñujare! Đajacu yópe mi aiye báquepedeca. Jorojīmejacu ñujaque. Chīoivubu ñuja ñuje ju abede mure. ¡Cainumua mearore jínajarevu caivu maja maje jabocure!

Salmo 91

(Mateo 4.6, Lucas 4.10-11, 10.19)

Caivure úre āruri parurivure me jári coreibi Jāmenijicu. Āmena pōevare ñájine đacuyume. Múcapūravu úre āruri parucubu. Que teni āmeno vaibévu mu. Āri mi nuinoi Jāmenijicu ùi daroimarare, ángelevare, mure jári coreicōjeñu daroibi. Jāmenijicu darocuyume ùi ángelevare, ne corenajiyepe ayu mure. Jāmuórajarama mure ne puruáque, mi ijié tebequiyepe aivu mi cubobare ibo cūraboque. Yópe aibi Jāmenijicu: “Yure jecucu, yure majicu, ùi āmeno vaiyede jáñu, úre mearo vaidé đacuyumu. Yure ùi jēniaino ùi jēniaiyepedeca mearo vaidé đacuyumu úre. Que teni ubeni cucu āmecube ũ.

Joe mearo cure dacuyumu ũre. Que baru joe torojucuyume”, aibi Jūmenijicu.

Salmo 94

(1 Corintios 3.20)

Mu, Jūmenijicu, ¿aipiyeta torojurājidi āmena pōeva? Mi pōevare boarí jaruvadama. Nomiópevare, tēumarare máre boarí jaruvadama. Ne nópe daiyede, “Jūmenijicu ñujare jámemi”, aríduyama. Maje jabocu majibi ina “¿Majidivu bárica?” arí majiniduvure ne dápiaiye ye bojecubede. Mu, Jūmenijicu, mi buei-mara torojarivubu. Cārijimenoque curivubu. Náre ye dajocabecubu mu. Yure mi cadatebedu, javeita yaijébu yu. Āmena pōevare bíjare dacuyume Jūmenijicu, ne āmeno daiye boje.

Salmo 95

(Hebreos 3.7-11, 15, 4.3, 5, 7)

Jūmenijicure yuriarājarevu. Jehová āmicucube ũ. Toroque yuriarājarevu maja. Maje āmeno vaiyede, ũcapūravu mearo vaidé daibi. Ũi cūramita ũre yuriarājarevu. Ũque torojurí, “Meavu” arājarevu maja. Jehová apevu ne mearore jímara pueno parucube ũ. Que baru ũre yuriarājarevu. Ũcapūravu ijoborōre, jia uradare máre, cuedayu bácube ũ. Que teni caiyede cōjeni purucuvacube ũ. Ũ majare cuedayu bácu maje jabocu Jūmenijicu bajube. Que baru ũ jina pōevamu maja. ũuatutarí, ũre mearore jínajarevu. ũre ju arí, parucu ũi cuede majinajaramu maja. Yópe arí toivaicōjeñume Jūmenijicu:

—Caride muje jápiaiyede Jūmenijicui coyuiyede, jápiaiyubevupe tebejarā, yópe mujeñecuva mácavu ne teiye báquepe. Na mácavucapūravu ju abedejaquemavu Jūmenijicure ne cuede pōecubenoí. ũre ju abeni, ũi urōre majidivu bácvuvarí dabedejaquemavu na mácavu. “ũájine dabecube Jūmenijicu majare, ũre maje ju abedu”, arí dápíarĩdurejaquemavu.

No pōecubenoí mujeñecuva mácavu yure ju abeni, ji urōre majidivú bācavuvacari đabedejaquemavu. Pare maucuvare-jaima yure, járiduivú bācavuvacari caiye ji daiyede pōeva ne đarī majibede cuarenta paiujua baju. Que baru jorojīni járeja-cacu na mácavure. Yópe arī dāpiarejacacu nára: “Cainumua ina pōeva jápiaiyubema yure. Que baru ji urōre aru ji dai-yede coreóvabema na”, arī dāpiarejacacu yu. Que baru pare baju jorojīni jáñu, yópe arī dāpiarejacacu yu: “Yúbu Jūme-nijicu. Que baru yópe coyuyubu jáve. No joborō ji náre cārijime-ne dájurorijoborōre ye eabenama na”, arī dāpiarejacacu yu, na mácavure jarayu.

Salmo 100

Caiva pōeva Jūmenijicare torojueque mearore jíye jauvu. Ũ Jehová Jūmenijicu bajube. Diede majié jauvu majare. Majare cuedarejaquemavu. Que baru ũ jina pōevamu maja. Ovejavare jári coreipōecu ũi teiyepe, ũ majare jári coreibi. Meacu bajube ũ. Que teni ũi cūramita ũre “Meacu paracu bajube”, arājarevu ũre. Majare cainumua jecubi. Que baru majare mearo đacu-yume.

Salmo 102

(*Hebreos 1.10-12*)

Mu, caiva maje jabocu, mamarumure múvacari cuedarejavū yo pōevai curijoborōre. Aru múvacari cuedarejavū cavarōre máre. Caiye iye mi cuedaiye báque cūiquíyebu. Ũbenita múcapūravu cainumua cūimécubu. Quénora cucuyumu cainumua. Caiye iye mi cuedaiye báque yópe cuitótecaje javecacajepe pojequiyebu. Yópe pōeva ne pēpejeiyepe-deca ne cuitótecaje javecacajede, ne doiye de mamacaje cuitótecajede, nopede ca múvacari pēpejene đacuyumu caiye mi cuedaiye báquede, mi epeiye de joborō mamarore aru cavarō mamarore máre. Yópe pōeva ne oatuvaiyepe ne cuitótecajede, nopede ca múvacari oatuvacuyumu

caiye mi cuedaiye báquede. Ûbenita múcapūravu oatuvabecubu cainumua. Bucutebecubu. Aru yaibécubu mu.

Salmo 104

(1 Timoteo 6.16, Hebreos 1.7)

Mearore jívu ji jabocu Jūmenijicure. Û mearore doibi, yópe maja pōeva cuitótecajeare maje doiyepe. Û miadá-roque cūmaimi, yópe maja pōeva cūmaiboaque maje cūmaiyepe. Û cucunuimi oopeniboaque, yópe maja pōeva jātu-ruicūaque maje curānuiyepe. Jūmenijicu ũi daroimara ángeleva ũmevupe paivure daibi náre. Náre, ũre memecai-vure, toa uruinope paivure daibi ũ, ne nūraiye boje ne memecaiyede ũre. Jia uradare nuicōjememi, yabobequiyepe ayu joborōre. Oco pīapóicōjeimi, āimara ne ũcurajiyepe ayu. Jocuabedejaiyede, cōriámenejaiyede máre pīaré daibi ũ, āimara aru pōeva maje ārajiyepe ayu. Aviá-vare, jāravucacure, ñamicacure máre, āimarare, mījinare, caivu ũi daimarare majiéque cuedaibi ũ. Ûi cuedaiyede jáñu, torojubi ũ. Yu apucu cāreja cainumua yuriacuyumu, mearore jícuyu Jūmenijicure.

Salmo 109

(Mateo 27.39, Marcos 15.29, Hechos 1.20)

Mu, Jūmenijicu, bída cubejacu ji jēnaiyede mure. Yure jári coenícu meyuyaibi yure. Ji mearo daiyedeca ũre, ũcapūravu āmeno daibi yure. Que baru obebejāravua cujacurī ũ. Apecu đajacurī ũi memeino mácarōre. Nópe vaidé đajacu yure jári coenícure. Aru cadatejacu yure. Cōmaje ārojacubu yu. Ji āiyede āme boje, ñuaboa cújivu yure. Ji acubecu teyubu. Pōeva yure jáivu, ne jipobuare cújiovarī, yurini, āmeina yávadama na yure. Ûbenita mi mearo daru yure, ye baquiyé āmevu ne āmeina yávaiyede. Cainumua mearore jícuyumu mure. Obedivu pōeva jēneboi mearore jícuyumu mure.

Salmo 110

(Mateo 22.44, Marcos 12.36, Lucas 20.42-43, Hechos 2.34-35,
1 Corintios 15.25, Efesios 1.20-22, Colosenses 3.1, Hebreos 1.12-13,
5.6, 6.20, 7.17,21, 8.1, 10.12-13)

Jūmenijicu aquemavu ji jabocure, “Dobajacu ji meapūravui, mi cuvae boje paruéde yápedeca. Aru yu epecuyamu mi mauvare mi cuboba cāchinoi. Que teni mure vainí jaruvare dacuyamu yu náre, mi jabotequiyepe ayu náre”, aquemavu. Ũi pōe-teiyeta jabojacocuyamu, ũre cadateni búrejaquemavu. Que teni yópe arejaquemavu ũre:

—Cainumua sacerdote tecuyamu mu dajocabecuva, yópe Melquisedec ũi sacerdote teiye báquepedeca dajocabecuva, arejaquemavu Jūmenijicu.

Que teni ũ jaboteni báyu parucu baju bacuyáme.

Salmo 112

(2 Corintios 9.9)

Mearore jínajarevu Majepacure. Ácu pōecu puedayu baru Majepacure, torojucuyume. Ácu pōecu Jūmenijicui daicōjeiyede dayu baru, torojucuyume. Ũi pāramena curipinidu teivu bárājivu mearo curājarama. Parurivu curājarama ne joborōi. Cuve méne cuvarājarama ne cūramiai. Cōmaje ārojarivure náre jauéde jíbi cainumua ñai pōecu Jūmenijicure ju ayu. Ũi cuvae-carōre jívayube jecubecuva ina cuve cuvabevure. Aru ũi mearo dacaiyede ārurajarama cainumua.

Salmo 113

(Lucas 1.48-53)

Jūmenijicu cōmaje āroje jáquemavu yure, ũi yebacacore. Que baru caivu ijāravacavu “Jūmenijicui torojure daimome ò”, arājarama ico juedocuvabeco bácore jipocai juedoeadore cari. Ñai parucu baju dayube yure mearo urarōre. Aru meacu bajube. Caivu apevu pueno meacube ũ. Cōmaje āroje jáñume

caivu ina pvedaivure úre, javede aru caride máre. Ñi daiyeque jádovañume ñi paruéde. Ina pōeva ne baju me dápiaivure, apevu pueno meara dápiaivure, coavayube. Ina jabova parurivu ne paruéde ñume náre jocarí. Aru ina cōmaje ārojarivure mearo dacayube ñ. Ina āuyaivure yapide dayube me āiyeque. Aru ina cuve cuvarivure jaroyube cuve cuvabevuva.

Salmo 118

(Mateo 21.9,42, 23.39, Marcos 11.9-10, 12.10-11, Lucas 13.35, 19.38, 20.17, Juan 12.13, Hechos 4.11, Hebreos 13.6, 1 Pedro 2.7)

Jūmenijicuque torojurivu úre “Meavu” maje aiyede meavu majare. Jūmenijicu majare, Israecavure, cainumua jecubi. Nópe ñi jecuéde apevure coyuiye javvu majare. Maje jabocu Jūmenijicurecabe yure cadateyu. Que baru jidubecubu yu. Pōecu cubebi āmedarí buojayu ji ũmene.

Jūmenijicure jēniacacu yu. Ji nópe jēniaiyede cadateame yure. Yure jári coenínivure yure ne āmeno daiyuede jáñu, mearo vaidé dáme. Obedivu yure jári coenínivu ne cuedeca, Jūmenijicu yure cadatecuyume. Náre vainí ture dacuyume ñ yure. Ñi nópe cadateiyede, Jūmenijicure “Meacu, parucu bajube”, aivu yu.

Ñai Jūmenijicu ñi daroquijimu cūrava teiyepebe. Iva cūrava cūramine daipōeva ubeni jaruvaquemavu. Caride iva cūrava caiva apeva pueno parurivabu. Nópe daino mácarōre daque-mavu Jūmenijicu. Que baru pare mearotamu majare, maje dápiaru.

Caride majare mearo cadateame Jūmenijicu. Que teni torojurājare maja. Jūmenijicu, ñujare jári coenínivure ñujare ne āmeno daiyuede jáñu, ñujare cadateavū mu. Jūmenijicu jiede memeyede dacuyure mearo cadateibi ñ. Ñ majare cainumua jecubi. Que baru maja caivu úque torojurí, úre “Meavu” aye javvu majare. Torojuve bajadéni ñai dayure Jūmenijicui āmiái, ñi paruéque. Jūmenijicui mearo dacaimume ñai jabocu Jūmenijicui daroimu mácu. Cārijimena cujarāri cavarō mearocavu. Jūmenijicure mearo majaróri. Jūmenijicure torojuve bajadéni.

Salmo 119

(1 Pedro 2.11)

Iye yuriaiye urarō bajubu. Jūmenijicui daicōjeiyede bueiye aru ju aiyē märe coyuiyu iye yuriaiye. Yópe aivu iye yuriaiye:

Jūmenijicui daicōjeiyede vainí tubevu mearo vainájarama. Bojuyo Jūmenijicui daicōjeiyede vainí tubevu baru, meacu bacu-yúme. Jūmenijicu, mure pare mearore jíyuvu. Mi daicōjeiyede vainí tubede dajacu yure. Mi daicōjeiyede cainumua āruvu, “Yu āmeno dainomu” ayu. Mi daicōjeiye me bajubu. Diede yure me majide dajacu. Jave mi daicōjeiyede vainí tuyu barīducacu. Que teni āmeno vaiyú batecácu. Que baru caride mi daicōjeiyede vainí tubevu.

Mi daicōjeiye cainumua cuquiyebu. Que teni die daicōjeiyede ji bueiye boje, yure jári coenínivu ne majié pueno majivu yu. Diede bueya, yure bueipōeva, bucava märe, ne majié pueno majivu yu. Mi bueiyeque torojuvu yu. Mumicorore ji ūcuiyede torojuvu yu. Ūbenita pueno torojuvu yu “Yópe mure mearo dacacuyumu yu” mi aiyede. Ūrure ji cavaede torojuvu yu. Ūbenita pueno torojuvu yu mi bueiyecapūravure. Mi coyuiye pēoibu teiyepebu. Pēoibu majare jári majide daiyepedeca, mi coyuiye ji mearo daquinore majide daivu. Obedivu pōeva mi daicōjeiyede ne vainí tuiyede jáñu, chñori vaivu yu.

Salmo 121

Jehová āmicucu Jūmenijicu bajube. Ū ijoborōre, cavarōre märe cuedayu bácube. Ū matuiyeda jāveneca majare cadateiye majibi. Ye cāmemi ū. Que teni majare cainumua jári meadaibi. Obedinumua maje āmeno vaijurorōre vaidé daibi majare.

Salmo 135

(Apocalipsis 9.20)

Jūmenijicure “Meacu paracube”, arī torojurājare. Caivu ūi cūrami memeivu, ūre arī torojurājare. Maje nópe torojuru,

Jūmenijicuque maje yuriaru meavu. Majare, Israecavure, ũ jina pōeva mārājivure beoáme ũ. Parucu bajube. Apevu ne mearore jímara pueno cucube. Ūbeni cucu āmemi. Ūi urōpedeca daibi.

Ūmevu dare daibi. Ocore máre dare daibi. Javede Egipto āmicurijoborōcavu bācavu nēmara nēmamina māvavure yaidé darejaquemavu. Ne oteiāimarare máre pōeteni buivu bācavure yaidé darejaquemavu. Que teni no yóboi, Canaán āmicurijoborōcavu jabova bācavure boarí jaruvarejaquemavu, dijoborōre majare jícuyu. Que baru maja, Israecavu, maje joborōmu dijoborō.

Jūmenijicu, mure “Meacu, parucu bajube”, arí torojurājarama pōeva. Ū jina pōevare majare cūináturu mearo dayube Jūmenijicu. Que teni maje āmeno daiyede ārumetecuyame ũ. Apenoa joborōacavu “Jūmenijinamu” ne arí pēpeimarare mearore jíyama. Ina pēpeimara pōeva ne daimaramu. Ūbenita ina pēpeimara yāvabema. Ne yacoruaque jámema, ne cámuco-beaque jápiabema, aru ũecobeaque máre ũmeimema. Que baru ina pēpeimara ye baquiyé āmema. Ne nópe cuede, ina pēpeimarare mearore jívu ye baquiyé āmenama. Maja Israecavucapūravu Jehováre, Jūmenijicu bajure, “Meacu parucu bajube”, arājare. Ūcapūravu ũi cūrami Jerusaléi cubi.

Salmo 137

(*Apocalipsis 18.6*)

Ñuja Israecavu ñuje dobaede jia ēcarui Babilonia āmicuriīmaroi chīocarā. Ñuje cuede Caldea āmicurijoborōcaīmaroi, Babilonia āmicuriīmaroi, chīocarā, ñuje dāpiaiye boje ñuje īmaro Jerusaléne, Caldeacavu ne jaruvaiye báque boje diīmarore. Ina Caldeacavu, ñujare buorí nuvaivu bācavu ñuje joborōre jocarí, ñujare yuriaicōjeniduima. Ūbenita nópe ñujare ne yuriaicōjeiyedeca, ñuja ye yuriarí majibetecarā, ñuje cue boje apejoborōi. Cainumua ārumetebecuyumu yu Jerusaléne. Jūmenijicu ũi cūrami cue boje diīmaroi, apenoa īmaroa pueno meaīmaro bajubu no. Jerusaléne ne jaruvaiye báquede jáivu, Edom āmicurijoborōcavu torojutequemavu. Que baru, mu, Jūmenijicu,

ne nópe torojue boje, ñájine ñajacu náre. Majivu yu cūináǵaravu baquinóre Jūmenijicu ñájine ñacuyure Caldeacavure, ne āmeno ñaiye báque boje.

Salmo 139

Mu, Jūmenijicu, caiye ji ñaiyede aru ji aiyede máre majivu mu. Caino cuvü mu. Ye apenoita mure dupini majibevü yu. Cavarōita cuvü mu. Aru joborō jivüita máre cuvü mu. Ñeminoreca, aipe ji ñaiyede me jáiü mu. Múcapūravü jipaco ōi yapibu jivüi yure bucure ñaquemavü mu. Méne ñayübu mi cuede, mure “Meacu parucu bajube”, acuyamu. Ji bajure me majini jebeivü mu. Yure majini jebeivü mu. Cainumua āravü mu yure. Mure jári yayuyarí ubevure, yu máre jári yayuyarí ubevü náre. Náre ñájine ñajacu mu. Ubenita yúcapūravure ji ñápiayede ji ñaquiyede me jári majijacu mu. Ji ñápiayede majini jebejacu mu. Ñaicōjemejacu yure mi ubenore. Quéñora ñare ñajacu yure yópe mi urōpe.

Salmo 140

(Romanos 3.13)

Mu, ji jabocu Jūmenijicu, jári corejacu yure, ina āmeno ñaivu ne āmeno ñabenajiyepe ayu yure. Cainumua boaiyurivubu na. Ne yávaiye yópe āñai jīmape paiyebu. Que baru ne yávaiyeque āmetede ñadama ajevure. Que baru jári corejacu yure. Nópe ajevure ne āmeno ñaiyuepe, āmeno ñajacu náre. Majivu yu mu mearo ñayure ina cōmajie ārojarivure. Majivu yu mu cadateyure ina āmeno vaivure. Ina pōeva mure āruri parurivü mure mearore jivubu. Nácapūravü curājarama múque mi yebai.

Salmo 146

Ji apurijāravuape Jūmenijicure “Meacu parucube”, acuyamu. Que teni ũre mearore jivu, yuríayede yuríacuyamu. Joborōcavu ne pueno jabova, ajevü pōeva máre, jāveneca

majare cadateiye majibema. Ëbenita pōevare āruri parué jau-bevu majare. Nácapūravu yóbo yainájarama. Majecu bácu, Jacob bácu, javede Jūmenijicu bajure mearore jídejaquemavu. Ëi mearore jímu, Jūmenijicu, ijoborōre, cavarōre, jia uradare máre cuedayu bácube. Ë majare ïi cadatedu, mearo cuvu maja. Apevure, āmeno daivure, Jūmenijicucapūravu mearo daibi. Āvué yaivure āiyede jíbi. Aru ne buoimarare jaetovaibi. Jári eabevure járe daibi. Mearo daivure jecubi ũ. Aru nomiópevare, tēumarare, apenoita daivure máre me jári meadaibi ũ. Āmenacapuravure nájine daibi. Que teni cainocavu ne pueno jabocu cainumua cucuyume. Ēre “Meacu parucube”, arí torojurājarevu maja.

**Israecavu me majidivu ne coyuiye báque, pōevare
majide daivu**
Proverbios 1-31

Israecavu me majidivu ne coyuiyede ne baju toivarejaquemavu. Cūiná mae coyuiyede *Proverbios* āmicariticubo papera-tucuboi toivarejaquemavu na mácavu. Ñai jabocu Salomón mácu ïi me majié boje, ure iye coyuiyede dápiarí toivarejaquemavu. Aru ape coyuiyede toivarejaquemavu apevu bácvu.

**Ñai jabocu Salomón bojuvure ïi coyuiño mácarō,
náre majicayu**

(Lucas 14.7-11, Romanos 12.20, Hebreos 12.5-6, Apocalipsis 3.19)

Pōecu me majiyuru, iye majicaiyede me jápiarí ju aiye jauvu: Āramevu matuiyeda daicōjeiyede vainí taivuque yóvarí nuñama. Ëbenita pōeva Jūmenijicure mearore jívu baru, me majidivu barājarama.

Āruri parubejarā majidivure. Ne dainope ne dápiayepedeca dabejarā. Quénora Jūmenijicucapuravure āruri parujarā.

Pōeva Jūmenijicure ne torojure daru, náre cadatecuyume, ne cuvaiyuede ne earājiyepe ayu.

Mujare ũi ñájine daiyede, Jūmenijicuque jorojīmejara. Mujare jecucu ñájine daibi.

Ŭmunaque āmeno dainomiva yebai numejara. Majemarebucunaque matuiyeque cujarā. Apecui márepacoque muje curu, meamevu.

Me majidivu cujarā muja. Que teni diecapūravure ujarā muja. Tāuturare, bojecurijīboa cūrajiboare muje urō pueno me majiécapūravure ujarā.

Mu, bucu, me jápiarī adajacu maje jabocu Jūmenijicu majicayure mure aipe daiye jaurōre. Chīori parubetebejacu mi ũmei. Ŭ coreóvare dayu mi āmeina teiyede. Que teni maje jabocu Jūmenijicu caivu umarare majicaibi. Aru caivu ũi jacopui-mara mamarape ñájine daibi.



Ñai jabocu Salomón ape ũi me majiéde coyuiye báque

(1 Pedro 5.5)

Némacu me majicu ũi cuede, torojudama ũi bucuva. Ŭbenita némacu ārumecu ũi cuede, chīodama na.

Ārumecucapūravu yópe arī dápíarīduibi: “Yúcapūravu majini jebeivu cainumua”, arī dápíarīduibi. Ŭbenita me dápíayucapūravu majidipōeva ne coyuiyede me jápiarī ju aibi.

Põecu mamacure ñájine dabecu, úre jecubebi. Ubenita ù mamacure jecucu baru, úre mearo daicõjecuyume.

Põeva árumevu ju adama caiye ne jápiaiyede. Ubenita majidipõeva caiye ne jápiaiyede ju abema. Quénora jáve ne jápiaiyede apevu ne jádovaru, ju adama na.

Põeva mearo dápiaivu napiyama. Jijecubema. Ubenita ina maume jijecurivu árumema.

Cūinácu mure jarayu baru, duibajíe meacu põecupe úre mi ju aru, mure jarabecube. Ubenita úque mi jijatedu, pueno jorojĩ-cuyume.

Cūinádami cūramicavu áme áiyede áivuvacari, cuve cuvabe-vuvacari, ne baju jecurĩ, me cuma na. Ubenita apedāmi cūrami-cavucapūravu me áiyede áivuvacari, cuve cuvarivuvacari, ne baju jári coenínivu me cubema na.

Ina “¿Meara máríca ñuja?” arĩ dápiaivu baru, ámeno vainájarama.

Churarava ne jabocu meacu, majicu, ùi churaravaque cūináimarcavure ne boarĩ vainí turu, meajebu. Ubenita ñai jabocu ùi daiye pueno meavu, põecu jarayu baru, ùi baju daicõjeiye, ámeno dabecuyu.

Majióvarō yávayu árumecu ùi cuedeca, “Árucube”, arĩ dápiajebu apevu.

Jūmenijicu maucuvaibi ina apevu pueno ne baju “¿Meara máríca?” arĩ dápiaivure. Ubenita ùi pueno meacu baju boje, cadateyube ina “¿Meara máríca?” abevure.

Põeva vino úyaicorore aru boqueiyede máre ũcuivu baru, ámeno vainájarama na. Diede ũcuicojurivu me majidivu ámenajarama.

Majare ámeno daivure ámeno darĩ cojediovabenajare. Jūmenijicucapūravu náre ùi ñájine daquinore corenajarevu.

Mumicorore urarō ũcumejara. Úrarō ũcuivu baru, ijié tenajaramu muja.

Muje cūramia yebai curivure ne yebai jujuéda curānumejara. Muja jujuéda muje curānuriburu, mujare ueturājarama na.

Mujare jári coenínivure áiyede, ũcuiyede máre jíjarā, ne urĩburu. Muje nópe daiyede cuyenajarama na. Que teni muje mearo daiye boje, mujare mearo dacuyume Jūmenijicu.

Muje mauvai ñájino ávuéna, jíjarā muja náre áiyeva. Aru muje mauvai ũcuiyuru, jíjarā muja náre ne ũcuiyeva. Que

darĩburu yóboi, nácapūravui chĩomenu mujare ne ñájine daiye báquede, pueno urarō ñájine darājaramu muja Jūmenijicui ñájiovaquijijāravu baquinóre ne maucuvae boje mujare, muje mearo daiyedeca náre.

Quĩjĩñami cūrami curivuvacari, jijateino cubeno curivuvacari, mearo curivubu. Ubenita meadami uradāmi cuvarivuvacari, ũmure jímarepaco cainumua jararĩ codobobodo, mearo torojueque cubema na. Que baru pōeva ne me cuede ne baju pueno meavu ne cuede meadami uradāmi cūrami.

Cūĩñóimara jajué ocore ũcuiye cojuma. Ne nópe cojuépedeca, me borore joai edaiyede jápiaye cojuma.

Jijateivu toabopebu. Que teni āmeno borodaivu peca teiyepebu. Peca cubedu, toabo codarĩ nuivu. Nopedeca āmeno borodaivu ne cubedu, jijateiye cubevu.

“Ũ meacube” apevu ne aru, meavu. Mi baju “Meacubu” mi aru, meamevu.

Jūmenijicu ũi daicōjeiyede vainĩ tuyu, Jūmenijicure ũi jēniaiyede ũre jápiayubebi.

Maje āmeno daiyede Jūmenijicure coyuiyubevu, āmeno vainājaramu. Maje āmeno daiyede maje coyuru, diede maje dajocarú, Jūmenijicu maje āmeno daiyede ārumetecuyume.

Quénoramu.